



مريم محمد

رواية

معجزتي

مريم محمد عبد القادر



معجزتي

مريم محمد عبد القادر



تصميم

تأليف الكاتبة : مريم محمد عبد القادر

تصميم الغالف : مريم محمد

التصميم الداخلي والتعبئة : مريم محمد

[Mariam Abd Elqader](#)

" يقولوا دائما إن اللقاء نصيب .. وإن القدر يجمع الناس حتى لو بينهم بلاد
وبلاد "

بقلم / مريم محمد

عبد القادر M.M

اللهم صل وسلم وبارك على سيدنا محمد

*

إزيكم يا أجمل متابعين .. أخيرا جيتلكم برواية (معجزتي) يا رب تنال
اعجابكم

استمتعوا بالقراءة 

في واحده من الشقق في طنطا وفي اوضة الصالون
تحديدا ، في بنت قاعده على الارض قدام واحد من
كراسي الانترية وحاطه دماغها عليه ، فستانها كان
مقطع وجسمها كله كدمات وجروح من كثر
الضرب ، البنت كانت بتعيط بكل وجع وقهر وذل ،
هي استحملت اللي ماحدش يستحمله في سنها ده ،
كانت حاطه ايدها على بوءها جامد بتكتم شهقاتها
إنها تطلع ، وبايدها التانيه بتضرب بيها على صدرها
من كثر وجع قلبها اللي يفوق وجع جسمها أضعاف
مضاعفة ، كانت بتفتكر كل اللي حصل معاها طول
اليوم وبتعيط وذاكرتها خانتها وعرضت قدامها كل
سنين العذاب اللي عاشتها

شهقاتها بدأت تزيد وتعلی فكتمتها بايدها الثانية كمان
، لازم ماتطلعش أي صوت عشان الوحش اللي جوا
لو سمعها هيجي يضربها تاني

بعد وقت طويل من العياط قامت سولاف من مكانها
بكل وجع ورجليها شिलाها بالعافية ، رتبت الاوضة
اللي كانت مكركة جدا ، مسكت واحد من مخدات
الانترية وحطتها مكانها وسرحت وهي بتقول
بصوت ضعيف : سيبتوني ليه لوحدني ؟

خلصت اللي بتعمله ومشيت في الشقه الضلمة اللي لا
تسوى شئ من ضلمة حياتها اللي عيشاها ، وصلت
لحد اوضة النوم وسندت على الباب وهي بتبص
عليه ، زوجها ، أو اللي الناس بتقول عليه زوجها

كان راجل طويل وضحخم جدا ، جسمه كله عضلات
بشكل مربع بس رغم كل ده كان نايم بكل هدوء
وسكينه وملامحه مسالمة ، دخلت الاوضة وغيرت
فستانها المتقطع بواحد تاني وكان حقيقي جميل جدا
عليها رغم كل الكدمات والجروح اللي في جسمها ،
خلصت اللي بتعمله وقربت من زوجها وهي
بتحارب نفسها وعايزة تمنعها إنها تقرب بس غصب

عنها لازم تقرب ، لازم تعمل كده وإلا هيقوم
يضربها تاني

مستغربين ليه !! اه ما هو زوجها اللي ضربها
بالشكل ده وهو اللي عمل فيها كده

راحت وقفت جنب السرير وهي بتبص لوشه وبتسأل
نفسها : إزاي قادر ينام بكل الراحة دي ولا كأن في
حاجة حصلت ؟ إزاي بعد ما كان بيضرب فيا بكل
وحشية ملامحة تكون بريئة كده ؟

نظراتها اتحولت للغضب وكان نفسها تقتله بس هي
ماتقدرش تعمل كده ، اتتهدت بكسره وهو صحى
على صوتها

بصلها وأبتسم ومد ايده ليها وهي زي المغيبه حطت
ايدها في ايده وهو شدها لحضنه وضمها بعنف جدا
وهو بيحرك شفائفه على خدها بكل رغبه ، اتعدل
وسند بدراعاته حوليها عشان يبقى فوقها وقرب منها
وهمس جنب ودنها : أنتى بتاعتي انا وبس ، فاهمه ،
أنا وبس

بعد شويه عن وشها وبص في عيونها : بحبك يا
سولاف ، بحبك

قرب منها بكل حيوانيه وهي كانت زي الميته بين
 ايديه ، جسد بلا روح ، بتكرهه وبتكره قربه منها
 وبتكره نفسها شخصيا لما بيقرب منها ، نفسها لو
 تخليه يبعد عنها ، يبطل اللي بيعمله ، بس إزاي ؟
 هي بنت في منتهى الضعف وهو في منتهى القوة
 والجبروب ، ومع ذلك ، مش بيرحم ضعفها ده
 وبيضربها بكل قوته لحد ما يكسر عضمها وفي
 الآخر يكمل عليها ويقرب منها غصب عنها وبكل
 همجية عشان يسببها جسد هادم على السرير مش
 عارف ولا قادر يتحرك من مكانه

عمل اللي عمله واطرمى على السرير ونام ، زي
 الحيوانات بالظبط اشبع رغبته ونام وساب سولاف
 جنبه ضامه نفسها وحاسه ان روحها بتتسحب منها
 من كتر وجع جسمها ، حست ان أطرافها اتخدرت
 من كتر الألم ومابقتش حاسه بأي حاجة ، زي كل
 مرة

تحاملت على نفسها وقامت من السرير وهي حاطه
 ايدها على بطنها بوجع ودخلت الحمام ، ملت البانيو
 مياه دافيه وحطت فيه مطهر للجروح وقعدت فيه ،
 قعدت في صمت وهي ضامه رجليها ودموعها بتشق
 طريقها اللي عرفاه على خدها مش عارفه تمنعها ،

فضلت مكانها وهي بتفكر كل حاجة حصلت معاها
من ٣ سنين فاتوا

ونروح فلاش باك

في واحد من الأحياء البسيطة في مدينة طنطا وفي
واحد من الشقق الصغيرة بتصحى بطلتنا

سولاف أكرم : ٢٢ سنة شعرها أسود طويل وعيونها
خضرا بلون الزيتون ، جمالها لطيف وهادي واللي
بيحليها أكثر لون عيونها المميز والملفت ، بنت
طيبة ورقيقة ، عايشه مع والدتها لان والدها توفى
بالمرض بعد ما خلصت الثانويه العامه وبقت مامتها
هي كل حياتها ، كان نفسها تدخل كلية طب وجابت
مجموعها فعلا بس كان صعب أوي بالنسبالها تدخلها
بظروفها دي فدخلت كلية تمريض أهو أي حاجة من
ريحة حلمها وهي حاليا في آخر سنة ، بتشتغل في
سوبر ماركت قريب من جامعها عشان تساعد
والدتها في المصاريف وكمان والدتها بتشتغل في
محل للملابس وعايشين حياتهم بهدوء

سولاف بعد ما صلت الصبح طلعت من اوضتها :
صباح الخير يا حنون

حنان : صباح النور يا بنت قلبي

سولاف راحت قعدت تحت رجليها : عامله ايه
النهارده يا حبيبيتي ؟

حنان وهي بتطبطب على شعر بنتها بحنيه : الحمد
لله أنا كويس ، هقوم احضرك الفطار عشان تلحقي
تروحي جامعتك

سولاف : والله أنا تعبت من الجامعة دي ونفسي
تخلص بقى

حنان بحزن : ما هو أنتي اللي مصرة تنزلي تشتغلي
، حرام عليك يا بنتي والله تروحي الجامعه وتشتغلي
كمان ، لو بس تسمعي كلامي وتركزي في جامعتك
وتطلعي موضوع الشغل ده من دماغك ، أكرم الله
يرحمه لو كان لسه معانا ماكانش وافق على اللي
انتى بتعمليه ده

سولاف وقفت : تاني الكلام ده يا ماما ، هو مش إحنا
اتكلمنا في الموضوع ده كتير قبل كده وقفلناه ، يلا
قومي معايا بقى أنا اللي هعملك الفطار النهارده ،
فطار إنما ايه هتحكي وتتحاكي بيه طول عمرك

حنان قامت معاها : بقى شوية الفول والجبنه هحكي
واتحاكى بيهم برضه

سولاف ضحكت : يوه يا حنون قلبك أبيض بقى

حنان : قدامي يلا على المطبخ يا غلاباوية

سولاف وحنان راحوا حضروا الفطار مع بعض في
جو مليون دفئ وحب وضحك

بعد الفطار سولاف راحت على الجامعة بتاعها
وقابلت صاحبها عند البوابه

ماجده : صباح الخير يا سيمو

تسنيم : صباحو يا جوجو

بصت لسولاف اللي جاية ناحيتهم : المزة بتاعتنا
جات أهى

سولاف : مزة برضه يا بيئة ؟

تسنيم ضحكت جامد : اه ، ما هو انتى اللي حلوة
اوي الصراحة

ساره : تعالي يا سولي وفكك من الهبله دي

الأربع بنات ضحكوا كثير وراحوا حضروا
المحاضرات بتاعتهم ، وبعد ما خلصوا سولاف
راحت على شغلها

في مكان ثاني داخل واحده من صالات الالعاب
الرياضية واقف المدرب المسؤول عن الجيم بيمرن
واحد بجدده : انشف يا ض او مال

الشاب : مش قادر يا كوتش

حسام خبطه في كتفه : أنت قدها يا بطل فاضل ثلاث
عداات بس يالا ، ١ . ٢ . ٣

الشاب خلص تمرينته وقعد على الارض بيضحك
وحسام سقف : عاش يا بطل ، كده أنت خلصت
النهارده ، أشوفك التمرينه الجاية

كشر : وحذاري بس تفكر تزوغ ، هروح اجررك من
قفاك وهجيبك عافيه ، فاهم ؟

رد عليه شاب كان جاي من وراه : ربنا على الظالم
ياخي في ايه ما براحه يا ض على الناس

حسام التفت وبصله : أنت شرفت يا حيلتها ؟

معاذ : وسع وسع الكينج وصل

حسام بزقه واحده منه كان معاذ متكوم على الارض
زي شوال البطاطس ، وحسام بسخرية : لا واضح
إنك كينج فعلا

معاذ : يخربيت غشوميتك دي ، دراعي يا عم

حسام وهو بيعدل الأوزان على واحد من الاجهزه :
تعالا اتمرن وأنت تبقى زي الفل

معاذ قام وقف : لا يابا متشكرين ، المهم ، الحجه
عزماك على الغدا النهارده

حسام : والله أمك دي لو لفيت الدنيا مش هلاقي احلى
من أكلها

معاذ : لا والله صدقتك أنا كده ؟

حسام : هتنكر ؟

معاذ ضحك : أكيد لا ، يالا بقى عشان جعان
وشوفتها بتحضر الاكل قبل مانزل وعيني كانت فيه
الصراحه

حسام : هي طابخه أيه ؟

معاذ بابتسامه واسعه : محشي وحمام

حسام : اوبا بقى ، لا لا وسعلي كده أما أروح اتغدى
معاك

معاذ بيضحك وهو ماشي وراه : استني يالا ، اوعي
تاكل اكلي

قبل ما يطلعوا من الجيم أخت معاذ رنت عليه وهو
رد : خير يا اوزعه عايزه ايه ؟

ساره : اوزعه في عينك ، أمك بتقولك هات معاك
مخلل وأنت جاي عشان خلص

معاذ : ماشي ياختى

ساره : ميزوو ، بقولك

معاذ : طلا ما فيها ميزو يبقى عايزة شوكلاته ، مش
كده برضه ؟

ساره ضحكت : حبيبي والله

معاذ : مصلحجيه والله

معاذ قفل مع أخته وحسام بصله : في حاجه ولا ايه ؟

معاذ : لا ياسطا عايزين مخلل بس

حسام أبتسم ونادى على واحد ببساعده في الجيم :
ولا يا بلحه ، أنت يالا

بلحه : ايوه يا معلمي

حسام : خلي بالك من الجيم على ماجي

بلحه : أنت تؤمر يا معلم

حسام مشي مع معاذ صاحبه يشترروا المخلل ومعاذ
أتكلم وهو بيقرب من السوبر ماركت : عارف ، في
بنت زي القمر بدأت تشتغل هنا جديد

حسام باستغراب : بنت ، وهنا ، ده إزاي ؟

معاذ : يابني فاكركم أكرم النجار اللي مات من
أربع سنين ده ؟

حسام : لا مش فاكركه أكيد

معاذ : مش مهم المهم ان دي بنته بقي ، الدنيا
ملطشه معاها هي وامها من ساعة موت أبوها
ومالهمش حد فنزلت تشتغل ياعيني ، واهو الشغل
اللي لقبته قدامها

حسام هز دماغه بفهم ومعاذ كمل : بس والله حرام ،
البنت ملبن كده حرام تشتغل بالشكل ده

حسام : أنا أي نعم ماشفتهاش ولا مره بس
مايتهايأليش إنها حلوه أوي كده

معاذ : حلوة ايه ، بقولك ملين ، البنت حاجة آخر
حاجه الصراحة

حسام : وهي المدينة المعفنه دي فيها بنات حلوة كده
يابني ، دي كلها أشكال تسد النفس

معاذ ضحك : هتشوفها دلوقتي بنفسك

دخلوا السوبر ماركت ومعاذ بص لسولاف : مسا
مسا على أجمل بنت فيكي يا منطقه

سولاف أبتسمت : دكتور معاذ ، مساء الخير

معاذ : والله انتى الوحيده اللي بتحسسيني بقيمتي في
المكان ده ، بدل ما أنا متمرط في كلية الطب دي
وفي الآخر يتقالي واد وياض وولا

سولاف بلطف : ربنا يعينك ، المهم محتاج أيه ؟

معاذ : عايز نص مخلل يا قمر وازازه حاجة ساقعة
وشوكولاته للمفجوعه

سولاف وهي بتتحرك : ثواني ويكون معاك

راحت تجيبه طلبه ومعاذ بص على حسام اللي عينيه
ماترفعتش من على سولاف طول الوقت وضربه في
جنبه وقال بضحك : أيه يا عم الجامد ، أنت شويه
وهتخترق البت بعينيك ، خف شويه

حسام بتوهان : هو ايه ده ، هو في كده ؟

معاذ ضحك : قولتلك البت ملين ماصدقتش

حسام : ملين ايه بس ، دي قمر ، ملاك ، حوريه ،
ايه الجمال ده

سولاف رجعت تاني ومدت ايدها بكيس الطلبات :
اتفضل يا دكتور

حسام تعمد هو اللي يمد ايده وياخد الكيس بدل معاذ
عشان يلمس ايدها ، وهي اتوترت من لمستته دي
وسحبت ايدها بسرعة ورجعت خطوه لورا : اءااا
كده الحساب....

معاذ طلع الفلوس وعطهاها : تسلمي يا قمر ، الا
صحيح ماعرفتكيش ، حسام صاحبي

سولاف أبتسمت وهزت دماغها بترحيب وحسام تايه
خالص فيها ومعاذ ضحك باحراج وسحبه وراه وهو
خارج : سلام بقى يا سولي

معاذ خرج من السوبر ماركت وهو بيشد حسام من
دراعه : في ايه يالا مالك عامل زي اللي نزل عليه
سهم الله كده

حسام : البت حلوه أوي يا معاذ ، ايه ده ، لا وكله
كوم وطريقة كلامها كوم هي بتتكلم كده إزاي تحس
كل الناس ليهم حروف وهي ليها حروف لوحدها ،
ايه كمية اللطافة دي ، دي تتاكل آكل كده

معاذ ضحك : يا عيني يابني كل ده

حسام فاق وكشر فجأة ومسك معاذ من قفاه : أنت
ياض أنت كنت واقف تعاكس فيها طول الوقت ،
عرفتها منين ولا مين عطاك الحق تعاكسها كده ؟
معاذ : اعاكسها ايه بس يابني استهدى بالله دي زي
اختي

حسام كشر أكثر ومعاذ بيحاول يفلت منه : والله بجد
مابهزر ، دي صاحبة سارة من الجامعة

حسام بصله بشك وهو رافع حاجبه ومعاذ فلتت من
ايدته : ماما بتحبها أوي وبتعتبرها زي بنتها كده وأنا
كمان بعتبرها زي ساره

خبطه في كتفه : يا عم زاما بقولك كده والله ، أوعى
تسرح لبعيد أنا مافيش في قلبي غير ممنن

حسام : مافيش في قلبك غير ممنن برضه ولا خايف
لامنن تخلص عليك لو شمت خبر إنك بتلعب بديلك

معاذ : استر عليا يستر عليك ربنا يا جدع

الأتنين ضحكوا ومعاذ قال بتلميح : بس عارف أنا لو
ماكنتش خاطب والله لكنت اتجوزتها ، يعني البنت
حلوة مافيهاش عيب وسيرتها كويسه في المنطقة ،
وكمان رقيقة جدا وضعيفة واكيد محتاجه لراجل
يسندها وتتحمى فيه

خبط بظهر ايده على صدر حسام : ولا أنت ايه رأيك
يا كوتش ؟

حسام فهم تلميح صاحبه وسكت وراحوا في صمت
على بيت معاذ اللي كان قصاد السوبر ماركت اللي
شغاله فيه سولاف على طول

قابلوا على السلم منى جارة معاذ وخطيبته اللي
بصلها بمشاغبه : قفشتك ، رايحه على فين يا قطه
؟؟

منى أبتسمت : رايحه أشتري حاجات من المكتبه
عشان أذاكر

معاذ : كده ومن غير ماتقوليلي ؟

كمل بحب : مش قولتلك قبل كده أى حاجة تحتاجيها
تطلبها مني وأنا هجيبهاك لحد عندك ؟

منى أبتسمت بحب : ماكنتش عايزة اتعبك معايا يا
حبيبي

معاذ : ولا تعب ولا حاجة ، يالا ادخلي انتى بيتك
وأنا هجيبك كل اللي انتى عايزاه لحد عندك

حسام وهو بيتفرج على المشهد ده : مش يلا بقى يا
عم النحوح ولا ايه ؟

معاذ بصله : نحوح ؟ شوف مين بيتكلم ، بقولك ايه
اطلع أنت اتغدى وهوينا شويه هاااه

حسام : ماشي يا عم الله يسهلك ، أنا طالع

حسام سابهم وطلع ومعاذ نزل يجيب لمنى اللي هي
عايزاه من المكتبه وطلع بيته يتغدى مع الكل

خلونا نتعرف على الشخصيات

حسام : ٢٧ سنه ، شاب طويل وعريض وجسمه
رياضي جدا ، متخرج من كلية تربية رياضية ، فاتح
جيم وبيمارس هوايته فيه وهي كمال الاجسام ، والده
عنده محلين شغال فيهم ، راجل طيب وعلى نياته

عكس والدته اللي شخصيتها قويه ، وعنده مها اخته
الصغيره اللي طالعه لوالدها في طبيبتها ، متخرجه
من كليه آداب ومخطوبه لشاب محترم وبتجهز
لفرحها

معاذ : صاحب حسام من أيام ابتدائي يعني أعز
صديق ، متخرج من كلية طب مامته وباباه ناس
طيبين جدا وعنده اخت اللي هي سارة واحده من
صحابات سولاف خاطب منى جارتة اللي في آخر
سنه طب ومقررين يتجوزوا بعد ما تخلص جامعتها
ومعاذ يستقر في شغل ويخلص شفته

حسام من ساعة ما شاف سولاف وهو مش عارف
يخرجها من دماغه خالص كانت مسيطره على كل
تفكيره وكل يوم والتاني ينطلها في السوبر ماركت
بحجه إنه بيشتري حاجات ، وسولاف ملاحظة
تصرفاته ومحاولاته إنه يشد انتباهها بس ساكته
وعامله مش واخده بالها من حاجه

في يوم سولاف اتأخرت جدا في الشغل عشان الشاب
 اللي ماسك الشفت المسائي حصلت عنده ظروف
 واتأخر وهي فضلت قاعده مستتياه على مايجي
 فأتأخرت ، شويه والشاب وصل واعتذر منها على
 التأخير وهي قالتله مافيش مشكله واخذت بعضها
 ومشت ، كانت بتجري في الشارع عشان تروح
 بسرعة وأول ما دخلت الشارع بتاع بيتها لقت كلاب
 كثيره واقفه في الشارع فخافت جدا وفضلت ترجع
 لورا وهي حاطه ايديها على بوءها عشان ماتعملش
 صوت والكلاب تشوفها

وقفت بعيد شويه واستخبت ورا شجره كبيرة وبتبص
 على الكلاب وبتكلم نفسها : وبعدين بقى هو ده وقته
 ؟

قعدت تبص حوليها لحد ما عينيها جات على شارع
 جانبي لو مشت فيه شويه ممكن تدخل الشارع بتاعها
 منه فأبتسمت بسعاده : الحمد لله أني افكرت الشارع
 ده وكده هعرف اعدي الحته اللي فيها كلاب دي
 وأكمل للبيت

سولاف مشت بهدوء ودخلت الشارع الجانبي ده
 ومشت فيه شويه وهي متوتره ، الشارع كان ضيق

شويه وضلمه شويتين وساكت خالص تلات شويات
كده

وقفت بتردد تكمل مشي ولا ترجع تاني بس قاطع
تفكيرها صوت شاب بيتكلم بطريقة غريبه : ايه ده
كله ، هو القمر نزل عندنا ولا ايه ؟

شاب تاني : ايه يا حلوه ، ايه اللي جايبك هنا ،
محتاجه خدمه ولا ايه ؟

شاب تالت بوقاحه : تعالي يا عسل واحنا هنساعدك
على الآخر ، هههههه هنتبسطي جدا صدقيني

التلات شباب ضحكوا جامد وسولاف ميته من
الرعب من منظرهم اللي بيقول إنهم شاربين
مخدرات ومش في وعيهم خالص ، يعني هي كانت
بتهرب من الكلاب ودلوقتي وقعت مع كلاب بشرية
أسوء من الحيوانات

رجعت كذا خطوة لورا برعب ولفت ولسه هتجري
منهم بس في شاب منهم مسك ذراعها وشدها جامد
عليه وهي صرخت لعل وعسى حد يساعدها ، بس
مين اللي هيسمعها في المكان المقطوع ده ، هي اللي

غلطانه إنها دخلت شارع زي ده من البداية وكمان
بالليل

سولاف بعياط : سييني ، سيب دراعي ارجوك
سيبوني امشى

شاب: ايه يا حلوة هو حد قالك ان دخول الحمام زي
خروجه ولا ايه ؟

كان لسه هيقربوا منها بس سمعوا صوت قوي من
ورا سولاف : هي مش قالتك تسببها ولا البعيد مش
بيفهم

كلهم بصوا لصاحب الصوت واللي كان حسام واقف
وعيوناه بتطق شرار

سولاف بخفوت : أستاذ حسام

.

الشباب اتوتروا من منظر حسام وهو عامل زي
المدرعه كده ونظراته لا تبشر بالخير ابدأ بس واحد
حاول يتشجع وبصله : أمشي يا حيلتها من هنا بدل
ماتزعل

حسام : ليه يا كوتوموتو هتطربني بالعصاية فهعيط
ولا ايه ؟

قرب منهم ومسك سولاف شدها من ايد الشاب اللي
ماسكها ووقفها وراه وبصلهم : وروني بقى هتعملوا
ايه ؟

حسام مسك التلات شباب و عدمهم العافيه ، ماسابش
فيهم حته سليمه من كتر الضرب وبعد ما خلص راح
وقف قدام سولاف وهنا بان فرق الطول والحجم
بينهم : أنتى كويسه ؟

سولاف مسحت دموعها بظهر ايدها وهزت دماغها
: أنا كويسه

حسام بغضب : ممكن أفهم سيادتك بتهبي ايه في
مكان زي ده ؟

سولاف استغرب غضبه ده بس ردت عليه : الشارع
عندنا كان مليون كلاب وأنا خوفت أوي فقلت اخرم
من هنا

حسام زعق : غيبه ، كان ممكن تطلبي من حد
يعدكي الشارع مش تيجي هنا ، طيب افرضي أنا
ماكنتش قريب ولحقتك كان ممكن يحصلك ايه ؟
سولاف عيطت : اسفه والله ماكنتش أعرف ان كل ده
ممكن يحصل

حسام ضعف قدام دموعها وانحنى شويه عشان يبقى
 في مستواها ومد ايده مسحلها دموعها : خلاص
 خلاص ماتعيطيش ، حقك عليا ، أنا آسف والله مش
 قصدي

سولاف ارتبكت جامد واتكسفت منه ورجعت
 خطوتين لورا وهي بتتكلم بإحراج : ماحصلش حاجة
 خلاص

حسام اتعدل في وقفته : تعالي هوصلك البيت
 سولاف كانت لسه هتعرض بس هو ما سابلهاش
 فرصه ترد ومسك ايدها وشدها وراه ، وهي ماشيه
 بصمت وبتبص علي كتافه العريضة وبتفكر جوا
 نفسها قد ايه هو قوي وشهم أوي ، ولولاه ماكانتش
 تعرف ايه اللي كان ممكن يحصلها

أول ما طلعا من الشارع الضلمة سولاف سحبت
 ايدها بهدوء من ايده ومشت وراه بصمت وهو ادايق
 من حركتها دي بس سكت

وصلوا لحد العمارة وحسام بصلها وشاور بدماعه :
 يلا اطلعي بيتك

سولاف هزت دماغها بموافقة ومشت خطوتين
ووقفت تاني وبصتله بامتنان : متشكره أوي يا أستاذ

ح....

حسام قاطعها : حسام ، ناديني بحسام وبس من غير
أستاذ

سولاف : بس

حسام : مش لايقه عليا أساسا أستاذ دي ، فقولي
حسام بس ، أو يا كوتش ، يا كابتن ، اللي تحبيه
يعني

سولاف أبتسمت وهزت دماغها بموافقه وطلعت على
شقتها

.

سولاف أول مادخلت بيتها لقيت مامتها قاعده في
الصالة وبتدعي

سولاف : حنون

حنان قامت بسرعه من مكانها وجرت عليها : بنتي ،
اتأخرتي ليه كده يا سولاف ، حرام عليكى وقفتي
قلبي من القلق

سولاف حضنتها جامد : ماتقلقيش يا حبيبي انا
كويسه اهو

حنان : اتاخرتي ليه ؟

سولاف قعدت وحكت لماتها كل حاجة حصلت
معاها وحنان حطت ايدها على قلبها : يا حبيبي يا
بنتي ، كنتي هتضياعي مني ، منهم لله ، ربنا ينتقم
منهم

سولاف : خلاص يا ماما الحمد لله ماحصلش حاجة
وكابتن حسام وقفهم عند حدهم

حنان : ربنا يكرمه ويجازيه خير الشاب راجل
بصحيح

ضربتها على رجليها : وانتي يا جزمة مش تاخدي
بالك شويه ، في واحده عاقله تعمل عملتك السودا دي
؟

سولاف : اللي حصل بقى يا ماما وان شاء الله مش
هتتكرر تاني

حنان : اكيد طبعا مش هتتكرر ، وبعدين تعرفي
حسام ده منين يابت احنا فينا من كده

سولاف ضحكت : لا مافيناش من كده ده صاحب
أبيه معاذ و عرفني عليه مرة وهما بيشتروا حاجات
من السوبر ماركت وبس

حنان لوت شفايفها وبهزار : يا خسارة ياختي ، وأنا
اللي قولت الراجل اتهدف في عقله ولا حاجة واعجب
بيكي

سولاف وقفت وهي بتضحك : لا يا حنون الراجل
لسه بعقله وماتهفش ولا حاجة ويلا بقى تعالي ناكل
أنا واقعه من الجوع

حنان : تعالي ياختي تعالي

راحوا اكلوا وسولاف دخلت اوضتها واترمت
بارهاق على سريرها وهي بتفتكر حسام ، نظراته
ليها وصوته وشكله وموقفه معاها من شويه ،
أبتسمت وحضنت الدبدوب بتاعها وبعد تفكير كتير
راحت في النوم

على الناحية الثانية حسام كان بيراقب كل حركة من
سولاف وهي طالعه بيتها وكل وتفصيله فيها وهو

سرحان وفضل واقف شوية تحت بيتها وبعدها مشي
وهو بيفتكر اللي حصل

بقاله كذا يوم من ساعة ما عرفها وهو بيراقبها
وبيمشي وراها وهي مروحة من غير ما تاخذ بالها
منه وبدأ يدور ويعرف كل حاجة عنها الصغيره قبل
الكبيرة والنهارده لقاها اتأخرت جدا عن معادها اللي
بتروح فيه كل يوم ، المفروض انها لما بتيجي تروح
بتعدي من قدام الجيم بتاعه وكده يعرف يمشي وراها
، قلق عليها جدا وفكر ان في حاجة وحشه حصلت لها
واتوتر من مجرد التفكير في الموضوع ، فقرر إنه
هيروح الماركت يسأل عليها وكان لسه هيفتح الباب
الازاز بتاع الجيم لقاها بتجري من قدامه ، اتفاجئ
بس لملم نفسه بسرعه وطلع جري وراها لحد ما
وصل للشارع الجانبي اللي دخلت فيه

وقف وهو ببص للمكان حوليه ومستغرب جدا هي
جت هنا ليه ، خرج من أفكاره على صرختها اللي
خلته يتنفذ من مكانه وجرى بسرعه يشوف ايه

اللي حصل وشاف التلات شباب اللي كانوا بيديقوها
فخلصها منهم وروحها بيتها

فاق من أفكاره على وصوله للجيم بتاعه فققله وطلع
بيته ، وامه أول ما شافته جرت عليه : حبيبي
اتأخرت كده ليه قلقت عليك أوي ؟

محمد : لا بجد ايش حال إن الجيم بتاعه تحت البيت
كنتي عملتي ايه ، هفضل اقولك لحد امتي كفاية دلح
فيه بقى ، كده هتبوظيه

سهير: بس يا راجل أنت

بصت لابنها : حبيبي جعان اجهزلك الأكل ؟

حسام : اه يا ماما بس هاخد دش الأول

سهير : ماشي يا حبيبي على ماتخلص اكون جهزتلك
أكلك

مها : يا رب نص الحنان ده بدل طول اليوم مها
روحي مها جيبي مها اعلمي

سهير ضربتها في كتفها : حنان ايه يا ام حنان ، يا
بت ايش حال إنك لسه قاعده على قلبنا لحد دلوقتي لا
ليكي فايده ولا نيله ، خلفه البنات على اللي عايزها

مها عينيها لمعت بالدموع وأبوها اخذ باله فرد : في
 ايه يا سهير دي بنتك برضه وبعدين البنت تقعد في
 بيت أبوها معززه مكرمه لحد ما تتجوز وتروح لبيت
 راجل يعيشها في بيته برضه معززه مكرمه واهو
 كلها كام شهر وهتجوز وتسيبها لك مخضرة ،
 وبعدين لما اكون مقصر معاكم في حاجة ابقى قولي
 كلامك ده

مها فرحت ان باباها دافع عنها وهو بصلها بابتسامة
 : تعالي يا مها يا حبيبي خطيبك كان باعتلك حاجة
 معايا تعالي اما اوريها لك

مها قامت مع أبوها وهي مبسوطة ودخلوا اوضتها :
 حبيبة بابا ماتر عيش من أمك هي أكيد مش قصدها ،
 وبعدين انتى على قلبي زي العسل فمش عايزك
 تزعلي خالص

مها حضنته جامد : ربنا ما يحرمني منك يا حبيبي
 أنت اللي ليا في الدنيا دي كلها

محمد : ولا يحرمني منك يا نور عيني ، وبعدين أنا
 اللي ليكي في الدنيا أومال الواد عبد الرحمن يبقى ايه
 كيس لب

مها بكسوف : بابا

محمد ضحك : ربنا يهنيكم يا بنتي ويقر عينك بيه
ويقر عينه بيكي

مها : يا رب

وباست ايده : وربنا يديك في حياتي يا سندي
وماتحرمش منك أبدا

محمد ضمها وقعدوا يتكلموا مع بعض شوية عن
تجهيزات الفرح وغيره

في الصالون بره

حسام بص لمامته : هي مها عملتلك أيه لكل ده ياما

سهير بغيط : أختك دي عايزة قطم رقبتهها والله

حسام : ليه

سهير ساكته فحسام قعد قصادها : احكي لي بس ايه

اللي مدايقك كده منها ؟

سهير بغيط : شوف يا سيدي أبقى أنا نازلة معاها

هي والحرباية حماتها دي عشان نجيب شوية حاجات

في الجهاز بتاعها واقولها تجيب حاجة وحماتها
تقولها على حاجة تانية وتروح مقصوفة الرقبة
مختارة اللي حماتها قالت عليه ، بتفضل حماتها عليا
الجزمه

حسام : بقى هو ده اللي مدايقك و عامله كل ده عشانه
؟

محمد من وراهم : قتلها والله بس هي اللي سايقه
المعيلة على الآخر ، البنت حبت تشتري دماغها
وتكسب حماتها ، وبعدين هي كان عاجبها الطقم اللي
حماتها اختارته ايه تختار اللي مش عاجبها عشان
بس انتى مش عايزاه

سهير ضربت حسام في صدره وبصت لمحمد بغیظ
: اه خليك أنت كده تقويها عليا لحد ماييقاش ليها
رابط ، البنت لازم تكسرلها ضلع وعشره عشان
تتظبط وتمشي عدل

محمد : انتى عارفه ان دي عمرها ما كانت طريقتي
في التربية ، ده حتى الرسول قال رفقا بالقوارير
تقومي تقوليلي نكسرلها ضلع ، البنت عمرها
مابتمشي بالضرب ، البنت دايمًا بتسمع كلام اللي
يعاملها بحنية

سهير شهقت : ماشي يا أبو حنية ، خليك كده حنين
 عليها وخليني أنا الشريره في الحكاية
 محمد : استغفر الله العظيم وأتوب إليه
 سابههم وراح ناحية الباب وهي سألت : رايح فين
 ؟؟

محمد : في داهية يا سهير ، رايح في ستين داهية
 وسابلهم الشقة ورزح الباب وراه ومشي
 سهير : شوف الراجل بيكلمني إزاي ، قرف ايه ده
 بس يا ربي اللي بليتني بيه

حسام : والله انتي ظالمه ، طول عمره بيعاملك
 كويس وعمره ماكسرلك كلمة ولا رفضك طلب
 طول ما هو قادر عليه

سهير بز عيق : واد أنت ، أنت هتخيب زيه ولا ايه ،
 ده بدل ما تقف في وشه وتجيبي حقي ولا تروح
 تدي لاختك دي علقه تظبتها بتقول كده

حسام : عايزاني اقف في وش ابويا ؟

قام وقف : أنا داخل اخد دش

مشي وسهير بتبص عليه بغيط : ماشي يا ابن بطني
 ماشي

حسام طول الليل بيفكر في سولاف ، في صوتها
 وحركاتها وشكلها ورقتها ، أبتسم أوي لما افكر
 كسوفها منه لما مسك وشها وصوتها وهي بتشكره ،
 اتهد وغمض عينيه : مش هتبقى غير ليا أنا يا
 سولاف

عند سولاف الأيام بتجري وامتحاناتها قربت وقبل
 الامتحانات بأسبوع قررت تكلم صاحب السوبر
 ماركت وتطلب منه إجازة عشان الامتحانات

.

سولاف : السلام عليكم ازيك يا حاج مهران
 مهران : ازيك يا سولاف ، خير في حاجة
 سولاف باحراج : هو اا هو أنا الفترة دي داخله على
 امتحانات يعني وكنت عايزة بس أشتغل وقت أقل
 شوية عشان اعرف أذاكر

مهران : اه وأنا اجيب منين حد يشتغل بدالك ، وفي
 غيرك شغالين ، اجيب واحد كمان عشان حضرتك
 مش عايزة تشتغلي وقتك كله ، اجيب فلوس منين أنا

لكل الناس دي؟؟ وبعدين مش كفاية أنى مراعي إنك
بتروحي كليه الصبح وبخليكي تشتغلي من الظهر
بس لحد العشا؟؟ كمان عايزة تقلي وقت الشغل
!!

سولاف بحزن : مش بإيدي والله يا حاج ، طيب بص
أنا هشتغل زي مانا بس استأذنك بس هجيب كتبي
معايا واذاكر هنا

مهران : ليه شيفاها مكتبه وبعدين انتى شايفه أهو
السوبر ماركت كبير والرجل عليه كتير سيادتك بقى
هتركزي مع الزباين ولا هتذاكري

سولاف : طيب أعمل ايه أنا دلوقتي ؟

مهران : ماتعمليش ، أنا بصراحه ماكانش عاجبني
شغلك اليومين دول فتروحي انتى تشوفي حياتك يا
بنت الناس وتسييني في حياتي

سولاف : قصدك ايه ؟

مهران : قصدي شغلك عندي انتهى وروحي شوفي
مكان تاني يرضى يشغلك على مزاجك

سولاف : بس حضرتك عارف الظروف يعني ،

وييي

قاطعها مهران بنرفزة : الظروف الظروف ايه
 ماوركيش غير الكلمة دي ما كل الناس عندها
 ظروف جت عليكي يعني ، اتفضلي بقى امشى من
 قدامي عشان مش فاضيلك

سولاف كانت خلاص هتعيط بس تماكنت نفسها :
 طيب حضرتك أنا عايزة مرتبي

مهران : مرتب ايه يا ام مرتب وهو الشهر كان
 خلص عشان تاخدي مرتب

سولاف : أنا اشتغلت ١٢ يوم من الشهر يعني
 المفروض ليا المبلغ الفلاني

مهران طلع الفلوس وهبدها على المكتب : يادي
 البجاجة اللي بقت في الناس ، خدي الفلوس اهي
 جتك القرف في شكلك

سولاف اخدت الفلوس ودموعها في عينها وبصتله :
 ربنا يسامحك

اخذت بعضها ومشت وهي دموعها على خدها ومش
 عارفه تعمل ايه ولا تتصرف ازاي دلوقتي ، إزاي
 هتلاقي شغل ، وهو ده وقته اصلا تقعد تلف على
 شغل وهي المفروض عايزة تذاكر عشان امتحاناتها

بصت للسماء بدموع وهي بتدعي : يا رب أنا ماليش
غيرك أطلب منه ، يا رب ساعدني
مشيت وهي بتمسح دموعها وبتفكر في اللي هتعمله
بعد كده ، ماينفعش تستسلم ابدا ، لو استسلمت هتنهار
وده ماينفعش ابدا

عند حنان استأذنت من الشغل عشان كانت تعبانه جدا
بس مخبية على بنتها وقبل ما تدخل العمارة وقفتها
واحد جاريتها : ازيك يا ام سولاف

حنان : ام إبراهيم ، ازيك ياختى وازي الولاد
ام إبراهيم : ياختى الدنيا ماشية تلطش فينا أهو بس
الحمد لله على كل حال

حنان بطيبة : ربنا يبعد عنكم كل شر يا حبيبتى
ويهون عليكم وان شاء الله تفرج قريب

ام إبراهيم : يا رب بس ما قلتلش يام سولاف البت
بنتك دي كانت راجعه البيت من كام يوم كده متأخر
أوي ليه ، وكم ان يعنني...

حنان : كمان ايه ؟

ام إبراهيم لوت شفايفها : جاية مع شاب ، ده ابني لما
شافها كان هاین عليه ينزل يقتلها بس أنا وقفته
بالعافية

حنان : قصدك ايه يا ام إبراهيم ، ماتلفيش وتدوري
عليا

ام إبراهيم : ياختي ألف وادور ده ايه والكلام واضح
زي الشمس ، بنتك راجعه في انصاص الليالي مع
شاب غريب ، ايه اللف والدوران في الموضوع ، ما
هي البت أبوها مات ولا ليها راجل يشكمها ولا
حاجة

سولاف من ورا مامتها : حاسبي على كلامك يام
ابراهيم عشان ماتر عيش مني

ام إبراهيم : شوف البت بتكلمني إزاي ، لا وليكي
عين تردي عليا يا بت ؟

سولاف وقفت قدام مامتها : اه ليا ، عشان ماعملتش
حاجة غلط ، ولو عندك دليل أنى عملت حاجة غلط
وريهولي

ام إبراهيم : شوف البجاجة ده أنا شيفاكي يا بت بعنيا
اللي هياكلهم الدود دول جاية مع شاب

سولاف : بصي يا ام إبراهيم ، أنا مش مضطرة
 ابررلك بس لآخر مره هعمل كده ، حصل معايا
 مشكلة في الشغل واضطريت اروح متأخر وانا
 ماشية قابلت شوية شمامين زي ابنك ده وكابتن حسام
 وقفهم عند حدهم وروحني بيتي ، لا أنا عملت حاجة
 غلط اتكسف منها ولا كابتن حسام عمل حاجه غلط ،
 والحته كلها تشهد باخلاقي ، فماتجيش تقولي كلامك
 ده لانه مش هيغير حاجة ، واخيرا بقى أنا عارفه
 انتى بتعملي كل ده ليه ، وكلمة مش هتنيها تاني ،
 جواز من ابنك انسي لان مش أنا اللي هتجوز واحد
 شمام زي إبراهيم ايده سابقة عقله

ام إبراهيم شهقت بسوقيه : والنبي ايه ده على أساس
 ان انا اللي ميته عليك ، ده ابني ميت مين تتمناه
 وتتمنى بس نظرة منه تيجي ايه انتى عشان تتعوجي
 علينا

حنان وقفت قدام بنتها : لحد كده وكفاية أوي يا ام
 إبراهيم أنا سكتالك من بدري بس لحد هنا وكفاية
 مش هسمحك تغلطي في بنتي اكثر من كده ، أنا
 بنتي ست البنات كلهم تربية أكرم الله يرحمه ،

والحته كلها تشهد باخلاقها فمش هسمحك تغلطي
 كده فيها ، وابنك ربنا يسهله بعيد عننا خليه يتجوز
 واحده من الميت مين اللي يتمنوه دول وسيبيننا إحنا
 في حالنا

مشيت وشدت سولاف وراها : يلا يا بنتى أما دي
 ناس تحرق الدم بصحيح

مشت كام خطوة ولفتلها تاني : واه صحيح حذاري
 تجيبي في سيرة أكرم تاني وياريت عملي احترام ليه
 شويه ، ده الراجل كان خيره دايمًا سابقه والكل يشهد
 باخلاقه وجدعنته فحرام عليكى تتكلمي عن عرضه
 كده ، لا وكمان مش محترمة حرمت الميت ، الف
 اخص عليكى والله

ومشيت وام ابراهيم مرقباها وبتكلم نفسها : شوف
 إزاي ، بطلوا لده واسمعوا ده ، كله بسبب الموكوس
 ابني ، أموت وافهم بيحب فيها ايه بس بنت حنان
 وكل اللي طالع عليه بحبها ياما جوز هالي ياما

إبراهيم من وراها : ايه ده ياما انتى بتكلمي نفسك
 ام إبراهيم ضربته في كتفه : ماهو كله بسببك انت يا
 منيل على عينك

ابراهيم : وأنا مالي بس عملت ايه ؟

ام ابراهيم : كل شوية بحبها يا ماما جوز هالي يا ماما
وشوف عملت فيا ايه المحروسة وامها

ابراهيم باهتمام : عملت ايه ؟

ام ابراهيم ادايقت أكثر من اهتمام ابنها فحكته كل
حاجة حصلت وحطت شوية بهارات من عندها
عشان تكرهه في سولاف

في البيت فوق

حنان بصت لبنتها : وبعدين يا سولاف في المصيبة
دي هنعمل ايه ؟

سولاف باستغراب : مصيبة ايه يا ماما ؟

حنان : انتي ماسمعتيش الولية العقربة دي بتقول ايه
، والله أعلم هي ممكن تقول ايه تاني

سولاف وهي بتقعد على الكنبه جنبها : تقول يا ماما
اللي تقوله أنا معملتش حاجة غلط اتكسف منها ومش
هيفرق معايا حاجة

حنان قعدت جنبها : أنا عارفه يا حبيبتي إنك عمرك
 ما عملتي حاجة غلط بس الناس مابترحمش
 وبيصدقوا اللي هما عايزينه ومش بيفرق معاها صح
 من غلط

سولاف مسكت ايديها : وفين ربنا من كل ده يا ماما
 ، زي مانتى قولتي احنا الحمد لله عمرنا ما عملنا
 حاجة غلط وعلى طول ماشين جنب الحيط وربنا
 عالم بينا وبحالنا وهيكون جنبنا وهينصرنا على اي
 ظالم ، ماتخافيش وخلي ثقتك في ربنا كبيره
 حنان : ونعم بالله ، بس...

سولاف وقفت وقطعتها : يلا بقى يا حنون أنا واقعه
 من الجوع خرينا ناكلنا حاجة

حنان اتنهدت بقلة حيلة وقامت معاها وسولاف
 بصتلها : الا صحيح يا حنون ايه اللي مرجعك بدري
 كده من الشغل؟

حنان اتوترت : هه ، لا ده هو ، أنا بس خلصت
 شغل بدري وطلبت أروح مش اكثر
 سولاف : يعني مش تعبانه ولا حاجة؟

حنان : لالأ خالص ، تعبانه ايه بس ربنا مايجيب
 تعب خالص ، وانتى ياختى ايه اللي جايبك بدري
 كده ؟

سولاف : طلبت من صاحب السوبر ماركت اشتغل
 وقت أقل عشان الامتحانات

حنان : طيب مابلاش تشتغلي خالص الفترة دي يا
 بنتي لحد ما تخلصي امتحاناتك

سولاف : لا يا ماما أنا مرتاحة كده ماتقلقيش عليا

سولاف كانت حاسه ان مامتها بتخبي عليها حاجة
 واخذت بالها ان شكلها مرهقة جدا فماحتش تقولها
 إنها سابت الشغل وقررت تستعين بالله وتروح تدور
 على شغل جديد

بعد كذا يوم حسام كان ماشي في الشارع وسمع
 صوت سولاف بتتخانق ، في الأول كذب نفسه بس
 لما قرب اكثر من مصدر الصوت لقي سولاف فعلا
 واقفه بتتخانق مع شاب

سولاف بنرفزة : ما تبعد عني بقى يا إبراهيم أنت
مش بتزهق ؟

إبراهيم : لا مش بزهب وهتكوني ليا يعني هتكوني
ليا يا سولاف وهتشوفي

سولاف : أنا قولتلك قبل كده مش هيحصل وقولت
لمامتك من يومين جواز منك مش هيحصل خلصنا
بقى

إبراهيم قرب منها خطوة : اه أمي اللي غلطي فيها
انتى وامك

سولاف : أنا ماغلطتش في حد بالعكس دي هي اللي
كانت جاية تغلط فينا وفي شرفنا واحنا اكيد مش
هنسمع شتيمتنا بودانا ونسكت وبعدين بدل ما حنا ناس
وحشه أوي كده في نظركم عايزين مننا ايه ، عايز
تتجوزني ليه

إبراهيم : عشان اكسر غرورك ده

سولاف وهي ماشية : ماشي يا إبراهيم أكبر ما
عندك اعمله

سابتة ومشت بسرعة من قدامه وهي متوتره وخايفه
وهو بيراقبها بغل

ابراهيم : ماشي يا سولاف ، مابقاش أنا إبراهيم لو
 ماجبتكيش تحت رجلي وكسرت مناخيرك اللي
 رفعها للسماء دي وساعتها أنتى اللي هتترجيني
 وتبوسي رجلي عشان ارحمك ، ماشي أنا وأنتى
 والأيام بيننا

إبراهيم مشى بغیظ وهو بيخطط يعمل ايه في
 سولاف يكسرها بيه

كل ده تحت نظرات حسام اللي بيراقب بصمت
 ويحاول يفهم الموقف ، مشي بسرعة في الطريق
 اللي سولاف مشت فيه ولسه هيروح يكلمها لقاها
 واقفه مع معاذ صاحبه وبيتكلموا فاستخبي يسمع
 كلامهم

سولاف : ها يا دكتور لقيتلي شغل ؟

معاذ : بصي بصراحة كده هو أنا اتكلمت مع مدير
 المستشفى اللي شغال فيها وشرحتله ظروفك وكل
 حاجة وهو وافق يشغلك

سولاف اتنطتت في مكانها بسعادة : بجد يا دكتور
 وافق

معاذ أبتسم على سعادتها : ايوه وافق بس هو في
مشكلة صغيرة كده

سولاف بتوتر : خير ، ربنا مايجيب مشاكل

معاذ باحراج : بصي هو وافق يشغلك بس بعد
ماتخلصي امتحاناتك ، يعني تخلصي السنادي وتبدأي
شغلك هناك على طول بإذن الله

سولاف : طيب والشهرين دول هعمل فيهم ايه
؟؟

بصت في الارض وهي بتحاول تلاقي حل بسرعة
للموقف ده ومعاذ زعل أوي عليها : سولاف ، سولي
بصيلي

سولاف بصنله بأمل : بصي أنتي عارفه معزتك
عندنا أنا وماما وساره صح

سولاف هزت دماغها باه وهو كمل : وانتى عارفه
كمان أنى بعترك زي اختى الصغيرة وربنا يشهد
على كلامي ده صح ؟

سولاف هزت دماغها تاني وهو طلع فلوس من جيبه
: خلاص يبقى تاخدي دول منى تمشي بيهم أمورك
لحد ماربنا يفرجها عليكم

سولاف رجعت خطوه لورا وهي بتهز دماغها
برفض : لالا يا دكتور أنت بتقول أيه بس ، أنا مش
ممکن أخذ منك حاجة ، كفاية عليك اللي عندك وكل
مليم بيتك أولى بيه

معاذ قرب منها : انا كده بجد هزعل منك ، انتى مش
بتعتبريني اخوكي الكبير ولا ايه

سولاف باحراج : إيوه بعتبرك اخويا ، بس ..
معاذ أبتسم : مابسش ، انتى زي سارة بالظبط وليكي
عليا زي اللي ليها عليا

سولاف عينيها لمعت بالدموع بقالها سنين ماحستش
بشعور السند ده ، من ساعة وفاة باباها وهي مالهاش
حد يساعدها بعد ربنا ومامتها ، ابتسمت : ربنا
مايحرمني منك ابدأ يا ابيه بس خلي فلوسك معاك
وأنا هتصرف ، هي كلها شهرين مش اكره هحاول
الاقى حل

معاذ كشر : سولاف خلص الكلام والشهرين دول أنا
اللي متكفل بيهم وياستي لو حاسه إنها شفته او كده
اعتبريهم سلفه وابقى رجعيهم تاني لما تشتغلي في
المستشفى بإذن الله

سولاف : والله يا ابيه احنا الدنيا معانا مستقرة حاليا
واوعدك لو احتجت حاجة أول حد هروحله هو انت
، أنا عارفه إنك داخل على جواز وكل جنيه انت
محتاجة فخلي فلوسك معاك وأنا لو احتجت حاجة
هقولك

معاذ بيصلها بتردد وهي أبتسمت : اوعدك بجد أنا
مش هكذب عليك

معاذ اتهد ورجع فلوسه تاني لانه عارفها مش هتاخذ
حاجة مهما يعمل زي أبوها بالظبط ، بصلها :
خليكي فاكراه إنك وعدتيني ، ولو حصل وعرفت إنك
محتاجة حاجة وماقتلش هزعل منك بجد

سولاف : ماتقلقش

معاذ : خلاص ماشي ، اه صحيح بكرة هاجي اخذك
معايا المستشفى عشان المدير عايز يشوفك ويأكد
شغلك عنده

سولاف بحماس : تمام ماشي من النجمه هبقى عندك
معاذ ضحك : مش للدرجة يعني ، أنا نابطشيتي
بالليل أصلا فعلى العصر كده هبقى اجيلك
سولاف : تمام ماشي هستناك

سولاف روجت بيتها وهي مبسوطة على زعلانه ،
 مبسوطة إنها هتتعين في مستشفى كبيرة زي دي
 ومش اي حد بيعرف يتعين فيها بسهولة ، وزعلانه
 على الشهرين اللي مش عارفه هتعمل فيهم ايه دول
 ، بس قررت تسيبها بظروفها واللي ربنا عايزه
 هيحصل

معاذ ودع سولاف وجاي يمشي لقي حسام بيكلمه من
 وراه : كانت عايزه منك ايه ؟ وشغل ايه ده اللي
 بتدور عليه ؟

معاذ : ايه يا عم مافيش ولا احم ولا دستور كده
 حسام : معاذ انجز ، شغل ايه ده

معاذ : ولا حاجة يا سيدي ، سابت شغلها القديم
 عشان صاحب السوبر ماركت مارضاش يخليها
 تذاكر وهي بتشتغل فبتدور على غيره

حسام : وانت ايه دخلك بالموضوع

معاذ كشر : في ايه يا حسام أنت بتحقق معايا ولا ايه
 ؟ وبعدين أنا قولتلك كذا مره إنها اختي الصغيره

وطبيعي لما تحتاج مساعده هكون أول واحد
يساعدها ويقف في ظهرها ، مالك أنت بقي ؟
حسام : أنت بتعصبي علي فكره وأنت عارف ان
عصبيتي وحشه

معاذ وهو ماشي : يا عم ولا تعصبي ولا اعصبك
اديني ماشي اهو

حسام جرى وراه : خلاص يا عم ماتقفش كده ،
ماكانش سؤال يعني

معاذ : لا يا حسام في فرق بين السؤال والشك ، أنت
كده بتشك ان في حاجة بيننا رغم اني قولتلك إنها
اختى وانى بحب منى ومش شايف غيرها بس أنت
لسه مصمم

حسام : حقاك عليا يا عم معلىش خلاص ماتزعلش ،
أنا بس ، لما شفتك بتكلمها يعنيبي ، هو اااا

معاذ ضحك : ايه ده انتى غير انه يا بطه ؟

حسام وشه أحمر من العصبية : معاذ

معاذ طلع يجري وهو بيضحك جامد : لا ده طلع بجد
، غير ان يا نانوس عين ماما ، غير ان يا كوتوموتو ،
ههههه

حسام طلع يجري وراه والأتنين بيضحكوا وبيضربوا
في بعض

تاني يوم معاذ اخذ سولاف وراحوا المستشفى وقابلوا
المدير اللي أتكلم معاها كتير وفهم ظروفها كويس
وكان مبسوط بيها لأنها ذكية جدا وشكلها مجتهده
ومحترمة

المدير اكد عليها إنها هتشتغل أول ما تخلص
امتحاناتها وهيبقى ليها مرتب ثابت زي كل
المرضين في المستشفى زيها زيهم ، وهي كانت
هتطير من الفرحة ان ربنا وقلها الناس دول في
طريقها عشان يساعدها ، شكرت المدير ومعاذ
ورocht بيتها وهي طول الطريق بتحمد ربنا
وبتشكره على كرمه

تاني يوم سولاف نزلت كأنها رايحة شغلها في
السوبر ماركت وقعدت تلف في المحلات على شغل
لحد ما تعبت وفي نص اليوم لقت تليفونها بيرن كان
رقم غريب : السلام عليكم مين ؟

كريمة : و عليكم السلام أنا خالتك كريمة يا سولاف
صاحبة مامتك في الشغل

سولاف اتوترت : خير يا خالة هي ماما حصلها
حاجة ولا أيه ؟

كريمة : مامتك تعبانه يا سولاف وبنقولها تروح بس
هي مصرّة تكمل شغل فقلنا نكلمك يمكن تعرفي
تقنعها

سولاف بخوف : خلاص يا خالتي أنا جيا لكم مسافة
السكة بس

سولاف قفلت مع كريمة وطلعت تجري لحد المحل
اللي مامتها بتشتغل فيه ، أول ما وصلت دورت
عليها بعنيها لحد ما شافتها قاعده على كرسي وشكلها
تعبانه جدا وكريمة واقفه جنبها وجييالها مايه ،
جريت بسرعة وقعدت تحت رجليها وفضلت تبوس
في ايديها وهي بتتهج : مالك يا ماما فيكي ايه يا
حبييتي ؟

حنان وهي بتمسح على خدها : أنا كويسه يا قلب
ماما ماتقلقيش

سولاف : لا شكك تعبانه خالص انتي مالك ؟

حنان : ماتخافيش يا حبيبي ده أنا دوخت شوية بس
كريمة هي اللي بتكبر المواضيع

كريمة : اخص عليكى يا حنان بقى أنا بكبر
المواضيع برضه ، مش انتى اللي كل يوم تدوخي
وتقعي من طولك يعني ؟

سولاف بصت لكريمة بصدمة : كل يوم بتقع من
طولها

بصت لمامتها : ماما بجد الكلام ده ؟

حنان : يا بنتى والله أنا كويسه ، ماتبطلي بقى يا
كريمة خوفتي البت

سولاف قامت وقفت وبتشد مامتها عشان تقوم :
قومي معايا يلا هنروح المستشفى

حنان : يا بت مستشفى ايه وبتاع ايه بس ؟ ليه كل ده
؟

سولاف بعياط وصوت اشبه بالصريخ : عشان مش
عايزة اخسرك انتى كمان ، بابا مات بالمرض زمان
ولو كنا اخدنا بالنا منه بدري كان ممكن يكون عايش
دلوقتي ، مش عايزه يحصلك حاجة انتى كمان ، أنا

هموت لو جراك حاجة ، فبالله عليكي تعالي معايا
نكشف ونتظمن

حنان قلبها اتنفض من تفكير بنتها واخذتها في
حضانها : لا حول ولا قوة الا بالله العلي العظيم ، ايه
يا بنتي اللي انتي بتقوليه ده بس ، أكرم الله يرحمه
مات عشان عمره خلص لحد كده ، احنا ماقصرناش
معاه في حاجة ده قدر ومكتوب ، استغفري ربنا يا
حبيبتي واهدي كده ، وبعدين أنا معاكي أهو والحمد
لله واقفه على رجليا بصحتي فخايفة ليه ؟

سولاف وهي بتعيط في حضانها : عشان خاطري يا
ماما تعالي بس نكشف ، عشان خاطري

حنان قلبها اتقطع على بنتها وقررت تروح معاها
عشان قلبها يتظمن ، وقبل ما يمشوا قابلوا نعيم
صاحب المحل : خير يا ام سولاف رايحه فين ؟
سولاف : عمو معلش ممكن أطلب من حضرتك
طلب ؟

نعيم : اطلبني يا بنتي

سولاف : ممكن اجي أنا اشتغل بدل ماما ، بالله عليك
، هشتغل كويس والله بس بالله عليك توافق ، ماما
تعبانه وأنا مش عايزاها تشتغل ، ينفع ؟

حنان شدت سولاف من دراعها جامد : ماتأخذهاش
يا حاج هي البت مش عارفه مالها النهارده

نعيم بص على سولاف اللي بتعيط وحنان : بس انتي
فعلا يا حنان يابنتي تعبانه خالص اليومين دول ، خلي
بنتك تشتغل مكانك وانتي ريحيلك شوية ولو عايزة
ترجعي مكانك موجود

سولاف : بجد يا عمو ؟

نعيم : ايوه بجد ، روحوا النهارده لأن شكلكم تعبان
ومن بكره تقدري تيجي الشغل

سولاف بتمسح دموعها : متشكره أوي يا عمو

نعيم : لا شكر على واجب يابنتي

نعيم مشي وحنان ضربت سولاف في كتفها : انتي يا
بت انتي اتهبلتي ولا ايه ؟ هتشتغلي مكاني إزاي ؟
وشغلك ودراستك وامتحاناتك اللي قربت ، هتعملي
ايه في كل ده ؟

سولاف : مش مهم كل ده المهم انتي دلوقتي ، تعالي
نروح المستشفى

شدتها من ايدها من غير ما تسبيلها فرصة تتكلم حتى
وراحوا المستشفى اللي شغال فيها معاذ اللي اول ما
شافهم استغرب وراح لهم : خير يا خالتي ؟ في ايه يا
سولاف ؟ حد حصله حاجة ولا ايه ؟

حنان : ماتقلقش يا حبيبي إحنا كويسين ، دوخت بس
شوية في الشغل بس زي ما انت شايف كده أختك
عملاي مناخه ومصممه اجي اكشف

سولاف : دكتور خالة كريمة بتقول إنها كل يوم بتقع
من طولها في الشغل فقتلتها نروح نكشف ، غلطانه
أنا كده ؟

معاذ : لا مش غلطانه ، تعالي يا خالتي معايا هدخلك
لدكتور ، لو فضلتوا قاعدين كده هتطولوا اوي

وفعلا معاذ أخذ حنان ودخلها لدكتور أكبر منه عشان
يكشف عليها

الدكتور : مش بتاخدي علاجك ليه يا حاجة ، صحتك
بقت في النازل خالص ، ده اسمه كلام برضه ؟

حنان : علاج ايه ده يا دكتور ؟

الدكتور : السكر

سولاف بصدمة : بس أمي مش مريضة سكر اساسا
الدكتور : إزاي بقى ! التحاليل بتقول أهو سكر درجة
تانية

سولاف بصت بخوف لمامتها وهي طبطبت على
ظهرها وبصت للدكتور : طيب والعمل ايه يا دكتور
؟

الدكتور : الأول هكتبك على علاج خافض للسكر
عشان نسيطر عليه ، وحاولي تظبطي اكلك وارتاحي
شوية لان عندك ضعف عام وتابعي معايا وهقولك
تعلمي ايه بعد كده ، نعدي بس الفترة دي الأول

الدكتور كتب العلاج وعطاه لحنان ومعاذ طمنهم ان
كل حاجة هتكون كويسه بإذن الله واشتر الهم العلاج
وفهم سولاف إزاي تديه لمامتها وركبهم تاكس عشان
يروحوا ورجع هو لشغله

حنان أول ما دخلت الشقة راحت على اوضتها
وقعدت على السرير بتفكر وسولاف دخلت عندها
وقعدت تحت رجليها : ماما

حنان أبتسمت : قلب ماما

سولاف بصوت مهزوز : انتى مش هتسيبيني صح ؟
 مش هتعملي زي بابا وتسيبيني لوحدي صح ؟
 حنان بتططب على شعرها : لا يا حبيبتى مش
 هسيبك باذن الله

سولاف : بس بابا مات هو كمان بالسكر

حنان : ربنا كبير يا سولاف ، ماتخلىش موت أكرم
 يعمل فيكي كده ، ده عمره يابنتى ، وهو دلوقتى في
 مكان أحسن بكتير عند رب رحيم ، وأنا باذن الله
 هبقى كويسه فماتخافيش

سولاف فضلت قاعده مع مامتها لحد ما نامت في
 حضنها وهي فضلت طول الليل سهرانه بتفكر في
 المستقبل

بصت لبنتها : شوفت بنتك يا أكرم ؟ كبرت وبقت
 عروسة آية في الجمال إزاي ؟ نسخة منك يا حبيبي ،
 بس يوم وفاتك لسه مآثر فيها لحد دلوقتى ، أعمل ايه
 عشان اطمئنها مش عارفه ؟ قلقانه عليها جدا وخايفه
 أموت قبل ماطمئن عليها مع راجل يحميها من بعدنا ،
 يارب أنت العالم بينا وبحالنا هون علينا ودبرلنا
 امورنا يا كريم

حنان بعد وقت كثير من الدعاء نامت جنب بنتها
وهي كلها امل ان بكره هيكون أحسن

تاني يوم سولاف صحت وصلت وبعد الفطار لسه
هتنزل الشغل مامتها وقففتها : لسه مصممه برضه
تنزلي مكاني ؟

سولاف وهي بتربط رباط الكوتشي : ايوه يا ماما ،
أنا قولتلك كثير بلاش انتى تشتغلي وانتى برضه
كنتى مصممه فقولت خلاص اديكي قاعدة مع خالتي
كريمة بدل ماتقعدى في البيت لوحداك بس لو الشغل
هيتعبك فبلاها أحسن

اتعدلت ومسكت كتافها : ماما أنا مش عايزة حاجة
من الدنيا غيرك ، عايزاكي جنبي وبصحة كويسه
وبس فعشان خاطري ريحي قلبي وخلي بالك من
نفسك أكثر ، أنا ماليش غيرك في الدنيا دي فلو
بتحبيني اسمعي كلامي

حنان حضنتها : حقاك عليا يا بنتي ، حقاك عليا

سولاف باست كتفها : يلا يا حبيبي أنا هنزل وانتي

خليكي مرتاحه وبلاش تعملي اي حاجة في البيت

ولو احتاجتي حاجة رني عليا ، ماشي ؟

حنان : ماشي يا بنت قلبي ، روعي يا حبيبي ربنا

يوقفلك ولاد الحلال ويفتحلك ابواب رزقه

سولاف أبتسمت : اللهم آمين ، يلا مع السلامه

حنان : مع السلامه يابنتي ، ربنا يحفظك يا حبيبي

.

سولاف نزلت وهي بتدعي ربنا يبسرلها الحال

ويقويها ، وقبل ما تدخل المحل قابلت حسام في

طريقها

حسام: ازيك يا ست البنات ؟

سولاف اتكسفت : ازيك أنت يا كابتن ؟

حسام : عرفت اللي حصل معاك ومعاك مامتك

سولاف بحزن : قدر الله وما شاء فعل ، إحنا مش

بايدنا حاجة نعملها

حسام قرب خطوة : بس انا في إيدي كثير

سولاف : قصدك ايه ؟

حسام سكت شويه بيفكر واخيرا أتكلم بعد ما قرر
يقولها عن شعوره ناحيتها : قصدي أنى أقدر
اساعدكم ، اطلبى انتى بس وأنا تحت أمرك

سولاف ساكته وبتحاول تستوعب الكلام وحسام
مسك ايدها : بصي انا مش عارف هو ايه احساسى
ده بس كل اللي أنا فاهمه أنى هعمل أي حاجه
عشانك

سولاف اتوترت وحاولت تسحب ايدها من ايده بس
هو ضغط عليها ومنعها : بصي أنا مش عايز ردك
دلوقتي بس عايزك تفكري في كلامي ، وخليكي
عارفه حاجه

قرب منها أكثر : أنا دايما موجود ، منين ماتحتاجيني
هتلاقيني ، أنا دايما موجود حوليكي يا سولاف في
كل مكان جنبك زي ضلك

سولاف وشها بقى أحمر من الاحراج وسحبت ايدها
جامد وبلجلجه: عن إيدك يا ، يا كابتن أنا عندي شغل
، اه عندي شغل ، عن إيدك

طلعت تجري من قدامه وهي حاطه ايديها على قلبها
اللي بيدق بجنون وهو متابعتها بنظراته وبيبتسم ، حط

ايدہ علی قلبہ و ہمس : خلاص انٹی بتاعتي انا يا
سولاف ، بتاعتي أنا وبس

كشر بشر : بس الأول نخلص من أي حد دايقك
وبعدها هخطفك من العالم ده كله

كان لسه هيمشي بس لمح الحاج نعيم فنادى عليه
وراح اتكلم معاه شوية وبعدها مشى وهو بيخطط
لخطط شريره في عقله

نعيم دخل المحل وبص شوية لسولاف بصمت
وبعدها نادى عليها

سولاف : خير يا عمو هو في حاجة ؟

نعيم : خير أكيد يابنتى ، ماما عامله ايه دلوقتى ؟
سولاف : الحمد لله ، روحنا كشفنا والدكتور كتبلها
على علاج

نعيم : طيب الحمد لله ، ربنا يعافياها ويعفو عنها

سولاف : يارب

نعيم : سمعت ان امتحاناتك قربت ومحتاجة وقت
تذاكري ؟

سولاف بحزن بتحاول تداريه : اه فعلا الامتحانات
قربت ولازم أذاكر ، بس ماتقلقش الشغل مشغل مش
هقصر والله ، ولما أروح هبقى اشوف كده الدنيا فيها
ايه

أبتسمت : أكيد ربنا هيساعدني

نعيم أبتسم : فعلا انتى بنت حلال واكيد ربنا
هيساعدك وأنا كمان هساعدك

سولاف : إزاي ؟

نعيم : هسمحك تجيبى كتبك وتذاكري هنا طول
مانتى فاضيه ومافيش زباين لو تحبي يعني
سولاف عينيها لمعت بسعادة : بجد يا عمو عادي
اجيب كتبى ؟

نعيم : اه عادي طلاما مش هتقصرى فى شغلك
فعادي

سولاف : متشكره متشكره أوي يا عمو

سولاف رجعت لشغلها بطاقة كبيرة وامل جديد
وكانت بتفكر كثير فى حسام وبتفكر كلامه ليه
وبتبتسم

ونعيم كمان افكر كلام حسام معاه ، هو اللي فهمه
ظروف سولاف وانها لازم تذاكر كويس عشان
تعرف تشتغل في المستشفى بس ما عندهاش وقت
وفضل يقنعه كثير انه يسببها تذاكر براحتها

بتعدي الأيام وسولاف دافنه نفسها في المذاكرة
والشغل من ناحية ، وبتخلي بالها من مامتها والبيت
من الناحية الثانية ، بس وجود حسام اللي اخدت بالها
انه دايم موجود حوليها ، بيدعمها نفسيا ويببسطها
جدا

خلصت الامتحانات واخيرا سولاف عرفت تاخذ
نفسها شوية وحاسه ان حمل كبير انزاح من فوق
كتافها ، وبعدها راحت تشتغل في المستشفى ، وكل
حاجة كانت ماشية تمام والوضع مستقر

في يوم واحده من الممرضات ابنها كان تعبان وكان
لازم تروح بدري ومحتاجة حد يغطي مكانها
وسولاف قررت تقعد بدالها

سارة اللي بتاخذ التدريب بتاعها في المستشفى بتغني
: سو يا سولي يا لولتي

سولاف بضحك : نعم يا سارة يا سوسو يا
سر سورتى ؟

سارة : انتى لسه ماغيرتيش لبسك ؟ هنتأخر كده
سولاف : أنا مش هروح النهارده ، عندي نابطشية
بالليل

سارة باستغراب : ده من امتى ده وانتى بتشتغلي
بالليل ؟

سولاف سندات على مكتب الإستقبال بجانبها : عارفة
ميس نسمة اللي شغالة معانا ؟

سارة : اها مالها ؟

سولاف : مش هتعرف تقعد النهارده عشان ابنها
الصغير تعبان ومحتاجها فوقلتها تروح هي وأنا
هاخذ مكانها

سارة حطت ايديها في وسطها : لا بجد يا بت ناقصة
انتى شغل فوق شغلك وحمل زيادة عشان تقوليلها
كده ؟

سولاف : انتى عارفه إنها ساعدتني كتير يا سارة من
ساعة ماجيت هنا وكنت عايزة اردلها جزء من
المساعدة ، وبعدين ده يوم يعني مش حوار
سارة لوت شفايفها : مش عارفه أنا الدماغ الناشفه
دي جيبها منين ؟

سولاف ضحكت وردت عليها وهي بتكتب شوية
حاجات في ملف : جيبها من سوق الجمعة ياختي
سارة : أنا قولت كده برضة

مسكت في دراعها فجأة وبتتكلم بهمس : بت بت
بصي مين جه ؟

سولاف بصت وراها ولقت واحد من الدكاترة وده
اسمه يحي وبصت لسارة بقله حيلة : تاني يا سارة ؟
تاالني !

سارة ضربتها في جنبها : بس انتى يا قطاعة
الارزاق سيبييني أحب في الواد براحتى ، يالهوي يا
سولي الواد مز مز بشكل

رفعت ايديها كأنها بتدعي : يارب يارب جوز هولي
الواد ده

سولاف ضحكت على صاحبها : ربنا يهديكي يا
سارة والله

سارة : طيب شوفي بقى لو ما وقعتهوش الدبدوب ده
في دباديبي مابقاش أنا سارة

سولاف : روعي يا سارة يا بت ام سارة إلهي يا رب
تتجوزيه لو فيه خير ليكي

سارة حضنتها جامد : قلبي قلبي انتى والله يا سولي

.

معاذ قاطعهم : انتى جايبالها شوكلاتة ولا ايه يا
سولي عشان كل الحب ده ؟ أصل أنا عارف اختى
مصلحجية وبتاعت كرشها

سارة ضربته في كتفه : وسع يالا وأنت دمك ثقيل
كده

معاذ : بس ابت ده أنا دمي ده شربات مكرر ، يلا
خلصتوا ولا ايه ؟ نروح ؟

سولاف : ابيه أنا مش هروح معاكم النهاردة عندي
شغل

معاذ استغرب وهي حكتله الموضوع كله

معاذ : طيب كلمتي خالتي بلغتها ؟

سولاف : ايوه كلمتها واطمنت عليها

معاذ : ماشي يا سولاف وأنا كمان موجود لو حصل

حاجة ابقى بلغيني على طول

سولاف أبتسمت : ربنا مايحرمني منك يا ابيه

معاذ : ولا يحرمنا منك ، يلا يا سارة

سارة همست لسولاف في ودنها : ما تخليني معاكي

شوية اراقب الواد المز بتاعي ؟

سولاف ضحكت : انتى خليتيه بتاعك مرة واحده ؟

معاذ : في ايه ؟ بتتوشوشو في ايه ؟

سولاف : ولا حاجة ، سارة خلصت أهي

سارة : ماشي يا ندلة يا عرة الصحاب

همست تاني : طيب صور هولي حتى وابعثيلي واتس

وحياة عيالك يا شيخة

سولاف زقتها : امشي ابت أمشي

سارة مشت مع معاذ وهي بتبص لسولاف بترجي

وسولاف بتشاور لها باي باي بايدها وبتضحك

خلص الليل وعلى الفجر سولاف خلصت شغلها
وغيرت لبسها ومشت ، الشوارع كانت ساكته
والمحلات كلها تقريبا قافله ومافيش حد ماشي في
الشارع ، كانت هتركب تاكس بس مالقتش فقررت
تتمشى شويه لحد البيت

قفلت الجاكيه بتاعها ورفعت الكوفية على وشها من
برد الصبح وسرعت خطواتها شوية ، وهي ماشية
عدت على السوبر ماركت اللي كانت شغالة فيه قبل
كده ، وقفت شوية وبصت عليه : ربنا يسامحك يا عم
مهران بس والله لولا إنك طردتني من عندك يومها
ماكنش زمني في المستشفى دي دلوقتي ، يلا ربنا
يسامح الجميع

كانت لسه هتمشي لقت إبراهيم جارهم طالع من
السوبر ماركت بعد ما اشترى السجاير بتاعته وأول
ما شافها : ايه ده !! سولاف !! والله وبقيتي كل يوم
والتاني ياما راجعه في نص الليل أو وش الفجر

سولاف ماردتش عليه ومشت بس هو جرى وراها
ومسك ايدها شدها عليه جامد لدرجة إنها خبطت في
صدره

سولاف : أنت اتجننت ؟ وسع كده

ابراهيم بشر : أنا أبقي مجنون بجد لو فوت الفرصة
دي

شدها جامد لشارع سد وحاصرها في الحيطه وقرب
وشه منها برغبة واضحه : قولتلك هندمك وهكسر
مناخيرك دي اللي رفعها للسما ماصدقتيش ، واهو
جت من عند ربنا وبقيتي تحت ايدي من غير ما
اخطت لأي حاجة

قرب منها وحاول يبوسها وهي عماله تضربه وتزقه
وتزعق : أنت مجنون والله ، وسع كده يا متخلف
أنت

مرة واحده لقت إبراهيم وقع مغمى عليه وحد واقف
وراه ، بصت للشخص وأبتسمت : أنت على طول
هتظهرلي كده كل مرة ابقي في مشكلة ؟

حسام ضحك : اه

سولاف : بتعرف مكاني منين ؟

حسام قرب منها : مش قولتلك أنا على طول حوليكي
وجنبك

سولاف أبتسمت بكسوف وهو ضرب ابراهيم جامد
برجله في بطنه : عيل @\$# ، كان عايز منك ايه
الواد ده ؟

سولاف : ده واحد مجنون والله ، مصر يتجوزني
بالعافية ومهما ارفضه ما عندهوش لا دم ولا كرامه
ويرجع تاني

حسام كشر بغضب وتوجس : وانتى ليه مش عايزة
تتجوزيه ؟

سولاف : ده واحد شمام وبتاع بنات ، اكيد مش
هطمن على نفسي مع حد زيه

حسام اتنهد براحة واتكلم بنبرة حب : طيب وايه
رأيك في واحد رياضي ومالهوش في الحشيش ولا
البنات توافقي عليه ؟

سولاف وشها أحمر جامد وسكتت وهو كرر كلامه :
ها ؟ تتجوزيني يا سولاف ؟

سولاف اتوترت وبتفرك في صوابعها : اءااا ، ك ،
كلم ماما ، عن إذتك

سابتة وطلعت تجري تهرب من قدامه وهي قلبها
بيدق جامد وحسام متابعتها بنظراته وبيضحك : والله
ووقعتي

سولاف وصلت البيت ودخلت قعدت على أول
كرسي قابلها وحطت ايديها على قلبها : يالهوي
معقول كان بيتكلم جد ؟

حنان كانت صاحبة بتصلي الفجر وحست بسولاف
جت فطلعت من اوضتها : سولاف انتي جيتي ؟
سولاف حاولت تداري توترها : ايوه يا حنون ،
صباح الخير يا حبيبي ، عامله ايه ؟

حنان : الحمد لله

مسكت وشها بين ايديها : وشك عامل كده ليه يا بت
؟

سولاف : أحم مافيش حاجة ، عايزة أنام بس
حنان : مش عارفه أنا والله بتتعبني نفسك كده ليه ؟
سولاف بابتسامه : ولا تعب ولا حاجة يا حبيبي ،
يلا أنا هصلي واروح أنام شوية
حنان : مش هتاكلياك لقمه ؟

سولاف من جوا اوضتها بتغير : لا مش جعانه

صلت وراحت نامت على سريرها وبصت للسقف ،
جواها احاسيس متلخبطة ، مبسوطه زي اي بنت
بيتقدمها واحد بس كان في شعور مش مريحها ،
حاسة بقلق ومش فاهمه ليه ؟ غمضت عينيها
وقررت ماتفكرش وتسبب كل حاجة تمشي لوحدها ،
وخلال دقائق كانت في سابع نومه

ظ

بعد الموقف ده ابراهيم ماتعرضتش لسولاف ثاني ،
وهي عرفت ان في ناس طلعا عليه ثاني يوم
وضربوه بغباء لدرجة انه دخل المستشفى بين الحيا
والموت بس ماحدث عارف مين دول ولا عملوا كده
ليه؟؟

في واحده من الشقق كانت واحدة بتزق بك كل صوتها
: على جثتي ده يحصل
حسام : ليه بس ياما ؟

سهير : هو ايه اللي ليه ؟ يعني أنت الدنيا خلاص
داقت بيك مالمقتش غير بنت حنان وعايز تتجوزها ؟
ليه ؟

حسام : وفيها ايه ؟ أنا بحبها

سهير : اتجننت أنت ولا ايه ؟ هو ايه اللي بحبها ؟
حبك برص ياخويا ، أنت شكلك اتفهيت في عقلك ،
بقى تسبب كل بنات الحته اللي هيموتوا عليك ومش
لاقي غير البت الكحيانه دي اللي بتكمل عشاها نوم
وماحيلتهاش اللضا وعايز تتجوزها ، ليه ان شاء الله
؟

حسام وقف بنرفزة : أما أنا مش باخد رأيك على
فكرة أنا ببلغك بس ، أنتي كل شوية تقولي لي اتجوز
اتجوز وأنا أهو هتجوز ، سولاف أنا بحبها
ومايفرقش معايا هي بنت مين ولا معاها ايه ولا اي
حاجة من ده ، أنا عايزها هي نفسها ، وده اللي
عندي

سابها ودخل اوضته وسهير بتزعق بره : والله ما
هيحصل يا حسام ، ويانا يانت

كل ده كانت متابعاها مها من ورا باب اوضتها ، قفلت
الباب براحة وقعدت وراه : يا ربي ، هي ايه اللي
وقعها في واحد غبي زي ده بس ؟؟ ربنا يتولاها
بجد

فونها رن بصت فيه كان خطيبها عبد الرحمن
اتعدلت في قعدتها واتحنحت : ألو
عبد الرحمن : يا أجمل ألو في الدنيا
مها أبتسمت بحب : إزيك ؟

عبد الرحمن : بخير طول مانا قادر اسمع صوتك
مها اخدت الدبدوب اللي جنبها -واللى هو كان
جايبهولها هدية- وحضنته جامد بحب : ربنا يديم
الخير عليك يااا

عبد الرحمن : يا ايه ؟ قولها
مها سكتت بكسوف وهو قال بهيام : بحبك
مها بهمس : وأنا كمان بحبك
عبد الرحمن أخذ نفس طويل كأنه بيسمع سنفونية :
أنا راجع مصر بكرة
مها وقفت بسعادة وعيونها بتلمع : بجد ؟ بجد يا
حبيبي اخيرا هترجع ؟

عبد الرحمن : ايوه يا قلب حبيبك ، أخيرا هنزل
وهتجوزك هاخذك في حضني وماحدث يقدر يقولي
حاجة

مها حضنت الدبوب تاني كأنها بتحضنه هو : ترجع
بالسلامة يا حبيبي

فضلوا يتكلموا شوية مع بعض لحد ما مها نامت منه
وهو همس بحب : تصبحي على خير يا حبيبي

بتعدي الأيام وسهير كل شوية تتخانق مع حسام
بسبب سولاف وهو مصر برضه يتجوزها

سهير : يا حسام يابني ال

حسام قاطعها بضيق : اووووف بقى ياما ، هو احنا
اللى هنعيده هنزيده ولا ايه ؟

سهير قعدت جنبه ومسكت ايده بتحاول تقنعه : طيب
أنت حتى ما شفتهاش ، شوفها الأول

حسام : ما شفتش ايه ياما ، ايش حال كانوا ساكنين
في الشارع اللي قصادنا !! وبعدين مي بنت أختك

تقريباً متربيه معانا و عارفها كويس مش محتاج اقعد
معاهها عشان اعرفها

سهير : طيب ده كويس ، أهي مننا و علينا و عارفينها
كويس و بنت خالتك كمان و هي أولى بيك

حسام : ياما بقى

.

قاطعتهم مها اللي كانت خارجة من المطبخ : والله
ماما كلامها صح ، أهو انتوا الاتنين من نفس العجينة
ال@#\$ هتليقوا على ب

مالحقتش تكمل كلامها من القلم اللي نزل على وشها
من حسام : العجينة ال @\$# اللي انتى بتتكلمي
عنها دي انتى منها انتى كمان ، او عي تنسي نفسك يا
مها

سهير بفرحة : ايوه كده حبيب قلب أمك ، راجل
بصحيح ، وانتى انجري على جوا خلصي اللي
بتعمليه

مها بصت بكسرة لأخوها اللي دايماً يضربها على
الكبيرة والصغيرة وبصت لماتها اللي دايماً تشجعه
على كده : أنا بكرهكم

دخلت جري على المطبخ تاني وقعدت تعيط وهي
بتكلم نفسها : ناس ظلمه والله ، يارب ، يارب ريحني
منهم بقى

افتكرت حبيبها عبد الرحمن اللي جاي النهارده
عشان يحدد معاد الفرح وأبتسمت من بين دموعها :
أنت اللي مهون عليا يا حبيبي ، يا رب تيجي بسرعة

قامت تخلص الأكل اللي بتطبخه عشان خاطر حبيبها
وهي بتحاول تتماسك عشانه

في الصالون بره

سهير بتخبط كف على كف : شوف البت عديمة
الربايه بتقولي بكرهك وفي وشي كده ، مش كفاية
إنها عايزة تتجوز بسلامته ده وأنا مش راضيه عليه
أصلا ولا عيلته ، منه لله أبوها هو اللي مقويها عليا
ونافشلها ريشها

حسام جه يدخل اوضته سهير مسكت دراعه : استنى
هنا رايح فين ؟

حسام : هغير عشان أنزل الجيم

سهير : هتفكر في اللي قانتك عليه صح ؟ مي دي
والله مش هتلاقي أحسن منها

محمد كان تحت بيحيب شوية طلبات وطلع ، دخل
الشقة على جملة سهير دي

محمد : انتي مش هتسيبي الواد في حالة بقى ؟ مش
كفاية البت مش عاجبك خطيبها ومن ساعة ما
اتخطبتله وانتى بتعاملليها ولا كأنها بنت ضرتك ،
كمان ماسكه في الولد ؟ ما تسيبي العيال في حالهم يا

سهير

سهير : يا مراري يانا ياما ، يا راجل أنت ايه ؟
عاجبك يعني اللي عيالك بيعملوه ده ؟ مش كفاية
الموكوسة بنت الموكوسة اللي جوا دي وخطيبها
المصون

محمد : والله أنا مش فاهم انتي عايزة ايه بالظبط ،
عبد الرحمن الله أكبر عليه شاب أدب واخلاق
ومجتهد في شغله وبيحب بنتك ولو يطول يجييلها
حتة من السما هيحبيها ، عايزة ايه تاني ؟

سهير : هو مش عاجبني ، ولا امه الحرباية دي
عجباني

حسام : طيب أنا هسيبكم بقى في خناقة كل يوم
وهنزل الجيم بتاعي

سهير : حسام

حسام بنرفزة : أما خلص الكلام ، جواز من مي او
غيرها مش متجوز ، وسولاف بتاعتي خلاص ، مش
هسيبها ، قصرو

سابها وراح غير هدومه ونزل الجيم بتاعه وسهير
دمها بيتحرق منه

.

سهير : عوض عليا عوض الصابرين يا رب ، يا
ميلة بختك في عيالك يا سهير

محمد سابها تندب حظها واخذ الحاجات اللي اشتراها
ودخل المطبخ عند مها

محمد : حبيبي أساعدك في حاجة ؟

مها : لا يا نور عيني تسلم ، أنا يعتبر خلصت
خلاص

محمد : بنتى حبيبتى ست بيت شاطره

مها بغرور مصطنع : أكيد طبعا هو أنا أي حد

محمد ضحك : لا مش أي حد ، انتى ست البنات
كلهم ، يلا كلها ساعتين و عبد الرحمن يوصل ،
يادوب تجهزي نفسك ولو احتاجتي حاجة قوليلي
ماشي يا بابا ؟

مها : حاضر ، ربنا ما يحرمني منك ابدأ يا حبيبي

محمد خرج من المطبخ ومها كملت اللي بتعمله
بسعادة وقلبها بيدق جامد كل أما تفكر في حبيبها
وإنها أخيراً هتشوفه بعد سفر سنه كامله ؛ سافر
يشتغل عشان يقنع مامتها بيه ويثبتلها إنه قد
المسؤوليه وأخيراً رجع من كام يوم

خلصت اللي بتعمله وراحت اخدت شاور وجهزت
كان الضيوف وصلوا ، ومها كان نفسها تجري على
حضن خطيبها بس تماسكت

عدى اليوم و عبد الرحمن حدد يوم الفرح مع محمد
وطبعا اليوم ما خلاش من كلام سهير السم لعبد
الرحمن بس هو ساكت ومستحمل عشان خاطر مها
حبيبته

هنسرع الأحداث شوية

مها اتجوزت عبد الرحمن وهو معيشها في جنبه
حرفيا وبيعوضها عن كل الأيام اللي عدت

.

حسام أتقدم لسولاف وهي وافقت واتخطبوا وبدؤوا
يجهزوا شقتهم واللي كانت فوق شقة محمد ، وحسام
بيحاول على قد ما يقدر مايخليش سولاف تحتك
بسهير خالص

.

سارة أخت معاذ لسه بتحب في دكتور يحي من بعيد
وهو مش حاسس بيها

.

ومعاذ لسه بيجهز نفسه عشان يتجوز هو كمان

جه يوم فرح حسام وسولاف

معاذ : اه يا سيدي على الناس اللي بتتجوز ، بقى أنا
ابقى خاطب بقالي ٣ سنين ولسه ماتجوزتش وأنت
في ٣ شهور بس خطبت البت و هتتجوزها أهو ؟
حسام : أنت بتقر علينا يالا ؟

معاذ : اه ، عايز أتجوز أنا كمان ، جوزوني بقى
حسام : يخربيتك هتفضحنا ، ايه يالا ؟؟ ماتنشف
شوية

معاذ قعد و حط ايده على خده : لا مش عايز انشف ،
أنا عايز اتجوز ، و بنت ال#@ \$ منى منشفا عليا
خالص ، بقى بقولها هاتي حزن قامت منولاني
بالقلم و تقولي أنت مش متربي يالا ، وفي مرة كنا في
المستشفى و عندنا نابطشية بالليل و الجو جميل و جيت
ابوسها قامت رافعه عليا المشرط و قالتلي هتتلم و لا
اخليك لا تصلح لشيء ، منها لله بنت فتحية

حسام ضحك جامد : أحسن تستاهل

معاذ: ماليش فيه بقى أنا عايز اتجوز أنا كمان مش
هينفع كده والله

حسام : يا باير يا معفن

معاذ : ما بلاش ، أنا ممكن اخربها عليك برضه

حسام بصله بشر وهو ضحك وراح حضنه : ألف
مبروك يا كوتش أنا حقيقي مبسوط النهارده صاحب
عمري واختي هيتجوزوا حقيقي ربنا يسعدكم
مسك كتافه : أنت اخدت ست البنات وقمر الحنة
فحافظ عليها

حسام جز على اسنانه بضيق من كلامه بس مابينش
: أكيد

على الناحية الثانية سولاف بتجهز ، لبست فستانها
وخلصت وبصت لمامتها

حنان بسعادة : بسم الله ما شاء الله الله أكبر ، عيني
عليكي بارده يا حبيبي ، ربنا يهنكي ويسعدك يا
بنت قلبي

سولاف حضنتها جامد : أنا بحبك أوي يا ماما ، ربنا
يباركلي فيكي يا حبيبي

سهير دخلت عندهم ولوت شفايفها : مش يلا يا
عروسه ولا عايزة تلطعي ابني في الشارع أكثر من
كده ؟

سولاف ماكانتش بترتاح لسهير دي ومش بتحب
تتعامل معاها وحنان كمان كانت مقلقه منها وحاسه
إنها هتكون حماه شريرة لبنتها بس اللي مطمئنا ان
حسام قالهم مالهمش دعوة بيها ، هو هيتعامل معاها
وينفذلها اللي عايزاه بعيد عن سولاف

حنان : جايين أهو يام حسام

مها راحت حضنت سولاف وبصت في عيونها أوي
: أنتى ايه بس اللي عملتية في نفسك ده ؟

سولاف استغربت كلامها ، مها رغم إنها طيبه جدا
وحنينه بس كانت كتير تقعد تقولها كلام غريب معناه
إنها تبعد عن حسام

سولاف : قصدك ايه ؟

مها أبتسمت : قصدي إنك قمر أوي ما شاء الله
عليكي

سولاف أبتسمت : حبيبتى ربنا يخليكي

حسام جه أخذ سولاف وراحوا القاعة وبدأوا الفرح
وبما ان معاذ يعتبر زي اخو سولاف فهو كان وكيها

وخط ايده في ايد حسام وكتبوا الكتاب ، وبعد
ساعتين تقريبا من الضحك والاكل والاغاني والفرحة
، خلص الفرح وحسام أخذ عروسته وخرجوا

وعلى باب القاعة الكل بدء يودع العروسين ومعاذ
بص لسولاف : ألف مبروك عليك يا قمر
سولاف : الله يبارك فيك يا ابيه ، وعقبالك
معاذ ضحك : ايوه ادعيلي كثير لحسن أنا خللت
خلاص من القاعده

سولاف ومعاذ وحنان هزروا شوية مع بعض وحسام
بيراقبهم وعينيه بتطق شرار وهاين عليه يجيب
سولاف من شعرها عشان ماتتكلمش معاهم

بعد السلامات العرسان مشوا ومعاذ اخذ حنان
يروحها معاهم وبعد ما وصلها بص لمنى : ابوس
ايدك يا شيخه خرينا نتجوز بقى أنا بجد تعبت
منى : وهو أنا كان في ايدي وقلت لا ، وبعدين
مستعجل ليه ؟

معاذ : يا مفترية بقى أنا مستعجل ؟؟ ده أنا بورت
يا بت من كتر القاعده ، ثلاث سنين يا قادره ؟؟ ثلاثة
؟؟

منى ضحكت : خلاص هانت كلها كام شهر

معاذ بييرطم : كلها كام شهر

منى ضحكت وسابته وطلعت العمارة وهو طلع
وراها : يا بت بتسيبيني وتمشي ؟ يا مزه ، انت يا
بطل

منى بصتله بشر : لم نفسك يا معاذ

معاذ قرب منها : ليه ؟ مانتي بطل فعلا

منى : وأنت صايح وضايح ومش متربي

معاذ ضحك : مش مشكله عادي

سكت شويه وهو بيوصلها بحب واتفك بجديه : بعد

الأيام والله عشان تبقى في حضني ، بحبك

منى اتكسفت : وأنا كمان بحبك

معاذ : يلا ، زي ما قلتى كلها كام شهر ، وهبقى

عريس زي الواد حسام المعفن ده

منى وشها اتغير : حسام اه

معاذ : مش عارف انتى مش طايقاه ليه ؟

منى : والله ما عرف بس انا مش بلعاه خالص الشخص
ده ، شكله لوحده مش بيريجني

معاذ : يابنتى حسام ده صاحبي من زمان واعرفه
كويس وعمرى ماشفت منه حاجة وحشه ، مش
عارف انتى مش قبلاه ليه ؟

منى هزت كتافها وكملت طلوع السلم : ما عرفش

.

دخلت شقتها بعد ما سلمت على معاذ وهو طلع شقته
وبيفكر في كلام منى ، سارة اخته كمان كانت بتقوله
نفس الكلام وإنها مش بترتاح لحسام ده ومش فاهم
هما ليه كده ؟ نفض الأفكار دي كلها من دماغه
وشغل نفسه في حاجات تانية

سولاف كانت قاعده في العربية جنب حسام
ومستغربه شكله ، حساه مخنوق أو متعصب بس
حاولت تقنع نفسها إنه بيتهيأها مش اكر ، بس
بمجرد ما وصلوا البيت حسام بدأ يزق فيها جامد

إنها إزاي تقف تضحك مع معاذ كده وتهزر عادي ،
وهي واقفه مصدومه منه ومش مصدقة انه بيز عقلها
بالمنظر ده وفي ليلة فرحهم اللي المفروض تكون
أجمل ليلة في حياتهم ، بس فسرت ده إنه بيغير عليها
وهي فعلا ماكانش ينفع تقف مع معاذ كده ، هي حتى
لو بتعتبره زي اخوها بس هو في الآخر مش اخوها

سولاف راحت قعدت جنب حسام وواحد واحد
بدأت تتكلم معاه براحه واعتذرت عن اللي عملته
وعرفت بهدوءها ورقتها إنها تمتص غضبه وعاش
الإثنين أول ليلة ليهم كزوج وزوجة

تاني يوم سولاف صحت على لمسات حسام ، فتحت

عينها وبصتله : صباح الخير

حسام : صباح الجمال

قرب منها وباسها : ايه القمر ده كله ؟

سولاف بابتسامة : طول عمري

حسام ضحك : لا وواثقه من نفسها أوي

سولاف : ايوه طبعا ، وهو ايه اللي هيخليني مش
واثقه في نفسي يعني ؟

حسام : أموت أنا في الواصل ده ، بما إنك واثقه كده
بقي وريني شطارتك

سولاف اتكسفت وخبت وشها بالغطا وهو ضحك :
قلبتي قطه شيرازي يعني ، أومال فين واثقة في
نفسى ؟

سولاف باحراج : بس بقى

حسام نزلها تحت الغطا وحاوطها بدراعاته عشان
يبقى فوقها : لا طبعا مش هبس ، ده أنا ماصدقت
اتجوزتك وتبقى بتاعتي

سولاف استغربت كلمه بتاعتي اللي بيكررها كل
شوية بس أقنعت نفسها إنها كلمه عاديه ومافكرتش
فيها كثير أو بمعنى أصح حسام ماسابلهاش فرصة
إنها تفكر أساسا

بعد وقت الإثنين فاقوا على خبط جامد على الباب ،
حاولوا يتجاهلوه بس الخبط مش بيوقف

حسام : مين ابن ال#@ \$ الى بيخبط بالمنظر ده
وفي الساعة دي ؟

قام لبس هدومه وفتح الباب لقي مامته في وشه اللي
ماسابتلوش فرصه يتكلم وزقته ودخلت الشقة كأنها
بتاعتها

سهير : حبيبي جبتك فطار زمانك جعان يا عيني
وما عندكش حد يأكلك

سولاف سمعت صوت حماتها من جوا واستغربت
من وجودها في الوقت ده والاكثر كلامها ، يعني ايه
ما عندكش حد يأكلك أو مال هي بتعمل ايه ؟ قامت
تلبس هدومها عشان تطلع تسلم عليها ، هي في
الآخر حماتها ومش عايزه تعمل مشاكل معاها

سهير جابت الشقة كلها بعينيها : أو مال فين ست
الحسن والجمال ؟

حسام : بتغير وجاية

قعد على الكنبه وسولاف طلعت بابتسامة جميلة على
شفايفها : إزيك يا ماما عاملة ايه ؟

سهير شهقت بسوقيه : جاك ماو ، ماما ايه دي ياختى
؟

سولاف اتكسفت جدا وحببت تغير الموضوع :
تشرابي ايه حضرتك ؟

سهير : وهو أنا مستنياكي انتى تقوليلى اشرب ايه
وأعمل ايه ؟ ده بيت ابني يعني بيتي وأعمل اللي أنا
عايزاه براحتى

حسام اتدخل : أما بيتهيايلى سمعت بابا بينادي عليكى
، روي شوفي كده ممكن يكون عايز حاجة ولا ايه
؟؟

سهير بصتله بغيط وفهمت إنه بيمشيها بالذوق
واخذت بعضها ومشيت ورزعت الباب وراها وهي
بتتوعد لسولاف

سولاف بحزن : هي مامتك ليه مش بتحبني ؟
حسام : مش حكاية مش بتحبك ، بس هي شديدة
شوية

شدها من وسطها عليه : وبعدين انتى عايزاها تحبك
ليه ؟ هو حبي ليكي مش كفاية ؟

سولاف بابتسامة : لا كفاية

حسام : يلا نكمل بقى اللى كنا بنعمله ولا ايه ؟

بتعدي الأيام ومدايقات سهير لسولاف كل يوم بتزيد
وكلامها الجارح كل يوم بيوجع أكثر وسولاف مش
فاهمه هي ليه بتعمل كده وكل أما تقول لحسام يفهمها
طبعها أو حتى يعرفها ترضيها إزاي يقولها
ماتعامليش معاها أو ماتكلميهاش ، وهي مش فاهمه
إزاي يقولها كده أصلا ؟ ساعات بتحس إنه بيكره
مامته بس بتكذب نفسها

الاسوء تصرفاته هو شخصيا ، ساعات كتير بيفضل
بيصلها بصات غريبه وهي بتتكلم في الفون مع
صحابتها أو مامتها ، وكتير بيتعصب عليها لو لقاها
بتتكلم مع الجيران ، وده موترها وموتر الجو بينهم

في يوم سولاف كانت راجعه من السوق وبعد ما
حطت الأكياس في المطبخ طلعت برواز جميل مش

كبير أوي كان صورة للبحر ، بصتلته بحب واخذته
وراحت لحسام

سولاف: حسام عايزة اوريك حاجة

حسام : امم

سولاف حطت البرواز قدامه : ايه رأيك ؟

حسام سكت شوية وهي اتكلمت : حلو أوي صح ؟
البحر حقيقي شكله جميل أنا بحبه أوي ونفسي اشوفه
على الحقيقة

حسام مسك البرواز ورزعه في الأرض اتكسر ميت
حته

سولاف شهقت بصدمة : ليه كده يا حسام ؟

حسام : سوري مش قصدي عموما هو ماكانش حلو
أساسا وبلاش تجيبي البراويز دي تاني مش حلوين
خالص

سابها ودخل المطبخ يعمل الشيك بروتين بتاعه وهي
مسكت البرواز بحزن ، ليه يكسره كده ؟ حتى لو
مش حلو ماكانش المفروض يكسره كده ويكسر قلبها
معاه بالشكل ده

بعد حوالي ٤ شهور

معاذ اخيرا اتجوز منى بعد ما جنن كل اللي حوليه
معاه وبعد الجواز اعتدل الناس وبقى قليل لما حد
يشوفه لان بطبيعة شغله وقته الفاضي قليل وهو
بيستغله يكون مع حبيبته

.

أما الوضع عند سولاف كان كله توتر بينها وبين
حسام ، وفي يوم كانت في المستشفى وبتصفح النت
، سارة جت من وراها : ايوه بقى يا عم على الناس
المتجوزين ، انتوا تدوروا على طريقة عمل التورته
ام دورين واحنا حتى مش لاقين كيس دقيق يبص في
وشنا

سولاف بضحك : يالهوي عليكى يا سارة ، انتى
محسساني إنك خلاص عنستي ، ايش حال يا بت إنك
كل يوم والتاني متقدمك عريس وانتى اللى ترفضى
؟

سارة قعدت جنبها : ما أنا مش عايزة أتجوز أي
واحد وخلاص

سولاف : أومال عايزة مين ؟

سارة بتهيده : المز أبو عيون خضرا

سولاف بضحك : يادي الخيبه عليا وعلى ابو عيون
خضرا

سارة بغيط : يا سولاف هموت من القهرة والله بقالي
١٠ شهور تدريب هنا ومابصليش حتى ، حاسه أنى
هخلص باقي السنة التدريب وامشي وهو مايعرفش
أنى عايشه على الكوكب أساسا

سولاف : روجي قوليله يا دكتور يحي أنا مهوسه
بيك اتجوزني بقى

سارة وقفت : تصدقي فكرة ، أما أروح اقله بقى
جت تمشي بس سولاف مسكتها بسرعه : يا مجنونه
انتى هتعملي ايه ؟

سارة : هروح اقله بدل ما هو لطح كده

جالها صوت من وراها : مين ده اللي لطح ؟

سارة بصت وراها وصرخت بخضه : اللطح !!

سولاف حطت ايدها على بوء سارة تسكتها وأبتسمت
بعملية : صباح الخير يا دكتور يحي

يحي : صباح النور

بص لسارة اللي واقفت ورا سولاف باحراج : أنا
محتاج ممرضة تشتغل معايا عشان ندى قدمت
استقالتها ، فاضية ؟

سارة شاورت على نفسها ببلاهة : أنا ؟

يحي : ايه يا انسه وأنا اللي بقول إنك مجتهده
ومركزة في شغلك هتخليني أغير رأيي ولا ايه ؟
سارة بان دفاع : ألا مجتهده ! حضرتك مش هتلاقي
ممرضة مجتهده زيي في المستشفى دي كلها
يحي : طيب كويس ، يلا بقى شوفيلي كشوفات
النهارده ووظبيلي العمليات

سارة بهيام : حاضر

يحي مشي وسارة متابعاه بعنيها لحد ما اختفى من
قدامها وفضلت تضرب في سولاف وهي بتتنطت :
بيحبني بيحبني بيحبني

سولاف : بيحبك ايه يا مجنونه انتي ؟

سارة : يا بت ده ساب المستشفى كلها وجالي أنا
عشان أشتغل معاه يبقى اسمه ايه ده

سولاف : يبقى اسمه إنك الممرضة الوحيدة اللي
متاحة حاليا

سارة ضربتها : بطلي هزار بقي

سولاف بجديه : أنا مش بهزر على فكره ، سارة
حبيبتي أنا بعترك زي اختي ومش عايزاكي تتعلقي
بيه وهو يمكن يكون مش شايفك أصلا وفي الآخر
قلبك يتكسر لو بص لواحد تانية ، أنا أكثر واحده
أعرف يعني ايه كسرة القلب وعمري ما حب إنك
تجربي الشعور ده ، هو لو بيحبك بجد هيدخل البيت
من بابه ولحد الوقت ده ما يجي بلاش تعلقي نفسك
بيه

سارة حضنتها : ربنا يديمك ليا يا اختي ، أنا عارفه
الكلام ده والله ومش عايزاكي تقلقي عليا خالص

سابتها وطلعت تجري : يالهوي الراجل هيعلقني من
رجلي ، هروح أنا بقي اشوف شغلي واسيبك انتي
في التورته ام دورين يارب تتهنوا بيها
سولاف ضحكت عليها ورجعت للي كانت بتعمله
تاني

آخر اليوم سولاف راحت السوق تشتري شوية حاجات وهي مروحة من شغلها ، وعدت على السوبر ماركت تشتري مكونات التورته اللي هتعملها ، بكره يوم ميلاد حسام وهي عايزة تحتفل بيه وعايزة تصلح العلاقة المتوترة بينهم شوية

خلصت ورجعت البيت بحماس إنها هتجرب حاجة جديدة ، أول ما دخلت الشقة لقت حسام قاعد في الصالون وباصص في الأرض

سولاف : حسام أنت جيت بدري ؟

حسام بصلها بغضب جحيمي : أنا ماجتش بدري سيادتك اللي جاية متأخر ، ممكن أفهم كنتي فين كل ده ؟

سولاف بصت على الساعة ولاحظت إنها اتأخرت شوية صغيرين عن معادها واستغربت كل الغضب ده على الوقت القليل ده

سولاف : معلى كنت بجيب شوية طلبات من السوق راحت باسته في خده وبصت في عيونه : حمدا لله على سلامتك يا حبيبي هحضرلك الأكل ثواني

حطت الاكياس في المطبخ ووقفت تحضر الغدا
بسرعة بس اتفاجئت بحسام وراها شدها جامد
بطريقة وقعت قلبها

حسام : لما أكون بكلمك أوعي تديني ظهرك بالمنظر
ده

سولاف : في ايه يا حسام ؟

حسام زعق : في إنك مش مهتمه بيا خالص

سولاف فتحت عينيها بدهشة : أنا يا حسام !! أنا مش
مهتمه بيك !! طيب ده أنا كل وقتي ليك أنت ، يادوب
الكام ساعة اللي بروح فيهم المستشفى وبطن على
ماما في الفون وأنا هناك ولما برجع كل وقتي ليك
أنت وبس

حسام : لا مش كفاية ، مش كفاية يا سولاف ، أنا
عايز وقتك كله يبقى ليا أنا ، كله ، من أوله لآخره
بتاعي

سولاف حساه مش طبيعي فسابت المعلقة اللي في
ايدها وبتتكلم معاه بهدوء : طيب فهمني بس أنت
عايز ايه وأنا هعمله ؟

حسام : تسيبي الشغل

سولاف : ليه بس ؟

حسام : هو كده ، انتى زمان كنتى بتشتغلي عشان
الفلوس واكل العيش ، دلوقتى انتى مسؤلة منى أنا

سولاف : وماما ؟

حسام بنرفزة : برضة هتقولي ماما ، انتى ليه مركزة
مع الناس كده ؟ ركزي معايا أنا

سولاف : يا حسام ما أنا مركزة معاك والله بس ماما
مالهاش حد غيري وأنت عارف ده كويس

حسام : خلاص وأنا متكفل بمامتك بس في المقابل
تعلمي اللي بقولك عليه

سولاف : بس انا بحب شغلي

حسام قاطعها بصوت مرعب هز قلبها من الخوف :
اخرسي ، أوعي تقولي على حاجة غيري إنك
بتحبيها ، انتى تحبيني أنا وبس

سولاف بلعت ريقها بتوتر : حسام مالك ؟

حسام مسك كتافها وكشر : انتى ليه بتقولي حسام هاه
؟ ليه مش بتعلمي زي المتجوزين وتقوليلي حبيبي
هاه ؟ انتى مش بتحبيني ؟

سولاف حاولت تسيطر على خوفها ومسكت وشه
برقة : أنت إزاي تقول كده ؟ أنا مراتك وأنت جوزي

، يعني اكيد بحبك

حسام ببص لعينيها كأنه بيدور على الحب بجد في
عينيها : طيب قوليلي أنا بحبك يا حسام كده

سولاف : حسام الكلمة دي مش بتطلب هي بتطلع
لوحدها من غير ترتيب أو تخطيط

حسام كشر : يعني مش بتحبيني ؟

سولاف حست إنها بتتعامل مع طفل مش راجل عاقل
، اتتهدت : بحبك يا حسام

حسام شالها بدراعه وباسها : وأنا مش بحب حد زيك
اخدها ودخل اوضته وفرغ شحنات الغضب اللي
كابتها جواه

تاني يوم سولاف ماراحتش الشغل وفضلت طول
اليوم بتحضر مفاجأة لحسام ، بدأت تعمله كل
أصناف الأكل اللي بيحبها وتجهز التورته وجهزت
السفرة بجو رومانسي وجميل وجهزت اللبس اللي

هتلبسه كمان وكانت مبسوطة جدا وبتحاول تتخيل
ردت فعله هتبقى ايه

في شقة سهير تحت

كانت قاعده مع سميرة أختها اللي مدايقه منها : يا
سميرة بقى هتفضلي لحد امتى ز علانه كده ؟

سميرة : وهي دي مش حاجة تزعل ؟ يعني تقوليلي
هجوز ابني لبنتك وبعد ما تتعشم البت الاقى
المحروس ابك اتجوز واحده تانية

سهير : طيب مانتى عارفه انى مش راضيه عن
الجوازه دي وبحاول اطفشها

سميرة شهقت بسوقية : لا بجد يابت ؟ بقالك أربع
شهور بتحاولي تطفشيها ؟ ليه ؟ دي حته بت
ماتخدش في ايدك يومين ، قال بحاول قال ، حَكَمْ

.

سهير : طيب وحياتك بحاول اطفشها بس الواد حسام
هو اللي مغلبنى ، متصدر ليا ومش بيخليني اكلها

ولا اشوفها حتى ، الواد بجد اتجنن من ساعة ما
عرفها ، دي اكيد سحراله

سميرة بشر : يبقى خلاص طلا ما هو بيدافع عنها
ومش عارفين نوصلها نخليه هو اللي يرميها بنفسه
زي الكلاب

سهير بتركيز : إزاي ياختي قوليلي ؟ ده أنا غلبت
معاها

سميرة : وهو ايه اللي يخلي راجل يطلق مراته
ويرميها مهما كان بيحبها ؟

سهير بتفكير : أوعي يكون ؟

سميرة : ايوه ياختي مافيش غيره

سهير : وده احنا هنعمله إزاي ؟

سميرة : سيببها عليا أنا ، كل اللي عايزاكي تعمليه
هو إنك تلعبى في دماغ ابنك اليومين دول عشان يوم
مانفذ يبقى هو مستوي ومشحون من ناحيتها فتدخل
عليه

سهير بشر : ماشي سيبهولي

سميرة بصت للفراغ بشر : مابقاش أنا سميرة لو ما
خرجتهاش من هنا بفضيحة

سولاف بعد ما خلصت الأكل اللي بتعمله دخلت
أخذت شاور ولبست وجهزت نفسها واستنتت حسام
يجي ، وعلى وقت الغدا حسام ساب الجيم وطلع
عشان يتغدى ، مامته حست بيه طالع فنادت عليه :
حسام حبيبي

حسام : نعم ياما ؟

سهير : تعالا سلم على خالتك

حسام لوى شفايفه بضيق : حاضر جاي

راح سلم عليها وهي فضلت ماسكه فيه لحد ما اتخفق
وقام

حسام : أنا هطلع بقى ياما اتغدا عشان جعان

سميرة : طيب ماتقعد تتغدى معايا ده أنت واحشني
أوي يا غالي يابن الغاليه

سهير : عندك حق والله بقالنا كتير ماتغدناش مع
بعض ، تعالا يا حبيبي ده أنا عامله صينية بشاميل
اللى بتحبها هتاكل صوابك وراها

سهير وسميرة مسكوا في حسام لحد ما قعد بالعافية
يتغدى معاهم

دخلت الاختين يجهزوا الغدا وحسام رن على
سولاف يقولها إنه هيتغدا مع مامته وهي اتصدمت
حسام : سو أنتى معايا ؟

سولاف : اه ايوه معاك ، بس هو يعني لازم النهارده
؟ ماينفعش تتغدى معاهم يوم تاني

حسام : معلش بقى أنا عارف إنك قولتيلي كذا مره
قبل مانزل ماتاخرش واتغدى معاكي النهارده بس
هما شبطانين فيا جامد

سولاف بحزن : خلاص براحتك يا حسام

حسام : طيب ايه رأيك تنزلى تتغدى معايا ؟ أهو
تفتحي نفسي على الأكل

سولاف بحزن : لا يا حسام ، أنا صايمة ، اتغدى
أنت بالهنا

سولاف قفلت مع حسام وبصت على كل اللي عملته
بحزن وحاسه ان كل تعبها راح على الارض ،
سابت كل حاجة زي ما هي ودخلت اوضتها وفضلت
تعيط

آخر اليوم حسام روح ، أول ما دخل الشقة شاف
الغدا والتورته على السفرة وفهم ليه سولاف كانت
مصرة يتغدى معاها اليوم ده ولو هله حس إنه غلط
لما اتغدى مع مامته وخالته ، دخل اوضته لقي
سولاف نايمه ، صحاها وهي صحت ز علانه

حسام : سو ، حبيبتى ، معلىش ماتز عيش منى
سولاف : أنا مش ز علانه ، هما برضوا أهلك ومن
حقهم عليك تقعد معاهم

حسام : لا انتى شكلك ز علانه ، طيب قومي يلا أنا
هاكل كل الأكل اللى انتى عملاه ده ، يلا بقى

سولاف رغم إنها كانت مدايقه فعلا الا إنها ما حبتش
تدايقه هو او تنكد على نفسها أكثر وتضيع تعب اليوم
كله هباء فقامت معاه

وبعد ليلة طويلة من الحب ، طلع نهار يوم جديد
وسولاف كلها امل ان حسام هيلين والوضع بينهم
هيبقى أحسن بس اللى حصل غير كده ، الوضع

بينهم بقى اسوء وحسام كل مدى تحكّماته بتزيد
وعصبيته بتزيد وكل يوم والتاني يز عّق فيها بطريقة
بتخوفها منه ، ومش كده وبس بقى في شئ من
العنف في تصرفاته وعلاقته معاها وده اللي هي مش
قادرة تتقبله منه ابدأ

في يوم سولاف كانت قاعده في البيت زي عاداتها
الشهور الأخيرة بعد ما حسام منعها تنزل الشغل
نهائي

سارة رنت عليها وفضلوا يتكلموا مع بعض كثير
وسارة بتحكيها عن دكتور يحي وطرقه إنه يتقرب
منها وشكله وقع بجد فيها وسولاف بتسمعها بابتسامه
ومبسوطه لفرحتها

حسام جه في الوقت ده وسمعها بتتكلم

سولاف : يعني هنلبس فساتين سواريه وهنلبس دبل
قريب ولا ايه بقى ؟

ساره : ادعى يابت ده أنا خلاص روجي طلعت منى
وأنا متشحتفه كده

سولاف بضحك : مش ممكن والله ، ربنا يرزقك
ونفرح بيكي قريب يا سوسو

سولاف حسنت بحسام جه : طيب خلاص يا حبيبتى ،
هبقى اكلمك بعدين ، يلا سلام

قفلت الفون وقامت مسكت ايد حسام : حبيبي حمدا لله
على السلامه ، شكلك مرهق أوي مالك ؟ أنت كويس
؟

حسام سكت شويه : كنتى بتكلمي مين ؟

سولاف : سارة أخت ابيه معاذ

حسام بغضب غير مبرر : وبتقوليلها يا حبيبتى ؟

سولاف : وفيها ايه ؟

حسام : ايوه وتقوليلها يا حبيبتى ليه ؟

سولاف : في ايه يا حسام بجد ؟ أنت مش طبيعي

خالص اليومين دول ، ايه المشكله لما اقولها يا

حبيبتى مش فاهمه ؟

حسام زعق : وأنا قولتلك كام مرة انتى بتحبينى أنا

وبس ؟

مسكها من درعاتها جامد لدرجة إنها اتوجعت :

قولتلك كام مرة أنا بس اللى حبيبك ؟ هاه ؟

سولاف بوجع : حسام أنت بتوجعني أوي

حسام : ردي عليا الأول ، كام مرة قولت ؟

سولاف مابقتش قادرة تستحمل ايديه عليها أكثر من
كده ودموعها نزلت من الوجع : حسام بالله عليك
سييني بجد ايديك جامده أوي

حسام بضيق : لا مش هسيبك غير لما تقولي بحبك

سولاف بصتلته بتوتر وهو زعق : انطقي ، قوليلي
بحبك يا حسام

سولاف بخوف : بحبك يا حسام

حسام قرب منها وباسها بعنف جدا لدرجة إنها حست
بشفايفها بتقطع بين سنانه وحست بطعم الدم في
بوءها وحلقها وكرمان نزل على دقنها ورقبتها كأنه
بينتقم منها وبيعذبها مش بييوسها، حاولت تبعده عنها
وبصعوبه عرفت تزقه بعيد عنها

سولاف : حسام أنت اتجننت في ايه ؟

.

حسام بصلها شويه ومرة واحده نزل على وشها
بالقلم وقعها على الارض ، وهي اتصدمت وبصتلته
بدموع : أنت بتضربني يا حسام ؟ بتمد ايديك عليا ؟

حسام : تاني مرة اوعى تبعديني عنك فاهمه ؟ أنتى ملكي واعمل فيكي مابدالي وأنتى أوعى تعترضي كده تاني

سابها ودخل الحمام وهي قاعده مش قادرة تستوعب اللي حصل دلوقتي ده ، هو بجد ضربها وعشان ايه ؟ مش راضيه بعنفه معاها ؟ ده بجد ؟

ودي كانت أول مره حسام يمد ايده على سولاف بس للأسف ماكانتش آخر مره ، لان نفس الموقف ده اتكرر أكثر من مرة بطرق مختلفه وعلى حاجات مختلفه وكلها اهيف من بعض ، لحد ما سولاف خلاص مابقتش قادرة تستحمل الوضع ده وقررت ترجع عند مامتها تقعد معاها فترة

حنان : حاضر ياللي على الباب جاية
فتحت الباب وكانت سولاف اللي أول ما شافتها
اترمت في حضنها
حنان : حبيبتى يا سولي ، عامله ايه يا بنت قلبي ؟

سولاف ماردتش عليها بس دموعها نزلت غصب
عنها وشهقاتها باننت

حنان بقلق : مالك يا حبيبتى فيكى ايه ؟ ايه اللي
معيطك بس ؟

سولاف فضلت مكابشه في مامتها ومش عايزة تبعد
عنها وفضلت تعيط كتير على كل المعامله اللي هي
فيها طول الفترة اللي فاتت دي واللى جد عليها كمان
ضرب حسام ليها

بعد مده من الشحتفه سولاف بطلت عياط ومامتها
بتمسحها دموعها : مالك يا بنت قلبي فيكى ايه ؟
سولاف : ضربني يا ماما ، ضربني انتى متخيله ؟
حنان بصدمة : مين ده اللي ضربك ؟ اوعي تقولي
جوزك

سولاف هزت دماغها بتأكيد وحنان : ده اتجنن ده
ولا ايه ؟ لااا هو فاكرها سايبه

سولاف دموعها نزلت تاني وحنان مسحتها : قوليلي
طيب ايه اللي حصل عشان يضربك

سولاف بشحتفه : يا ماما ده غريب اوي ، بحسه
عايز يحبسني في بيته ومش عايزني لا اروح في

حتة ولا اكلم حد ، الشغل وسييته وصحابي وانتي
 بكلمكم على الديق ومن وراه ، والسوق مش بنزله
 والجيران بطلت أتعامل معاهم ، ده حتى أهله مش
 مسموحي ازورهم أو اكلمهم او حتى يطلعولي بيتي
 ، لا بجد في ايه ؟ وكل شوية يقولي ماتعمليش
 وماتقوليش ، مره سمعنى بكلم سارة وبقولها حبيبتى
 اتعصب وزعق

حنان : مش يمكن يا سولاف يا حبيبتى يكون حاسس
 إنك مقصره معاه ؟

قربت منها ومسكت ايديها : الرجاله عندهم حتة تملك
 كده بيحب يكون هو كل حاجة بالنسبة لمراته ، في
 رجالة بتعرف تسيطر على مشاعرها دي وفي لا
 ولما بيحس ان مراته مش مهتمه بيه بيتغير ويعمل
 مشاكل من ولا حاجة عشان بس يلفت نظرها ليه ،
 زي العيل بالظبط لما يحس ان مامته مش مركزه
 معاه يعمل غاغه عشان تقعد معاه

سولاف : توصل للضرب يا ماما ؟ ده أنا خدي ورم
 من الضرب

حنان بضيق من حسام : وهو يضربك ليه ؟ فهمنى
 طيب ايه اللي حصل عشان يضربك ؟

سولاف اتكسفت تقول لمامتها إنه بيضربها عشان
بترفض عنفه معاها في علاقتهم : ااا ، يعنيي ، مرة
اتعصبت عليه لما زعقلي وقولتله أنت اتجننت و

حنان قاطعت كلامها وهي بتضربها على كتفها :
ومش عايزاه يضربك ؟ أما انتى طلعتي بوجه
بصحيح

سولاف بصتلها بصدمه : ماما !!

حنان : طيب بالله عليكي هو في واحده عاقله تقول
لجوزها أنت اتجننت ؟ لا وكمان وهو متعصب ؟

سولاف : ما هو ساعتها ، هو ااا

سكتت لأنها مكسوفه من تصرفاته هتقولها ايه يعني
باسني بعنف ، وحنان مسكت ايديها بحنية : يابنتي يا
حبيبتي الراجل ما يحبش الست تقف في وشه ابدأ ،
حتى لو هو اللي غلطان ما يحبش الست تزعق قصاده
، وعمره ما هيمد ايده عليها لو هي ساكته ، والست
الذكية اللي لو لقت جوزها متعصب تسكت وتسيبه
يزعق براحته ولما يهدى ويصفي تعاتبه بهدوء
وهتلاقيه هو اللي راجع يعتذر بنفسه كمان

سولاف : بس..

حنان : طيب بالله عليكى عمر ك شوفتي ابوكى الله
يرحمه مد ايده عليا ؟

سولاف هزت دماغها برفض : بس بابا ماكانش
بيتعصب اصلا

حنان لوت شفايفها : مين ده اللى ماكانش بيتعصب ؟
ده ابوكى ده كان و ابور جاز متحرك ، بيتعصب
على كل حاجة بس كان يطلع يطلع وينزل على
مافيش ، أنا كنت عارفه ده وعشان كده كنت بسببه
يعمل اللى هو عايزه وبعدها من غير حتى ما عاتبه
كان يجي ويتأسف زي الطفل اللى غلط وبيعتذر ،
هي كده الدنيا يا حبيبتى مش كلها حلوة ولازم
نستحمل بعض عشان الحياة تمشي ، يوم هو يدايق
ويزعق انتى تسكتى وتحتويه ، ويوم انتى تزعلي
وتتقمصي هو يحايل ويدادي ويطبطب ، ماتخر بيش
بيتك بنفسك يا سولاف وخليكي ست ذكية ماحدث
يعرف يمسك عليكى غلظه

سولاف كانت مقتنعه جدا بكلام مامتها وهي بتعمل
كده فعلا وبتحاول تحتوي حسام بكل الطرق وبتعمله
كل اللى هو عايزه بس هي مش قابله عنفه معاها ،

هو كده بيضرها نفسيا وجسديا بس سكتت ، كانت
مكسوفه تشرح فسكتت

حنان طبطبت على كتفها بحنية : معلىش يا بنت قلبي
بكره هتتعودي على الحياة وتفهميها أكثر يلا دلوقتي
قومي معايا نتغدى ، انتى من ساعة ماتجوزتي وانتى
ماكلتيش معايا ولا مره

سولاف قامت معاها وحضروا الأكل ولسه هيقعدوا
لقوا الباب بيخبط ، سولاف قامت تفتح لقت حسام في
وشها ، واقف وعيونه حمرا من الغل ووشه بيطلع
نار ، اترعبت من شكله ورجعت لورا بخوف

حنان : مين يا سولي ؟

قربت منهم ووقفت قدام سولاف : حسام ، أهلا ،
أدخل يابني

حسام : كنت جاي اخذ سولاف

حنان : مش عيب عليك لما اقولك تدخل وماتسمعش
الكلام ؟ أدخل عايزاك في كلمتين

حسام دخل وحنان قفلت الباب : ادخلي اوضتك يا
سولاف عايزة اتكلم مع جوزك لوحدنا شوية

سولاف راحت جري على اوضتها وقفلت الباب
وسندت عليه وحطت ايديها على قلبها : اسكت إزاي
بس يا ماما واحتويه إزاي ده شكله يرعب ، وأنا اللي
كنت بقول مش هتجوز إبراهيم عشان متهور وايدة
سابقه عقله ، طلع حسام أسود منه ، يا رب استرها
عليا

في الصالون بره

حسام قعد على الكنبه وحنان قعدت جنبه : مزعل
سولاف ليه يا حسام ؟

حسام بصلها بدشه : أنا مزعلها ؟ ده إزاي ؟

حنان : مش أنت اللي ضربتها برضه ولا أنا ؟

حسام : ياما هي اللي عصبتني ، كل ما اقولها على
حاجة ماتعملهاش

حنان بغضب : تقوم ضاربها ؟ ليه ؟ هي عشان
مالهاش اب يعني هتفتري عليها ؟

حسام : ماكانش قصدي والله ، هي بس ..

حنان مسكت ايديه : حسام يابني ، أنا واحده متجوزه
من حوالي ٢٥ سنه وافهم أكثر منك ومنها وعارفه

كويس طبع الرجاله بس عايزة افهمك حاجة ، مهما
تكون متعصب ومهما تكون مدايق ده مايديش ليك
الحق إنك تضرب مراتك ، أنا مش بقول كده عشان
بنتي لا ، لأنني لو اتكلمت كام هقولك طلقها ومش
هتشوف وشها تاني

حسام بصلها بصدمة وهي : بتبصلي كده ليه ؟ اه
بنتي وماحبش حد يدوسلها على طرف حتى لو كنت
أنت ، عشان كده بقولك ، أنا مش عايزة اخرب على
بنتي واطلقها بعد ٦ شهور بس من جوازها ، خراب
البيوت مش بالساهل كده ، انا هكلمك زي ما كلمتها
، انتوا الاتنين ولادي وحقكم عليا اوعيكم ، أنا فهمتها
إزاي تتعامل معاك وتسمع كلامك وأنت كمان لازم
تفهم إزاي تتعامل معاها ، مش معنى إنك الراجل
إنك تفتري عليها ، ومش معنى انها بتسمع كلامك
إنها مالهاش رأى لا ، هي بتسمع كلامك عشان
بتحبك ، بتعمل ده حب مش إجبار فانت ماينفعش
تجبرها على حاجة ولا تستخدم سلطتك عليها ، خدها
بالهداوة وواحد واحد ، البنت بطبعها بتحب اللين
وبتسمع كلام اللي بيعاملها بلطف مش بفرد
العضلات ، فخليك حنين معاها وخليك أنت الراجل

في صبرك وتحملك ، استحملها و علمها براحه
وهتلاقيها بتستجيب ليك

حسام كان عند جملة مش هتشوف وشها تاني وسمعه
وقف وماسمعش ولا حرف بعد كده ، وفضل يفكر ،
هي حنان بجد ممكن تبعد سولاف عنه ؟ هتحرمه
منها ؟ ده مستحيل يحصل وهو مش هيسمح بده ابدأ
، سولاف دي بتاعته وحق مكتسب ليه وماحدث ليه
الحق ياخذها منه

فاق على صوت حنان وهي بتطبطب على ايدته :
فهمت يا حبيبي ؟ يلا قوم صالحها واتكلموا شوية مع
بعض بس زي ما فهمتك براحه وبشويش

قامت دخلت عند سولاف : جوزك هيدخل يتكلم
معاكي ، اعقلي كده واسمعيه براحه واتصافوا
سولاف هزت دماغها بموافقة وحنان طلعت وحسام
دخل وقفل الباب

سولاف فعلا كانت خايفه منه وهو فضل يبصلها
كثير وبعدها قرب منها ووقف قدامها : انتي ممكن
تسيبيني فعلا ؟ مامتك قالت لو زعلتك تاني هتاخذك

منى

سولاف حاولت تمثل الشجاعة وأكدت على كلام
مامتها : ايوه يا حسام ، أنا برضه ليا أهل في ظهري
، ومايغركش ان ماما ست وكده ، دي اقوى من ميت
راجل وتقدر تعمل اللي الرجالة ما يقدروش يعملوه

حسام قرب منها والدموع في عينيه : وهون عليك
؟ هتسيبيني وتمشي يا سولاف ؟

سولاف اتوترت وراحت قعدت على السرير وقالت
بخفوت : أنت اللي بتجبرنا على كده بعنفك

حسام راح قعد تحت رجليها ومسك ايديها ودموعه
بدأت تنزل : أنا آسف ، والله آسف غصب عني
عملت كده ، مش هعمل كده تاني صدقيني بس
ماتبعديش عني ، أوعي تسيبيني يا سولاف والله
هقتل نفسي لو عملتي كده

سولاف بخوف : ايه اللي أنت بتقوله ده يا حسام قتل
ايه بس ؟

حسام : أنا أهون عليا اقتل نفسي ولا أعيش يوم واحد
من غيرك ، أنتى فاهمه ؟ أنا ماقدرش أعيش من
غيرك يا سولاف

سولاف قلبها رق و اتنهدت بقلة حيلة ومسحتله
دموعه : خلاص يا حسام كفاية كده ، أنا مش هبعد
عنك ولا حاجة بس بلاش تضربني كده تاني أو
تعاملني بعنف ، ماشي ؟

حسام حضنها : أنا بحبك أوي يا سولاف ، بحبك
أوي

بصلها : انتى بتحبيني صح ؟

سولاف هزت دماغها بتأكيد وأبتسمت وهو حضنها
تاني ، بعد شوية سولاف بعدته عنها : كنت أنا وماما
محضرين الغدا ، تعالا كُُل معانا

حسام بضيق : خلينا نروح ناكل في البيت

سولاف قامت وبتشده وراها : لا أنا عايزه أكل مع
ماما بقالي كتير ماكلتش معاها ، يلا بقى

حسام خرج معاها وقعدوا كلهم ياكلوا وسولاف
ومامتها قاعدين بيضحكوا مع بعض وحسام بيراقبهم
بصمت وبيبص لحنان بغل وكره وحاسس ان حنان
بقت خطر عليه وعلى علاقته بسولاف وفضل
يخطط لحاجات عايز يعملها

اليوم عدى وحنان مسكت في حسام وسولاف يباتوا
 معاها اليوم ده مرة من نفسهم وفعلا باتوا عندها
 وحسام هيموت من القهر ومش عاجبه تعلق سولاف
 بمامتها ده وعازي ياخذها ويمشي ويحبسها في بيته
 للأبد

عدت فترة من اليوم ده وحسام في الأول كان فعلا
 بيعامل سولاف كويس بس رجع تاني للعنف
 والضرب وقلة القيمة وسولاف اعصابها باظت
 خالص بسببه ، هو يبهدلها وبعدها يتصرف عادي
 كأن مافيش أى حاجة حصلت وهي المطلوب منها
 تتقبل الوضع ده وتتكيف معاه

سولاف لاحظت على حسام تصرفات غريبة الفترة
 الأخيرة ، بيتكلم في الفون بالألغاز وكل لما يشوفها
 يقفل الفون وهي مستغربة وبدأ عقلها يروح لبعيد ،
 معقول بيخونها ؟ يمكن عشان كده بيعاملها بقسوه
 ولحد دلوقتي مش عازي يخلف منها رغم إنها اترجته
 كثير واتحايلت عليه أكثر من مرة بس هو رافض

رفض قاطع ، ومهما حنان أو سهير يسألوه على
الحمل يقولهم لما ربنا يسهل

قعدت على السرير وبتفكر ليه يخونها ؟ هي قصرت
في ايه ؟ شغل البيت وبتعمله ودورها كزوجه عمرها
ماقصرت فيه ، احتوته واحترمته وقدرته رغم كل
اللي بيعمله فيها ، طيب ليه ؟ في ايه ؟ هزت دماغها
جامد بتنفض الأفكار دي ، هي لسه مش متأكده إذا
كان بيخونها ولا لا

فاقت من افكارها على صوته : سو

بصتله وهو واقف عند الباب وبيبتسم ، أتكلم وهو
بيقرب منها : انتى حاسه بيا ومستتياني على السرير
؟

قعد قصادها ولسه هيقرب حطت ايديها على صدره
بعده بهدوء : ممكن اسالك سؤال ؟

حسام ادايق من صدها ليه : اسألي

سولاف بتوتر : هو أنت ، أنت يعني ممكن تيجي في
يوم وتبطل تحبني أو تتجوز عليا ؟

حسام اتصدم من كلامها : أنا !! مستحيل ، أنا
مستحيل المس ست غيرك يا سولاف ، أنا ماعرفتش

السعادة غير على ايدك ، ماحبتش بنت غيرك ولا
حببت حد قدك

سولاف : يعني بتحبني ؟

حسام: بموت فيكي ، بجد مهما اوصفك حبي ليكي
مش هعرف اوصلك احساسي

سولاف : طيب ليه مش عايز نخلف ؟ أنا نفسي في
طفل

حسام وشه أسود وكشر : تاني يا سولاف الموضوع
ده ؟ مش فاهم أنا عايزة طفل ليه ؟ هتعملي بيه ايه ؟

سولاف باستغراب : هو ايه اللي هتعملي بيه ايه !!
هربيه يا حسام هعمل بيه ايه يعني ؟

حسام سابها وقام : مالوش لزمه ، ركزي معايا أنا
وبس ، الطفل هيشغلك عني وأنا مش عايز كده

سولاف قامت وراه ومسكت دراعه بتحاول تقنعه :
بالله عليك يا حسام حرام عليك تحرمني من الامومه
كده ، عشان خاطري لو بتحبني

حسام زقها بعنف : اخرسي بقى ، ايه ؟ انتى مش
بتحسي ؟

سولاف عينيها لمعت بالدموع وهو قرب منها
ومسكها جامد من دراعتها : آخر مره هقولها يا
سولاف موضوع الخلفة ده تشيليه من دماغك خالص
، والا وحياتك عندي لاكون موديكي لدكتور يشيلك
الرحم خالص ، فاهمه ولا افهمك بطريقة تانيه ؟

سولاف دمعه من عينيها خانتها ونزلت وهزت
دماغها بفهم

حسام مسح دموعها وابتسم : تعرفي ؟ أنا بحبك أوي
، بجد يا سولاف بحبك جدا ، نفسي تفهميني ، أنا
مش عايز حد من الدنيا غيرك ومش عايزك تكوني
لغيري ، انتى بتاعتي انا وبس

حضنها جامد وهي هنا فهمت كل تصرفاته من أول
يوم الفرح لحد اللحظة دي ، كان عدى عليها قبل كده
مقال بيتكلم عن حب التملك وكل اعراضه كانت
بتنطبق على حسام بس هي كانت بتتكر لحد آخر
لحظه بس دلوقتي اتأكدت ، حسام بيحبها حب تملك ،
شايفها حاجة ملك ليه مش بني ادمه وليها حق تعيش
زي باقي الناس

غمضت عينيها بحزن على حالها ومش عارفه
 تتصرف ازاي في اللي هي فيه ده ولا تشتكي لمين ؟
 مامتها وتعبها بيزيد الفترة الأخيرة ومش عايزة
 تتعبها أكثر بمشاكلها ، ومامت حسام لو تطول تقتلها
 بنفسها هتقتلها ووالده مش بتعرف تشوفه لوحدها
 دايمًا حسام بيكون معاها ، فكرت في معاذ ، ايوه هو
 ، اخوها أكيد هيعرف يتصرف بس هتوصله إزاي

فاقت من دوامة الأفكار دي على صوت حسام : ايه
 يا سولاف روحتي فين ؟

سولاف : هاه !! مافيش ، مارحتش في حته ، عن
 إذناك عايزة أدخل الحمام

طلعت بسرعة من الاوضة ودخلت الحمام ، وقفت
 وسندت علي الحوض وقعدت تفكر في حياتها قدام
 وهتتصرف إزاي مع حسام وجنانه ده

وفعلا في يوم سولاف استنتت لما حسام نزل الجيم
 بتاعه وراحت بسرعه رنت على سارة ، ولسه

هتطلب منها معاذ اخوها اتفاجئت بطريقة كلامها
معاها

سولاف : انتى بتكلميني كده ليه ؟ انتى ز علانه منى
ولا حاجه ؟

سارة بجمود: لا مش ز علانه بس لو سمحتى أنا مش
فاضية ، ما عنديش وقت اضيعه معاكي

سولاف بحزن : كده يا سارة ! هونت عليكى تقويلي
الكلام ده ؟ ده انتى اختي

سارة بدموع بتحاول تداريها : أنا مش اختك ولو
سمحتى أنا ورايا شغل

سولاف : ماشي يا سارة براحتك ، بس ممكن لما
تفضي تخلي ابيه معاذ يكلمنى ضروري ، أنا مش
معايا رقمه

سارة : لا مش هقوله وياريت انتى كمان تبعدى عنه
، هو مش اخوكي ولا عمره هيبقى فبطلني تكوني
حمل عليه

سارة قفلت السكة في وش سولاف وقعدت تعيط

على الناحية الثانية سولاف حطت الفون جنبها
وقعدت تعيط هي كمان ، مش متخيلة ان صاحبة
عمرها تقولها كلام قاسي زي ده

أبتسمت بتهكم من بين دموعها : بقى جوزي اللي
المفروض يكون اقرب حد ليا بيعمل فيا كده مش
عايزاها هي تعمل كده ؟

فضلات تخبط على قلبها بوجع وقهر : طول عمرك
حمل على غيرك يا سولاف ، طول عمرك مصدر
إزعاج وهم كبير على غيرك

من اليوم ده سولاف قعدت تقراً في حالة حسام أكثر
وازاى تتعامل مع شخصية زيه وبدأت تعمل كل اللي
بتقرأه في محاوله إنها تغيره بس الموضوع كان
بيجيب نتايج عكسية ، كل لما تحاول تقرب منه اكثر
عشان تحسسه باهميته وتحاول تخليه واثق في نفسه
أكثر ، ده بيخلي غروره يزيد وكونها حق مكتسب
ليه بقت فكره مسيطرة على عقله ، ومهما تحاول
معاه بالعقل مرة والحنية مرة والدلع مره كل طرقها
تفشل وكل اللي بتطلع بيه من تجاربها الفاشلة وجع
ليها وشروخ في قلبها ودمار لنفسيتها لحد ما روحها

هالكت وهي اللي دخلت في حالة نفسية من تصرفاته
وما بقتش عارفه تعيش

وحسام مستمر في هوسه بيها وبيضغط عليها بقوته
عشان تبقى تحت طوعه وتقول حاضر على اي
حاجة يطلبها ، وحر فيا خلى حياتها مافيهاش غيره
هو وبس ، منعها تماما من الخروج من البيت لدرجة
إنه كان ساعات بيحبسها ويقفل الباب عليها بالمفتاح
، ومنع عنها النت والرصيد وما بقتش بتعرف تكلم
حد ، حتى مامتها فين وفين لما يسمحها تكلمها
وبتكون مكالمه خمس دقائق وهو قاعد معاها ، يعني
حر فيا كان معيشها في سجن تحت مسمى جواز
كاذب

في يوم حسام نسي يقفل الباب بالمفتاح وسولاف
استغلت ده وراحت لمامتها من وراه ، خبطت على
الباب ومامتها فتحتها وأول ما شافتها اترمت في
حضانها زي عاداتها

حنان : بنت قلبي

سولاف فضلت ساكته ودموعها بتنزّل غصب عنها
 بقهر من غير صوت وفضلت تحسس على ظهر
 حنان وتطبّطب عليها كأنها بتحس بوجودها وبتستمد
 القوة منها

مسحت دموعها وبعدت عنها وأبتسمت : وحشتيني
 أوي يا غالية

باست ايديها : حقك عليا مش بعرف اجيالك كثير
 حنان طبّطبت عليها بحنية : ولا يهملك يا حبيبتى أنا
 مقدرة

سولاف كان نفسها تصرخ وتشكيها كل وجعها
 وتقولها خليني معاكي خليني في حضنك وماتبعدنيش
 عنه تاني بس سكتت وكتمت في قلبها وخبّت كل
 همها وري ابتسامتها المزيفه

بصت لوش مامتها لفته اصفر زي الليمونه وشفافها
 بيضا فمسكت ايدها بقلق : مالك يا ماما ؟ شكلك
 عامل كده ليه ؟

حنان بابتسامه : ماليش يا حبيبتى

شدتها من ايدها قعدتها على الكنبه : خليكى هنا
 وهدخل اجيالك عصير

مشت خطوتين ووقفت وطولت في وقفها فسولاف
نادت عليها باستغراب : ماما !!

حنان بصتلها وأبتسمت : هعملك آكل استنى ماينفعلش
تنزلي مدرستك من غير فطار

سولاف قلبها دق بسرعه وبصت لمامتها بصدمه
ووقفت : م .. ماما انتى بتقولي ايه ؟

حنان فضلت بصلها شوية بتوهان وبعدها نظراتها
اتغيرت كأنها استوعبت : في ايه يا بنتى ؟ هروح
اعملك عصير استنى

مشت تاني بس سولاف مسكت ايدها : ماما أنا مش
عايزة عصير ، قوليلي بس انتى كويسه ؟

حنان : يوه يا بت ، انتى كل مرة هتكلميني فيها
تقعدى تنوحى كده ؟ تعالى نتكلم شوية انتى وحشاني
أوي ودلوقتى جوزك يطب على دماغنا ويقولك يلا
نروح

سولاف قلبها كان مش مطمئن على حالة مامتها بس
راحت معاها وفضلوا طول اليوم يتكلموا ويهزروا
ويضحكوا من قلبهم بجد زي أيام زمان وسبحان من

خلى حسام مايحسش بغياب سولاف وماراحلهاش
وكأن القدر كان في صفها وسمحها تعيش يوم سعيد
من غير اى وجع أو ضيق

على أذان العشاء سولاف حست بالوقت وقامت
مفروعه : يا خبر هو الوقت اتأخر أوي كده ؟

حنان : يلا بسرعة روجي يابنتى

سولاف سلمت على مامتها وقبل ما تمشي حنان
وقفتها : سولي

سولاف بصتلها وهي حضنتها جامد أوي لوقت
طويل وبعدت عنها ومسكت وشها بإيديها : أنا بحبك
أوي

سولاف بدموع : وأنا كمان بحبك أوي

حنان باست سولاف على خدها وأبتسمت : ربنا
يفرح قلبك يا بنت قلبي

سولاف في اللحظة دي قلبها ارتجف جامد وحست
ان مامتها مش كويسه وماكانتش عايزة تسيبها بس
سمعت صوت حسام من وراها : سو

بصتلها وحنان راحت وقفت قدامه : حسام

حسام بضيق مداريه : نعم ؟

حنان مسكت ايديه بحنية : بنتى أمانه في رقبتك يا
حسام ماتنساش

حسام اتوتر منها لو هلة بس تماسك : ماتقلقيش مش
ناسي

حنان أبتسمت بحب ليهم : يلا يا حبايبي ، ربنا
يهنيكم

سولاف سلمت على مامتها وحسام اخدها ومشى
وأول ما دخلوا شقتهم حسام شدها من شعرها : كام
مليون مرة اقولك ماتتصرفيش لوحدك من غير ما
ترجعيلي هاه ؟

سولاف بألم : حسام أنا اسفه والله بس ابوس ايدك
بلاش ضرب النهارده على الأقل ، أرجوك

بس حسام ماسمعش كلامها وضربها زي المعتاد لحد
ما تعب وسابها ودخل اوضته ورزح الباب وراه
وهي مرمية على الارض بضعف وبتعيط بصمت
وتعب

سولاف بدموع : انتى اللي عملتي كده في نفسك ،
كان المفروض ابعده من أول ما حسيت بالقلق من

علاقتنا ، كان المفروض أفهم كلام مها وانقذ نفسي
منه ، انتى اللي غلطانه يا سولاف

فكرت إنها لازم تقفله لازم تعترض مش هتسكت
أكثر بس خافت ، لا اترعبت ، حسام ربي جواها
رعب هي ما حسنتش بيه غير لما سيطر عليها تماما ،
هي مابقاش عندها القدره للمواجهه ، لا هي مستحيل
تعمل كده

غمضت عينيها ونامت مكانها لحد تاني يوم صحت
على لمسات حسام اللي بيمشي ايدو على خدها : سو
حبيبتى اصحي

سولاف قامت وبصتله بقرف وهو بيبتسم في وشها
كده كأن مافيش حاجة حصلت

حسام : ايه اللي منيمك في الأرض كده ؟

سولاف : ولا حاجة نمت من غير ما حس

حسام هز دماغه بفهم : أنا جعان ، مش هتعملي
الفطار ؟ اعمله أنا ؟

سولاف : مش لازم ، أنا هعملك فطارك

حسام مسك ايديها ووقف ووقفها : روي غيري
لبسك وأنا عمل الفطار ، يلا

سولاف راحت بصمت غيرت هدومها واطرمت على
السريير بوجع و عملت نفسها نايمه ، وحسام حضر
الفطار ودخلها الأوضة لقاها نايمه فسأبها ونزل
الجيم بتاعه

سولاف بعد ما حسام نزل فتحت عينيها وفضلت
باصه في السقف بتوهان وبتفتكر كل حياتها لحد
مافتكرت شكل مامتها امبارح بالليل وقلقت

قامت بتحمل وجابت فونها وبأخر جنيه رصيد معاها
رنت عليها بس ماردتش فكرت إنها في الحمام أو
بتصلي أو مش فاضية فسأبت الفون ونامت تاني
على السريير وقررت ترن تاني كمان شوية وفعلا
بعد وقت رنت تاني وتالت ورابع وفوق الخمسين
مرة وحنان مش بترد وسولاف قلبها بيرتجف من
القلق

سولاف برقت بصدمة : أنت بتهزر ؟

حسام سحب ايده من ايدها : خلاص مافيش مرواح
في حته

سولاف مسكت في هدومه : خلاص حاضر ، حاضر ،
هعمل اللي أنت عايزة

وقفت بصمت شوية وهي بتفكر تتراجع ، هي مش
ممکن تقلل من كرامتها أكثر من كده ، جت ترجع
خطوه لورا بس افكرت شكل مامتها امبارح وقد ايه
كان باين عليها المرض فغمضت عينيها بألم وفعلا
باست رجله وهي بتبكي بس كله يهون عشان مامتها
.. وبصتله وهو واقف منتشي وحاسس برجولته
المزيفه

حسام : قومي ، بس هما خمس دقائق بس

سولاف مسحت دموعها وقامت بسرعه وطلعت
جري على بيت مامتها وحسام وراها

وصلت البيت وخبطت على الباب كتير ونادت على
حنان بس مافيش رد فطلعت المفتاح وفتحت الباب ،
وبمجرد ما خطت أول خطوة جوه الشقة لقت مامتها

نايمة في اوضتها وكان سهل تشوفها لان اوضتها في
وش باب الشقه على طول

سولاف فضلت باصة عليها من بعيد وهي واقفه في
مكانها ، عقلها بيقولها على كل حاجة بس قلبها مش
عايز يصدق

سابت الباب مفتوح ودخلت بخطوات ثقيله وصوت
نفسها بيعلا وقلبها بيكسر في ضلوعها من كتر الدق
، وصلت لحد اوضة مامتها ودخلت ، شافتها نايمه
بهدوء وجنبها المصحف مفتوح

راحت قعدت على الارض وبصت لوشها الأبيض
وشفايفها الزرقا ومسكت ايدها المتلجة وبصوت
مهزوز : ماما ؟ حنون انا جيت يا حبيبي اصحي
يلا

حنان ماصحتش وسولاف بحكم خبرتها كمرضه
كانت عارفه ان دي النهاية بس عقلها رافض نهائي
يصدق ، دموعها بتنزل وبتهز في مامتها براحه :
قومي يا أمي ، أنا سولاف ، قومي يا حبيبي
فضلت تشد فيها جامد وصوتها بيعلا : ابوس ايدك
قومي ، أنا بنتك يلا قومي

سولاف بصت للسماء وصوت عياطها بقى مسموع
وبوجع : يارب يارب

رمت نفسها على صدر مامتها وفضلت تعيط بكل
صوتها لدرجة ان الجيران كلهم اتجمعوا على
صوتها

سولاف : ماما ، ماما ، يا ماما قومي ، هتسيبيني
لمين بس ؟ قومي يا حبيبتي

واحد من الجيران مسكتها وبتحاول تهديها : لا حول
ولا قوة الا بالله ، وحدي الله يابنتي

سولاف فضلت تصرخ وتعيط وهي بتشد في مامتها
والجيران بيمسكوها لحد ما حسام جه وسولاف
بصتله وفضلت تصرخ : كله بسببك ، كله بسببك

.

الناس اتصلوا بالدكتور بتاع حنان عشان يجي وبعد
ما شافها : أنا آسف ، البقاء لله

سولاف قعدت على اقرب كرسي منها وهي بتعيط
بهسترية وبتردد : اللهم أجرني في مصيبي واخلف
لي خيرا منها ، اللهم أجرني في مصيبي واخلف لي
خيرا منها

سولاف فضلت ماسكه في مامتها جامد وبتعيط لحد
 ما الناس عرفوا يبعدوها عنها بالعافية واخدوا حنان
 وصلوا عليها ودفنوها والناس مشوا واحد ورا الثاني
 وفضلت سولاف وكريمة وحسام واسرته ومعاذ
 وأسرته

سولاف كانت قاعده في الارض جنب قبر مامتها
 ومش مبطله عياط وكريمة حضناها : وحدي الله يا
 سولاف ، حرام عليك كده انتى بتوجعيها

سولاف بصوت مكتوم : طول عمري بوجعها يا
 خالة ، طول عمرها شايلة همي ، صغيرة وكبيرة ،
 بنت ومتجوزة ، قريبة وبعيده ، وفي الآخر أقل
 حقوقها عليا ماعملتهاش ، ماتت لوحدها كأنها وحيدة
 مالهاش حد

بصتلها : يا ترى كان شعورها ايه ؟ يا ترى اتوجعت
 ولا ماتت بهدوء ؟

فضلت تخبط على قلبها : أنا السبب ، لو فضلت
 جنبها الليلة دي بس ، كنت حاسة إن فيها حاجة ،
 شكلها كان تعبان ومش في وعيها ، وهي كانت
 حاسة إنها اخر مرة ، ودعتني وباستني وقالتي بحبك
 ، كانت عارفه إنها هتموت ، كانت حاسة ياقلبي

كريمة حضنتها جامد : هي دلوقتي في مكان أحسن ،
 أنتي ماشفتيش وشها كان بينور إزاي ولا كانت
 بتضحك إزاي هي في نعيم دلوقتي ، ادعيها يابنتي ،
 مافيش في ايدنا غير الدعاء ، ادعيها

سولاف حطت ايديها على قبر مامتها : ربنا یرحمك
 يا حبيبي ، ربنا یرحمك ويسكنك فسيح جناته ، ربنا
 یرحمك يا أغلى ما ليا

أبتسمت بوجع : زمانك دلوقتي مع بابا حبيبا ، كنتي
 كل يوم بتتمنى تشوفيه ، كنت بسمعك كل ليلة
 بتدعيه وبتدعي ربنا يجمعنا كلنا في الجنة ، يا ترى
 شوفتیه؟؟ قابلتیه اخيرا؟؟ أمانه عليكي تسلميلي
 عليه

حطت دماغها على القبر كأنها بتحضنه : أنا بحبكم
 أوي ، بحبكم جدا ، استنوني ، يارب اقابلكم قريب ،
 يارب خودني ليهم

معاذ كشر وقعد جنبها ورفع راسها من على الارض
 وطبطبت علي كتفها : لا إله إلا الله ، كفاية كده يا
 سولاف ، قومي يا حبيبي

معاذ قام ووقفها وهي مش قادرة تقف على رجليها
 وبصت لسارة اللي واقفه جنبها وبتعيط وهي بتردد

أنا آسفه ، وبصت لمعاذ برجاء : خليني ابات عند
 ماما النهارده ، عايزة أنام في بيتها على سريرها ،
 عايزة أحس بيها واشم ريحتها ، لو بتعتبرني أختك
 بجد قول لحسام يسبيني النهارده عندها ، ده آخر
 طلب هطلبه منك والله

معاذ هز دماغه بموافقة : حاضر

وفعلا سولاف روجت على بيت مامتها ، دخلت
 وبصت في البيت الفاضي وحست بالوحشة ، بصت
 للناس اللي معاها : أنا اسفه عايزة ابقى لوحدي

كلهم احترموا رغبته ومشوا ماعادا حسام اللي فضل
 قاعد على السلم وبياكل في ضوافرة بغل وتوتر وقلق
 وضيق ، وعمال يهز في رجله وبيفكر في مليون
 حاجة وحاجه

سولاف فضلت تبص لكل ركن في البيت وتفتكر
 مامتها ، هنا اكلوا مع بعض ، وهنا هزروا مع بعض
 ، وهناك كانت مامتها بتز عقلها عشان تقوم تروح

المدرسة ، وهنا حضنتها ، وهنا وهنا وهنا وهنا
وهنا

وقعت على الارض وفضلت تبكي بحرقه ، هي لو
كان ظهرها اتكسر بموت باباها فهي فقدت روحها
وقلبها بموت مامتها

قامت ودخلت اوضة مامتها وبصتلها ، ريحتها لسه
فيها ، بصت على الارض لقت المصلية بتاعتها
مفروشه وعلى السرير المصحف مفتوح ، راحت
اخذته وفضلت تصلي طول الليل لمامتها وهي بتبكي
في السجود وتدعي ، لحد ما اغمى عليها من كتر
التعب والبكاء

حسام فضل قاعد طول الليل على السلم برعب
ماحدش فاهمه لحد ما النهار طلع ، راح خبط على
باب الشقة بس ماحدش رد ، خبط كذا مره ونادى
على سولاف كتير لحد ما الرعب تملكه وكان
هيموت من القلق عليها ، وقف ومش عارف يعمل
ايه ؟ قرر يكسر الباب وفعلا خبطه جامد كذا مرة

لحد ما واحده من الجيران خرجت على الصوت
وبصتله : في ايه يا حسام ؟

حسام بقلق : سولاف جوه لوحدها وعمال اخبط
عليها مش بتفتح وأنا قلقان ليكون جرالها حاجة
الجاره بقلق : طيب استنى أنا معايا مفتاح احتياطي
للشقة

وفعلا دخلت جري تجيبه وخرجت ، فتحوا الباب
وحسام أول ما شاف سولاف واقعه على الارض
جري عليها واخذها في حضنه ويحاول يفوقها :
سولاف ، حبيبتى قومي ، بالله عليكى فوقى
شالها وراح بيها المستشفى بسرعة والدكتور علقها
محاليل وقال لحسام إنها هتفوق بعد فترة وهو فضل
جنبها

مسك ايدها وفضل يبكي : قومي يا حبيبتى ، أوعي
تسيبيني يا سولاف أنا ممكن أموت فيها
فضل يبوس في ايدها : أنا عملت كده عشانا والله
فماتسيبينيش بعد ده كله

بعد فترة طويلة شوية سولاف فاقت فعلا بس كانت
جسد بلا روح

حسام اخدها وروحوا بيتهم وقبل ما يطلعوا سولاف
اتكلمت بضعف : عايزة آشوف ماما

حسام : انتى تعبانه دلوقتي ، خلىنا يوم تاني

شالها وطلع بيها وقابل سهير على السلم

سهير : خير يا حسام مالها السنيورة ؟

حسام : أما إحنا تعبانين بعد إذنك

طلع وسهير لوت شفايفها : ماكانتش أول واحد امها
تموت يعني ، ما نص الناس عايشين من غير امهات
وعادي ، حكم

حسام دخل سولاف اوضة النوم وحطها على السرير
بهدوء ومسك ايدها : محتاجة حاجة ؟ اعملك تاكلي
أو تشربي ؟ اي حاجة نفسك فيها أنا هعملهاك

سولاف بصتله بدموع وصوت رايح : أنا عايزة ماما
، هتعرف تجيبهالي ؟

حسام كشر وسكت وهي : طلا ما مش هتقدر فسيبني
لو حدي لو سمحت

نامت على المخده بوجع وعطته ظهرها وهو فضل
قاعد جنبها وببيص عليها بصمت بصات غريبه
وبيحاول يسيطر على أعصابه

في يوم سولاف صحيت بالليل مالتش حسام جنبها ،
استغربت جدا دي أول مرة يعملها ، قامت راحت
الحمام وهي راجعه اوضتها تاني لقت حسام واقف
في البلكونة وبيشرب سجاير ، قربت منه باندهاش
وسمعتة بيتكلم في الفون

حسام : يعني ايه ؟ عارف يا دكتور الغبرة أنت لو
الكلام ده طلع من بيننا لحد تاني وحياة ربنا ل@#\$
، اه عشانـ

قاطعتة سولاف : حسام ايه اللي موقفك هنا الساعه
دي ؟ بتعمل ايه ؟

حسام طففي السيجارة بسرعة وقفل الفون في وش
اللي كان بيكلمه بإرتباك غير مبرر ولا اللي عامل
عامله : سو ايه اللي صحاكي دلوقتي ؟

سولاف : كنت قايمه اروح الحمام وشوفتك ، ايه
اللي أنت بتعمله ده ؟ فهمني ايه كل السجاير دي ؟
أنت من امتي بتشرب سجاير أصلا ؟

حسام دخل من البلكونة وقفل الباب : وانتى بتسألني
ليه ؟

سولاف : هو ايه اللي بتسألني ليه ؟ هو أنا اللي
هقولك على أضرار السجاير برضه ؟ ده أنت
ماكنتش بتطبق ريحتها اصلا دلوقتي بتشربها
وبالمنظر ده !!

حسام قرب منها وأبتسم : انتى للدرجادي خايفه عليا
؟

سولاف بعدت عنه : ماتقربش مني ريحتك كلها
دخان

طلعت جري على الحمام وفضلت تستفرغ كثير
وحسام قرب منها بلهفه : سو انتى كويسه ؟ مالك
بس ؟

سولاف رفعت ايدها قدامها : ماتقربش ، ريحتك
 بتتعبني ، روح غير هدومك دي ولا خد شاور
 قامت غسلت وشها وطلعت بره : أنا حقيقي كل يوم
 باتصدم فيك اكثر

دخلت الاوضة ونامت على السرير تاني وهي ماسكه
 دماغها من الصداع اللي ملازمها من ساعة وفاة
 مامتها

عدى شهرين من الأحداث دي وسولاف لسه زي ما
 هي جسد بلا روح وطول الوقت تعبانه وبتستفرغ
 كثير

وفي يوم مها اخت حسام كانت بايته هي وزوجها
 عند أهلها والصبح طلعت لسولاف تقعد معاها شوية

مها : حبييتي يا سوسو عامله ايه دلوقتي ؟

سولاف : الحمد لله على كل حال

مها طبطبت علي كتفها : ربنا يحضرك الخير يا
 حبييتي

سولاف سكتت شوية وبعدها بصتلها : كنت عايزة
اسألك على حاجة يا مها

مها : أسألي براحتك يا حبيبيتي

سولاف : لما وافقت أتجوز اخوكي ليه قولتيلي ايه
اللي أنتي عملتيه في نفسك ده ؟ كان قصدك ايه ؟
مها بصت في الارض باحراج وسكتت وسولاف
جاوبت هي : عشان عارفه ان اخوكي حيوان وايده
سابقه عقله وغبي في تصرفاته مش كده ؟

مها بصتلها بحزن : أنا آسفه

سولاف سندات دماغها على المخده اللي وراها
وغمضت عينيها واتهدت بتعب : ماتتأسفيش انتي
مالكيش ذنب ، اخوكي فعلا مش طبيعي ، ده غير
كل الحاجات دي اكتشفت ان عنده حب تملك ، ده
مريض

مها بخفوت : اسفه

سولاف هزت دماغها برفض ، وبعد صمت طويل
شوية

سولاف : ممكن أطلب منك طلب ؟

مها : أنا اخدمك بعيوني

سولاف : عايزة أروح ازور ماما ، اخوكي حابسني
هنا من شهرين ومش عارفه أخرج

مها قامت : قومي يا حبييتي ، أنا هساعدك

سولاف قامت تلبس ومها اخدتها ونزلوا من غير ما
حد يحس بيهم وراحوا عند قبر حنان وسولاف قعدت
عندها شوية تقرأ لها قرآن وتتكلم معاها وبعد فتره
مها قربت منها : سوسو حبييتي يلا إحنا لازم نمشي
قبل ما حد يلاحظ غيابنا

سولاف : انا بجد بشكرك أوي ، انتى مش عارفه
أنتى عملتيلي ايه بمساعدتك ليا

مها بابتسامه : أنتى اختى يا سولاف

سولاف أبتسمت وأول ما قامت وقفت الدنيا لفت بيها
وكانت هتقع لولا مها لحقتها : مالك يا سولاف ؟
فيكي ايه ؟

سولاف بتعب : مش عارفه والله ، حاسه أنى دايله
مش قادر

بصت لقبر مامتها وأبتسمت : شكلي هحصلها ولا ايه
؟

مها: بعد الشر عليكى تعالى نروح المستشفى بسرعه

مها اخدت سولاف وراحت المستشفى والدكتورة
كشفت عليها

الدكتورة : ألف مبروك يا مدام انتى حامل
سولاف بصدمة : حامل !! ده إزاي ؟ أنا باخد برشام
منع حمل ، إزاي حامل ؟

الدكتور ه : عادي ساعات بيحصل حمل مع البرشام
أو ممكن تكونى ماخديتش بالك فى مرة أو كده ، فى
كذا سبب

مها بسعادة : ألف مبروك يا سوسو

بصت للدكتور ه : هي حامل فى قد ايه كده ؟

الدكتورة : يعنى حوالي شهرين

سولاف بصت على بطنها وهي بتحسس عليها بحنية
: يعنى من ساعة وفاة ماما وأنا حامل ، أنت هو
العوض ليا

ضمت بطنها بايديها كأنها بتحمي ابنها من الدنيا
وهمست بابتسامة : أنا يمكن خسرت كل حاجة فى
حياتي بس أنت لا ، او عدك إنى هحافظ عليك طول
مافيا نفس ، ثق فى ماما يا حبيبي

غمضت عينيها وهي بتشجع نفسها تتمسك بامل جديد
وتحاول مرة ثانية إنها تعيش عشان حد

مها : يلا عشان نبلغهم في البيت ، دول هيطيروا من
الفرحة ، انتى ماتعرفيش كانوا مستنين حملك ده
إزاي

سولاف مسكت ايدها برعب : لا ، أوعي يا مها
تقولي لحد أوعي

مها باستغراب : ليه ؟

سولاف شدتها عليها وبصوت واطي : انتى هبله يا
بت ؟ بقولك اخوكي بييجبرني أخذ برشام منع حمل ،
يعني ماكانش في مشكله مانعه الخلفة زي مانتوا
فاهمين ، وحسام لو عرف أنى حامل مش بعيد
يجهضه

مها : طيب والحل ؟ ما هو كده كده هيبان ، مش
هتعرفي تخبي كثير

سولاف بحزن وخوف : ولحد الوقت ده أنا مش
هتكلم ، ولا أنتى كمان ، كأننا مانعرفش حاجة ، ولما
الموضوع يبان هيكون مافيش حل غير أنى أكمل
الحمل ، مش هيقتلوه يعني

فون مها رن وکان جوزها : يا خبر يا سولاف دول
شکلهم اکتشفوا أنا نزلنا ، هنقولهم ايه ؟

سولاف بتفكير : هنجيب أي حاجة على سكتنا كأننا
نزلنا نشترها وخلص

مها : وهيدخل الهبل ده على حسام ؟

سولاف بخوف : طيب ايه ؟

مها : هنقولهم أنى تعبت فجأة وانتى جريتي بيا على
المستشفى وخلص

سولاف : لا يا بت ذكية ولما يسألوا مالك هتقوليلهم
ايه ؟

مها شدتها قومتها من على السرير ونامت هي : أي
حاجة ياختى

بصت للدكتورة اللى قاعده على مكتبها : لو سمحتى
أنا عايزة اكشف أنا كمان

الدكتورة : على ايه بالظبط ؟

مها : عندي وجع في بطني من كام يوم وعايزة
أعرف مالي

الدكتورة قامت كشفت عليها وقعدت تضحك : لا مش
معقول

مها : في ايه ؟

الدكتور : مبروك أنتى حامل

مها: انتى بتهزري صح ؟ ده أنا لسه والده مابقاليش
سنه ، لحقت ؟

الدكتورة بضحك : أهو والله باين في السونار ، حامل

سولاف أبتسمت : مبروك يا مها

مها أبتسمت : الله يبارك فيكي

شدتها من ايدها بهزار : ده انتى حظك في السما يا
بت ، أهو موضوع حملي ده هيغطي على غيابنا بره
البيت

سولاف أبتسمت بهدوء والاتنين روحوا البيت وأول
ما دخلوا شقة سهير عبد الرحمن راح عند مها :
كنتي فين يا مها كل ده ومن غير ما تبلغيني ؟

مها بصت لكل اللي قاعدين بتوتر وشافت حسام اللي
قرب على سولاف والنار بتطلع من عينيه وحست
إنه هيقتلها ، وخافت منه جدا هي أول مرة تشوفه
كده وفكرت إزاي سولاف بتستحمله ؟

حسام بهمس : حسابك معايا يا سولاف ، و حياة ربنا
 مانا سايبك على اللي انتى بتعمليه ده ، عشان انتى
 الظاهر عيارك فلت على الآخر

سولاف بلعت ريقها بتوتر ورعب بس مها انقذتها لما
 اتكلمت بصوت عالي : يا جماعة معلىش قلقناكم معانا
 بس أنا كنت قاعده مع سولاف وتعبت جامد فجأة
 وهي اخدتني بسرعه على المستشفى ومالحقناش
 نبلغكم

عبد الرحمن بتوتر : ليه ؟ مالك فيكي ايه ؟
 مها أبتسمت : ما تقلقش يا حبيبي أنا بس حامل
 كلهم بصلها باندهاش وعبد الرحمن : انتى بتتكلمي
 جد ؟

مها بضحك : اه والله بجد ، التحاليل أهي

كلهم شافوا التحاليل و اتأكدوا فعلا إنها حامل وهنا
 سهير زغردت بأعلى صوتها سمعت الشارع كله
 و راحت حضنتها وقالت بتلقيح : ايوه كده ، بنتى
 حبيبتى اللي كل سنة تحمل مش زي ناس ، أرض
 بور

سولاف بلعت الكلمة بصمت ، هي مش فارق معاها
اساسا لأنها حامل فعلا ومها بصتلها بحزن بس هي
ابتسمتها بهدوء

كلهم انشغلوا بمها وحملها ونسوا سولاف خالص
اللى حست إنها دايقه ولازم ترتاح ، بصت لحسام
اللي بيراقبها زي الرادار واتكلمت بصوت واطي
وهي بتحاول تنقي كلماتها بعناية اللي تخليه ينفذها
اللى هي عايزاه من غير مايعرف عن موضوع
الحمل بتاعها

سولاف : ممكن اطلع بيتنا ؟ تعبت النهارده لما
ساعدت مها وعايزة أنام شوية

حسام لما سمع كلمة بيتنا ماسمعش حاجة بعدها ،
لسه صوتها وطريقة نطقها للحروف بتجننه رغم
تعبها ده كله وبعد كل الوقت اللي عاشوه مع بعض ،
أبتسم : يلا بينا

اخذها وطلعوا فعلا والحمد لله عدى اليوم من غير
ضرب أو أي حاجة

بس للأسف الوضع الهادي ده ماستمرش لفترة طويلة
 ورجع حسام للعنف تاني وعلى حاجات اتفه من
 الأول وعصبيته غير المبررة بتزيد أكثر وبدون اي
 أسباب وتصرفاته كمان بقت غريبه ودايما بيكون
 شارد ومتوتر واللى زاد إنه بيشر ب سجاير كمان
 بشراهة وطريقة مقلقه

مرت الأيام وفي يوم حسام أخذ سولاف ونزلوا
 يتغدوا عند محمد وسهير تحت ، وطبعاً سهير
 ماسابتش فرصه زي دي وماتحرقكش فيها دم
 سولاف بكلامها السم وتصرفاتها المقرفه

بعد الغدا سولاف لمت الاطباق مع سهير و عملت
 شاي لمحمد وراحت قعدت على الارض وبتحط
 الصينيه اللي عليها الشاي وكيك على الترابيزة
 القصيرة قدامه

كانت لابسه الطرحة بتاعتها اي كلام كأنها شال على
 راسها ولما اتحركت الطرحة وقعت وشعرها الطويل
 الأسود المفروود على ظهرها بان

محمد بصلها بابتسامة : شعرك جميل يا بنتي ما شاء
الله ربنا يباركك فيه

سولاف أبتسمت : تسلم يا عمي

بصت بطرف عينها على حسام اللي النار بتطلع من
عينيه وهو بيوصلها ونظراته كلها شر وتوعد ليها

.

بعد ما اليوم خلص ، حسام طلع على شقته فوق وهو
بيجر سولاف من ايدها وراه بعنف وأول ما دخل
الشقة وقفل الباب وراه بصلها بشر وضربها بالقلم
جامد

سولاف : بتضربني ليه هو أنا عملت ايه ؟

حسام ضربها تاني : ايوه عملتي ، بتفكي شعرك
تحت ليه هاه ؟ مش شعرك ده ملكي أنا ويخصني ؟
بتوريه لغيري ليه ؟

سولاف : أنا ماكانش قصدي والله هو اللي بان
غصب عني

حسام شدها من شعرها جامد وهي اتأهت بوجع :
خلاص يا سولاف يبقى اقصوهو لك خالص

.

جرها وراه لحد المطبخ واخذ سكينه من قدامه
 وفضل يقطع في شعرها بكل غل و عشوائية و غباء
 لدرجة إنه عورها في ودانها ورقبتها وهي بتعيط من
 الوجع والخوف

بعد ما خلص و قطع شعرها لحد ودانها تقريبا شدها
 وراه لحد الصالون وهدها على الارض : أنتى ملكي
 وكل حاجة فيكي بتاعتي أوعى تنسى ده ، ودلوقتي
 تقومي تغيري لبسك وتجيلي على الأوضة عشان
 ماجيش أنا اجيبك بطريقتي

سابها ودخل اوضة النوم و غير لبسه ونام بارهاق
 على السرير وراح في النوم غصب عنه لدقايق وفاق
 على تنهيدة سولاف جنبه فبصلها وأبتسم ومد ايده
 ليها وهي حطت ايدها في ايده باستسلام وسابته يعمل
 اللي هو عايزه وبعد ما نام دخلت الحمام

عودة من الفلاش باك

سولاف فاقت من ذكرياتها على صوت العصافير
 اللي بتخبط على إزاز الشباك ، أدركت ان النهار
 طلع وهي لسه قاعده زي ما هي في المياه

خرجت منها تنهيدة وجع وقامت كملت الشاور بتاعها
 ولبست البرنس ، بصت لنفسها في المرايا ولجسمها
 اللي كله علامات زرقا ورفعت ايدها مشتها بهدوء
 على شعرها القصير المتقطع بعشوائية ، وحسست
 بوجع على ودانها المتعورة ، ضمت جسمها جامد
 وهي بتططب على نفسها وبتواسيها ودموعها نزلت
 ثاني

فاقت على صوت الباب بيخبط فغسلت وشها بسرعه
 وفتحت الباب كان حسام واقف وساند على الحيطه
 بدراعه وبيبص لكل تفصيله في جسمها باعجاب
 حسام : أيه الحلاوة دي كلها ؟

قرب منها ونزل البرنص من على كتافها بس هي
 بعدت نفسها عنه وقالت بلجلجه : اءاااا ، انا هروح
 احضرك الفطار زمانك جعان والوقت اتأخر
 والمفروض هتنزل الجيم بتاعك

ماستنتهوش يرد وطلعت جري بره الحمام ولبست
 هدومها وراحت المطبخ تحضر الفطار
 وقفت في المطبخ وحطت ايدها على بطنها بتوتر :
 استنى يا حبيبي شوية بس هأكلك حاضر

جهزت الأكل وقعدوا الإثنين ياكلوا وحسام زي
عادته بيفصص سولاف بنظراته ولاحظ إنها بتاكل
اكتر من الطبيعي

حسام : شايفك نفسك مفتوحه يعني

سولاف اتوترت بس حاولت تحافظ على هدوئها
عشان خاطر ابنها : أنت بتعد عليا الأكل يا حسام ،
لدرجة دي بتكره أنى أكل من الأكل اللي بتجيبه ؟
لو كده مش واكله خلاص

حسام مسك ايديها بسرعه : لا ، أنتى تأكلي براحتك
، أنا بحبك وبحب كل حاجة بتعملها ، بالعكس لما
تأكلي كويس صحتك هترجع تاني

وكمل بوقاحه : واهو بدل ما تفر فرى منى كل شوية

سولاف في اللحظة دي كانت حاسه بالإشمئزاز منه
فسحبت ايديها من ايده وكملت أكل غصب عنها ،
كانت قرفانه منه ومن نفسها ومن الأكل بس لازم
تاكل ، هي هتعمل اى حاجة عشان خاطر ابنها ولو
على حساب نفسها هي

في مكان ثاني أول مرة نروحه

في واحد من القصور في الإسكندرية ، تسالت أشعة الشمس الرقيقة لواحدة من الأوض نايم فيها شاب اللي اتحرك بكل كسل وشد اللحاف على وشه بيمينع أشعة الشمس توصل لعينيه وكمل نوم لدقايق ولقى الباب بيخبط وواحدة من مدبرات المنزل بتنادي عليه : مروان بيه الفطار جاهز

مروان بنوم : امشي يا سندس وسيبيني أنام

سندس : بس يا بيه ، البيه الكبير مستني تحت على السفارة وقالى اقولك تنزل

مروان زعق بغضب : اووووف بقى ، سندس أنا قولت سيبييني اتزفت أنام مش ناقص قرف على الصبح

سندس : حاضر يا بيه

سندس انسحبت بهدوء ونزلت لاوضة السفارة ووقفت قدام راجل باين عليه الضيق اللي سألها بصوت صارم : فين الباشا ؟

سندس بتوتر : مرضاش يقوم يا بيه وقالى امشى
واسيبه ينام

كمال بغضب : طبعا ما البيه سهران لحد وش
الصبح وراجع البيت يتطوح من الزفت اللي بيشر به
ده عايزاه يقوم إزاي ؟

اتدخلت فيري مراته في الكلام بتدافع عن مروان :
يوه يا كمال ما تسيب الولد يعيش سنه

كمال بضيق : وانتى شايفه اللي بيعمله ده اسمه
عيشه أصلا ؟ كل يوم سهر وشرب وخروجات مع
البنات وحاجه آخر مسخره ، تفتكري لو الصحافه
شمت خبر عن عمايله دي هيعملوا ايه ؟ هتكوني
مبسوطه يعني لو ده حصل ؟ طيب شكلنا هيكون ايه
قدام الناس ؟

دخل من الباب راجل في أواخر الخمسين : الولد لسه
صغير سيبه يعيش سنه

كمال بصله : صغير ؟ صغير ايه ده ان شاء الله ؟ ده
بقى شحط عدى ال ٢٥ سنه هيكبر امتى ده ؟ وبعدين
المفروض يتحمل مسؤوليه بقى وينتظم في شغله
معانا في الشركة ، أنا عاطيله ورق صفقه بقاله شهر
عنده لحد دلوقتى ماخلصهوش

عاصم بضيق : مش أنت اللي هتتحكم في ابني يا
 كمال وبعدين أنا ابني بيعرف يتحمل مسؤوليته
 كويس الدور والباقي على عيالك أنت

.

قاطعهم صوت تمارا اللي دخلت الاوضة وراحت
 قعدت على السفارة : صباح الخير مامي بابي اونكل

فيري : صباح النور يا حبيبي

كمال : صباح الخير يا هانم ، انتى كمان مش ناوية
 تتعدلي شوية ؟ ولا هتفضلي زي البيه ابن عمك كده
 ؟

تمارا بزهدق : اوف بقى ، تاني الكلام ده يا بابي هو
 كل يوم ولا ايه ؟

كمال زعق : بنت ايه قلة الأدب اللي انتى فيها دي ؟
 انتى ناسية نفسك بتتكلمي مع مين ولا ايه ؟

تمارا بتوتر : لا ، اناااا

كمال قاطعها : انتى تسكتي خالص ، ده بدل ما
 تحسي على دمك وتقومي تروحي جامعتك وتذاكري
 شوية بدل مانتي بقالك سنتين بتعيدي في سنه رابعه
 كده واقفه تردي عليا بكل قلة أدب

بص لمراته : لمي عيالك يا هانم اللي مش متربين
دول بدل ما اخربها على دماغكم كلكم

قام وقف بعصبية : جتكم القرف ، سديتولي نفسي
على الصبح

كمال سابهم ومشى راح على شركته وفيري بتبصله
بشر وقرف وبصت لعاصم : عاجبك اللي أخوك
بيعمله ده ؟

عاصم قام : والله عنده حق ، ناس تحرق الدم
وسابهم ومشى هو كمان وتمارا مشت من القصر
بكل عصبية وهي بتشتتم في سرها باقبح الألفاظ على
الكل ، واخذت بعضها وراحت تقابل صاحبها في
النادي

استوووووب شوية نتعرف على الشخصيات اللي
ظهرت معنا

كمال هارون : ٥٥ سنة واحد من أكبر رجال الاعمال
في مصر ، عنده شركة استيراد وتصدير كبيرة

بيديرها هو واخوه الكبير ، وليه اخت متجوزه بره
مصر

فريال : معروفه باسم فيري ٥٢ سنه زوجة كمال ،
انسانه أنانية و متكبره ، وعندها بنتين

تمارا : ٢٤ سنه انسانه متكبره جدا زي مامتها
ومؤذيه لكل اللي حواليتها ، بتدرس في كلية تجارة
قسم ادارة أعمال

لوجين : ٢٢ سنه مختلفة عن مامتها واختها ،
شخصيه لطيفه ومتواضعه ، بتحب الرسم جدا بس
ماحدش بيدعم هوايتها

*

عاصم هارون : ٥٨ سنه أخو كمال الكبير ، انسان
جشع جدا بيحب الفلوس اكثر من نفسه ومش سوي ،
مطلق وعنده ولد واحد

مروان : ٢٧ سنه ابن عاصم ، شاب ذكي وكان
متفوق في دراسته بس بيتفنن إزاي يلغي مخه
ويضيع وقته في حاجات تافهه ، وكل حياته شلته
البايظه وخروج وسهر وشرب وبس

*

كارما هارون : ودي الأخت الصغيره لكمال وعاصم
وعايشه في ايطاليا مع جوزها الإيطالي وابنهم
الوحيد إياس

*

وفي كمان آدم والشخصية الأخيرة في العيلة دولت
هانم ودي تبقى ام كمال وعاصم وكارما وهنتعرف
على كل الناس دول مع الأحداث

آخر اليوم مروان صحى من نومه على صوت فونه
المزعج ورد بكسل : ألو

سمع المتصل ورد : ده الساعة ١٠ اللي هي كمان
ساعة دي ؟

سمع المتصل تاني ورد : لا ياعم مش هلق اجي أنا
في ساعة ، خليها ساعتين كده وهتلاقيني عندك

سمع المتصل ورد : هشوفها حاضر لو حبت تيجي
هجيها معايا

قفل الفون واتقلب شوية في السرير بكسل وقام ،
دخل أخذ شاور ولبس هدومه وظبط نفسه وبص

لشكله في المرايا بغرور فهو شاب يملك من الوسامة
قدر كبير

أخذ فونه ونزل من اوضته وهو بيدندن وعلى السلم
قابل تمارا : مساء الخير يا بت

تمارا : بت أما تبتك

مروان زقها من وشه : أنا غلطان ، ده أنا حتى كنت
عازمك على حفلة إنما ايه اورجانك

تمارا بصتله : بتتكلم جد ؟

مروان قرب منها : وهو أنا امتي هزرت في حاجات
زي دي ؟

تمارا : طيب خودني معاك

مروان سابها ونزل : لا يا حلوه مش عايز

تمارا نزلت جري وراه واتشعلقت في دراعه : لا
بالله عليك يا مارو خودني معاك هاه ؟ أنا كنت
خارجة مع صحابي بس فشكوا الخروجة ومدايقة
اوي فخليني اجي معاك ، عشان خاطري يا مارو ،
هزعل والله

مروان ضحك : طيب ماتزعلي ياختي الله ، حلوة
دي

قاطعهم صوت عاصم اللي بيتكلم بحزم : مروان ،
رايح فين على المساكده ؟

مروان : روي انتي يا تمارا استنيني في العربية
وأنا هحصلك

تمارا مشت بسعادة إنها هتخرج معاه بدل خروجتها
اللي قعدت ساعتين كاملين تجهلها وفي الآخر
اتفشكت

ومروان بص لباباه : نعم يا بابا ؟

عاصم بسخرية : نعم الله عليك يا حبيبي ، رايح
تتسرمح وتسهر وجارر بنت عمك وراك ومش مهتم
باللي بيحصل حوليك

مروان : وهو ايه اللي بيحصل مش فاهم ؟

عاصم راح مسك كتافه : هتجيب حقنا من آدم امتي
هاه ممكن أعرف ؟

مروان : وهو فين آدم ده ، في اخر الدنيا وبعدين
أنت عارف طول ما الراجل الرخم ده معاه ماحدثش
بيعرف يقرب منه ، اصبر بس يرجع ويبقى تحت
ايدي وأنا هخلص منه

عاصم : ايوه ايوه اسطوانة كل مرة وفي الآخر هو
اللى بيعلم عليك ويسافر تاني

مروان : اوووف بقى ، خلاص لو شايف أنى ماليش
لزمه كده اتصرف أنت ، وعن إيدك بقى أنا ورايا
ميعاد

سابه ومشى وهو بيلعن ويسب فى آدم والنار بتطلع
من عينيه : @\$@ يا آدم ، عكرتلى مزاجي الله
يعكر مزاجك ، اوووووف

عند الحربايتين سهير وسميرة

سميرة : ايه يأم حسام هنفذ الخطة امتى ؟

سهير بغیظ : والله ما عرف ياختى الواد حسام ده
هيجنني خلاص

سميرة : ليه ماله حسام ؟

سهير قربت من أختها : مهما أكلمه عن مقصوفة
الرقبة دي يعمل ودن من طين والتانية من عجین ،
ولا بيصدق عليها حاجة كأنه واثق ومتأكد إنها

مستحيل تعمل حاجة من وراه ، البت خلاص ركبت
ودللت رجليها يا سميرة

سميرة : معقوله ؟

سهير : ايوه ياختي ، أنا خلاص برج من نفوخي
هيطير

سميرة : طيب ايه ؟ هنعمل ايه بقى ؟

سهير : بصي احنا بكرة الصبح مسافرين البلد عند
أخوات محمد هنقعد ثلاث أو أربع أيام كده ، لما
ارجع ان شاء الله هبقى اقعد معاكي ونخطط على
رواقه

سميرة : ماشي تروحي وترجعي بالسلامة ياختي

.

وتاني يوم الصبح سهير ومحمد سافروا وحسام
وسولاف ودعوهم وزى كل يوم حسام قفل على
سولاف ونزل شغله

سولاف كانت قاعده في اوضتها على سريرها
وبتحسس على بطنها اللى بدأت تكبر وبدل ما تتجنن

من قعدتها بين أربع حيطان لوحدها فضلت تتكلم مع
ابنها ، الكائن الوحيد اللي فاضلها من الدنيا : حبيبي
اللي بدأ يكبر وكلها أيام وبطني هتبان ، ده حسام
هيعمل مننا بطاطس محمرة

ضحكت بحسرة : لا بطاطس مهروسة بما إنه بيحب
الضرب أوي كده

ضمت بطنها بحب : أنا ماليش غيرك فعشان
خاطري ماتسبينيش أنت كمان ، اتمسك بالحياة زي
ما أنا بتمسك في كل حاجة عشان أحملك ، أنا هفديك
بروحي فعشان خاطري خليك قوي

نامت على جنبها وسرحت وهي بتمسد على بطنها
كأن ابنها في حضنها بجد ، وبتفكر في طريقة تهرب
بيها من هنا عشان مستحيل تخلي ابنها يعيش مع
واحد مريض زي حسام

قاطع سرحانها رنت فونها اللي وجوده زي عدمه
معاها

قامت بسرعه ترد وكانت متأكدة إنه حسام لان
مافيش حد غيره بيكلها -كل صاحبها قطعوا
علاقتهم بيها من زمان ومالهاش حد يظمن عليها من

بعد وفاة مامتها- ولو ماردتث عليه هيضربها زي
العاده وهي في غنى عن ده

ردت بسرعة والغريب إنها كانت مها -اللى بتظمن
عليها وعلى البيبي- وفضلوا الاتنين يتكلموا شوية
بتوتر من الايام اللي جاية وفجأة سولاف لقت حسام
شد الفون من ايدها ورماه على طول دراعه هبده في
الحيطة وقع ميت حتة على الارض

سولاف بصتلته : ايه اللي أنت عملته ده ؟

حسام ببرود : عشان ماتسمعيش الكلام كويس ،
قولت كلام في الموبايل ممنوع

سولاف : دي مها أختك

حسام : انشالله أمي ذات نفسها ، كان المفروض اخذ
الموبايل منك خالص بس مش مشكلة ملحوقه واديه
غار في ستين داهية

سولاف راحت قعدت على الارض قدام فونها
ومسكته بس ماكانش فيه حتة سليمه ، دموعها نزلت
وهي شايفه آخر رابط بينها وبين مامتها اتدمر زي
اللي قبله ، كل صورها مع مامتها اللي كانت بتملي
عينيها بيها راحت ومش هتقدر تشوف مامتها تاني

بصت لحسام بدموع : أنا بكرهك

حسام اتجنن من الكلمة وراح شدها من شعرها :
قولتي ايه ؟

سولاف خلاص فاض بيها ومابقتش قادره ولا عايزه
تستحمل اكثر من كده ، كده كثير أوي ، وخلص
هي مش هتستحمل أكثر ، وقالت بصريخ : بكرهك
يا حسام بكر_____

مالحقتش تكمل كلامها من القلم اللي نزل على وشها
من حسام اللي فضل يضرب فيها وهي بتحاول تبعد
ايده عن بطنها في محاوله بئسة منها لحماية ابنها
بس معرفتش فتكلمت بسرعة : حسام لأ أنا حامل

الكلمة وقعت على حسام زي الصاعقة ، وقف
ضرب فيها واتعدل في وقفته وبصلها وكل جسمه
متسمر وسأل باستنكار : أنتى ايه ؟

سولاف وهي بتزحف لورا على الارض بعيد عنه
برعب : ح .. ح حامل

حسام كشر : ده اللي هو إزاي يعني ؟

ز عق جامد : أنا مش قايلك ميت مرة تاخدي زفت
برشام منع حمل ؟

مسكها من شعرها وهي صرخت من الألم وهو كمل
ز عيق : مش كل مرة بنام معاكي فيها بأكد عليكي
تاخدي البرشام وانتي بتقوليلي اخدته ، إزاي حامل ؟
سولاف بعياط : والله والله كنت باخده كل مره ، بس
دي إرادة ربنا أعمل ايه ؟

حسام هبدها جامد على الارض : مش أنتي اللي
هتعملي ، أنا اللي هعمل

سولاف حطت ايدها على بطنها وبترجع لورا برعب
: أنت هتعمل ايه ؟

حسام قرب منها بخطوات خوفتها وزى ما توقعت
بدأ يضرب فيها بكل همجية ، وهي بتحاول تحمي
نفسها منه وصرخت : حسام بطل ، ابوس رجلك
كفاية

حسام ماهتمش لتوسلاتها وكمل ضرب وهي بتحاول
تستعطفه : هتقتل ابنك ؟

حسام ز عق : ايوه هقتله ، وهقتل أي حد يحاول
يشاركني فيكي

نزل على ركبه قدامها ومسك وشها جامد لدرجة إنها
حست ان فكها واسنانها هتتكسر بين صوابعه : أنتي
بتاعتي أنا ، ملكي أنا ، وماحدث ليه الحق يشاركني
فيكي ، أنا عملت المستحيل عشان تبقي ليا لوحدي
ومش هتيجي دلوقتي تجيبيلي طفل يشاركني فيكي

-

سولاف بتقول أى كلام بتحاول تهديه عشان ابنها :
ماتقلقش ماحدث يقدر ياخدني منك ، أنا هفضل
جنبك على طول حتى بعد ما طفلنا يجي ، حبي ليه
مش—

سولاف مالحقتش تكمل كلامها من القلم اللي نزل
على وشها تانى خلى بوءها كله يجيب دم ، وحسام
قام وقف وزعق جامد وهو بيتنطط من كتر العصبية
والغضب اللي هيجننه : اخرسي ، اخرسي بقى ،
أوعى تقولي إنك بتحبي حد غيري ، مش بعد كل ده
تحبي حد غيري ، انتي مش عارفه أنا عملت حاجات
كثير إزاي عشان نوصل للمرحلة دي ، انا زمان
اللي بعث رجاله يضربوا إبراهيم عشان فكر فيكي ،
هددت صحابك يقطعوا علاقتهم بيكي عشان
ماتشاركيش حياتك مع اي حد حتى لو جزء صغير

منها ، أنا منعت الجيران يتكلموا معاكي عشان
ماتتصاحبيش على ناس جديدة ، منعتك من النزول
والشغل وكل ده ليه هاه ؟ عشان تفضلي معايا أنا
وبس

كمل بجنون : أنا اللي قتلت أمك عشان مايبقالكيش
اي حد في الدنيا دي غيري ، عشان كنتي متعلقة بيها
أكثر مني ، قتلتها عشان تيجي تترمي في حضني
وتبقى معايا على طول ، تبقى ليا أنا وبس فمش بعد
كل ده تجيبيلي طفل يشاركني فيكي ، لا مش هيحصل
وحياتك ما هو حاصل يا سولاف

سولاف تحاملت على نفسها وقامت وقفت وبصتله
بصدمة : أنت أيه ؟ ع عملت ايه ؟

سألت بدموع وانهيار وصوت مبحوح : ام.. ا..امي
أنا .. أنت قتلت ..ها ..ها ؟

حسام رد عليها زي المغيب : ايوه أنا اللي قتلتها ، أنا
عملت كل ده عشان تجري على حضني وتبقي ملك
ليا أنا وبس ودلوقتي الطفل ده لازم يموت هو كمان

حسام خلص كلامه ونزل فيها ضرب بكل وحشية
كأنها مش انسانه قدامه وفضل يضربها في كل

جسمها ماسابش حته غير وايدة وصلتلها وضربها
أكثر في بطنها بكل غل وكره وهي بتحاول تحمي
الجنين من بطشه بس ما باليد حيله هي هتجي ايه
قدامه

سولاف لقت ان المقاومة قصاد حسام مش هتفيد
فبدأت تصرخ جامد بكل صوتها وتطلب المساعدة
لعل حد من الجيران يسمعها وينجدها من ايدين
الوحش ده

سولاف : الحقونيببي .. حد يساعدنيبيبي .. بالله عليكم
.. حد ينجدني

حسام قعد فوقها وكتم بوءها بايده جامد : اخرسي ..
اخرسي

سولاف فضلت تتحرك بكل قوتها بتحاول تفلت منه
وهي مستمره في النحيب وحاسه ان نفسها هيتقطع ،
فضلت تحرك ايديها بعشوائية وتضربة وتخربشه في
وشه وصدرة وبتحاول تفلت منه لحد ما ايدها
اتخبطت جامد في الترايبزة الصغيره جنبها وطفاية
السجاير بتاعت حسام وقعت على دراعها

السجاير اللي كانت مولعه نزلت على جلدھا حرقتها
بس هي ما حستش من كتر الوجع اللي هي فيه ، كل
اللي لفت نظرھا الطفاية نفسها اللي اخدتھا وبدون
لحظة تفكير واحده ضربته بيھا بكل قوتھا على
دماغه فتحتها له ووقع عليها سايح في دمه

بره الشقة

في ناس اتجمعت بسبب صراخ سولاف وكان منهم
واحد ساكن في دور عالي شوية وده يبقي صاحب
معاذ ، لما سمع الدوشه نزل بسرعة وخبط كثير على
الباب بس ما حدش رد فاضطر يتصل على معاذ لانه
عارف انه صاحب حسام وبلغه يجي بسرعه عشان
يتصرف وهو قاله انه هيجي في اسرع وقت

سولاف كانت مصدومه من اللي عملته جسمها كله
كان بيتنفض ويرتجف وبتتنفس بسرعة ، زقت حسام
جامد بعدته عنها بصعوبة واطرعبت من الدم اللي في

كل مكان بس استجمعت نفسها وطلعت جري بره
الشقة قبل ما يقوم تاني

فتحت الباب واتخضت من الناس اللي واقفين وواحد
قربت منها وهي بتبص على الدم اللي مغرق هدمها
بصدمة : أنتى كويسه يا بنتي ؟

سولاف صرخت : ابعدوا عني

اخذت بعضها ونزلت جري على السلالم وكأنها
بتهرب من الموت ووقعت كذا مره بس كانت بتلحق
نفسها بسرعه وتقوم تاني تكمل جري لحد ما وصلت
للدور الأرضي وقبل ما تخرج من العمارة لقت معاذ
في وشها

الإثنين اتصدموا من بعض ، معاذ صعق من منظر
سولاف اللي كانت هدمها مقطعه وشعرها مبهدل
وبوءها كله دم وجسمها مليان كدمات وجروح
وحروق وماشيه برجليها حافين ، وسولاف اترعب
من معاذ وفضلت تعيط وترجع لورا وهي بتهز
دماغها برفض وطلعت تجري بتهاول تهرب منه
عشان مايرجعهاش لحسام

معاذ خرج من صدمته بسرعه وطلع جري وراها
ومسك ذراعها وهي بتصرخ : سيبيني .. ابعد عني

معاذ زعق : سولاف اهدي ، اهدي شويه

سولاف فضلت تضرب فيه وتشد نفسها منه كأنه
شخص غريب عنها مش الإنسان الوحيد اللي وثقت
فيه بعد باباها واعتبرته في يوم من الأيام أخوها
الكبير

عافت كثير قصاده بس ما عرفتش تفلت منه :
سييني امشي ، بالله عليك ابعده ، أنا لازم امشي من
هنا ما ينفعش اعيش معاه تاني

معاذ بيحاول يفهم قصدها وتوقع إنها بتتكلم عن
حسام فقال بتوتر : أنا همشيكي من هنا

سولاف بطلت حركة وبصتله وهو كمل : تعالي
معايا أنا هطلعك من هنا

بص حولين منه وقلع البالطو الشتوي بتاعه وحطه
عليها وقفله وشدها من ايدها : تعالي بسرعه قبل ما
حد يشوفك

ماسابلهاش فرصه ترد عليه وشدها وراه بسرعه
ركبها عربيته وركب جنبها ، وساق بسرعه جدا
ودخل في أول طريق يمينه عشان ما حدش يشوف
عربيته

سولاف ماكانتش عارفه تتلم على اعصابها وجسمها
كله بيتنفض وهي بتردد برعب : أنا قتلتة ، أنا قتلتة
، أنا قتلتة

معاذ بصلها باستغراب : هو مين ؟

سولاف كانت تايهه خالص ومكمله : أنا قتلتة

معاذ : ده حسام ؟

سولاف أول ما سمعت اسم حسام عيطت جامد
وجسمها بيرتجف ومعاذ فهم ان هو : طيب فهميني
ايه اللي حصل ؟

سولاف حطت ايديها على ودانها وهي
بتعيط وبتحكي كل اللي حصل معاها من ساعة
ماتجوزت حسام كأنها كانت قنبلة وانفجرت ، ومعاذ
بيسمعها بصدمة وحاسس أنه هيتشل من اللي بيسمعه
ومش مصدق ان حسام يعمل كل ده

سولاف بعد ما خلصت كلام حطت دماغها على
تبلوه العربية قدامها وفضلت تعيط ومعاذ طلع فونه
بسرعه ورن على مراته

منى : ألو

معاذ : ايوه يا منى ، أنتى فى البيت ؟

منى : اه يا حبيبي فى البيت

معاذ : طيب معلىش ممكن تروحي لحسام كـ

منى كشرت باستغراب وقطعت كلامه : وأنا اروحلہ

ليه ؟

معاذ زعق بتوتر : قومي يا منى اعلمي اللي بقولك
عليه ، مصعب صاحبي رن عليا وقالى اجي بسرعه
بس أنا عندي عمليه مهمه ومش هعرف اروح

دلوقتي وخايف يكون فى حاجه حصلت أنتى دكتورہ
وهتعرفى تتصرفى فروحي أنتى وأنا هحصلك لما

اخلىص

منى قامت : ماشي قايمه أهو ماتز عقىش كده

معاذ : خودي عم رمضان البواب معاكى وأنتى

رايحه هاه ماتروحيش لوحدك ، فهمانى يا منى ؟

اوعى تروحي لوحدك

منى : حاضر حاضر ماتقلقش

منى قفلت مع معاذ وراحت لبست ونزلت بسرعه
وخلال خمس دقائق كانت عند حسام واتصدمت من
منظر المكان وحسام اللى سايح في دمه والناس
حوليه بيحاولوا يفوقوه

مى قربت منه بسرعه : ايه اللى حصل هنا يا
مصعب ؟

مصعب : والله ما اعرف يا دكتور ه ، ده أنا كنت
قاعد مره واحده سمعت صوت صريخ وتكسير
فنزلت هنا ورنيت على دكتور معاذ وقلتله يجي
وخبطت كتير لحد ما المدام فتحت بس لقيتها طلعت
تجري وسابت الدنيا كده

منى راحت جري جابت علبة الاسعافات وقعدت
على الارض جنب حسام وبدأت تعالج جرحه
وتحاول تفوقه

حسام فاق ومنى سألته : أنت كويس ؟

حسام فضل قاعد شويه تايه وبعدها استوعب اللى
بيحصل وفضل يلف بنظرة في المكان بيدور على
سولاف : هي فين ؟

منى : هي مين ؟ مافيش حد هنا

مصعب : اسكتي ليسمعك ممكن يقتلك فيها

منى سكتت وهي بتراقب حسام اللي لف الشقه كلها
ميت مرة يتأكد ان سولاف مش فيها وبعدها نزل
جري يدور عليها في الشوارع زي المجنون ومنى
ومصعب وراه

معاذ بيسوق بسرعه جدا كأنه في سباق وفونه رن
كانت منى اللي بلغتة بكل حاجة حصلت

معاذ : خلاص يا منى خليكي مع مصعب
وماتسيبو هوش لوحده خالص أحسن يعمل في نفسه
حاجة وأنا كلها كام ساعه وجاي

منى بخوف : هتيجي امتي ؟ أنا خايفه أوي من
صاحبك ده ، ده مجنون يا معاذ

معاذ بضيق : مش عارف يا منى هاجي امتي ،
المهم انتي ماتقعديش معاه لوحداك وخلي بالك من
نفسك لحد ما اجي ، ولو مالقتيش حد يقعد معاكي
روحي أنا مش مستغني عنك ، اوعي تفضلي لوحداك
معاه في مكان واحد ، سمعتي ؟

منى : حاضر يا معاذ ماتقلقش عليا بس أنت
ماتتأخرش

معاذ : حاضر هحاول

قفل معاها ورمى فونه على التبلوه قدامه بغضب
وبص لسولاف : ماتقلقيش لسه عايش

سولاف بصتله وسكتت ، وبعد فترة

سولاف : أنت ليه بتساعدني ؟

معاذ بندم : لأنني السبب في كل اللي بيحصلك ، أنا
اللي عرفته عليك من الأول

وقف العربية وبصلها ومشى ايده على شعرها
المقطع واتكلم بحنيه : ما تقلقيش من حاجة ، زي ما
قربتك منه أنا اللي هبعداك عنه برضه

نزل ايده براحه على رقبتها : خلاص يا سولاف
مافيش عذاب بعد النهارده ، ثقي فيا

معاذ ضغط جامد على العرق النابض في رقبتها
خلاها يغمى عليها واتنهد بعنف وشغل العربية وكمل
سواقه بسرعه للمكان اللي يقصده

حسام فضل يلف في الشوراع زي الثور بيزق أي
 حد في سكتة وببشتم اي حد يكلمه وبيدور على
 سولاف ، بعد ما لف كثير جدا رجع تاني وقف قدام
 العمارة اللي عايش فيها

وقف في نص الشارع وعمال يبص حولين نفسه
 بتوهان لحد ما الدنيا لفت بيه ووقع مغمى عليه من
 كتر الدم اللي نزفه وفقد الوعي

منى قربت منه بحذر : ربنا يهدك يا شيخ ايه ده ،
 اخيرا وقعت

بصت لمصعب : معلش يا أستاذ ساعدني بس احط
 الجته دي في اي تاكس

مصعب وكام راجل تاني ساعدوا منى وخطوا حسام
 في تاكس

مصعب : انتى هتروحي معاه لوحدك ؟

منى : والله هو معاذ قالي ماقعدش معاه لوحدى بس
 أنا ماعيش حد

مصعب : وهو فين معاذ ؟ إزاي يسبيك لوحدك كده ؟

منى : قالي عنده عملية مستعجله ومش هيعرف يجي
 دلوقتي ، أنا بس هوصله المستشفى القريبه دي

والناس هناك كثير حتى لو حاول يعمل حاجة مش
هيعرف

بصت لعم رمضان بتردد : حضرتك هتيجي معايا ؟
رمضان اتنهدي : جاي يا بنتي مايصحش اسيبك كده
معاها

مصعب : وأنا هاجي معاكم أنا كمان ، انتي مرات
اخويا وماينفعلش اسيبك مع تور زي ده بس ثواني
هكلم مراتي اطمئنها وجاي

.

وفعلا مصعب راح المستشفى معاها هو ورمضان
ودخلوه اوضة الفحص وقعدوا يستنوا معاذ يوصل

بعد ساعة ونص تقريبا معاذ وقف عربيته قدام واحد
من البيوت الصغيرة على أطراف واحده من الأماكن
الراقية في محافظة الإسكندرية ، بص في ساعته
كان الوقت قبل الفجر بشويه بص لسولاف اللي
مغمى عليها ومسك ايدها يقيس نبضها ومشى
صوابه بوجع على مكان الحروق والكدمات في

دراعتها وقلبه بيوجهه على اللي حصلها ومش قادر
يصدق ان صاحب عمره يطلع قلبه قاسي
وبالجبروت ده كله

بصلها وهمس : سامحيني يا سولي ، بس ما عنديش
حل غير ده ، أنا مش هعرف اقف قدام حسام أنا مش
قده وهو صاحبي في الآخر

بص على باب البيت اللي وقف قدامه : هنا هتكوني
في أمان

نزل من العربية وفتح الباب ناحية سولاف وشال
البالطو بتاعه من عليها وشالها وراح حطها بهدوء
على الارض قدام باب البيت الصغير ومشى بسرعه
ركب عربيته وبعد بيها شويه عن المكان بحيث
يكون شايفها وما حدش شايفه واستنى دقائق كان
الفجر بدأ يأذن

دقائق وفي شاب طويل خرج من البيت ، وأول ما
شاف سولاف واقعه قدام الباب جرى عليها بسرعه :
يا انسه ! يا انسه انتى كويسه ؟

الشاب حرك سولاف وأول ما شاف وشها الغرقان
دم اتصدم وبسرعه نادى على والدته اللي خرجت

على صوته وهي مخضوضه : في ايه يا إسلام يا بني
بتز عك كده ليه ؟

خبطت على صدرها أول ما شافت سولاف : يا ليلة
سودا ، مين دي وايه اللي حصلها ؟

إسلام : مش عارف والله ياما ، جيبيلي حاجة بس
اغطيها بيها

هند دخلت جري جابت بطانيه ولفت سولاف بيها
واسلام شالها ودخلها البيت وحطها على سرير
والدته وبصلها : خليك معاها هجيب دكتور علي
صاحبي يكشف عليها ، زمانه في المسجد بيصلي
الفجر

هند: ماتقلقش يا حبيبي أنا معاها

اسلام خرج من البيت جري وفي بنت طلعت من
اوضته وهي بتمد ايديها ادامها بنوم : في ايه يا ماما
مالك صوتكم عالي ليه ؟

شهقت مرة واحده لما شافت سولاف : احيه مين دي
وايه اللي مبهلها كده ؟

هند : مش عارفه يا ليلي والله ده جوزك لقاها قدام
البيت بشكلها ده فدخلها وراح يجيب علي يشوفها

بعد فتره إسلام رجع مع شاب تاني اللي كان دكتور
علي

علي دخل وسلم على هند : ازيك يا حجه ؟

هند : الحمد لله بخير ازيك أنت يابني ؟

علي : الحمد لله يا أمي بخير ، إسلام حكالي عن
الموضوع واحنا جايين ، خليني اشوف البنت

هند : تعالا أدخل هي في اوضتي جوه

علي دخل الأوضة وصعق من منظر سولاف ووشها
اللي مش باين ملامحه من الكدمات والدم ، بصلهم
بصدمة وهند سألت : هي خارجه من حادثة ولا ايه
؟

علي قرب من سولاف : لالأ مش حادثة ده حد
ضاربها

رفع ايدها : بصي الكدمات اللي على جسمها دي
علامات ضرب

هند : يا عيني يا بنتي منه لله اللي عمل فيها كده

علي : البنت بتتزف من كل حته ، إحنا لازم ننقلها
المستشفى بسرعه مش هينفع تفضل هنا

.

إسلام : طيب معلىش يا أمي لبسيها حاجة غير لبسها
المقطع ده وأنا هطلع اجهز العربية

هند : حاضر

وفعلا هند جابت هدوم ليها ولبستها لسولاف بمساعدة
ليلي واسلام اخدهم وراحوا كلهم على المستشفى
وعلي اخذ سولاف على الطوارئ وبدأ يكشف عليها
هو ودكتور تاني

بعد مده خرج علي بسرعه من أوضة الطوارئ
ووراه الممرضات اللي واخدين سولاف على ترولي
وبيجروا بيها بسرعه على اوضة العمليات

.

إسلام مسك ذراع علي بقلق : في ايه يا علي ؟
علي : البنت حامل يا إسلام ، والجنين ميت ، تقريبا
من الضرب اللي اتعرضتله ولأزم ينزل بسرعه والا
ممكن تموت هي كمان

هند حطت ايدها على قلبها : انا لله وانا إليه راجعون
، وبعدين يا ابني ، العمل ؟

علي : لازم عملية بسرعه وكمان لازم نبلغ البوليس
، البنيت حد مغتصبها بوحشية أكثر من مرة و عندها
كذا ضلع مكسور ده غير ان عندها تهتك في
الحوض ، دي متدمره خالص ، لازم محضر

هند : لا حول ولا قوة الا بالله

إسلام : خلاص يا علي اعمل اللي أنت شايفه صح
واحنا معاك

علي : تمام ، هو دكتور النسا دخل معاها العمليات
عشان الجنين ده وأنا هكتب تقرير عن الحالة وهكلم
الشرطه تدخل

علي راح على مكتبه عشان يعمل اللي قال عليه
واسلام راح مع والدته ومراته وقعدوا على كراسي
الانتظار قدام اوضة العمليات

هند : تفتكر ايه اللي حصل معاها وايه اللي وصلها
للحالة دي ؟

إسلام بتفكير : مش عارف والله يا أمي

هند : ربنا يستر عليها

وماذا بعد ؟ هل فقدت المسكينة كل آمالها في الحياة
ولم يتبق لها سوى الحزن والألم ؟ أم أن الحياة
ماتزال تحمل بين كنفها بعض أشعة الشمس المشرقة
لتزين بها عتمة أيام الصغيرة الحزينة ؟

دكتور معاذ بعد ما اتأكد ان إسلام اخذ سولاف
للمستشفى وعرف حالتها من واحده من الممرضات
رجع بسرعة على طنطا وبعد مده وصل للمستشفى
اللي فيها منى ، دخل جري وراح للاوضة اللي فيها
حسام وقعد على ركبته قدام منى ومسك وشها
يتفحصه بلهفه : أنتى كويسه يا حبيبتى ؟

منى بدموع : اتأخرت ليه ؟

معاذ بيمسح دموعها بلطف : أنا آسف يا حبيبتى
معلش ، أنا جيت أهو خلاص ، قوليلي بس أنتى
كويسه ؟

منى : أنا كويسه الحمد لله ماحصلش حاجة
شاورت بدماغها على حسام : بس صاحبك مش
كويس ، دماغه اتفتحت ونزف كتير

معاذ بص عليه بغضب وبص لمصعب : متأسفين
أوي على الدوشة دي يا مصعب

مصعب : ولا دوشة ولا حاجة يابني ، ده واجبي
اساعد ، دكتور ه منى دي مرات اخويا يعنى اكيد
ماكنتش هسيبها لو حدها كده

معاذ : متشكر أوي ، طيب هو ايه اللي حصل
بالظبط ؟ ممكن تحكي لي ؟

مصعب حكى لمعاذ كل حاجة يعرفها وهو قلبه بيولع
من الغضب من حسام : خلاص يا مصعب ، متشكر
أوي لوقفك جنبنا ومتاسف تانى ، تقدر انت تروح
دلوقتي

معاذ أخذ مصعب وركبه تاكس ورجع لمنى قعد
جنبها وضمها لصدره وهو بيمشي ايده على ظهرها
: انتى كويسه ؟ ظهرك بيوجعك ولا حاجة ؟

منى حضنته جامد : أنا كويسه يا حبيبي ، كنت خايفه
أوي يا معاذ ، صاحبك ده بجد مش طبيعي ، أنا
قولتلك كتير والله قلبي مش بيرتاحله واهو أنت شايف
بعينك اهو

معاذ طبطب على ظهرها : حقك عليا يا حبيبتى ،
هو فعلا مش طبيعي وأنا مش فاهم هو ماله والله

منى : طيب وسولاف ؟

معاذ : مالها سولاف ؟

منى : مش ضربها ، والله أنا بقول الحمد لله إنها
عرفت تهرب بجد ويارب مايلاقوها تاني ابداء ، أنا
بس كنت هموت من صوته وشكله ولا لما زقنى
حسيت ان خرسانه خبطت فيا مش إنسان لحم ودم
تخيل هي بقى اللي اضربت منه

معاذ سكت وهو بيدعي من كل قلبه ان سولاف تبقى
كويسه ومايحصلهاش حاجة

في عروس البحر المتوسط

سولاف فضلت وقت طويل جدا مغمى عليها و هند
كانت بتفضل معاها كثير

إسلام : ماما هتفضلي كل شوية تيجي كده ؟

هند : قلبي واجعني عليها أوي يا إسلام

إسلام : انتى حتى ماتعرفيهاش قلبك واجعك عليها
ليه بقى ؟ مش يمكن تكون حد مش كويس وتستاها
اللي حصلها ؟

هند بسرعه : لالا يا إسلام يابني ، أوعى تقول على
حد كده وأنت ماتعرفش ظروفه ، وبعدين البنت
شكلها غلبانه ورقيقة مش سحنة حد مش محترم

-

بصت على سولاف ومسكت ايدها : مش عارفه ايه
اللي حصل بس أنا قلبي اتفتحتها وحساها زي
ماتكون بنتي

إسلام : بقت بنتك كده مره واحده ؟ المهم الدكتور
قالك هتصحى امتى ؟ البوليس بقاله يومين مستنى
عشان ياخذ اقوالها

هند : مش عارفه والله الدكتور بيقول كلام معقد كده
، مش عارفه صدمة ايه نفسيه ولا ايه ومش عارفين
هتفوق امتى

إسلام : يا معين يا رب ، ربنا يشفيها

هند : يا رب ، ألا بقولك يا إسلام ، ماتخلي ليلى
تيجي تقعد معاها شوية أهو بدل قعدتها في البيت
لوحدتها وأنا كمان عايزة أروح القصر عشان الشغل
بتاعي

إسلام قعد قصادها : أموت واعرف ياما ايه لزمته
 الشغل ده ومرمطه تحت ايدين ناس ربنا يحرقهم
 بجاز ، هو أنا كنت قصرت معاكي في حاجة ؟ هو
 أي نعم الدنيا على القد بس مستوره الحمد لله ، ليه
 بقى تنزلي انتى تشتغلي

هند بحب : ربنا يديمك ليا يا سندي ويوسع رزقك ،
 أنت عارف يا حبيبي أنى بشتغل مش عشان الفلوس
 وإنما عشان الحجة الكبيرة وجماليات الله يرحمها
 وعدتها أخذ بالي من ابنها وأنا شغالة عشانهم هما
 الاتنين بس ، وبعدين زي ما قولتلك قبل كده مش
 بشتغل كثير وطول الوقت قاعده مع الحجة أو بشرف
 على الشغل فماتقلقش عليا

إسلام بضيق : والله ما عارف اخرته ايه الموضوع ده
 ، يعني هيحصل ايه لو حد تاني اخذ باله منها ؟
 عارف إنها ست كبيرة ومحتاجة رعاية بس برضة
 وبعدين ابن جمالات ده مش شحط كبير ؟ ده يمكن
 أكبر منى كمان ، ده تاخدي بالك منه إزاي ده ؟

هند : يوه ياولا ، ده زي اخوك

إسلام بتهكم : اخويا اه

قاطعهم صوت انين سولاف اللي بدأت تفوق

هند قربت منها بسرعة : يا حبيبتي يا بنتى انتى
فوقتى ؟

سولاف بتوهان : أنا فين ؟ انتوا مين ؟

هند : انتى في المستشفى ، واحنا لقناكي مغمى
عليكي في الشارع فجبناكي على هنا

سولاف اتحركت بوجع بتحاول تقوم وحطت ايديها
على بطنها : ابني ، ابني حصله حاجة ؟

هند بحزن : البقاء لله يا بنتى ربنا يعوض عليكى
سولاف بصتلها بصدمة ودموعها نزلت : البقاء في
مين ؟

هند : الله يرحمه مات من الضرب اللى اتعرضله
سولاف صرخت بهستريا : لأ ، لا ماتقوليش كده ،
ابنى لأ ، ابني ، ده أنا ماصدقت يجي ، لأ بالله
عليكي ، لا ابني لا ، حبيبي لا ، ده أنا اتمنيته من
الدنيا ، لا يا رب لا ، يارب بلاش هو كمان تاخده
منى ، لا يارب ، رحمتك بيا يارب

الدكاترة جم على صوتها و عطولها حقه مهدئة
نيمتها و هند ماسكه ايدين ابنها وبتعيط

علي : هو ايه اللي حصل ؟

هند : صحيت وسألت على ابنها وقولت لها إنه مات

علي : ليه بس ؟ كان المفروض نمهدلها الأول

هند : والله يابني ماقصدي ، هي سألت عليه وأنا

بلغتها ماعرفش إنها هتعمل كده والله

علي : حصل خير ، هي كده كده كانت لازم تعرف

، سييوها دلوقتي ترتاح شوية ولما تفوق نشوف

هيحصل ايه ؟

هند : هي ممكن يجرالها حاجه يا علي يابني ؟

علي : بصي هو أنا ماقدرش اقولك حاجة دقيقة ،

احنا دلوقتي بنتعامل مع نفسياتها ودي يتختلف من

شخص للتاني ، فهنستنا تفوق تاني ونشوف الدنيا

فيها ايه ، وماتقلقيش هي تحت عينينا

هند هزت دماغها بفهم واسلام اخدها وروحوا البيت

.

إسلام : مالك بس يا أمي ؟ ايه العياط ده كله ؟

هند : قلبي متقطع عليها يابني ، يا حبة عيني البت

شكلها شافت كتير في حياتها وده كان أملها الأخير

وراح هو كمان ، صوتها وهي بتعيط وجعني أوي يا
إسلام

إسلام باس راس مامته : ربنا يبعد عنك أى وجع يا
حبيبتى ، وماتقلقيش ربنا كبير ومش بيسيب حد
محتاج ، وكمان علي معاها خطوة بخطوة وهيطمنا
على طول

هند هزت دماغها : طيب هروح أنا بقى القصر
زمان الحجة مستنياني

إسلام بضيق : تاني ياما تاني ، ياست نفسي تسمعي
كلامي مره واحده بس

هند ضربته على كتفه : بس يا ولد دي كلمتى أنا ،
وبعدين روح لمراتك يا خويا ، ايه اللي جايبك هنا
؟؟

إسلام بدراما : بقى اخرتها تطرديني من بيتك ياما ،
ده بعد ماجيلك من آخر الدنيا عشان بس اشوفك
تعملي فيا كده ؟

هند : لا بجد !! ده مش على اساس إنك ساكن في
الشارع اللي جنبي وكل شوية تنط عندي يعني ؟
روح روح ربنا يهديك

إسلام ضحك وباس ايديها : طيب تعالي اوصلك
 بالعربية على سكتي ، انا كمان رايح الشغل
 هند : ماشي يلا

حسام من ساعة ما فاق وخرج من المستشفى وهو
 قالب الدنيا على سولاف ، مستشفيات وأقسام حتى
 راح بيت امها وقبرها وكل صاحبها وماسابش حته
 مادورش عليها فيها لحد ماتجنن

معاذ زعق : ماتهدى بقى يا حسام وترتتي
 حسام وهو عمال رايح جاي قدام معاذ بغيط : أنا
 هتجنن يا معاذ ، هي راحت فين بس ؟
 معاذ : ما هو أنت لو تهدي وتحكيلى ايه اللي حصل
 بينكم يخليها تمشي بالشكل ده
 حسام : قولتك ماحصلش حاجة ، شدينا مع بعض
 شوية بس عادي يعني ، أنت مش بتتخناق مع منى
 يعني ؟

معاذ : ايوه بتخانق معاها بس مش لدرجة إنها
تضربني بطفاية سجائر تفتحي دماغي وتهرب ، ايه
اللي أنت عملته وصلها لكده ؟

حسام ز عق : بقولك ايه يا معاذ أنا مش ناقص قرف
بقي ، أنت مالك أصلا بينا شاغل بالك بسولاف ليه
هاه ؟ تخصك في ايه ؟

معاذ قام بنرفزة : لا إله الا الله ، أنت مش بتزهق ؟
لا بجد يعني مش بتزهق ؟ كل مرة نتكلم عليها تقول
نفس الكلمتين وأنا بصراحه زهقت بقي وتعبت من
كثر التبرير ليك

سابه ومشى وهو بيكلم نفسه : بقي كل ده يا حيوان
وتقولي شدينا مع بعض شويه او مال لو شديتوا أكثر
هتعمل فيها ايه هتقتلها ؟ طيب ورب الكعبة ماننت
لاقيها تاني يا حسام ، أنا إلهي غلطان ، كان
المفروض أحس ان في حاجة غلط من تصرفاتك ،
كان لازم أفهم اللي بيحصل من ساعة ما سولاف
اختفت بعد الجواز ، بس ملحوقه مابقاش أنا معاذ لو
شوفت بس ضلها تاني ، ماشي يا حسام الكلب

مرت الأيام وسولاف كل شوية تصحى تصرخ
وتتكلم كثير كلام ماحدث فاهم منه حاجة والدكاترة
يجوا يدوها حقنه مهدئة تنيمها ، وكده كل يوم

في يوم هند كانت بايته مع سولاف في المستشفى
والصبح صحيت وبتبص عليها لقتها صاحية وبتبص
على الشباك وسرحانه وباين عليها الهم والوجع ،
قربت منها بهدوء وقعدت جنبها : انتى كويسه يا
بنتي ؟

سولاف سمعت كلمة بنتي افكرت مامتها واللي
حسام عمله فيها ودموعها نزلت وهند اتوترت :
مالك بس يا ضنايا ؟ قوليلي مين اللي عامل فيكي كل
ده ؟

سولاف عيظت أكثر وهند اخذتها في حضنها
وفضلت تطبب علي ظهرها : لا حول ولا قوة الا
بالله ، فهميني طيب انتى مالك يابنتى ؟ ايه اللي
واجعك كده ؟

سولاف اتوجعت من ضلوعها المكسورة فهند بعدت
عنها براحة وهي ساكته وبتعيظ وبس لحد ما علي
استأذن ودخل : صباح الخير يا حجة

هند : صباح الخير أفضّل

علي بص لسولاف : ازيك يا استاذه ، شكلك أحسن
النهارده ، قوليلي حاسه بايه ؟

قرب منها شوية وهي كلبشت في هند بخوف و هند
استغربت حركتها دي

علي : انتى كويسه ؟

لسه بيمد ايده قدامه لقاها انتفضت من مكانها و رفعت
ايديها قدام وشها بخوف و عيطت فرجع تانى لورا
وبعد عنها مسافه كبيرة و رفع ايديه ل فوق باستسلام :
أنا بعيد أهو ، مش هعملك حاجة ماتخافيش

سولاف كانت مش عارفه تهدي من الحالة اللي هي
فيها دي و علي بص لهند : هي سابتك تقربي منها
عادي ؟

هند : ايوه عادي

علي : تمام ، أنا همشي دلوقتي وهاجي بعدين خليكى
انتى معاها

هند : ماشي

علي مشي وراح لمكتب دكتور ه زميلته و قعد معاها
شوية و كلمها عن سولاف و شرح لها حالتها بالظبط

وشكه وطلب منها تروح لها هي بنفسها وتشوفها وهي
راحت فعلا

خبطت ودخلت وعلي بيراقب كل حاجة من بره
الايضة : السلام عليكم ، ازيك يا ماما ؟
هند : وعليكم السلام ، الحمد لله يا بنتي أنا كويسه ،
خير هو في حاجة ؟

إيمان : لا يا امي مافيش عرفت بس ان في عسلية
تعبانه وجيت اشوف مالها

قربت شوية من سولاف اللي ماتحركتش ولا حركة
، قعدت جنبها وحاولت تلمس ايدها فسولاف بصتلها
وحاولت تسحب ايدها بسرعه بس إيمان مسكتها
كويس تطبطبت عليها : طيب بالله عليك بقى في
قمر زيك كده يعيط ؟ مالك بس يا مشمشه مين
مزعلك ؟

سولاف دموعها نزلت في صمت وإيمان قربت
بهدوء ومسحت دموعها : حقا عليا أنا ماتز عيش
فضلات تتكلم معاها شوية وسولاف مش بترد عليها
لحد ماخرجت وبصت لعلي : توقعاتك كلها صح
للأسف

علي : يعني خايفه مني ؟

إيمان : خايفه من الرجاله ممكن تقول

علي : أنا قولت كده ، الأكيد ان اللي عمل فيها كده
راجل ، مين بقى مش عارف

إيمان : بس في حاجة قلقاني يا دكتور علي

علي بصلها باستفهام : البت مش بترد خالص علينا ،
كل اللي طالع عليها عياط وبس

علي : تفتكري من الصدمة فقدت النطق ؟

إيمان : غالبا اه

علي مسح وشه بايده : يا الله ، ربنا يستر بجد

.

مرت الأيام وسولاف صحتها الجسدية بتتحسن بس
نفسيتها بتسوء يوم بعد يوم ، وكل ماتسمع صوت
راجل تخاف وتعيط ، حتى البوليس ماعرفوش
يتكلموا معاها ولما جت شرطية ست تتكلم معاها
ماكانتش بتتطق ، واتشخصت فقدان نطق مؤقت
بسبب الصدمة والمحضر اتقفل على اللي فيه كده
عشان هي رافضه تتجاوب مع الشرطه

حسام امه وابوه رجعوا من السفر وامه اول ما
عرفت اللي حصله طلعتله بسرعه

سهير حضنته : ابني حبيبي ، مالك يابني ؟

حسام : ماليش ياما أنا كويس

سهير اخدته من ايده قعدته على الكنبه وبصت على
راسه المتعوره : يا مري ، يا ميلا بختك يا سهير ،
منك لله يابت حنان ، اشوف فيكي يوم يا مفترية ،
إلهي ماتوعي تتهني في حياتك ابدًا ، ربنا ينتقم منك
يا بعيده مطرح مانتى قاعده

حسام بذهول : ايه ياما ليه كل ده ؟

سهير : ليه كل ده ! من حرقة قلبي عليك يابني ،
شوف اللي تتشل في ايديها عملت فيك ايه

حسام : أما كفاية هاه

سهير : كفاية ؟ بقى هي صعبانه عليك ومش صعبان
عليك حرقة قلبي ؟

حسام : ربنا مايحرق قلبك ابدًا بس ماتدعيش عليها
بالشكل ده ، دي مراتي

سهير بغیظ : أموت واعرف بنت ال@#\$ دي
 عملاك ايه مخلياك كده ؟؟ أنت من ساعة ماعرفتها
 وأنت مش طبيعي ، ربنا يحرقها مطرح ماهي قاعدة
 والحمد لله اديها غارت في ستين داهية بعيد عنك ،
 وماتقلقش يا حبيبي من بكرة هجوزك ست ستها
 البايره أرض البور ديه وهخليك تقول كنتي فين من
 زمان ياما

حسام قام وقف : أنا مش عايز اتجوز ، أنا متجوز
 وبحب مراتي ومش هتجوز عليها

سهير زعقت : حبك برص يابن ال@#\$ ، بقى
 بتحب المضروبة في قلبها اللي عملت فيك كده ؟ دي
 لو اطولها بس هقطعها بسناني

حسام نفخ : اف بقى ، أما بقولك ايه أنا مش ناقص
 وجع دماغ أنا داخل أنام

سابها ودخل اوضته وهي اتكلمت بغیظ : ماشي يا
 ابن بطني مابقاش أنا سهير لو ماكنتش فكتلك العمل
 اللي العقربه دي عملا هولاك ، ماشي

في بيت هند

إسلام : يعني ايه يا امى تاخديها تعيش عندك ؟ هي
كانت من بقيت اهلنا ؟

هند : بس يا إسلام يابنى البت مالهاش حد ولا مكان
تروحه يرضيك أنت تسيبها كده ؟ اعتبرها اختك
وساعدها يابني

إسلام هيتجنن من مامته : ياما البت مانعرفش عنها
حاجة والله أعلم هي مايتها ايه ؟

هند بضيق : تاني يا إسلام ، قولتلك والله البت شكلها
بنت ناس ومحترمة

إسلام : طيب ماشي هي بنت ناس ومحترمة حلو
ماقولناش حاجة بس الله أعلم بقى وراها ايه ؟ اصل
ايه اللي هيخلي واحده زيها بحالتها دي الا اذا كان
وراها مصيبه وأنا ما عنديش اى استعداد احطك في
مشاكل الناس

هند : ماتخافش ربك رحيم وهيسترها معنا ، ده احنا
حتى بنساعد محتاج ، أكيد ربنا مش هيضرنا ،
وبعدين خليها تيجي تقعد معايا بدل مانا قاعده لوحدي
كده

إسلام : يا أمي ، يا أمي ، لو عايزة حد يقعد معاكي
هبعثك ليلي أو أنا هاجيلك كل يوم إنما دي

هند : يوووو بقى يا إسلام قولتك البت شكلها كويسه
وحتى لو وراها حاجة فشكلها مظلومة وربك مش
بيسيب حق المظلوم وبعدين بيني وبينك أنا حسيتها
بنتي وعايزها تيجي تعيش معايا

إسلام اتنهد بعنف : خلاص ياما اللي يريحك ، بس
والله والله لو فكرت بس مجرد تفكير إنها تاذيكي
لـ

هند قاطعته : بس بس ايه في ايه لكل الحلفانات دي
؟ البت شكلها غلبانه وماتقدرش تموت نمله حتى
هتاذي إنسان !

إسلام : ربنا يخلف ظني ويكون كلامك صح ياما

وفعلا هند راحت اخدت سولاف من المستشفى
ورجعت بيها على بيتها

هند : ادخلي يا حبيبي ماتخافيش

سولاف دخلت بتوتر وفضلت تبص للمكان بتفحص

هند : ايه وحش المكان مش عاجبك ؟

سولاف بصتلها وهزت دماغها برفض و هند أبتسمت
: طيب الحمد لله ، تعالي بقى اوريكي اوضتك

سحبتها وراها ودخلتها اوضتها ، وليلى بصت
لجوزها : أنت هتسيبها تعيش هنا بجد ده احنا حتى
مانعرفش عنها حاجة ؟

إسلام بضيق : أعمل ايه يعني يا ليلي أمي عايزاها
تعيش معاها

ليلى : طيب افرض وراها مصيبه ولا حاجة ؟
إسلام : ربنا يستر بقى

هند : أهى دي اوضتك ، روقتهالك ونضفتها كويس
أيه رأيك ؟

سولاف هزت دماغها بحلوه وإنها عجبته
هند : طيب كويس ، يلا بقى ياااا ، أنا حتى مانعرفش
اسمك ايه

سولاف ماردتش كأنها مش عايزه تعرفها اسمها

هند : خلاص مش مشكلة

قعدتها على السرير وقعدت جنبها : عارفه ، أنا كان نفسي طول حياتي يكون عندي بنت بس الحمد لله على كل حال ربنا ماردش ، وعشان كده أنا اعتبرتك بنتى وهسميكي داليدا ، بحبه أوي الاسم ده ها عجبك ؟

سولاف هزت دماغها بتأكيد وحاولت تبتسم بس
ماعرفتش

هند بحنيه : برضه مش عايزه تتكلمي ؟ ده انتي حتى صوتك جميل وطريقة كلامك لذيدة اوي
سولاف فضلت ساكته و هند اتنهدت وطبطبت علي كتفها : خلاص مش مشكله يا حبيبتى ، زمانك مرهقه ناميلك شويه ريحي جسمك اكون جهزتلك لقمة تسندي طولك بيها ، انتى بقالك إسبوعين في المستشفى وبصراحة بقى آكل المستشفى ده ماياكلش
عيش

سولاف بتردد حطت دماغها على رجلين هند زي ماكانت بتعمل مع مامتها وبصتلها بترقب من رد فعلها بس هي ابتسمت جامد وفضلت تطبطب علي شعرها : نامي يا بنتى نامي وارتاحي

هند فضلت وقت طويل قاعده مع سولاف عشان تنام
 لحد ما اخيرا نامت بعد تعب ، وهي خرجت من
 الاوضة وقفلت الباب وراها
 إسلام : ارتحتي خلاص لما عملتي اللي انتي عايزاه
 ؟

هند باستفزاز : ايوه ارتحت ارتاح أنت بقي وشيل
 البت من دماغك هي مش ناقصه وجع
 راحت مسكت ايد ليلى : تعالي يا ليلى يا حبيبتى أنا
 طبخالك النهاردة شوية صيادية من اللي أنتي بتحبيها
 ، إنما ايه هتاكلي صوابك وراها
 إسلام : وأنا ماليش حاجة ؟

هند : لا يا اخويا مابنأكلش رجالة إحنا هما الحريم
 بس

إسلام حزن مراته : عاجبك كده يا لوليتي ؟
 ليلى طبطبت على ظهره : لا
 هند : ايوه يا اخويا اتسهوك اتسهوك وانتى يا هبله
 خليه ياكل عقلك بكلمتين
 إسلام ضحك : والله انتى لو حماتي مش هتعملي
 معايا كده

هند ضحكت عليه ودخلت تجهز الغدا وليلى راحت
تساعدها هي واسلام

سهير كانت قاعده مع أختها والنار بتطلع من عينيها
سميرة : وبعدين يام حسام ؟

سهير : بس ياختى ده أنا هموت من غيظي ، بقى
الجربوعه بنت حنان تعمل في ابني أنا كده ؟

صرخت بغیظ : واللى مجنني اكثر المحروس حسام
بيقولي بحبها ياما ، بعد كل ده ، هموت من غيظي
والله يا سميرة

سميرة : هي الحمد لله اديها غارت أهو من غير ما
نعمل أي حاجة سيبي الباقي على بنتى مي هي
هتنسيه الحرباية دي واللى خلفوها كمان

جت مي وهي شايله صينية فيها عصير : العصير يا
خالتي

سهير : تعالي يا قلب خالتك ، والله واتدورتي
واحلويتي يا بت يا مي ايه الجمال ده كله ؟

مي بود مصطنع : الله يخليكي يا خالتي

سميرة : ماتطلي ياختى تجيبي الواد حسام يقعد
معانا شوية بدل قعدته لوحده كده

سهير طلعت لحسام اللي حابس نفسه في بيته من
ساعة ما سولاف هربت وقعدت تزن على دماغه
كثير لحد ماز هق ونزل معاها

سميرة أول ما شافته قامت حضنته : الغالي ابن
الغالية

مسكت وشه بتفحص : مالك بس يا قلب خالتك هفتان
كده ليه ؟

حسام بيبيدها عنه : أنا كويس ماتشغليش بالك بيا

سميرة شدته من دراعه : تعالا اقعد يا حبيبي
قعدته وقعدت جنبه ومدت ايدها بطبق فيه كيك
بالشوكلاته : خد دوق الكيكة دي ، دي البت مي
بنتي لما عرفت اننا جاين هنا النهارده قامت من
النجمة عشان تعملها

مي بكسوف : ماما

حسام آكل حتة وتمتم : سولاف بتعملها أحلى من دي
بكتير

سهير اخرجت من كلامه فحاولت تغطي عليه :
 قوليلي يا بت يا مي عامله ايه في جامعتك ؟
 مي : أهو الدنيا ماشيه يا خالتي كلها كام شهر
 واتخرج بقي

سهير بتلميح : كويس وتفضي بقي لنفسك وحالك
 والعرسال مش كده ؟

سميرة : اه دي العرسال واقفين على بابها طوابير
 طوابير كده ، بس إحنا مش هنوافق على اي حد
 وخلاص مش كده ولا أنت ايه رأيك يا حسام يا
 حبيبي ؟

حسام فهم تلميحاتهم وقام وقف : أما أنا طالع
 سهير وقفت قصاده : رايح فين بس ماتخليك شويه
 حسام : طالع لسولاف ياما ، هاه فهمتي ولا لسه ؟
 سميرة : قصدك ايه بقي ؟

حسام بصلها : قصدي اللي فهمتية يا خالتي أنا واحد
 متجوز وبحب مراتي ومش هتجوز عليها ، عشان
 اللي داق الشهد مستحيل يروح للحنضل
 سميرة قامت بغضب : أنت اتجننت يا واد ؟

حسام بنرفة : اه يا خالتي اتجننت ما هو أنا مش
معقول اتجوز سولاف بكمالها وبعدها ابص لواحد
زي بنتك

سميرة راحت شدت بنتها اللي مصدومه وبتعيط
ومشت : لا ده انتوا شكلكم اتجننتوا رسمي

سهير : استني بس يا سميرة ياختي

سميرة : استني ايه يا سهير لما المحروس ابنك يشتم
ويهزء فينا أكثر ؟

سميرة مشت هي بنتها وسهير شدت حسام من دراعه
وزعقت : حسام ايه اللي أنت قولته ده ؟

حسام شد دراعه منها بضيق : اللي انتي سمعته ياما
، أنا قولتك ميت مرة قبل كده مش عايز مي ومش
هتجوز ابدأ بعد سولاف بس الظاهر إنكم مش
بتفهموا

قاطعهم صوت مها اللي جت بعد ما عرفت اللي
حصل مع اخوها ودخلت البيت : ماما

سهير : مها انتي جيتي

مها قربت منهم ووقفت قدام حسام : اللي أنا سمعته
ده بجد يا حسام سولاف مشت ؟

سهير بغیظ : ایوه یا اختی بجد

مها بصتله : ومبسوط دلوقتی ؟ طیب عارف والله
تستاهل یا حسام

سهير : انتی اتجننتی یا بت انتی کمان ؟

مها بز عیق : لا ماتجننتش ابنک هو الی مجنون یا
ماما ، ده کان بیضربها و بیحبسها و بیبهدل فیها
وانتوا نایمین علی ودانکم

سهير تتحت : انتی بتقولی ایه یا بت مین الی قالک
الكلام ده ؟

مها : بقول ایه !! بقول الی شفته بعینی ما حدش قالی
حاجة ، لو تفتکری من شهر یوم ما عرفت أنى حامل
كنت قاعده معاها وشوفتها بنفسی ، ضعيفه وكسورة
وهلكانه علی الآخر

قربت منها ومسکت ایديها : عارفه ، إحنا اصلا
یومیها روحنا المستشفی عشانها هی كانت داخه
ووقعت منی وروحنا المستشفی والدکتورة بتکشف
عليها شوفت جسمها

بصت لحسام بغضب وز عقت : کان کله کدمات
وجروح وعلامات زرقا وحمرا ، وكانت حامل

ساعتها متخيله أول ما عرفت عملت ايه ؟ قالتلي
 ماقولش لحد ابدأ والا حسام هيقته ، يا ماما ده مش
 معقول يكون بني ادم ابدأ
 سهير بصت لحسام بصدمة وهي مش مصدقه ابدأ
 وحسام دير وشه الناحية الثانية

مها : بتهرب ليه هاااا؟؟ مش ده اللي كنت بتعمله؟؟
 طيب عارف أحسن إنها هربت منك يا حسام دي
 ربنا نجدها منك والله ، ويارب ماتعرف توصلها
 ابدأ

حسام بصلها بشر وضربها بالقلم بكل الغل اللي جواه
 وقعها على الارض واتخبطت جامد في بطنها
 وسهير صرخت وجرت عليها بسرعه : بنتي ، أنت
 اتجننت يا حسام البت حامل

حسام بز عيق : لا ياما ماتجننتش وانتى يا مها وحياء
 سولاف لو سمعتك بتقولي الكلام ده تاني لكون قاتلك
 ، سولاف ماهربتش مني سولاف هترجعلي تاني أنا
 عارف وهتشوفوا كلكم ، سولاف هترجعلي فاهمين
 لأنها بتاعتي حتى الجنين قتلته عشان هي ملك ليا
 لوحدى

الأتين بصوله بصدمة وهو سابهم ومشى وسهير
لقت مها بتعيط وبتشد دراعها : ماما بطني بتوجعني
أوي مش قادرة

بدأت تصرخ من الوجع وسهير بصت عليها لقتها
بتنزف قعدت تلطم : يا نهار أسود يا نهار أسود ،
البت ، الحقونا يا ناس

في اللحظة دي محمد كان جه وشاف مها على
الأرض وسهير بتصوت جنبها فجرى بسرعه : مها
مالك يابنتي ؟

سهير : البت بتنزف يابو مها الحقها

محمد شالها رغم إنها كانت ثقيله عليه بس رعبه
عليها هو اللي كان بيحركه ونزل جري ركبوا تاكس
وراحوا المستشفى

بعد وقت طلع الدكتور من عند مها ومحمد جري
عليه : خير يا دكتور بنتي مالها ؟

الدكتور بحزن : ربنا يعوض عليكم سقطت

سهير ضربت على صدرها : يامصبيتي

الدكتور : إحنا لازم نبليغ الشرطه لان الواضح إنها
سقطت بسبب حدا اذاها

سهير : شرطة أيه ؟ هي وقعت بس بطنها اتخبطت

غصب عنها وجبناها على طول على هنا

الدكتور هز دماغه بفهم : تمام براحتكم ، هي نفسيتها
وحشه وهتحتاجكم جنبها

الدكتور مشي والاتنين دخلوها ومحمد قرب منها
وباس جبينها : حبييتي

مها عيطة : شوفت اللي حصل يا بابا ؟

بصت لمامتها : كله بسببك وبسبب تقويتك ليه ، ده
ذنب سولاف والله ذنبها

سهير بعياط : حقك عليا يا بنتي

.

في اللحظة دي دخل عبد الرحمن اللي كان جاي

يجري : مها حبييتي ايه اللي حصل ؟

مها عيطة أكثر وحضنته : ابننا راح يا عبد الرحمن
، راح

عبد الرحمن ضمها بلطف وطببطب على ظهرها

بحنية : فداكي ألف ابن المهم انتي تكوني كويسه

قوليلي بس ايه اللي حصل ؟

مها حكت اللي حصل كله تحت صدمة محمد ، و عبد
الرحمن كشر جامد وبص لسهير : ارتحتي كده ؟

بص لمحمد : عمي أنا آسف بس مها هترجع معايا
على البيت ومش هتروح عندكم تاني

محمد بحزن : حقك ، حقك يا بني

سهير : أنت بتقول أيه يا محمد عايزين تحر موني من
بنتي ؟

عبد الرحمن وقف : ايوه يا حماتي أنا كمان هاخدها
وهنساfer بره مصر مش كفاية المر اللي كنتي
مطفح هولها زمان ، وابني اللي راح بسبب ابنكم ،
عايزاني استنى ايه تاني بس ، لما اجي استلم جثتها
هي ؟

سهير بصت لمها : مها انتي موافقه على كلام
جوزك ده ؟

مها ديرت وشها الناحية الثانية وسكتت

محمد : مها مكانها مكان جوزها يا سهير أما ابنك ده
فحسابه معايا

محمد وسهير ودعوا مها وروحوا وأول ما دخلوا
البيت لقوا حسام مستنيهم وكان باين عليه القلق

قام وقرب منهم : مها فين ؟

محمد ضربه بالقلم بعزم ما فيه : وليك عين تسأل
عليها يا ابن الكلب ؟

سهير وقفت قدامه : محمد

محمد : عليا الطلاق يا سهير لو ادخلتي

سهير قاطعته بصدمة : هتطلقني يا محمد ؟

محمد بز عيق : ايوه يا سهير اطلقك ، قولتاك ميت
مره تربيتك دي غلط وهتبوظي الولد بدلحك ده بس
انتى اللي ركبتى جزمه في دماغك وبرضه عملتى
اللي انتى عايزاه واهو اتفضلي تربيتك أهى ، ابنك
المصون سقط اخته بسبب غباءة ، ومراته كمان
سابتة وهربت والله أعلم كان بيعمل فيها ايه هي
كمان ؟

حسام بضيق : بـ

محمد قاطعه : أنت تخرس خالص ، من يوم ورايح
هيكون في معامله مختلفه جو الدلع والمرقعه خلاص
خلص ولو الذوق ماجابش معاكم نتيجة يبقى قلة
الذوق هي اللي هتمشيكم ، اتفضلوا غوروا من
خلقتي دلوقتي

سهير دخلت اوضتها بصمت ومحمد قعد و حط
 دماغه بين ايديه بي فكر في اللي بيحصل ده وحسام
 أخذ بعضه وطلع على شفته
 دخل اوضة النوم وقعد على السرير ومسك فستان
 من بتوع سولاف وفضل يشم فيه بسكر : هرجعك
 لحضني تاني ، هرجعك تاني يا حبيبي

عدى سنه من الأحداث دي
 حسام لسه مستمر في بحثه عن سولاف وبيدور
 عليها في طنطا كلها شبر شبر

معاذ بيراقب حسام بصمت ، رغم إنه مخنوق من
 اللي عمله في سولاف بس قرر يفضل معاه عشان
 يعرف هو بيعمل ايه بالظبط وبيخطط لايه

أما بالنسبة لسولاف صحتها بقت أحسن بس لسه
 بتخاف لو سمعت صوت راجل بيزعق وبتفتكر
 حسام وكتير بتحلم بكوابيس وتصحى تصرخ

اخذت وقت طويل جدا عشان تعرف تخرج من
الصدمة اللي كانت فيها بس وجود هند جنبها ساعدها
كثير رغم إنها ست كبيرة شوية في السن يمكن اكبر
من مامتها بكذا سنه بس روحها حلوة ومرحة جدا
وده سهل على سولاف التعامل معاها ، وبمساعدها
رجعت تتكلم تاني بس لسه ما حكتش أي حاجة عن
حياتها و هند ماسألتش أصلا واكتفت بالحاضر بس
واعبرتها زي بنتها

في مكان تاني أول مرة نروحه « إيطاليا »

في واحده من الشقق الفاخره -شقة من التراز
الكلاسيكي القديم الراقى- منظمة وهادية بيتناغم مع
هدوءها صوت أغنية هادية من اغاني التسعينات
المصرية لعبد الحليم

كان في شاب في الحمام بيستفرغ ، في نفس اللحظة
دي دخل الشقة شاب تاني ملامحه أجنبية شوية وأول
ما خطى أول خطوة في الشقة سمع صاحبه بيكح
جامد فجري عليه وراحله

قعد على الارض جنبه وبيتكوا بالايطالي : آدم ماذا
بك يا رجل ؟

آدم : أنا بخير يا إياس لا تقلق

إياس بقلق : كلا لست كذلك أنهض سنذهب الي
المشفى

آدم وقف وطبطب على كتف إياس : أنا على ما يرام
لا تقلق

إياس : كل مره تخبرني بهذا وهانت ذا تستفرغ مرة
أخرى

آدم : تعرف أنني لن اتحسن حتى لو ذهبت الي
المشفى فلما كل هذا الان ؟

إياس اتنهد بيأس : مرة أخرى ؟ الي متى ؟

آدم اكتفى بابتسامة وراح غسل وشه وطلع حذف
نفسه على السرير وإياس واقف جنبه

ادم : هل جهزت كل شئ ؟

إياس : أجل ،ستسافر آخر الاسبوع

آدم هز دماغه بفهم وإياس سأل : ولكن هل أنت
متأكد من قرارك هذا ؟ منذ ان قررت السفر وأنا

أرى صحتك تتدهور أكثر فأكثر

آدم مسك سلسلة ألماس كان لابسها في رقبتة وحرك
صوابه عليها برقه : لقد اشتقت إليها كثيرا يا إياس
، أريد ان أراها

إياس : إنها هنا معك

آدم هز دماغه برفض وإياس هز كتافه بقلة حيلة : لو
علم جسار بحالتك تلك سيمنعك من السفر

آدم : لن يعرف أنا لن اخبره بشئ وأنت ايضا لن
تفعل

إياس ضحك وآدم بصله : أنا بتكلم جد على فكره
أنت مش هتقول حاجة فاهم

إياس فضل يضحك اكثر وآدم بتحذير : إياس

إياس : حسنا حسنا لن افعل لكن هذه أول مرة أرى
شخصا يخاف من حارسه الشخصي

آدم : ليس خوف ولكني لا أريد ان يمنعي احد من
فعل ما اريد وأنت تعرف جسار سيفعل

إياس هز دماغه بفهم وغير الموضوع : احضرت
طعام هل ستأكل ؟

آدم هز دماغه برفض وإياس : سأخبر دولي عن هذا

آدم بصله : انت بتلوي دراعي يا إياس ؟

إياس ضحك و اتكلم بعربي مكسر : أنا يا ابني ؟
 آدم أبتسم وقام خبطه في كتفه بهزار : طيب قوم كل
 معايا

الأتنين قاموا يتغدوا و آدم قعد على السفرة وهو
 بيدندن بهدوء مع الكوبليه اللي شغال وسمع صوت
 جسار اللي كمل الكوبليه وراه : الله على المزاج
 الرايق يا باشا

آدم بصله : أنت شرفت

جسار راح قعد معاهم : اه ، ليه كنت ناوي تاكل من
 غيري ولا ايه ؟

آدم : وهو انا اقدر برضه ده أنت تبلعني فيها
 والتلاته قعدوا يتغدوا سوى وهما بيتكلموا في
 مواضيع مالهاش تلاتين لازمه

في يوم هند كانت راجعه من الشغل بدري شوية عن
 معادها ، أول ما دخلت البيت سمعت صوت سولاف
 بتعيط في اوضتها وده ماكانش غريب على هند كثير
 كانت بتسمعها بتعيط بس الغريب كان في صوتها

ماكنش زي كل مرة ، كان صوتها عالي مروجع ،
كانت سمعها بتقول كلام بس مش واضح من بين
شهقاتها

دخلت عليها الأوضة لقتها قاعده على الارض
وحاطه دماغها على السرير وبتعيط بقهر ، جريت
عليها بخوف وقعدت جنبها : داليدا يا بنتى في ايه
مالك ؟

سولاف بصتلها وهي بتهز دماغها ومش قادرة تاخذ
نفسها فهند ضمته : بس بس يا حبيبتى كفاية
سولاف استخبت في حضنها وفضلت تتكلم بصوت
متقطع ومش واضح : زي الن..هه..هارده ، كان
..هه.. يوم زي..هه.. النهارده ، ماتت..هه.. ماتت
وسابت..هه..ني

هند : أنا مش فاهمه حاجة يا داليدا مين اللي مات
النهارده حد تعرفيه ؟

سولاف : ماما ، ماما ماتت السنة اللي فاتت زي
النهارده ، قتلها ، المجرم قتلها

هند مسكت وشها بين ايديها : فهميني بس في ايه ؟
احكيلى يا داليدا ايه اللي حصل معاكى ، اتكلمى يا
بنتى يمكن ترتاحى شوية

سولاف انهارت من العياط وزى ماتكون كانت
مستنيه اللحظة أو الكلمة دي وبدأت تحكي كل حياتها
لهند وهي بتتشحتف وهند دموعها بتتنزل وقلبها
بيتعصر عليها كل اما تسمع أكثر

سولاف : شوفتى ، شوفتى عمل فينا ايه ؟ شوفتى
عمل فيا ايه ؟ أنا لسه حاسه بكل ضربه في جسمي
لسه جسمي موعود ومدغدغ بسببه ، ااه مش قادرة
، يا ماما انتى فين ؟ أنا عايزاكي تعالى ، بالله عليكى
أنا محتاجاكي يا ماما

هند حضنتها جامد وهي كلبشت في حضنها اكثر :
عدى سنه بس لسه فكرها كأنها ماتت امبارح ،
فاكره كل تفصيلة في اليوم وشكلها وهي نايمه قدامي
، اه يا حسرة قلبي عليكى يا أمي ، سامحيني يا
حبيبتى ، أنا اللي عملت فينا كده أنا اللي اتجوزت
المجرم ده

هند بتطبطب عليها : خلاص يا سولاف يا بنتى كفاية
كده حرام عليكى نفسك

سولاف كانت منهاره وهند مش عارفه تهديها ولا
تسيطر عليها

في الوقت ده كان إسلام ومراته وصلوا لأن هند
كانت قالتهم يجوا يتغدوا معاها

إسلام : هو في ايه ؟

ليلى : مش عارفه استنى أدخل آشوف

ليلى دخلت اوضة سولاف وهند بصتلها : كويس
إنكم جيتوا أجري قولي لاسلام يجيب دكتور بسرعه
البت هتروح منى

ليلى خرجت بسرعه بلغت إسلام اللى طلب دكتور
وخلال دقائق كان عندهم وعطى لسولاف حقنه
مهدئه نيمتها وطمنهم عليها ومشى وهند سابتها
وطلعت قعدت مع ابنها ومراته

إسلام : مالك ياما في ايه حصل وانتي بتعيطي كده
ليه ؟

هند بعياط : البت دي

إسلام كشر : مالها عملت ايه فهميني ؟

هند : ما عملتش مشكلتها إنها ما عملتش يا إسلام ولا
كان ليها حد يعمل حاجة

إسلام قرب منها : أما أنا مش فاهم حاجة

هند : داليدا حكلي عن حياتها زمان ، يا حرقه قلبي
عليها ، شافت كثير أوي ، شربت المر شرب يا
إسلام يابني ، هو في حد كده ؟؟ لا حول ولا قوة الا
بالله العلي العظيم ، يارب صبر قلبها وخفف
وجعها

إسلام حضنها : خلاص يا حبيبي ماتعيطيش كده
هند فضلت تعيط كثير على سولاف لحد ما بطلت
ولما إسلام وليلي سألوها عن إللي سولاف حكته
رفضت تقول ، دي حياتها هي وهي اللي تقرر
تقولها لمين ومين لا

بعد شوية كلهم قاموا واتغدوا مع بعض واسلام
ماكانش عايز يسيب هند لوحدها وهي في الحالة دي
فبات معاها ، وبعد ما دخل هو وليلي اوضتهم هند
دخلت عند سولاف وقعدت جنبها وفضلت تطبطب
بحنية على خدها وشعرها وهي بتأمل ملامحها
الجميلة اللي كساها الحزن والوجع

عدى كذا يوم وسولاف اتحسننت فيهم عن الأول وهند
بتعاملها بحنية زيادة وحب بتحاول تعوضها شوية
عن اللي شافته

في قصر هارون

في واحده من الاوض الهاديه قاعده ست كبيرة جدا
في السن في أواخر الثمانينات من عمرها ولايسه
نظارة وبتقرأ في المصحف وجنبها قاعده ممرضة
بتلعب في فونها بصمت

خبطت على الباب واحده من مدبرات القصر ودخلت
وقالت بصوت هادي وباحترام : دولت هانم الفطار
جاهز حضرتك تحبي تفطري هنا ولا تحت مع
البهوات ؟

دولت صدقت وقلعت النظارة وبصت للبنت : هي
هند جات ولا لسه ؟

البننت : لسه يا هانم

دولت : خلاص هنزل أكل تحت مع الجماعه

البننت : أمرك يا هانم

خرجت ودولت بصت للمرضه : ممكن يا بنتي
تساعديني أنزل تحت

المرضة شالت فونها وقامت بضيق مدارياه
وساعدت دولت إنها تنزل لاوضة السفارة تحت ،
أول ما دخلت لقت مروان وتمارا بدأوا أكل والباقيين
مستنين

مشت بوقار وراحت قعدت على راس السفارة :
يظهر ان عيالكم نسيوا الأصول يا عاصم أنت
وكمال

مروان بز هق : نانا خليكي فري إحنا ولاد النهارده
عاصم خبطه في جنبه جامد وهو سكت

دولت : الاصول مافيهاش ولاد امبارح ولا ولاد
النهارده الأصول بيمشي عليها الإنسان المحترم مهما
كان عايش امتى وفين

كلهم سكتوا ودولت شاورت بايدها : عموما اتفضلوا
كلوا

الكل بدأ يفطر ودولت بتبص على الكرسي الفاضي
على شمالها بحنين واتنهدت وبدأت تاكل

مروان كان بياكل وهو بيتصفح النت وفجأة اتنفض
من مكانه لدرجة خضتهم وهو بيقول بصدمة : مش
ممكن لا

عاصم : في ايه مالك ؟

مروان حط التاب قدامهم على الصفحة اللي كان
بيقرأ فيها وقرأ بصوت عالي : «عودة صاحب
السلسلة الماسية الي مصر بعد غياب دام لاكثر من
عام»

شغل فيديو مع المقال كان لبعض الصحفيين في
المطار وواقف وسطهم شاب جنتل جدا بيوجهوله
الاسأله وهو بيجابو باختصار على بعضها

مروان بيقرأ عنوان الفيديو وهو بيجز على سنانه :
«بعد تصريح صاحب السلسلة الماسية على صفحته
الشخصية على موقع التواصل الاجتماعي أكد شفها
ان سبب عودته لمصر هو رغبته في افتتاح واحد
من فروع مطعمه في الإسكندرية ليضيف حلقة
ماسية أخرى الي سلسلته النادره بشئ من الطابع
المصري الأنيق»

عاصم وكمال وفيري وشهم أسود من الخبر والجن
الاحمر كان بيتنطت فوق دماغهم ، أما لوجين
وتمارا ودولت كانوا فرحانين جدا بالخبر ده كأنهم
أطفال فرحانين بالعيد

مروان : اه يا بن ال @\$@

عاصم شده جامد من ايده وسكته وكمال قام وقف :
أنا شبعت عن إذنكم

سابهم ومشي وعاصم قام هو كمان : طيب أنا كمان
همشي ورايا شغل كثير يلا يا مروان معايا

مشيوا الاتنين هما كمان ودولت بصت للوجين :
لوجين يا حبيبي تعرفي تجييلي الكلام اللي مروان
قاله من شوية ده عايزه اشوفه بنفسي

تمارا باندفاع : أنا ___

شدتها فيري من دراعها جامد عشان تسكت وبصت
لدولت بتكبر : هتشوفي ايه يعني الامله ؟ وبعدين
هي لوجين دي فالحه في حاجة أصلا غير ___

دولت قاطعتها بحزم : اخرسي يا فريال بدل ماتز علي
وانتي عارفه أنا أقدر أعمل ايه كويس

فيري قامت وسحبت تمارا وراها : اشبعوا ببعض
مشت ودولت راحت قعدت على الكرسي اللي جنب
لوجين وطبطبت علي راسها : حبيبي أوعى تزعلي
من كلامها أنتي عارفه فيري لما بتكون مدايقه بتقعد
تهلفظ بالكلام وخلص

لوجين رفعت وشه : مش تدافعي عنها أنا اعرفها
أكثر منك وعارفه ان قصدها كل كلمه قالتها بس
مش يفرق هي كلامها صح فعلا أنا مش فالحه في
اي حاجة

دولت : أوعى تقولي كده على نفسك يا حبيبتى أنتي
ست البنات كلهم

لوجين أبتمت بحزن : مش طول مانا كده
اتتهدت : خلينا نقل السيرة دي دلوقتي ونشوف
الاخبار دي بجد ولا ايه ، تعالي يالا
لوجين قامت ومشت ببطئ ناحية اوضتها اللي في
الدور الارضي ودولت قامت وراها بحزن على
حالتها والاتنين قعدوا في الأوضة بيتصفحوا النت
وبيشوفوا الأخبار

تاني يوم كمال و عاصم وفيري كانوا بيפטروا زي
عادتهم لحد ما واحد من حرس القصر دخل جري
عندهم ووقف بارتباك : ك كمال بيه ، عاصم بيه ،
البيه الصغير وصل

كلهم قاموا وقفوا وبيبصوا لبعض بصمت قطعه
صوت خطوات واثقه لشخص دخل من باب القصر
وماشي مباشرة للسلام الداخليه

كلهم طلوعوا من اوضة السفره وبصوا عليه ماشي
بثبات ، شاب تلاتيني لابس بدله سماوي فاتح وعليها
بالطو بني طويل ونظارة شمس وماشي على شماله
شاب ثاني طويل نسبيا وعريض جسمه كله عضلات
بشكل مخيف

كمال : ايه يا بيه مش هتسلم علينا

الشاب وقف وبص في المكان كله حوله وبص
لكمال وعاصم وفيري واحد واحد بكبرياء من تحت
نظارته السودا وقال بصوت ثابت : ماليش حد أسلم
عليه هنا

وقبل ما حد يرد كان هو سابهم وطلع على السلام
وكانهم مش واقفين اساسا ، وراح مباشرة على
اوضة دولت

خبط ودخل راسه من الباب : ندخل عادي ولا في
حد خالع راسه هنا ؟

دولت بلهفة : آدم يا حبيبي أنت جيت بجد ؟

حاولت تقوم فادم جري بسرعه وقعد جنبها على
السرير وساعدها وهي حضنته جامد بدموع : يا
غالي يابن الغالية ، بقى كل دي غيبه يا آدم سنه
بحالها يا آدم ؟

آدم بيطبطب على ظهرها بحنان : حقك عليا يا
حبيبي حقك عليا

آدم فضل وقت طويل حاضن دولت بيشبع من
حضنها لحد ما بعد عنها : وحشتيني أوي
دولت مسكت وشه بين ايديها : وأنت كمان وحشتني
، أقلع النضارة يا بنى وخليني أملي عيني منك
آدم أبتسم وقلع نظارته وهي باسته على خده وبدموع
: كده يا آدم تحرمني منك كل ده ؟

الباب خبط ودخلت هند اللي كانت في المطبخ وأول
ما شافت آدم شهقت جامد وآدم بصلها : في ايه يا
وليه شوفتى برص ولا ايه ؟

هند راحت بسرعه ناحيته وحضنته جامد : حبيبي
يابني

آدم حضنها جامد : وحشتيني أوي يا أمي

هند بعدت عنه ومسكت وشه بين ايديها وبدموع :
وأنت يا قلب أمك وحشتني أوي ، كل دي غيبه يا آدم
؟

آدم : تو يوه هو الشريط سف عندكم ولا ايه ؟
ماتجددوا شوية في الكلام مش ممكن كده
هند ضربته على كتفه : أنت يا ولا لسانك ده لسه
طويل زي ما هو ؟
آدم ضحك : ايوه

دولت بصت للشاب اللي واقف بيراقب كل ده
بصمت وأبتسمت : تعالا يا جسار يا حبيبي ايه اللي
موقفك كده ؟

جسار : لسه فاكرين ان في مخلوق هنا ؟ ما هو اه
من لقي احبابه بقى

هند ضحكت وراحت سحبته من ايده : تعالا يا ولا
أنت هتفتحلنا موشح ولا ايه ؟

جسار راح حضن دولت اللي طبطبت على ظهره
بحنيه : حمد لله على سلامتك يا حبيبي

جسار : الله يسلمك يا ست الكل

قام وسلم على هند وحضنها و هند : أنت يا ولا يا
 جبار كل سنة بتعرض كده عن السنه اللي قبلها
 الواحد بقى مش عارف يحضنك كويس ، ايه يا خويا
 كل العضلات دي ؟

جبار ضحك : في ايه يا حجة انتى بتحسدني ولا
 ايه ؟

هند ضربته : احسدك على ايه يا حصره شوية
 الكلاكيك دول ؟ ما عرفش والله أنت فرحان بيهم على
 أساس ايه

آدم ضحك : هتفضلوا انتوا طول عمركم كده
 مابتفهموش في البادي بيلدنج

هند : سيبناهولكم يا خويا البادي بيلدنج والشراب
 بلدنج كمان

آدم وجبار ضحكوا جامد و آدم بيحرك دماغه لمح
 الممرضة اللي واقفه جنبهم بصمت : أنتى مين ؟

الممرضة : انا عزة

آدم : ايوه عزة مين يعني عرفتك أنا كده ؟

دولت مسكت ايده بهدوء : دي الممرضة بتاعتي يا
 آدم يابني

آدم بصلها وكشر بخوف : ممرضة ليه في ايه مالك
؟

دولت : أنا الحمد لله كويسه يا حبيبي حكم السن بس
، هي بتتابع معايا علاج الضغط مش اكثر

آدم بشك : دولي أوعي تكوني بتضحكي عليا ؟

دولت : لا مش بضحك عليك ولا حاجة قولي بس
أنت يا حبيبي إخبارك ايه كنت عايش إزاي طول
السنة اللي فاتت دي ؟

آدم سكت شويه : عايش يا دولي عايش ، الا صحيح
فين لوجي ماشفتهاش تحت يعني ؟

هند : في اوضتها أنت عارف مش بتطلع منها غير
نادر

آدم : هنزل اشوفها وحشاني أوي بنت ال ايه دي ،
دولي خمسه وجايلك يا جميل وهنسر النهارده مع
بعض عشان عملي حسابك بس

دولت ضحكت : لسه شقي زي مانت ؟

آدم بغمزة : طبعا

لبس نظارته ومشى وجسار مشى وراه لحد ما وقف
قدام واحده من الأوض وفضل واقف قدام بابها كثير

جسار : آدم !

آدم بصله وأبتسم بحزن : معلىش ثواني بس أسلم
عليها

جسار : بقالك يومين عندها

آدم : معلىش يا جسار دقيقة بس

جسار اتهد وسكت وآدم فتح الباب بتردد ودخل ،
الأوضة كانت جميلة ورقيقة جدا زي صاحبته، بص
في المكان كله بحزن وراح قعد على الارض قصاد
السرير : أنا جيت، وحشتيني أوي

سكت شويه بيفتكر صوتها اللي عامل زي سنفونية
هادية بيتردد في عقله : أنا نويت اقعد فترة طويلة
شوية المرة دي أكيد هنتكلم كتير زي زمان

طلع ورده بيضا من جيبه وحطها على السرير :
سلاما على من فارقنا بجسده لكنه خالد بروحه في
قلوب احبته ، صباحك ورد يا وردتي

قام من مكانه وطلع وقفل الباب بهدوء ونزل بصمت
لاوضة لوجين

خبط على الباب بخفه ودخل : كنت عارف والله كنت
عارف إنك بتخونيني ، حاولت اكذب قلبي بس هو

طلع صح ، كده تخونيني أنا ومع مين لوحه ماكملتش
٥٠٠ جنيه على بعض ؟

لوجين سابت فرشة الرسم من ايدها وجريت اترمت
في حزن آدم : ايووو يا أبيه أنت بجد قدامي ؟
آدم حضنها جامد ورفعها من على الأرض : حبييتي
يا لوجي وحشتيني أوي يا بت

رفع وشها بين ايديه : احلويتي كده امتي ؟

لوجين فعلا كانت جميلة أوي زي الفراشة بشعرها
الأسود القصير اللي يادوب لامس كتافها وفتانها
الشيْفون الرقيق وملامحها البريئة الجميلة

جسار بهزار : شاهد قبل الحذف اخ كبير بيتغزل في
اخته بـ

آدم قاطعته : الله يقرفك على يقرف اخبارك ايه يالا
العفانه دي ؟

جسار ضحك : طيب وسع كده وسيب البت مسكتك
دي غلط

آدم مسك لوجين تحت دراعه : وأنت مالك يا حشري
واحد واخته الصغيره بتحشر نفسك بينا ليه ؟

لوجين بضحك : انتوا الاتنين اخواتي يا ابيه
 جسار : حبيبتني والله انتي يا لوجين ، هاتي حزن
 بقى

جسار راح حزنها والتلاته قعدوا يتكلموا شويه لحد
 ما آدم قام : قومي بقى يا لوجي ده إحنا سهرتنا
 صباحي النهارده هنسهر مع دولت زي زمان
 لوجين بسعادة : بجد ؟

آدم : ايوه بجد أبسطي يا ستي ، اسيبك بقى تجهزي
 كده ماشي

لوجين هزت دماغها بموافقة و آدم خرج هو وجسار
 جسار : غلبانه أوي لوجين دي
 آدم : كل واحد فيه اللي مكفيه

قاطعهم صوت تمارا اللي عرفت ان آدم رجع القصر
 و جت بدوشتها عشان تسلم عليه ، شافته خارج من
 اوضة لوجين فجريت عليه وقبل ما تحضنه كان آدم
 بعد من قدامها لدرجة إنها كانت هتتخبط في الحيطه
 آدم : غسلتي ايدك قبل ما تسلمي عليا ؟

تمارا بغیظ : أنت بتهزر ؟

آدم : لا ، شایفك لسه جاية من بره وشكاك
ماغسلتیش إیدك فماتسلمیش علیا لو سمحتي وانتي
كده مش عایز اتوسخ

تمارا : بس بقى ايه الكلام ده

آدم : بتدايقي ؟

تمارا : اه بدايق

آدم : اتفلقي

تمارا بغضب : كلمنى بأدب لو سمحت

آدم باستفزاز : لو سمحتي اتفلقي

وسابها ومشي كأنها مش موجوده

.

جسار بضحك : يخرّب عقلك يا آدم أیه اللي أنت

عملته ده ؟

آدم : لیه ؟ فاکرني هخدها بالحضن يعني ولا ايه ؟

أنت ناسي دي بنت مين ؟

جسار : لا مش ناسي بس يعني هي كمان أختك زي

لوجين

آدم رفع ايده باعتراض : لا لو سمحت لوجين حاجة
ودي حاجة ، لوجين قلبها ابيض ونضيف أما دي فلا
جواها سواد زي امها بالظبط ، صحيح الاتنين
اخواتي بس في فرق

جسار رفع كتافه باستسلام : اخواتك وأنت حر فيهم
آدم : فكك من السيرة دي بقى وخلينا نطلع لدولت
وهند ، اه بالمناسبة ساعد لوجين تطلع أنت عارف
السلام

جسار : وماله نساعدها

آدم طلع لدولت وجسار ساعد لوجين وحصلوهم
وقعدوا كلهم مع بعض يتكلموا كثير جدا

«خلونا نتعرف على الشخصيات»

آدم هارون : ٣٠ سنه ، مش طويل أوي بس جسمه
مضبوط ، شعره مايل للبني وبيمتلك من الوسامة قدر
لا بأس بيه ، ملامحه كلها نسخه من مامته اللي كانت
أيه في الجمال ، يبقى أكبر حفيد في العيلة والاخ

الكبير لتماما ولوجين بس من ام تانيه ، حنين جدا مع
اللي بيحبهم ودول دولت ولوجين و هند بس ومع باقي
الناس دبش ، وقاسي على اللي بيكرهم (وهنفهم ايه
موضوع يحب ويكره ده بعدين)

*

جسار : دراع آدم اليمين وصديقه واخوه الكبير ،
٣١ سنه ، شاب يتيم و آدم هو كل عيلته ، جسمه
رياضي جدا أكثر من آدم وده بسبب طبيعة شغله
ومع الأحداث هنعرف حكايته كلها

*

لوجين : عرفناها قبل كده بس هنضيف شوية
معلومات عنها ، سبب معاملة فريال ليها بالقسوة دي
إنها صحيح عندها ٢١ سنه بس بعقل مراهقه ١٥
١٦ سنه ، عندها شئ من التأخر العقلي وده مسببها
بعض المشاكل الجسدية زي إنها ساعات مش بتتحكم
في عضلاتها بشكل سليم والبطئ في الكلام
والاستيعاب ، وده بالنسبة لواحد زي فريال فضيحة
وحاجة تتعر بيها قدام الناس ، رغم إن لوجين بتتابع
علاجها باستمرار وحالتها أحسن من ناس كثير بس
هي مش شيفاها غير إنسانه متخلفه

[لوجين وتمارا ولاد فريال من اب تاني مش من كمال
، يعني آدم بس هو اللي ابن كمال ، وفريال تبقى
مرات ابوه وعيالها في حكم اخواته ، أكيد في منكم
توقعوا ده]

قبل ما نكمل منعا للخبطه بس هتكلم عن سولاف
بصفتها داليدا فتكونوا عارفين إنها واحد

ويلا بينا نكمل

داليدا كانت قاعده في اوضتها بتفرقع في صوابعها
بتوتر وبتعد القطط : قطه قطتين ثلاث قطط اربع
قطط ٥٥ قطه ٥٦ قطه ٣١٧ قطه ٣١٨
قطه ٣١٩ قطه

قاطعها صوت هند من وراها : ايه يا داليدا يا بنتي
عديتي قطط اسكندرية كلها في ايه ؟

داليدا قامت من مكانها بسرعة ووقفت قدامها بتوتر :
 انتى اتأخرتي كده ليه ؟ قولتي هتيجي الساعة ٧
 الساعة ١٢ دلوقتي

هند طبطبت علي كتفها : أنا آسفه يا حبيبتى ماخدتش
 بالي من الوقت والله حقك عليا

داليدا بخوف : أوعي تتأخري عليا كده تاني أنا كنت
 خايفه أوي تسيبيني زي ماما

هند حضنتها : ماتخافيش يا داليدا أنا معاكي أهو يا
 حبيبتى ومش هسيبك ولا حاجة

بعدها عنها وسألت بحنيه : اتعشيتي ولا لسه ؟

داليدا هزت دماغها برفض

هند : طيب تعالي نتعشى سوى

اخذتها وحضروا العشا وقعدوا مع بعض بياكلوا
 ويتكلموا وفي نص الكلام داليدا سألت : اتأخرتي ليه
 النهارده كده ؟

هند أبتسمت : عشان حته من قلبي رجع النهارده

داليدا : مش فاهمه مين رجع فين ؟

هند بتوضيح : عارفه الست الكبيرة اللي بشتغل
 عندها ؟

داليدا : اه دولت هانم تقريبا

هند : عليكي نور أهي دي حفيدها الكبير رجع مصر
النهارده ، كان مسافر ايطاليا سنين كثير أتعلم وعاش
هناك وكان بينزل زيارات كده كل فين وفين وآخر
مرة شفناه كان من اكثر من سنه واخيرا رجع ثاني
النهارده

اتعدلت في قعدتها : عارفه أنا بعتره زي ابني كده
اتولد على ايدي وأنا اللي مربياه من ساعه ما كان
عيل صغير

هند قعدت تتكلم كثير أوي عن آدم كأنه ابنها فعلا :
نفسى تقابليه أوي يا ديدا حته عيل سكره والله

داليدا : اسمه ايه بقى سلطان زمانه ؟

هند ضحكت : هو فعلا سلطان ، اسمه آدم

داليدا استعذبت الاسم جدا وبتحاول تتركب الاسم على
شكله اللي تخيلته من وصف هند وسرحت

هند : ديدا روحتى فين ؟

داليدا : مارحتش أنا هنا أهو ، قوليلي بقى سي آدم ده
عنده كام سنه ١٨ ٢٠ ؟

هند ضحكت جامد : ١٨ و ٢٠ دول ايه يا داليدا ؟

داليدا : مش انتى بتقولي عيل سكره ؟

هند : عيل اه بالنسبالي أنا إنما هو كبير ٣٠ سنه

داليدا هزت دماغها بفهم : وسي آدم بقى هو اللي
خطفك مني كل الوقت ده للدرجة القاعدة معاه حلوه ؟

هند : الا حلوة دي القاعدة معاه مايتشبعش منها ابدأ

وبعد وقت من الكلام كل واحده دخلت تنام

.

تاني يوم هند راحت شغلها وداليدا قامت زي كل يوم

رتبت البيت وحضرت الأكل وخلصت كل شغل

البيت وقعدت ، افكرت آدم وكلام هند عنه وكان

عندها فضول تشوفه ، من كلام هند عرفت إنه

مشهور جدا فجابت فونها اللي هند كانت جيبها لها

وبتردد فتحت النت وعملت سيرش عن آدم وايديها

بترتجف وقلبها بيدق بسرعه كأنها بتعمل جريمة

.

ثواني ولقت صور كثير لآدم ومقالات اكثر عنه ،

فضلت تقرأ كثير عنه وعن انجازاته ، استغربت جدا

إنه شيف : مش لايق عليه خالص شيف بنضارته

دي

دخلت علي الصور وفضلت تغلب فيها كثير أوي :
 أنى الاقي صورة واحده ليه من غير نضارة شمس ،
 ايه مولود بيها ولا ايه ؟

وهنا داليدا مسكت نفسها متلبسه بالتفكير في راجل
 فاخذت نفس طويل وقفلات الفون وحطته بهدوء جنبها
 : في ايه يا سولاف ؟

فضلت قاعده مكانها شويه بصمت وبعدها قامت
 تعمل اي حاجة تلهيها عن آدم ده خالص لحد ما هند
 ترجع

مروان زي عادته رجع البيت الصبح سكران ومش
 شايف قدامه قابل باباه في وشه قبل ما يطلع على
 اوضته

عاصم : أنت يا زفت مش هتبطل بقى اللي أنت
 بتهببه ده وكل يوم والتاني راجلي سكران طينه كده
 ؟

مروان بتوهان : بابا ، أنا مش سكران خالص ، أنا ،
 تمام ، تمام أوي وفايق

عاصم بتهكم : اه ما هو واضح أهو ده أنت حتى مش
عارف تسند طولك

مروان : ايوه وبعدين يعني عايز ايه ؟

عاصم مسكه جامد من كتافه : عايزك تفوق يا
حيوان بقى عشان نعرف نخطط هناخد حقنا من آدم
إزاي

مروان : اووووف بقى ام السيرة دي تاني ، آدم آدم
آدم ايه ماورناش غير الزفت ؟

عاصم سابه وسكت شويه وبعدها قال بهدوء :
عارف إنه رجع القصر امبارح ؟

مروان اتعدل في وقفته وبصله بتركيز : رجع !! هو
مش كان قاعد في سان ستيفانو من ساعة ما رجع
مصر ، ايه اللي جابه ؟

عاصم : ايه الهبل ده ؟ ما طبيعي يرجع مش دولي
بتاعته هنا وكمان

سكت شويه : هي كمان هنا

مروان : ياما نفسي اخنقه بايدي

عاصم : إحنا مش عايزين نقتله إحنا عايزين نرجع
حقنا منه

مروان : وهنرجعه يا بابا هر جعه ولو على جنته
عاصم بصله كتير بصمت : أطلع نام دلوقتي ونبقى
نقعد مع بعض نفكر

عاصم سابه ومشي وهو طلع اوضته وهو مخنوق
من آدم ، دخل ياخذ شاور عشان يفوق شوية ، وقف
تحت المياه وبيفكر في آدم ، طول عمره بيغير منه
طول عمره بيتقارن بيه من وهما صغيرين لحد
ماتعقد منه ومن نفسه ، مهما يعمل ومهما يحاول
دايما هو بيبقى أحسن منه ورغم كل اللي حصل من
سنين وسفره بره مصر برضه ليه هييته لا بالعكس
بقي ناجح أكثر والكل بيحترموه أكثر وهو بيصغر
قصاده أكثر

هدد بإيديه جامد على الحيطه : بكرهك يا آدم بكرهك
، انا لازم اوجعك واقهرك واعذبك زي ما بيحصل
فيا كده لازم ادوئك الأول من نفس كاس المر اللي
بطفح منه بقالي سنين وبعدها همحك ، همحي أكبر
عقبه وأسوء كابوس في حياتي

خلص شاور ولبس البرنص وطلع وخرج من الحمام
، سمع صوت لوجين بتضحك في جنينة القصر ،
وسمعه ، أكثر صوت بيضايقه في الدنيا الصوت

الرجولي اللي فيه بحه مميزة بيعرف عن صاحبه
بكل وضوح

طلع البلكونه وبص عليهم ، كان آدم قاعد على
واحد من الكنب وحاطط دراعه حولين كتاف لوجين
وضاممها وجسار قاعد قصادهم والتلاته بيضحكوا
وبيهزروا

مروان : أضحك أضحك يا آدم الكلب بكره تعيط بدل
الدموع دم ، ماشي
دخل ورزح باب البلكونه وراه وراح لبس هدومه
ونزلهم تحت

لوجين بضحك : وبعدها تلاقي الواحد من دول فاتح
قميصه كده عشان يبين صدره ويعمل فيها فتوة
الحارة وبيتكلم وهو بيشوح بايديه
جسار رفع ايده على صدره بصدمه وادم بيضحك
عليه : لا يا جسار أنت حالة خاصه يا بابا ، إحنا
مش بنلاقي هدوم مقاسك أصلا عشان تداري كل
المخدرات دي

جسار : مخدرات برضه يا جاهل يا رجعي انت دي
عضلات الشيست يالا ، ما هما العيال التوتو زيك
مايفهموش في الكلام ده

لوجين بضحك : ابيه مش توتو بس أنت اللي ناشف
زياده

قاطعهم مروان : والله وطلعلك صوت يا لوجين ما
هو اه ظهرك رجع مش كده ؟

وقف قدام آدم ومد ايده واتكلم بسخرية : أهلا يا ابن
عمي ليك واحشه يا راجل

آدم بص لجسار : يوه ، هو الجو لزق كده ليه يا
جسار ؟ ماتجيب بيروسول نرشه كده ولا حاجة
يمكن الدنيا تروق شوية

جسار ولوجين كتموا ضحكتهم وآدم قام وقف وبص
لمروان من تحت نظارته وبهبل : ايه ده ؟ مروان !!
معقوله أنت ؟ إزيك يا حبيبي واحشني أوي يا قلب
أخوك ووحشني الخناق قصدي الكلام معاك

مروان بيصله بغیظ : مايوحشكش عدو يا هه أبيه
آدم أبتسم باستفزاز : معاك حق بس أنت اخويا مش
عدو ولا ايه ؟

مروان : ايوه اوي اوي

آدم فضل يبصله بصمت ونفسه يفهم دماغه ولو لمره
واحد ، نفسه يعرف ليه كل الكره ده من ناحيته وهو
طول عمره بيعامله حلو وبيعتبره اخوه وعمره ما
اذاه ابدأ ونفسه لو هو كمان يعتبره اخ ليه بس ما
باليد حيله

آدم : ايه هتفضل لازق كده مكانك ؟

مروان : لا أنا مش فاضي زيكم ، جاتكم القرف
بوظتولي الدماغ اللي كنت عاملها

سابهم ومشى و آدم اتتهد بحزن وقعد مكانه

لوجين : ابيه

آدم حاول يرسم ابتسامه على وشه : حبيبي

لوجين : مش تزعل من ابيه مروان ، هو حد طيب

خالص والله ده أحن واحد عليا في البيت ده واكيد

مش يقصد يزعلك

آدم حضنها : والله يا بت يا لوجي أنتي الحاجة الحلوة

في البيت المنيل ده

جسار : ايه ده ونودي دولي وهنود فين بقى ؟

آدم ضحك : لا يا بني دول عواجز البيت إنما دي
ورده كده مفتحه ، أميرة الاميرات

لوجين ضحكت : ورده ده ايه ده ؟ دي اكيد ورده
قرنبيط

آدم : تموتوا في الالهانة انتوا بتحبوها زي عينيكم
مش كده ؟

جسار بضحك : ايوه ايوه كده

قاطع كلامهم واحده من مدبرات القصر : لوجين
هانم معاد العلاج بتاع حضرتك

لوجين قامت : أنا هدخل بقى

آدم طبطب على ظهرها بحنيه : روجي يا حبيبتى
ربنا يعافيكى ويعفو عنك

لوجين مشت وآدم قام هو كمان يتمشى شوية في
الجنينة وبيتأمل كل ركن فيها وبيفتكر ذكرياته
السعيده

قطع سرحانه صوت الممرضة بتاعت دولت اللى
كانت مستخبيه في مكان متداري وبتتكلم في الفون
مع حد

عزة : يابنتي زي مابقولك كده والله أنا حقيقي
اتخنقت وزهقت

سكتت شويه بتسمع الطرف الثاني وردت : مش
عارفه أنا واحده زيها لسه عايشه لحد دلوقتي ليه دي
عدت الخمسه وتمانين سنه متبته كده ليه في الدنيا
وتعبانا وقرفانا معاها ؟

سكتت تانى تسمع وردت : ايوه والمطلوب منى بقى
أخد بالي من كل حاجة تخصصها أكل وشرب ودوا
ونوم وصحيان ده حتى الحمام بساعدها تدخله ولا
كأني خدامه عندها مش ممرضة

الطرف التانى سألتها سؤال وهي ردت : لا ما هو
اللي مصبرني المرتب باخد منهم فلوس كثير أوي
عشان الشغلانه الزفت دي بس حاسه أنى خلاص
مش قادره استحمل أكثر

آدم بيسمع الكلام ومصدوم مش مصدق ان الكلام ده
كله عن دولي بتاعته ، ورده حياته وجنته ، عض
على شفايفه بضيق ومشى بسرعة قبل ما يروح
يجيب عزة دي من شعرها أو يخبط دماغها في
الحيطة

طلع على اوضة دولت ودخل بهدوء وقعد على
السرير جنبها وهو بيتأمل ملامحها الحنينه وهي
نايمه وهمس : اه لو يعرفوا بس قد ايه انتى حنينه
ماكانوش قالوا كده عنك

أبتسم بمشاغبه ومسك ايدها : دولي ، يا دولي
اصحي ، ايه كل ده نوم ؟

دولت بدأت تفوق : في ايه يا آدم يابني هو الواحد
مايعرفش ينام بهدوء في البيت ده ؟

آدم : ينام ايه بس مافيش وقت للنوم إحنا بتوع حركه
وتنطيط مش بتوع نوم خالص

دولت ضحكت : جاك ايه يا آدم ، وهو أنا فيا حيل
اطنطت ؟ ده أنا خلاص عجزت

آدم شهق بدراما : مين ده ياختى اللي قالك كده ؟
اسكتي اسكتي ، انتى شكلك مش بتبصي لنفسك في
المرايا ولا ايه ، ده انتى اللي يشوفك يقول اختى مش
جدتي

دولت بصت لجسار : روح يا جسار جبيلي رغيف
عيش من المطبخ أصل أخوك جاي ياكل بعقلي
حلاوة

آدم ضحك جامد : لا ودمنا خفيف كمان وبنهزر
حضانها : ربنا يديمك ليا يا حبيبتي واكل عقلك كمان
وكمان

دولت طبطبت علي ظهره بحب وبعدهته عنها : قولي
فين عزة خليها تساعدني

آدم : ايه ده هو أنا ماقولتلكيش ؟

دولت : لا ماقولتلكيش

آدم : قولي والله

دولت : وا ، في ايه ياولا أنت هتستعبط ولا ايه ؟

آدم ضحك : لا ، أصل عزة استقالت من الشغل ،
ربنا يعوض عليها بقي

دولت بقلق : ليه خير ؟ هي حصلها حاجة ولا ايه ؟

آدم : تقريبا عندها الغضروف أو العصوص مش
عارف ، يلا ربنا يشفي كل مبتلى

دولت : عصوص ايه ده يا آدم أنا مش فاهمه ؟

آدم : ماتوجعيش دماغك انتي بالكلام الفاضي ده
وقومي أنا هساعدك في اللي انتي عايزاه

آدم ساعدها تدخل الحمام وطلع وقف بره مع جسار ،
 في الوقت ده دخلت عزة واتفجأت بيهم : خير يا
 بهوات هو في حاجة ؟

آدم قرب منها بشر : هو هيبقى في لو فضلتي هنا
 ثانيه واحده ، انتى هتاخدي بعضك زي الشاطرة كده
 وتغوري من هنا بدل ماطلعك على قبرك على طول
 ، فاهمه ؟

عزة بخوف : وهو أنا عملت ايه لكل ده ؟

آدم : عملتي ايه ! لا معملتيش خالص ، انتى ملاك
 طاهر نازل من السما ، أنا اللي مفترى وظالم ، يا
 بت ده أنا سامعك بوداني من شوية بتتكلمي في
 الجنينه

عزة ارتبكت واتوترت وبصت في الأرض بخوف
 وآدم أبتسم بشر : ايوه كده اتظبطي ، اتفضلي بقى
 امشي ومش عايز آشوف وشك ده تاني هنا واحمدي
 ربنا أنى هسكت ومش هجيبك من شعرك ارميكي
 بره

وزعق : يلا اتحركي

عزة لمت حاجتها بسرعة وطلعت جري بره القصر
 وهي بتعيط وآدم قعد بضيق على السرير: ناس زباله

جسار : و هتعمل ايه دلوقتي؟ مش هينفع تسيب جدتك
كده

آدم : هشوقلها حد تاني كويس أكيد مش هغلب يعني

الباب خبط ودخلت هند : صباح الخير

آدم وجسار : صباح النور يا حلويات

هند : هي مالها عزة يا ولاد؟ شيفاها خارجه من هنا
بتعيط

آدم : تلاقي العصوص قافش عليها شوية معلش

هند بتعجب : عصوص؟

آدم : الا بقولك يا هند هو مين اللي جاب البت دي
تشتغل هنا؟

هند وهي بتحط صينية آكل على السفرة الصغيرة :
ده عاصم بيه وكمال بيه اللي جايبينها ، الهانم تعبت
من فترة وجابولها دكتور وقالهم لازم حد يفضل
معاها طول الوقت ياخذ باله منها وقالوله لو يعرف
حد فقالهم هيبغ للمستشفى ولو في حد متوفر هيبعتوه
، وبس يا سيدي جات عزة

آدم : اممم

هند : بتسأل ليه؟

آدم : لا ولا حاجة فضول بس أصلها سابت الشغل
وكنت بسأل يعني عشان اجيب غيرها

هند : وليه سابت الشغل ؟

آدم هز كتافه بعدم اهتمام : كل واحد وعنده ظروفه

هند هزت دماغها بفهم وكملت رص في الاطباق بس
وقفت فجأة كأنها استوعبت حاجة وراحت بسرعه
قعدت جنب آدم

هند : أنت قولت عايز واحد غيرها ؟

آدم : اه قولت ، بس عايز حد يكون كويس وموثوق

هند خبطته على رجله : وأنا عندي طلبك

آدم : ايه ده بسرعه كده من غير كلاكيع واكشن
وبحث ؟

هند : اه يا خويا بس يارب توافق هي بس

آدم كشر : يا رب توافق ! ليه يعني على ايديها نقش
الحنة ولا ايه ؟

هند : بس يالا ماتتكلمش عنها كده

آدم : ماشي ياختى بس انتى متأكدة إنها ثقه يعني ؟

هند بابتسامة واسعة : متأكده ده ايه ، ده أنا
اضمنها لك برقبتي بس اديني شوية وقت اكلمها
واقولك

آدم هز دماغه بموافقة ودولت طلعت من الحمام :
متجمعين عند النبي يا جماعة

كلهم : عليه أفضل الصلاة والسلام

آدم : مجوعانه يا ست ، ايه كان لازم تاخدي شاور
يعني ؟

جسار : والله معاك حق يا آدم الواحد جعان بس
مكسوف يقول

آدم ضحك جامد : لا وأنت وش كسوف اوي

دولت : اه طبعا لازم أخذ شاور وهو أنا معفنه زيك
أنت وهو ولا ايه ؟

هند : قوموا بينا يالا ناكل

كلهم قاموا يفطروا مع بعض وآدم وجسار مش
مبطلين مناغشه في دولت وهند وكلهم بيضحكوا مع
بعض

قعدتك كده لوحداك منها تغيري جو ومنها تكوني
معايا

داليدا كانت خايفه مجرد فكرة إنها تطلع بره البيت
وتتعامل مع بني آدمين غير هند كانت مخوفاها
وحاسه إن حسام هيقدر يوصلها لو طلعت بره

وهند قعدت كثير جدا بتحاول تقنع فيها وان كده
أحسن ليها تكون معاها طول الوقت ولو اتاخروا
يبقوا مع بعض أو يباتوا هناك من غير قلق وكلام
من ده كثير

بعد ثلاث أيام

آدم بضيق : ايه يا دادة كل ده بتقنعها تيجي ؟ ليه ؟
كانت آخر ممرضة يعني في الدنيا ولا ايه ؟ ما عنها
ماجت ، هو احنا هنتعب نفسنا ليه ؟ مافي كثير
غيرها

هند بذهول : في ايه يا آدم بلاعة واتفحت في وشي
! ما تحاسب على ألفاظك شوية

آدم : مش عارف والله انتى بتدافعى عنها كده ليه هي
كانت من بقيت أهلك ؟

هند أبتسمت : هي فعلا من بقيت اهلى ، دي بنتى
آدم رفع حاجبه باستغراب : لمأخذه يعني هو مش
كان ابنك ولد تقريبا بقى بنت امتى ؟

هند ضربته على كتفه : ومين جاب سيرة إسلام
دلوقتى ؟

آدم : أو مال ايه ؟ لحقتى تتجوزي وتخلفي بنت وبقت
ممرضة وكل ده في السنة اللي غبتها عنكم ؟

هند : هتقعد تهرج كثير ؟

آدم قعد قصاها : لا ما هو انتى لازم تفهميني في ايه
وبنت مين دي اللي أول مرة اسمع عنها ؟

هند : دي بنت اتعرفت عليها من مدة وعاشه معايا
من ساعتها واعتبرتها بنتى

آدم : لا انتى أكيد بتهزري، ما هو ياما انتى بتهزري
يانا اتجنيت ، أنتى عايزة تقنعيني إنك اتبنيتي بنت
ماتعرفيش عنها حاجة وعايزاها تيجي تقعد مع دولت
كمان ده اسمه ايه بقى ؟

هند : أي ان يكن اسمه هو ده اللي حصل وخلص

آدم : غريبه والله ، وواثقه فيها إزاي بقى بسلمتها دي ؟

هند : أنا يمكن ماعرفش عنها كتير بس الفترة اللي عاشتها معايا خلتنى أعرف معدنها كويس ، البنت محترمة ومتربية وبنت أصول وعمري ماشفت منها حاجة وحشة ابدا بس الظروف والدينا هما اللي بهدلوها ، أنا اضمنها لك برقبتي والله وأنت عارف أنا ليا نظرة في الناس

آدم بعد صمت : انا لو كان حد تاني قالي الكلام ده كنت ، المهم ، أنا هديها فرصة بس عشانك انتى وعشان بثق فيكي اتمنى بقى تبقى قدها هند بابتسامه : ما تقلقش صدقني هي كويسة جدا

وتاني يوم هند اخدت داليدا معاها القصر عشان تبدأ تشتغل وداليدا ماشيه بتوتر ومكلبشه في هند كأنها طفله ماسكه في مامتها

هند : ماتخافيش يا حبيبتي طول مانتى معايا وفي وجود آدم أوعي تخافي من أي حاجة طلخوا على اوضة دولت وخبطوا ودخلوا

هند : صباح الخير يا هانم

دولت : صباح الخير يابنتي تعالي

هند دخلت وبصت لآدم : أعرفاك داليدا بنتي

آدم بصلها من تحت نظارته السوداء وقام وقف :

ارفعي وشك

.

صوت آدم الهادي كان عامل زي موج البحر في
ودن داليدا وحسها بهدوء وأمان ، رفعت راسها
بتوتر وبصتله ، هو بالظبط اللي في الصور بنفس
النظارة المستفزه بس ملامحه واضحه أكثر من
الصور ، ملامح رجولية حاده ولحية خفيفه ورافع
شعره لفق قمحي شوية ووسيم

آدم : شكلك صغيره خالص عندك كام سنه بقى يا
شاطرة ؟

داليدا كشرت بضيق ، ايه شاطرة دي شايفها عيلة
ولا ايه ؟

سولاف : ٢٥

آدم : ٢٥ دول بتوعك كلهم لوحدك ؟

داليدا كشرت أكثر : حضرتك بتتريق عليا ؟

آدم : اه حضرتي بيتريق عليكى

شاور على ايديها اللي مكلبشه في دراع هند : أصل
مافيش واحده كبيرة بتمسك في الناس كده

.

هند كانت عماله تزغر بعينيها لآدم عشان يسكت
وهو قعد تانى : وانتى بقى يا حلوة هتقدرى على
شغل الممرضة ده ولا جاية تلعبى بالمكعبات هنا ؟

دولت : آدم في ايه اللي أنت بتقوله ده ؟

بصت لداليدا بحنية : تعالى يا حبيبتى ماتخافيش أنا
زي نانا برضه

هند بصتلها بتشجيع وهي سابت دراعها بتردد
وراحت ناحية دولت اللي خبطت براحه على السرير
جنبها : اقعدى يا حبيبتى

داليدا قعدت ودولت مسكت ايديها : معلىش ماتزعلش
من آدم هو لسانه ده متبري منه اصلا وماحدش قادر
عليه بس هو طيب خالص والله ومايقصدش حاجة
وحشه

داليدا ظهرها كان مقشعر من قاعدة آدم على حرف
السرير وراها وهزت دماغها : مش زعلانه

دولت أبتسمت : حبيبتي ربنا يسعدك قوليلي بقى
قولتي اسمك ايه ؟

داليدا : سـ ، داليدا

دولت : جميل اسمك أوي يا داليدا مين اللي سماكي
داليدا ؟

داليدا بصت لهند بمغزى : ماما

هند قلبها كان بيرفرف والفراشات بتخرج منه أول
ما سمعت كلمة ماما منها وقربت وحطت ايدها على
كتفها : دي الغالية بتاعتي يا هانم هادية ورقيقة
واوعدك هترتاحي معاها ومش هتتعبك ابدا

دولت : شكلها بيقول

دولت وداليدا قعدوا يتكلموا شويه وأدم بيتابعهم
بصمت ومركز أوي في صوت داليدا وطريققتها
اللطيفة في الكلام وبعدها أخذ جسار وانسحبوا بهدوء
من الاوضة بعد ما حس ان دولت ارتاحت لداليدا

في اوضة ضلمه بينور فيها ضوء أحمر صغير
لواحده من السجاير ، واحد قاعد على فوتيه وشكله

مبهدل جدا ولحيته باين إنها ماتحلقتش من مده طويله
 ، بيدخن سجارة ورا الثانية زي حريقة سجاير
 وعمال يقرقض في ظوافره ويشد في جلد صوابعه
 بسنانه جامد لدرجة ان كذا صباع نرف ، وبيهز
 رجله جامد وعامل زي مدمن ممنوع عنه
 المخدرات من مده

فونه رن فخطفه بسرعه من على الترابيزة ورد :
 لقيتها ؟

المتصل : لأ يا حسام باشا ، دي زي ماتكون فص
 ملح وداب

حسام : لاقوها ، دوروا تاني وجييوها ، انتوا لازم
 ترجعوهالي أنت فاهم ؟

قفل السكه ورزح الفون في الحيطه وقع متكسر زي
 الكثير اللي قبله ، وفضل يكسر في كل حاجة حوليه
 : أنتي فين بقى ؟ روحتى فييبين ؟

راح وقف قدام صورة كبيرة لسولاف متعلقه على
 الحيطه : انتي ليه بتعملي فيا كده ؟ أنا تعبان أوي من
 غيرك ، ارجعيلي بقى

سند دماغه على الصورة : بصي بقيت عامل إزاي
من غيرك ، حرام عليكى قلبي هيقف والله ، تعالى
بقى ، تعالى بالله عليكى

سكت شويه وكمل بشر و غضب مالهوش أول من
آخر : بس وحياتك يا سولاف هرجعك و هندمك على
كل لحظه سبتيني فيها ، مابقاش أنا حسام لو
ماكسرتش رجليكي الإتنين عشان ماتعرفيش تتحركى
بعيد عنى تانى

قعد يصرخ وهو بيكسر فى كل حاجة حوليه :
هترجعي تانى و هنرجع تانى زي ما كنا ، هترجعي
يعنى هترجعي

قعد على الارض من التعب وبص على الحيطان
حوليه ، كانت كلها صور لسولاف ، فى يوم فرحها
وهي بتطبخ فى المطبخ وهي قاعده بتسرح أو بتحط
مرطبات على وشها قدام المرايا وصور ليها فى كل
مكان فى الشقه وصور كثير جدا ليها وهي نايمه ،
كل الصور دي كانت معاه فى كاميرات المراقبة اللى
كان زارعا فى الشقة عشان يراقب بيها سولاف
طول اليوم

حسام قام بتهالك ودخل اوضة النوم ونام على
 السرير واخذ هدوم سولاف وحضنها جامد وهو بيشم
 فيها ويرتجف : هترجعي ، ايوه هترجعي وهنعيش
 بحب زي ما كنا يا حبييتي ، أنا بحبك أوي يا
 سولاف بحبك والله

غمض عينيه ويحاول ينام وهو بيتخيل سولاف
 واخدهاه في حضنها وبتطبطب عليه

عدى كذا يوم من ساعة ما داليدا بدأت تشتغل مع
 دولت كانت خايفه في الأول عشان بقالها مده مش
 بتشتغل بس لما فهمت حالة دولت كويس وعلاجاتها
 ومع الوقت رجعت ثققتها تاني ورجعت تفتكر شعور
 الشغف تاني اللى كان ميت من زمان عندها

آدم زي عادته مع كل الناس غلس ومش بيبطل
 غلاسه عليها هي بالذات وبيعاملها كأنها طفلة وده
 بيدايقها بس بتسكت عشان ماتعملش مشاكل ، أو
 بمعنى أدق لسه خوفها من الرجالة موجود وخايفه لو
 ردت عليه يز عقلها أو يضربها زي حسام وده كان

بيخليها تبني حواجز بينها وبين الناس وتعزل نفسها
عنهم

في يوم كان الكل متجمع على سفرة الفطار ما عادا
مروان اللي مش بيطبق يقعد مع آدم في مكان واحد
مع بعض

فيري بتبص على آدم اللي بياكل بنظام ورقى جدا
كأنه طالع من فيلم ارسنقراطي ، وبيهزر مع دولت
اللي قاعده على راس السفرة وعلى شماله جسار
قاعد بياكل بهدوء وصمت

فيري بتلقح : والله والغرب بقوا بيقعدوا مع اسياد
البيت وبياكلوا معاهم كمان

جسار بلع اللقمه بضيق لانه فهم ان الكلام ده عليه
هو بس مارفعش عينيه أصلا يبصلها

وآدم رد بداله وهو بيلعب في السلسلة اللي في رقبته
متعمد يظهرها : معاكي حق والله يا خالتي الغرب
دخلوا القصر وفاكرينه بيت ابوهم وعمالين يقولوا
مين يقعد ومين لا

فيرى اتجننت من كلامه لأنه بيلقح عليها هي بالكلام
: قصدك ايه بقى ؟ و ايه خالتي دي كمان ؟

آدم : يقطعني ، صحيح انتى تقريبا عديتي الخمسين
سنه المفروض اقولك يا حجة

داليدا اللى كانت واقفه جنب كرسي دولت بصت لآدم
بصدمة من كلامه الوقح ، وفيري قامت بنرفزة
وهبت على السفارة : أنت اتجننت يا بنى آدم أنت
ولا ايه ؟

آدم سند ظهره بكل اريحية على الكرسي وراه :
صحيح افكرت انتى ما حجتيش قبل كده ، سوري
بقى بنسى كثير اليومين دول بس ربنا يكتبها لك
قريب

كمال : لا انت كده زودتها أوي ايه ما حدش هيقدر
عليك ولا ايه ؟

آدم ببرود : والله اللى شايف نفسه يقدر عليا يتفضل
يوريني نفسه

دولت شدت دراع آدم جامد : آدم بس

بصت لكمال : كمال مراتك هي اللى بدأت الغلط كان
المفروض تسكتها هي من الأول

كمال بصلها : طول عمرك ناصر اه عليا رغم اني
ابنك

دولت : انت ابني اه بس أوعى تنسى انه يبقي حفيدي
الكبير ، حفيد هارون وأول صرخه وأول فرحه في
البيت ده ويبقى ابنك أنت كمان لو كنت ناسي
كمال : أنا مايشرفنيش واحد زيه يبقي ابني

داليدا برقت وحطت ايديها على بوءها بخصة و آدم
ضغط جامد على السكينة في ايده واخذ نفس طويل
وكمل آكل ببرود مصطنع : الأكل ده عامل كده ليه ؟
كام مره هقولكم بطلوا تستخدموا التوابل المطحونه
واستخدموا الحبة الكامله ؟ ناس متعبه

ساب الأكل وقام وجسار وقف هو كمان وعاصم
اتدخل في الكلام بسرعة : ايه يا أستاذ هتقوم كده قبل
الكبار هي قعدتك في ايطاليا نستك عوايد بلدك ولا
ايه ؟

آدم قعد تاني وبص لدولت : دولي ممكن اقوم ؟
دولت : قوم يا حبيبي براحتك أنت مش محتاج
تستأذن

آدم قام ومشي وجسار مشي وراه ودولت بصت
لعيالها : انتوا مابتكبروش ابا ؟ هتفضلوا عاملين
عقلكم بعقله كده ؟

كمال : برضه هتدافع

دولت قاطعت كلامه وهي بتقوم تقفت : اه هتدافع عنه
لأنه الوحيد المظلوم هنا وطبيعي اقف معاه
هي كمان سابتهم ومشت وداليدا راحت وراها

فيري بصت لكمال : أنت هتفضل ساكت للكائن ده
لحد امتي ؟

كمال : وهو أنا كنت عارف أكلمه أصلا ؟ زي
مانتي شايفه أهو ولد مش متربي ولسانه طويل واللي
بيقوله كلمه يرد بعشره ونابه أزرق ومش بيسيب
حقه وكل ماحاول أعمل حاجة الاقي أمي في وشي
بتدافع عنه

فيري بنرفزة : يبقى خلاص تخل

قاطعها عاصم بسرعة : في ايه يا جماعة هتتكلموا
كده ؟

كمال وفيري بصوا لتماما ولوجين اللي قاعدين
ومركزين في الكلام فسكتوا

كمال : ماتياللا على كليتك يا هانم ولا ناوية تعيدي
السنادي كمان ؟

تماما قامت بزهدق راحت جامعتها ولوجين هي كمان
قامت بصمت ورجعت اوضتها ترسم فيها زي
عادتها

دولت طلعت بسرعة لفوق وشافت آدم فنادته وهو
وقف وبصلها

دولت : حبيبي ، اللي حصل تحـ

آدم قاطعها ومسك ايدها باسها : حبيبي شاغله بالك
ليه بحاجات هايفه زي دي ؟

بص لداليدا : خوديها اوضتها لو سمحتى بيتهياي في
علاج بتاخده بعد الأكل

انسحب بسرعة من قدامهم وراح لنفس الأوضة اللي
دخلها أول يوم وصل فيه : جبار ، أنا هقعد هنا
شويه أنت براحتك لحد ماطلع

دخل الأوضة وقفل الباب وراه وقلع نظارته السودا
حطها على الكومود ونام بهدوء على السرير واخيرا
سمح لنفسه يضعف

آدم : فينك تطبطني عليا يا أمي ابنك متمرط من
بعدك الاقيها من مين بس ولا من مين ؟ عمي ولا
ابنه ولا مرات ابويا ولا ، هه ابويا نفسه اللي
مايشرفهوش واحد زيي يبقي ابنه ؟ عملتله ايه مش
فاهم والله ؟

ضم نفسه في وضعية الجنين وغمض عينيه بيحاول
يهرب من الواقع بالنوم يمكن يحلم بمامته اللي توفت
من سنين طويله جدا بس لو هله صورة داليدا ظهرت
قدامه فابتسم غصب عنه : أهى دي لوحدها بقى
حوار مش عارف أتكلم عن شكلها ولا طريقة نطقها
للحروف ولا صوتها ولا ااا عيونها ، جميلة أوي
ولونهم سحر بس ليه نظراتها حزينه ومرعوبه دايم
؟ ايه اللي مخليها محاوطة نفسها بأسوار عالية
بالشكل ده ؟

آدم خلال فترة بسيطه سمح لجسمه ياخذ هدنه بعد
تعب وسهر كذا يوم من ساعة ما رجع مصر مش
بينام كويس لحد ما تعب ونام

شوية وجسار دخل الأوضة بهدوء ومن غير مايعمل
صوت كان عارف إنه هيلقي آدم نايم ، عادته من
زمان لما يوصل لاخره يروح ينام في محاوله بائسة
منه إنه يحلم بمامته

قرب منه وغطاه وراح قعد على فوتيه قصاده بهدوء
: أنت اللي مش بتسمع كلامي قولتلك سيبيني اوقفهم
عند حدهم واخلصك منهم أنت اللي لسه مصر
وتقولي دول مهما يحصل اهلي

بص حوليه في اوضة جمالات والدة آدم : شايفه يا
خاله ابنك ؟ أعمل فيه ايه ده ؟ ياما نفسي اخنقه من
زمان بس مايهومش عليا ده اخويا وماليش غيره في
الدنيا دي

في شركة هارون وفي مكتب عاصم تحديدا
عاصم : ها يا جماعة عندكم أي خطط ؟
مروان : ما ايه رأيك يا بابا نستنى شوية كمان ؟ ده
أنا محضرله حتة مصيبه هتطلع من نفوخه

عاصم : ما هو أنت ماشفتش البيه عمل ايه الصبح
على الفطار

مروان : ايه عمل ايه ؟

عاصم حكاه كل اللي آدم عمله والكلام اللي قاله
لغيري

مروان : يا ابن ال @\$@

كمال : ده أنا ده اللي بتشتمه ؟

مروان باحراج : لا طبعا يا عمي مش قصدي انت
خالص

عاصم : المهم هنعمل ايه ؟

كمال : أى حاجة بس المهم مايتاذاش

عاصم بتهكم : أنت اللي بتقول كده ده على اساس
إنك زمان

كمال قاطعة بضيق : زمان كانت حادثه ماحدثش كان
متعمد ان ده يحصل أصلا

عاصم : أنت حنيت ولا ايه ؟

كمال : لا ، بس هو في الآخر إبني

عاصم أبتسم بسخرية على اخوه المتخلف زي
مابيسميه : ابنك

مروان : طيب ماتسمعوا اللي عندي

عاصم بصله : اتحفني أنت كمان

مروان حكالهم خطته : ها ايه رأيكم ؟ عظمة مش
كده ؟

عاصم : بس إحنا كده كمان هنجسر

مروان : لا كله من ميزانيتته هو الشخصية يعني إحنا
بره الليلة دي

كمال : بس ده شغل كيد مش اكثر إحنا كده

ماستفدناش أي حاجة

مروان : إزاي بقى ؟

كمال : قولي أنت هتستفيد أيه غير إنك هتشوفه

مضايق ؟

مروان : وده مربوط الفرس ، آدم قوي وقلبه جامد

ومش هيقع مرة واحده بس مهما كانت قوته لما

تتراكم عليه الخطبات هيجي وقت ويقع ودي هتبقى

أول خبطه ومش الأخيرة واللى جاي هيبقى أقوى

كمان

عاصم : كلام حلو وكل حاجة ، مافكرتش رد فعله
هيكون ايه ؟ اصله أكيد هيعرف

مروان : ولا هيقدر يعمل حاجة مش هسيبله فرصه
يعمل أصلا

كمال بيبرطم بصوت واطي : ده بيتهياك

مروان : بتقول حاجة يا عمي ؟

كمال قام وقف : لا مش بقول أنا رايح مكتبي

سابهم ومشى ومروان بص لابوه : بقولك ايه يا بابا
عمي ده شكله مش مريحني تفتكر بيحن ولا ايه ؟ ده
لو كده كل اللي بنعمله هيبوظ

عاصم : فكك من كمال هو طول عمره غبي وقلبه
خفيف ، قولي أنت ، بلاش خططتك دي ، دي
هتخسرنا كتير أوي وأنا ماعنديش استعداد اخسر
جنيه واحد

مروان : حتى أنت ؟

عاصم بنرفزة : هو ايه اللي حتى أنت ؟ وهو إحنا
بنعمل كل ده ليه مش عشان فلوسنا ؟

مروان قام وقف : انتوا أحرار بقى

سابه ومشي هو كمان وهو بيفكر في خططه
الشريره زي ماسماها

داليدا بدأت تتكيف مع الحياة واحده واحده رغم إنها
حاسه ان كل حاجة جديده عليها وحاجات عاديه كل
الناس بتعملها بتستغربها ، حاجات بقالها اكر من ٣
سنين ماعملتهاش ونست إنها حق مكتسب ليها أصلا
، حرية الأكل أو اللبس أو الكلام ، حاجات كانت
بتعملها بأمر من حسام واختياره هو ونسيت ان ده
حقها هي

الجو اللي اندمجت فيه كان جميل فعلا ، حنية دولت
اللي بتدوب الحجر ، وهزار هند ودمها الخفيف ،
ولوجين اللطيفه اللي فيها براءة مش موجوده في
الزمن ده ، وأدم وجسار اللي مخهم راكب عكس
الناس وبيقولوا أى حاجة تيجي على بالهم من غير
تفكير وبيعملوا كل اللي عايزينه من غير ما يهتموا
بحد ، نفسها لو تعيش يوم زيهم وتعمل كل اللي
نفسها فيه بس هي اجبن من كده أو يمكن العقده اللي
عندها منعاهها

معظم الوقت هند وداليدا كانوا يبيتوا في القصر
بسبب طبيعة شغل داليدا وهند اللي حابه المكان من
ساعة رجوع آدم

في يوم داليدا كانت نازله المطبخ تجيب مائة لدولت
وتشوف هند خلصت فطارها ولا لسه عشان العلاج
بتاعها ، قابلت مروان على السلم اللي بيطوح زي
عادته

مروان اول ما شافها ضحك بهيل : ايه ده مزة
ولابسه حجاب ! هو القصر دخل في الاسلام امتى ؟
ههههه

داليدا استغربته بس قررت تمشي بهدوء من غير
مشاكل بس هو وقف قدامها لدرجة خضتها : ايه يا
حلوة انتى مين وبتعملي ايه هنا ؟ الا تكونيش جايه
عشاني

حط ايده على كتفها وهي اتنفضت وشفشق الماية
وقع من ايدها اتكسر

داليدا بعنف وخوف : أبعد عني

مروان : ايه مالك بس هو إحنا لسه عملنا حاجة ؟ أنا
أي نعم عمري ما جربت النوع بتاعك من البنات بس
نفسي والله اجر به من زمان

داليدا بصتله برعب بس أنقذها صوت هند اللي
خرجت من المطبخ على صوت التكسير وشدت
داليدا وراها : مروان بيه صباح الخير احضرك
الفطار ولا هتنام ؟

مروان عمال بيص على يمين هند وشمالها عشان
يشوف داليدا : وسعي كده بس يا داهه أما نشوف ايه
القمر اللي هل علينا ده

داليدا مسكت في هدوم هند وهي بصت لمروان :
انت شكلك مش في وعيك خليني أساعدك تطلع
اوضتك

مروان بعصبية : بقولك ايه يا وليه وسعي بقى من
خلقتى ماتخلينيش اتعصب عليكى

هنا آدم ظهر من العدم وزق مروان في كتفه وبسبب
اللي شاربه وقع على الارض على طول : أنت
اتجننت يالا أنت بتكلم واحده قد أمك كده ؟ ايه
للدرجة دي الخمرة لحست مخك ولا ايه ؟

بص لجسار : شيل الواد ده اخفيه من وشي

جسار راح شال مروان زي شوال البطاطس ووداه
على اوضته وهو عمال يتوعد لآدم

آدم بص لهند : انتى كويسه يا أمى ؟

هند : حبيبي ماتخافش أنا كويسه

آدم بص على داليدا وباستفزاز : والكتكوته بتاعتنا
كويسه ؟

داليدا بصتله بغیظ وهو ضحك بسماجة : شكك
كويسه يا نونو

.

جسار رجع تانى وآدم نزل الكام سلمه اللي قدامه :
أنا ماشي بقى يا هنود ورايا شغل كتير ادعيلي ربنا
يوفقنى وافتح فرع المطعم الجديد ده على خير

هند : ربنا يعينك يا بني ويفتحك كل الأبواب المقفوله
قادر يا كريم

آدم بعثها بوسه في الهوا ومشى وهند شدت داليدا
من دراعها ودخلت المطبخ : يا بت انتى مش
هتتغيري ابدأ ؟

داليدا : وهو أنا عملت ايه ؟

هند بغیظ : مشكلتك إنك مش بتعملي سلبيه ودايما
ساكته

مسكتها جامد من كتفها : اسمعيني كويس لو عايزه
تعمري في البيت ده من غير أذى تخلي بالك من
مروان ده واد صايح ومش متربي لو فكر بس يقرب
منك تاني باللي في رجلك وتنزلي بيه على دماغه
على طول

دايذا برقت : انتى بتهزري صح ؟ عشان يمسوني
يعدمونى في ميدان عام

هند : مش هيحصل البيت كله عارف مروان
واخلاقه وكلنا عارفين انه واد فلتان وبتاع بنات حتى
ابوه بيتخانق معاه كل شوية على الموضوع ده ،
وزي ما قولتلك طول ما آدم هنا ماتخافيش ، دولت
وآدم هما اللى ليهم الكلمة الأولى والأخيرة هنا
والاثنين هيبقوا في صفك

مسكت كتفها بحب : أنا عايزاكي تتغيري انسى
سولاف بكل ماضيها وابدأى من جديد ، عيشي
وواجهي واعملي كل اللى نفسك فيه وماتخافيش من
حاجة ، فاهمه ؟

داليدا هزت دماغها بفهم و هند أبتسمت : بنتي حبيبتي
تعالى يالا نشوف فطار دولت هانم اتأخرنا عليها

تمارا كانت قاعده فى النادي مع صحابها زي العادى

ميساء : ايه يا تمارا سمعت ان آدم رجع مصر

تمارا : اه رجع

ليندا : طيب ايه ؟

تمارا : ايه فى ايه ؟

ليندا : مش هتجيبه مره معاكى النادي خلىنا نتعرف
عليه

ميساء : اه صح خليه يجى مش انتى فى حكم خطيبته
برضه ولا كنتى بتضحكى علينا ؟

تمارا بنرفزة : لا ماكنتش بضحك عليكم ولا حاجة
إحنا فعلا فى حكم المخطوبين وقريب أوى هنعزمكم
على الخطوبة بس زي مانتوا عارفين آدم مش واحد
تافه زي اللي تعرفوهم ، آدم راجل ليه وزنه واسمه

وهو دلوقتي مشغول مع مطعمه الجديد ولما يخلص
اللي وراه ويفضى أكيد هنتكلم وهنحدد ايه اللي
هيحصل

كملت بتكبر : هو هيخطب تمارا هارون بذات نفسها
وأنا مابحبش حد يشاركني في حاجة واكيد مش هقبل
اتخطب لآدم وهو مشغول كده

قامت وقفت : يلا بقى سي يو أنا مش فاضية خالص
دلوقتي عندي معاد مع البيوتي سنتر

سابتهم ومشت بغضب وراحت القصر دخلت عند
مامتها بنرفزة : مامي بقى انتى لازم تشوفي حل مع
اونكل كمال عشان يخطبني لآدم

فيري : يعني انتى شايفه ان ده وقته ؟

تمارا زعقت : مامي أنا صحباتي بقوا بيتريقوا عليا
في النادي أنا مستحيل اسمح بالوضع ده

فيري مسكت ايديها بتحاول تهديها : اهدي بس
دلوقتي انتى عارفه ان آدم مشغول مع المطعم بتاعه
وحتى لو فتحنا الموضوع مش هيوافق عليه فاستنى
يخلص بس اللي وراه وبعدها نشوف الموضوع ده

تمارا : بجد يا مامي ؟

فيري : بجد يا قلب مامي او عدك يا تمارا آدم مش
هيكون لواحد تانية غيرك ، مش عايزاكي تقلقي
خالص

بصتلها بتفحص : أنا عايزاكي الفترة دي تكوني
دايما بيرفكت ، لبسك شعرك ريحتك الميكاب
عايزاكي ممثله مش عايزه آدم يقدر يشيل عينيه من
عليكي ابدًا ، جننيه وخليه يلف وراكي زي السكران
وهو اللي هيجيلك راع تحت رجلكي

تمارا قامت بحماس : انتي صح يا مامي لازم ابقى
جميله ، ده أنا حتى لسه جايبه دريس بوديكون طويل
تحفه هروح البسه بقي ، ولا اقولك هروح البيوتي
سنتر الاول أعمل ضوافري وشعري وارجع البسه ،
يلا يا مامي أشوفك على العشا

تمارا سابت مامتها وخرجت من الجناح بتاعها وهي
ماشيه لقت داليدا خارجه من الاوضة اللي بين اوضة
دولت و آدم

تمارا : انتي ياااا

داليدا بصتلها وتمارا في الأول كانت فاكرها واحد
من مدبرات القصر بس أول ما لفتلها وشافت
ملاحها الجديده عليها والجميلة كشرت

تمارا : انتى مين وايه اللي مخرجك من الاوضة دي ؟

داليدا : أنا ممرضة دولت هانم

تمارا : اه ايوه ايوه افكرتك ، بتعملي ايه بقى في الأوضة دي ؟

داليدا : دي الاوضة اللي بقعد فيها

تمارا : يعني ايه بتقعدى فيها وانتى مين أصلا عشان تقعدى في اوضة زي دي ؟

داليدا كشرت : حضرتك بتتكلمي معايا كده ليه
وبعدين دولت هانم و آدم بيه هما اللي قايلينلى اقعد
هنا

تمارا بنرفزة : انتى اتجننتى يا بت انتى بتردي على
اسيادك ؟

داليدا كشرت باستهجان : اسيادي !؟ أكيد حضرتك
غلطانه أنا ماليش اسياد هنا وعن إذناك معاد الدوا
بتاع دولت هانم وماينفعلش أتأخر

مشت وسابتها هتولع من الغيظ ، وتمارا رجعت تاني
لمامتها ودخلت اوضتها مرة واحده : مامي هي إزاي
الخدمة البيئة دي تقعد فى الأوضة اللي جنب آدم

فيري كانت قاعده على كرسي التسريحة وبتحط
ميكاب ، سابت الفرشة من ايدها وبصتلها بز هق :
تمارا بطلي تدخلي عليا الاوضة بالشكل ده ، وبعدين
مين دي اللي بتتكلمي عنها ؟

تمارا : سوري بس في بنت كده بتقول إنها ممرضة
نانا ولقتها طالعه من الاوضة اللي جنب اوضة آدم
وبتقولي اوضتي

فيري : اه البت دي ، دي بديلة عزة هند اللي جيبها
وبتقول بنتها

تمارا : ماشي وهي ليه تقعد في القصر كانت فاكره
نفسها مين ؟

فيري بصت في المرايا وكملت اللي بتعمله : آدم هو
اللي قعدها عشان تبقى مع دولت طول الوقت انتي
عارفه بيخاف عليها من الهوا الطاير

تمارا قعدت جنبها : بس يا مامي البت ديبيبي

فيري : مالها ؟

تمارا بغيط : جميلة اوي وصوتها ده غريب كده بس
حلو أوي وخايفه يعني آدم

فيري ضحكت جامد : انتى أكيد هبله ، مين دي اللي
 آدم يبصلها وهو في واحده أجمل منك هنا عشان
 تلفت الأنظار ليها ، وبعدين أنا هقولك كام مره أنتى
 خطيبته وهنحدد معاد الخطوبة قريب

تمارا : طيب ماينفعلش يعني نجيب حد غيرها كلهم
 ممرضات في الآخر زيهم زي الشوزات نغيرهم زي
 ماخنا عايزين

أكيد الكلام ده مش صح وأنا شخصيا بحترم مهنة
 التمريض والممرضين بشكل خاص بس ده كلام
 للحبكة بس مش أكثر فمأحدثش يزعل مني

فيري : مأحدثش يقدر يغيرها لان آدم هو اللي شغلها
 وهو اللي يقدر يغيرها أنتى عارفه البيه نافش ريشه
 علينا إزاي

تمارا : مامي ماتتكلميش عليه كده عشان بدايق
 فيري زقتها من جنبها : طيب امشي اطلعي بره
 وماتحسسنيش إنك دايبه في دبايبه ياختى أنا وانتى

عارفين ان الجوازه دي عشان فلوسه فبطلي تمثلي
الحب عليا

تمارا بجديه : بس انا فعلا بحبه يا مامي

فيرى بسخرية : ماشي ياختى حبيه براحتك وهو أنا
هاخذ ايه من عيله زيك

تمارا مشت وهي متعصبه أكثر وطلعت بره القصر
وقربت من عربيتها ووقفت

الشوفير أول ما شافها فتحلها الباب بس هي كانت
واقفه سرحانه فقفله تاني ووقف باحترام يشوف هي
عايزه ايه

تمارا لما فاقت بصت للشوفير : أنت ايه يا بهيم أنت
مش شايفني واقفه ؟ واقف مكانك ليه مش تفتحي
الباب ؟

الشوفير ادايق من كلامها واحرج ولسه هيرد قامت
زقاه من وشها وركبت العربية ومشيت وهو واقف
بيحسب عليها

على وقت العصر لوجين وداليدا كانوا قاعدين مع
دولت في اوضتها ولوجين كانت قاعده على فوتيه
وقدامها لوحه كبيرة بترسم عليها صورة لدولت
وداليدا اللي قدامها

دولت قاعده على السرير وساند على مخده ورا
ظهرها ومغمضه عينيها وقاعده جنبها داليدا على
كرسي وماسكه ديوان شعر وبتقرأ بعض الابيات
لشعر قيس بن الملوح

"

الشمسُ قد قسُمت نصفين لي ولها
النور في خدها والنار في كبدي

.

يكاد فضيض الماء يخدش خدها
إذا اغتسلت بالماء من رقة الجلد

.

وإني لمشتاقٌ الى رشف خدها
كما اشتاق إدريس الى جنة الخلد

"

آدم كان واقف على الباب ويسمع الابيات وبيراقب
كل تفاصيل وش داليدا وهي بتقرأ باحساس عالي
وهو قلبه بيدق دقه غريبة عليه

حط ايده على قلبه واخذ نفس طويل وخطب على
الباب اللي ساند عليه : ممكن أدخل ؟

كلهم بصوله ولوجين أبتسمت : أتفضل يا أبيه

آدم دخل : هترسميني معاهم ولا أنتي بترسمي البنات
بس ؟

لوجين بضحك : لا هما البنات بس

آدم بقمصه : ماشي يا ستي شكرا

راح قعد على السرير جنب دولت واخذ الكتاب من
ايد داليدا : مجنون ليلى

بصلها : وياترى ليلى ليها مجنون ولا لأ ؟

داليدا سكتت وبصت في الأرض وهي بتقول
بسخرية جوا نفسها : ده مش مجنون بس ده مريض
نفسي كمان

دولت بصتله بفضول : وياترى انت عندك ليلى ولا
لأ ؟؟

آدم بص لداليدا شويه باستغراب من شكلها وبعدها
بص لدولت : لحد دلوقتي لا ومابيتهياأليش في
المستقبل كمان

دولت : ليه يا حبيبي ألا تكون مش ناوي تتجوز بعد
الشر وتفضل قاعدلي كده زي خبيتها ؟

آدم ضحك : بقى أنا خبيتها برضه ؟ الله يسامحك
قاطعهم صوت لوجين : أبيه ما تقلع النضارة دي
خليني ارسمك في اللوحة

داليدا بصتله بتركيز عايزه تشوفه من غير نظارة
وآدم راح عند لوجين وبص على اللوحة : لا كريترف
يا بت ايه الحلاوة دي ؟

لوجين بابتسامة : بجد حلوة ؟

آدم : جدا ، فناالنه

قاطعهم جسار اللي دخل الأوضة زي القضا
المستعجل وهمس لآدم بحاجة غيرت تعبير وشه
للغضب ، طلع فونه وشاف حاجة عليه وجز على
اسنانه : يا ابن ال#@ \$ طيب ورب الكعبه مانا
ساييه الحيوان ده

آدم مشي بسرعة وجسار وراه وماحدث فاهم في ايه
لكل ده بس الأكيد ان في مشكلة وكبيره

آخر اليوم تمارا واقفه في اوضتها قدام مرايتها
الطويلة وبتتفحص مظهرها النهائي برضا : ايوه كده
يا تمارا انتى مافيش زيك في الدنيا دي واكيد آدم أول
ما هيشوفني كده هيتهل عليا

أخذت البرفان بتاعها ورشت منه ونزلت تحت
تتعشى مع الكل

دخلت اوضة السفارة بس مالقتش آدم قاعد وشافت
داليدا واقفه جنب دولت وبتقولها على حاجة ماتاكلش
منها عشان غلط عليها

راحت قعدت وهي بتبص لداليدا بتكبر وغرور
وسألت مامتها : أومال فين آدم ؟

فيرى رفعت كتافها : شيفاني السكرتيرة بتاعته ولا
مديرة أعماله

تمارا استنتت آدم كتير يرجع بس هو مارجعش لحد
الصبح ، كانت قاعده في الليفنج روم وأول ما شافته

داخل راحتله بغضب : آدم هو أنت أيه اللي اخرك
بره كل ده ؟

آدم بصلها باستغراب : هو ايه ده ! وانتي مالك
أتأخر ولا عني ما رجعت أصلا

تمارا : يعني ايه ؟ لا طبعا ده حقي

آدم : هه حقا ! ليه كنتي أمي ؟

تمارا : لأ

آدم : مراتي ؟

تمارا كشرت : لأ

آدم سابها وماشي : طلا ما انتي لا امي ولا مراتي
يبقى مالكيش تسالي سؤال زي ده

تمارا راحت وراه بسرعه : بس انا استنيتك كثير ده
أنا حتى لبست الدريس ده مخصوص عشانك عشان
تقولي رأيك فيه

آدم بصلها : وهو الشئ اللي أنتي لبساه ده يتقال عليه
فستان أصلا

سابها ومشى : ياريت توسعي لبسك شويه انتي مش
قاعدته في اوضة نومك

آدم وهو طالع على السلم قابل مروان اللي بصله
 بشماته بس هو بصله بصة إنتصار وميل عليه وقال
 بصوت هامس : لما الكبار يتكلموا العيال تسكت بس
 مش مشكله خليك إلعب براحتك شوية من نفسك
 برضه

بصله بسخرية وطلع اوضته وسابه مش فاهم قصده
 ايه بكلامه ده

حسام نايم في بيته صحى على ريحة أكل حلوة في
 البيت ، اتنفض من مكانه وطلع جري على المطبخ
 وبيتكلم بلهفة وهو بينهج : سولاف !

سهير بصتله : أنا مش سولاف

حسام اتنهد بضيق وسابها وراح اوضته تاني وهي
 راحت وراه وقعدت جنبه على السرير : يابني حرام
 عليك اللي أنت بتعمله في نفسك ده سولاف ايه بس
 اللي أنت مموت نفسك بسببها كده ؟

حسام بصلها بشر وهي : ماتبصليش كده أنت مش
 سامع الكلام اللي بيتقال عنها في كل حته ، اللي يقول

ما صدقت أمها ماتت ومشت على حل شعرها واللى
يقول هربت مع عشيقها وغيره وغيره من الكلام
وأنت هنا عمال تبكي على الاطلال ومموت نفسك
من القهر عليها وهي زمانها عايشه حياتها في مكان
تاني

حسام قعد على ركبه ومسك كتافها : أنا وانتى
عارفين كويس ان كلامهم كله غلط وكل واحد بيقول
كلام زي ده واثق ومتأكد إنه كذب وافترى ، ماما
سولاف مش كده سولاف عمرها ما كانت كده ، أنا
كنت براقبها كل يوم وعمرى ماشوفتها عملت حاجة
زي كده

سهير بتخبط كف على كف : لا حول ولا قوة الا بالله
بقى شوف الناس بتقول ايه وأنت اللي أكثر حد
متضرر بتدافع عنها تيجي إزاي دي ؟

حسام : عشان بحبها وعشان انا عارف إنها بريئة
من كل ده

قام من على السرير ورايح ناحية باب الشقة :
وهروح بنفسى اقولهم إنها مش كده ولا عمرها
فكرت تخونى في يوم وانى أنا السبب إنها سابت
البيت ومشيت

سهير طلعت تجري وراه وشدته من دراعه جامد :
 أنت اتجننت يا حسام عايز تقول ايه للناس كنت
 بضرب مراتي فسابتني وهربت ؟؟ ايه الجنان ده
 ؟؟

حسام : أو مال عايزاني اسيبهم يتكلموا عنها كده ؟
 سهير : يا حسام يا حبيبي الموضوع عدى عليه أكثر
 من سنه والناس بدأت تنسي وأنت عايز تروح
 تفكرهم تاني وكمان تفضح نفسك قدامهم وبعدين الله
 أعلم سولاف دي عايشه ولا ميتة ولا في انهي داهيه
 أصلا ؟ مش يمكن تكون ماتت عشان كده ماحدث
 عارف يلاقيها

حسام زعق : سولاف مماتتش مستحيل تكون ماتت
 وأنا هلاقيها وهتشوفوا

سهير بز عيق هي كمان : وهتلاقيها فين ان شاء الله
 ده أنت لفيت عليها طنطا كلها ميت مرة ومش قادر
 توصل لحاجة

حسام : هدور بره طنطا ان شاء الله ادور في مصر
 كلها محافظة محافظة هدور عليها ، هقعد طول
 عمري مش بعمل حاجة غير انى ادور عليها لحد ما
 الاقيها

سهير قعدت على الكنبه بضعف : لا حول ولا قوة
الا بالله أنت عايز تموت نفسك بالحيا عشان واحده

حسام : دي مش واحده يا ماما دي ملاك

سابها ودخل اوضته تاني وهي قعدت تعيط بضعف
على اللي بيحصل فيهم ده وكرها لسولاف بيكبر
أكثر وبتدعي عليها تكون ماتت عشان ترتاح منها
خالص

حسام دخل أخذ شاور وحلق دقنه واخذ بعضه ونزل
يصلح فونه لو هينفع يتصلح أو يجيب واحد غيره

قابل معاذ في سكتة -اللى مارفعش عينيه عنه طول
السنة اللي عدتت- شافه جاي عليه ، شكله مختلف
مش ده حسام صاحبه وشه باين عليه التعب من
الحاجات اللي بيشر بها وجسمه خاسس وعضلاته
ضعفت ، لوهله صعب عليه بس لما افكر منظر
سولاف آخر مره شافها وكمان لما سأل عن حالتها
في المستشفى وعرف كمية الاذى اللي اتعرضتله
اتعصب ودمه اتحرق

حسام : إزيك يا معاذ ؟ عاش من شافك

معاذ : ده ليا أنا الكلام ده ؟ يعني مش أنت اللي
حابس نفسك في البيت والواحد مش عارف إذا كنت
عايش ولا ميت

حسام سكت ومعاذ سأل : رايح فين كده ؟

حسام : اصلح الموبايل ده

معاذ : تاني ؟ ده خامس موبايل تكسره ايه معاك
فلوس مش عارف توديتها فين ولا ايه ؟

حسام : لا ، المهم عرفت حاجة عن سولاف ؟

معاذ باستعباط : سولاف مين ؟

حسام كشر : أنت هتستهيل ولا ايه ؟

معاذ كأنه بيفكر : لا ، اه اه سولاف ، هي لسه
عايشه أصلا ؟؟ ده كل الناس هنا بيقولوا إنها أكيد
ماتت

حسام كشر وبغيظ : وأنا قولت مامنتش وهلاقيها
وكلكم هتعرفوا إنكم غلط

زقه من قدامه : ووسع بقى من وشي بدل ماعملها
معاك

مشي وهو بيولع من كل حته ومعاذ بيراقبه وهو
بيكلم نفسه : ايوه استوي على الجنبيين كده عشان

تعرف تفترى على بنات الناس كويس ، جالك قلب
تعمل فيها كده إزاي ؟ ده أنت كسرت ضلوعها
وقتلت ابنها كمان منك لله ياخي

ساب المكان ومشى هو كمان : برضه أنا اللي
غلطان عشان جوزتهالك ورمتها من غير ماكلف
نفسى حتى اسأل عليها أو أرفع السماعه اكلمها ،
خلينا كده إحنا الاتنين أما نشوف اخرتها ايه ويانا
يانت يا حسام

معاذ عرف ان حسام قرر يدور على سولاف بره
طنطا ورغم إنه عارف ان الموضوع صعب
ومحتاج ميزانية كبيره الا إنه فضل يصعب
الموضوع عليه أكثر ويحاول بقدر الإمكان يبعده
عن اسكندرية خالص في محاولة بائسة منه إنه
يحمي اللي فاضل من حطام سولاف

في شركة هارون

عاصم دخل مكتب ابنه بغضب بس أول مادخل
اتصدم من اللي شافه ، مروان كان قاعد على كرسي

مكتبه والسكرتيرة قاعده على رجليه واللاتنين في
وضع مخل

عاصم : ايه اللي بيحصل ده ؟

السكرتيرة اتنفضت من مكانها ووقفت باحراج وهي
بتمسح شفايفها ، ومروان بصلها : روجي انتي
دلوقتي

السكرتيرة طلعت بسرعه وعاصم راح قعد قصاد
مروان : مش كبيرة أوي عليك دي ؟

مروان سحب منديل من قدامه وضحك وهو بيمسح
شفايفه : دي يادوب أكبر مني بعشر سنين مش حوار
يعني

عاصم زعق : أي ان يكن القرف ده تعمله بره دي
شركة مش كباريه يا حيوان

مروان قلب عينيه بز هق : جاي ليه صحيح ؟

عاصم : جاتك القرف

طلع فونه وحطه قدامه على صفحة كان فاتحها :
أنت اللي عملت ده صح ؟ برضه عملت اللي في
دماغك مش كده ؟

مروان : ايوه أنا اللي عملت كده ويستاهل عشان
يعرف يمد ايده عليا كويس

عاصم بغضب : وأنت فكرك لما تبعت بلطجية
يكسروله مطعمه كده أنت كسبت ؟

مروان بزهدق : اف ، تاني الموضوع ده ؟

عاصم بنرفزة : ايوه تاني وتالت ومية

فتح صفحه تانيه : أتفضل شوف البيه رده عامل
إزاي

مروان مسك الفون وشغل الفيديو ، كان آدم واقف
قدام الصحفيين وبيقول : اللي حصل ده يا جماعة ما
هو الا سوء فهم بسيط خناقة صغيرة حصلت بين
رجالتي وبس مش زي الإشاعات اللي بتقول ان حد
اتهجم علينا ، عموما أنا أصلا ماكانش عاجبني
ديكور المطعم وكنت ناوي اغيره واهو هما سهلوا
عليا المهمه

كلهم ضحكوا وهو أبتسم وكمل : وبالمناسبه دي
أحب اقولكم ان مافيش أي تأجيل هيحصل في افتتاح
المطعم بالعكس أنا ناوي اقدم المعاد إسبوع كمان
وتحدي بيني وبينكم هخلص في معادي مضبوط

فرد ظهره و عدل ياقة بدلته : ماتنسوش أنا آدم
هارون وسلسلة A&G هتفضل طول الوقت في
مكانتها وماحدش هيقدر يوقفها ابدًا ، وشكرا ليكم

مروان هب الفون على المكتب : الحيوان
عاصم : أنت اللي حيوان ، لو فكرك ان لعب العيال
بتاعك ده هيهيهد آدم تبقى غلطان
اخذ فونه ووقف : وبعد كده حذاري تعمل حاجة من
غير ما ترجعلي
سابه مغلول وبيولع نار وطلع بره المكتب ، بص
للسكرتيرة بقرف : ستات رخيصه
وسابها وراح مكتبه

بعد شهر آدم أفتتح مطعمه الجديد في معاده زي ما
قال فعلا وكان إفتتاح ضخم جدا يليق بواحد من
سلسلته الفخمه

قدام باب المطعم الصحافة موجوده بتصور لحظة
الافتتاح و آدم واقف قدام الشريط الأحمر وفي ايده

المقص ، طلع فونه من جيبه وبعث رسالة لحد
وأبتسم ورجع حطه في جيبه ثاني وعد ٣٢١ وقص
الشريط هو ودولت

على الناحية الثانية جنب آدم مروان واقف بيراقبه
بغيط - وهو بيضحك مع دولت والصحافه- فونه رن
برساله فتحها كانت من آدم

«يارب تكون المفاجأة بتاعتي عجبك ، أنا لما
عرفت إنك أنت اللي كسرت المطعم قولت لازم
اردلك جميلك ده وابعثك هديه زيها انجوي بقى ياااا
ابن عمي»

مروان كشر بعدم فهم بس لقي فونه بيرن ، رد
وسمع المتصل وهو عينيه بتوسع مع كل كلمه
بيسمعها وبص لآدم بشر

عاصم : في ايه مالك ؟

مروان : عملها آدم الكلب عملها وردهالي

عاصم : أنا مش فاهم حاجة

مروان : كنت لسه شاري يخت كبير عشان نعمل فيه
حفلاتنا بدل الديسكو ، آدم الكلب بعث ناس غرقوه

دبدب برجله في الأرض وكان رايح ناحية آدم بس
عاصم مسك دراعه بسرعة : انت رايح فين ؟

مروان بنرفزة : سييني يا بابا سييني أروح اضربه
ولا اقتله حتى واخلص منه

عاصم : اه قدام الناس والصحافة وسيرتنا تبقى على
كل لسان مش كده

قرب منه واتكلم بصوت واطي : يعني هو رغم إنك
خسرته جامد في حاجة كان نازل فيها بكل ثقله
تقريباً سكت وتوه عن الموضوع عشان ماحدث
يقول ولاد العم بياكلوا في بعض ، حفظ اسمه وشكل
العيلة وأنت عشان حته يخت تقدر تجيب بداله عشره
عايز تفرج علينا الناس

شاور بدماغه على الصحافة : شايف أسامي القنوات
دي ، لو أي حاجة حصلت الدنيا كلها هتتكلم علينا
مش مصر بس ، نفسي تكون مره واحده بذكاءه ده
وتحسبها الأول

مروان بص لباباه بوجع وقهر من المقارنات اللي
دايماً بيحطه فيها مع ادم وسحب دراعه منه ببطئ :
أنا مرواح

سابه ومشي راح القصر طلع على اوضته وفضل
يكسر في كل حاجة حوليه ومن التعب وقف وبص
في المرايا وهو بينهج وشاف صورة آدم قدامه قام
ماسك ازازة البرفان اللي قدامه ورزعاها في المرايا
نزلت ميت حته وهو بيتكلم بغضب : اه ياما نفسي
اخنقك بايديا

مسك فونه ورن على حد : حبييتي ___ انتى أكثر
___ طيب بما إنك وحشاني وأنا واحشك كده
ماتيحي نخرج شوية؟؟ ___ ايوه بجد يا قلب
مارو

قفل معاها وبص على قايمه الأرقام اللي كلها بنات
وكل واحد بيقولها نفس الكلام مافكرش حتى يغيره
وكلهم بيصدقوه : غبية أوي
دخل غير لبسه عشان يمحي كل ذكريات اليوم ده من
ذاكرته واخذ بعضه ومشي من القصر

على الناحية الثانية آدم قاعد في المطعم بتاعه مع
دولت وسرحان في مروان وتصرفاته ، ليه بيغيره
يتعامل معاه كده ؟

رجع بذكرياته لكذا سنه وري ايام ما كانوا لسه
 أطفال في المدرسه وقد ايه كانوا بيحبوا بعض جدا
 أكثر من الاخوات لدرجة ان الناس كانوا بيفكروهم
 توأم من كتر ماكانوا زي بعض في كل حاجة ومش
 بيفترقوا ابدا

افتكر أيام ما كانوا بيلعبوا طول اليوم مع بعض أو
 مع جمالات ودولت وايام ما كانوا يحطوا مخدات
 على سرايرهم كأنهم نايمين ويستخبوا في الجنية
 ويسهروا مع بعض لحد الصبح ، كلها كانت ذكريات
 جميلة لحد ما بدأوا يكبروا ومروان تعامله بدأ يختلف
 سنه ورا سنه وبقي يبعد عنه أكثر وأكثر لحد السنة
 الحزينة اللي اتشقلت فيها حياة آدم كلها رأسا على
 عقب وسافر ايطاليا من يومها اتقطعت اخبارهم عن
 بعض

ولما رجع مصر بعد ٤ سنين لأول مره

آدم الصغير شاف مروان فراح ناحيته : مروان أنا
 رجعت وحشتني أوي
 مروان الصغير بصله بقرف : وأنت ما وحشتنيش
 خالص وكنت بتمنى ماترجعش أصلا

آدم اتصدم من رده ورجع خطوتين لورا : ليه ؟ ده
أنا أخوك حتى

مروان : أنت مش اخويا ومش عايز تبقى اخويا
حتى ، وبعدين أنت واحد منبوذ فماتقارنش نفسك بينا
ابدا ، اوعي تنسى نفسك يا ابن جمالات ال@#\$

آدم أول ما سمعه بيشتتم مامته ماشفش قدامه ومسكه
ونزل فيه ضرب بكل قوته لدرجة إنه كان هيموت
في ايده لولا الحرس وعاصم ودولت اتدخلوا ولحقوه
من تحت ايده ، وراح المستشفى واتحجز إسبوع
هناك

ومن يومها بدأت عداوة آدم ومروان اللي ماحدث
عارف هتنتهي في يوم ولا لأ

دولت : آدم أنت معايا ؟

آدم فاق من ذكرياته وبصلها : حبيبي أنا معاكي أهو
دولت بصت للحزن اللي باين عليه : مين اللي
مزعلك يا بني ؟

آدم بتمثيل : انتى

دولت اتخضت : أنا ليه أنا عملت ايه ؟

آدم شاور على طبق الأكل قدامها : يعني أنا دخلت
المطبخ و عملتلك الأكل ده بايديا وانتى حتى ماكلتيش
منه معلقتين على بعض ، للدرجة دي مش عاجبك
أكلي ؟ اه ما هو أنا اتركنت على الرف خلاص
وماحدش عايزني

بص لجسار : أنت حلو أنت وبتحب الأكل خد كول
الطبق ده كمان

جسار فهم آدم عايز يوصل لايه فبيسحب الطبق من
قدام دولت : ايه ده بجد آكله عادي ؟

دولت ضربته على ايده بخفة : في ايه ياولا أنت
وهو أنا أي نعم عجزت بس ده مش معناه إنكم تكلوا
عليا حقي ، حلوه أوي دي كول يا جسار والتاني
ماصدق

دولت بدأت تاكل و آدم وجسار بيضحكوا ، و آدم سند
ظهره على الكرسي وأبتسم : بالهنا عليكى يا حبيبتي

في طنطا

معاذ دخل عند أخته سارة لقاها قاعده وز علانه راح
 قعد قصاها ومسك ايديها : في عروسه تبقى مبوزه
 كده يوم فرحها ايه ناوية تنكدي على الراجل من
 أولها ولا ايه ؟

سارة بصت في عيونه وعينيها لمعت بالدموع وهو
 مسك وشها بين ايديه : مالك بس يا حبيبتى ايه اللي
 مز علك كده ؟

سارة : كان نفسي تكون سولاف معايا اليوم ده كانت
 فرحانالي أوي لما عرفت ان يحي بدأ يعجب بيا
 كانت دايمًا بتدعيلي ربنا يفرحني واتجوزه لو خير
 ليا وكنا على طول لما نقعد مع بعض نخطط هنعمل
 ايه في اليوم ده وهنلبس ايه وكل تفاصيل اليوم كنا
 بنخططه سوى

قعدت تعيط وهو طبطب عليها : بس يا حبيبتى
 ماتعيطيش انتى عارفه دي حاجة غصب عننا كنا
 ماحدثش يعرف هي فين ولا يوصلها إزاي نعمل ايه
 ؟

سارة : بس أنا وجعتها أوي يا أبيه يوم ما كلمتني
 وكانت عايزاك أنا قولت لها كلام يوجع مش يمكن لو

خلتها تكلمك ماكانش كل ده حصل ؟ مش يمكن كنت
نجدتها قبل ما كل ده ما يحصل ؟

معاذ اخدها في حضنه : كل ده كان غصب عنك يا
سارة هو هددك إنه هيوذينا لو كلمتها تاني كان في
إيدك ايه تعمله يعني ؟

سارة مسكت في حضن اخوها جامد : ياريتها ترجع
يا ابيه ترجع بس وأنا هعملها اللي هي عايزاه
هتأسف والله وهصالحها بس ترجع

مامتهم دخلت عليهم : في ايه يا ولاد ؟ مالها سارة يا
معاذ يابني بتعيط كده ليه ؟

معاذ ضحك : بنتك نكديه يا حجه وهتقرف الراجل
معاها

الأم : اخس عليك يا معاذ دي أختك سارة دي نواره
البيت

راحت وقفها : حبيبة قلبي دي اللي هتوحشني
دوشتها لما تبعد عني

ساره مسحت دموعها : لا ما هو أنا مش هبعد ده أنا
عاينه حته فرخه مشوية في التلاجه ومش مسامحه
اللي هياكلها فهرجع أكلها

كلهم ضحكوا

معاذ : طول عمرك همك على كرشك ربنا يعينه بقى
دكتور يحي ويعرف يأكل التماسيح اللي في بطنك
دي

الميكاب ارتست عدلت الميكاب بتاع ساره ويحي جه
واخذها واخيرا سارة اتجوزت أبو عيون خضرا
وراحتنا من از عاجها

في يوم داليدا راحت عند أوضة آدم عشان كانت
عايزاه في موضوع ، وقفت قدام الباب بتوتر
وحطت ايدها على قلبها : ماتخافيش يا سولاف مش
هيعملك حاجة ، خبطي وقوليله دولت هانم عايزاك
وامشي على طول

اخذت نفس طويل وخبطت على الباب مره والتانيه
ماردش خبطت للمره الثالثه برضه ماردش لسه
هتمشي لفته فتح الباب : نعم ؟

داليدا بصتله كان باين عليه لسه أخذ شاور ، شعره
مبلول والقوطه على كتفه وأول مره تشوفه من غير

نظارة ، سرحت غصب عنها في ملامحه و عيونه
البنّي وهو قطع سرحانها : في ايه ؟

داليدا باحراج بعدت نظرها عنه : اااا دولت هانم
كانت عايزاك

آدم : عايزاني ليه ؟

داليدا هزت دماغها ماعرفش وهو : ماشي حاضر
جاي أهو

آدم راح معاها عند دولت : دولي

دولت : حبيبي تعالا اقعد

آدم راح قعد جنبها : ها في ايه ؟

دولت : عارف ان عمك وابنها جايبين الاسبوع
الجاي ؟

آدم : بجد ! الواطي ماقلش يعني

دولت : معلى تلاقيه بس اتشغل ولا حاجة ، المهم ،
هتروح تجيبهم من المطار ؟

آدم : وأنا مالي كنت الشوفير بتاع أهلهم أنا ولا ايه ؟

دولت ضربته على كتفه : ماتلم يا ولد بقى

آدم : اتلميت أهو هما جايبين امتى صحيح ؟

دولت : يوم التلات الصبح على الساعة ٧ تقريبا
 آدم : منك لله يا اياس يابن ام اياس هتصحيني من
 النجمة عشان اجيبك من المطار حسبي الله
 دولت ضحكت : أنت بتدعي على ابن عمك يا ولد ؟
 آدم بهزار : ان شاء الله لو اخويا في الرضاعه لو
 هيصحيني بدري فاه
 دولت : ربنا يهديك يا آدم
 آدم : يا رب ياختى يالا هروح أنا بقى اشوف اللي
 ورايا ، عايزة حاجة مني ؟
 دولت طبطبت على ظهره : لا يا حبيبي روح شوف
 شغلك
 قام وراح وقف جنب داليدا : تعالي ورايا عايزك

مشي وداليدا راحت وراه بتردد
 دخل اوضته وبصلها : هي دولت عامله كده ليه
 أخذت بالي شكلها تعبان
 داليدا : مش حضرتك اللي اكلتها في مطعمك من كام
 يوم أكل ما عرفش حتى مكوناته ايه

آدم رفع حاجبه : يعني أنا السبب ده ايه هو ده ان
شاء الله ؟

داليدا : في آكل كثير ممنوع عنها عشان صحتها زي
الملح الكثير والسكر الكثير والدهون الثقيلة والتوابل
الحراقة كل ده غلط عليها

آدم هز دماغه بفهم : ده طلع حوار كبير بقى
بصلها : لا ده انتى تخلى بالك كويس أوي من أكلها
داليدا : حاضر

آدم : وعائزك تكتبيلي ورقه كده بالحاجات الممنوعه
عنها عشان أبقي عارف
داليدا : حاضر

ادم رفع حاجبه باستغراب : وتخلي بالك منها طول
الوقت وتبلغيني بكل حاجة
داليدا : حاضر

آدم بدأ بدايق من ردها : عائزك كمان تجهزيها في
يوم عشان هاخدها تعمل فحوصات شامله عشان
نظمن عليها
داليدا : حاضر

آدم سكت شويه وفكر في حاجة تانيه يستفزها بيها
عشان تغير ردها : أنا كنت عايزك تعمليلي حاجة
كده بعيد عن دولت

داليدا : حاضـ

آدم قاطعها بنرفزة : انتى كل حاجة حاضر كده ايه ؟

داليدا خافت من صوته العالي وقلبها بدأ يدق جامد
وفضلت بصاله بصمت

آدم : ماتنطقي قولي حاجة

داليدا بخوف : أقول ايه ؟

آدم : قولي أي حاجة ردي على كلامي

داليدا : حاضر هعمل اللي قولتلي عليه حاضر

آدم اتعصب أكثر وزعق : بطلي حاضر دي

ماتقوليش زفت حاضر بتدايقيني

داليدا : أقول ايه طيب ؟

آدم : قولي لأ

داليدا بصوت متقطع : لا

وقعدت على الارض وحطت وشها بين ايديها بحركة

دفاع تلقائية منها كأنها بتحمي نفسها من حسام أو

يمكن شبحه اللي بيطاردها في كل مكان سواء في
احلامها وهي نايمه أو ذكرياتها المؤلمة وهي
صاحبة

آدم فكرها بتعيط وواقف هيتجنن وعمال يلف حولين
نفسه : أنتي يابنتي حد مسلكك عليا ؟ بتعيطي ليه
دلوقتي ؟

آدم صعبت عليه فراح قعد قدامها بهدوء : طيب
خلاص أنا آسف لو زعلتك

داليدا لسه مخبية وشها وآدم قعد بيرطم بهمس : اه
للنساء ، طيب لو جبتلها شوكلاتة هتبطل عياط
داليدا بصتله وهو أبتمس : عارف إنها نقطة ضعفكم
داليدا : بس انا مش بعيط أصلا

آدم : طيب كويس

داليدا بصت في عيونه واعصابها هدبت تماما وهي
مش فاهمه ايه اللي بيجرالها قدامه كل شويه
المفروض إنها حاليا عندها فوبيا من كل ما هو ذكر
، ليه هو مش بتخاف منه ؟ ليه الاحساس الجميل
اللي محاوط قلبها ده وهو قريب منها ؟ إزاي ممكن

إنسان يخرق قوانين الطب النفسي ويفرض نفسه
على قلوب غيره بالطريقة اللطيفة دي ؟

ادم أبتسم : قمر مش كده ؟ عارف والله أصل أمي
كانت جميلة أوي وأنا واخد ملامحها كلها

داليدا اتكسفت جامد ونزلت وشها في الارض وهو
ضحك : هتفضلي قاعده كده على الارض ؟ أنا مش
هنكر ان القاعده على الارض حلوه بس مش منظر
يعني

داليدا قامت بسرعه وبعدت عنه وهو قام وفضلوا
ساكتين لحد ما داليدا اتكلمت : أنا ، أنا همشي عن
إذنك

آدم : داليدا

داليدا وقفت وبصتله وهو : حذاري تقولي حاضر
دي بعد كده ، مش أي حد يقولك على حاجة تقولي
حاضر ، فهماني

داليدا سرحت في كلامه وافتكرت نفسها زمان كان
قلبها جامد وبتقول لا بكل سهوله إنما حالياً لو فكرت
بس تقول لا قلبها يترعب

قاطعها صوت آدم : خليني أنا قدوة ليكي شايفه
 بجاجة اهلى دي اعلمي زيي ، أحم مش زيي أوي
 يعني عشان انتى بنت برضه بس اللي يقولك حاجة
 مش عجايباكي قوليله لأ

وكمل بهزار : وشوحي بايدك كدهو

داليدا ضحكت على كلامه وهو سرح في ضحكتها
 واتكلم بتوهان : حلوه أوي ضحكتك

داليدا اتكسفت : أحم طيب أنا همشي بقى

مشت بسرعه من قدامه وهو متابعتها بنظراته
 وابتسامته اختفت مع اختفاءها من قدامه : بتفكريني
 بيها ليه بس ؟ ليه مصممه تكوني نسخه صغيره منها
 قدام عيني

بص على صورة مامته جنبه على مكتبه : شبهك
 أوي مش كده ؟ ياخوفي تكون شبهك كمان في حياتها
 وتكون عاشت مأساة زيك

اتنهد بشجن وراح قعد على المكتب بتاعه وفضل
 يشتغل عشان يشغل باله بأي حاجة ويبطل تفكير في
 مامته وداليدا شويه

في إيطاليا

إياس كان عمال يلف في اوضته لحد ما مامته دخلت
عليه

كارما : إياس أنت بتعمل ايه ؟

إياس بعربي مكسر : بهدر شنتتي اهنا مش رايهين
مصر الاسبوع الجاي ؟

كارما بتشاور حوليها على الأوضة المقلوبة على
بعضها : وهو عشان تحضر شنطتك تعمل كل
الكركبه والدوشة دي ؟

إياس : هناك الكثير من الأغراض في كل مكان ولا
أدري ماذا علي ان أخذ معي

كارما : وأنت للدرجة دي متحمس تنزل مصر ؟

إياس أبتسم بسمه واسعه وقال بحماس : جدا مش
تعرفي انتى قد ايه متهمس ، كتير بسمع عن جمال
مصر وناسها نفسي شوف البنت المصرية كتير
باسمع عنها قد ايه هي هد جميل وقوي ، أنا لم
اصدق نفسي عندما وافقتي اخيرا بالسماح لي
بالذهاب معك الي مصر

كارما بتخبط كف على كف : عوض عليا عوض
الصابرين يا رب ، بقى المصريين يقعدوا يشتموا في
مصر وبناتها ونفسهم يهجوا بره البلد واللي عايش
حياته كلها بره بيحب مصر ونفسه يروحها ويشوف
بناتها

قاطعهم صوت بنت بتتكلم برقة و عياط مصطنعين :
ديفيد هل ما سمعته صحيح هل ستسافر وتتركنا حقا
؟

كارما بضيق : اسمه إياس وليس ديفيد يا سيلقيا ،
توقفي عن نعته بذلك الاسم الغبي
سيلقيا بصت لكارما بشر : جميع الاصدقاء ينادونه
بديفيد ما المشكله ؟

إياس : سيلقيا هذا يكفي ، أمي أتسمحين لنا ببعض
الوقت ؟

كارما لوت شفايفها وبتبرطم : اسمح يا خويا على
اساس أني لو قولت لا هتسمع الكلام مش عارفه أنا
يارب ايه الاشكال اللي بتتحدف علينا دي

خرجت بضيق من إبنها اللي مش بيسمع كلامها
ومصر يرتبط بالبنات الصغرا دي زي ما هي
مسمياها

إياس : ماذا بك يا عزيزتي لماذا تبكين هكذا ؟

سيلفيا : لأنك ستتركني وترحل

إياس : ولكنها مدة قصيرة وحسب وسأعود ثانيه لن
أبقى هناك الي الأبد

سيلفيا حضنته : إذا خذني معك لا تتركني وحدي هنا
أنت تعرف أني لا أستطيع ان اعيش يوما واحدا
بدونك

إياس : وماذا عن أهلك واصدقاءك ؟

سيلفيا : لن يعترضوا أنت تعرف كل شخص هنا له
حرية فعل ما يريد وعلى كل لن يمانعوا إذا علموا
انك معي

بصتله : غير هذا أنا لا يهمني أحد غيرك

إياس باس ايدها : وأنا أيضا إذا فلتخبريهم عن هذا
وقومي بتجهيز نفسك للسفر

سيلفيا باسته بوقاحة : أنا احبك جدا ديفيد

.

الباب خبط ودخلت مدبرة المنزل : سيدي ، السيدة
كارما تخبرك ان شخصا ما يريد الحديث معك على
الهاتف

إياس : من يكون ؟

المدبرة : السيد آدم على ما اعتقد

إياس أبتسم وراح معاها كان ادم بيتكلم مع كارما في
الفون

اخده ورد : عزيزي

آدم : يقرفك على يقرف عزيزي بتعتك دي يالا
ماحبهاش أنا الكلمة دي ابو شكلك

إياس ضحك : مازال لسانك سليط كما انت

آدم : زي مانت لسه ماشي مع البت الصفرا اللي
معاك دي ومزعل كرملة

إياس بعربي مكسر : هي مش صفرا وبعدين ايه
ماشي معاها دي هي بيوعتبر كتيبتي

آدم : خبطتك فيسبا يا بعيد وماتلاقيش حد يصوت
عليك حتى ، يالا دي البنات اللي زي دي مع اي
كلب يرميها فلوس هتجري وراه ، أوعى تنسى أنت
قابلتها فين أول مرة

إياس كشر بضيق لما افكر إنه قابل سيلفيا أول مره
في ملهى ليلي : آدم إذا سمعت مش تتكلم عنها كده
وبعدين هي بتل اللي كان بيعمله ، فين المشكلة بقي ؟

آدم اتهد بقلة حيلة : المشكلة إنك شايف ان مافيش
مشكله طيب روح يا إياس إلهي ربنا يوعدك ببنت
تعلمك الأخلاق من أول وجديد وتفهمك يعني
ايه شرف البنت ، بدل مانت عاملي فيها شاب إيطالي
كده ونسيت اصلك ودينك

إياس : أنت بيعرف هاجه ؟

آدم : ايه ؟

إياس : أنا عايز روح مصر عشان شوف البنت اللي
أنت بيتكلم عنها دي وشوف هي فعلا زي ما انت
بيقول ولا كلهم واهده

آدم : تعالا يا قلب أمك تعالا ده أنت هتتروق على
الآخر هنا

.

إياس ضحك وقعد يتكلم مع آدم شوية وبعدها قفل
وبص لمامته : هل ستخبرينه كل مرة عن تحركاتي
بهذا الشكل ؟

كارما : أنا ماقولتلهوش حاجة هو كان بيرن عليك
وسيادتك مشغول مع الهانم فرن عليا وسأل عنك
وقولتله إنك معاها

إياس : أنا حقا لا اعرف سبب هذا البغض لماذا
تكرهينها لهذه الدرجة ؟
كارما : بكرة تعرف

الباب خبط وكان جاكوب زوج كارما قامت بابتسامة
وراحت حضنته : عزيزي حمدا لله على سلامتك لقد
اشتقت اليك كثيرا

جاكوب باسها في خدها : اوووه يا عزيزتي ، كم
اشتاق لحضنك هذا كل يوم

إياس : هل أحضر لكم شجرة وكأسين عصير ؟
جاكوب : حقا يا عزيزي سأكون ممتن لك جدا ، هيا
يا عزيزتي لنجلس قليلا حتى يأتي ولدي العزيز
بالعصير

كارما ضحكت واياس سابهم ومشى بغیظ دخل
اوضته يكمل تجهير في حاجته

صوت أذان الفجر بيتردد في المكان ليبدد هدوء الليل
، داليدا قامت من النوم اتوضت وصلت وفضلت

قاعدة لوقت الشروق على مصليتها بتسبح وتذكر
ربنا لحد ما حست بالجوع

بصت في الساعة لقت الوقت لسه بدري أوي عن
معاد الفطار بس هي كانت جعانه جدا فنزلت المطبخ
تشوف حاجة تاكلها وقبل ما تدخل شمت ريحة حلوة
أوي ، دخلت المطبخ وشافت آدم واقف بيطبخ

كان لابس بنطلون أسود وقميص زيتوني مقسم
عضلاته ومشمر كاماه ولافف على وسطه مريه
مطبخ ومشغل راديو قديم جنبه على واحده من اغاني
أم كلثوم ومنسجم جدا في اللي بيعمله وهو بيدندن
بصوته الجميل بهدوء ، واشعة الشمس الذهبية اللي
داخلة من الشباك الكبير مع نسمة هوا الصبح خلاه
عامل زي لوحة فنية من أيام التسعينات

طلع الصينيه من الفرن ولف لقي داليدا واقفه عند
الباب فابتسم بهدوء : بنسوار يا هانم

داليدا أبتسمت الابتسامة اللي بتترسم غصب عنها
على شفايفها كل ما تسمع صوته وهي مش حاسه
بنفسها وهو قال مع حركة درامية : اتفضلي يا

مادموزيل

راح جاب صينية كيك كان حاططها في التلاجه
وداليدا دخلت وقعدت قصادة على البار -طيب ممكن
تقول على نفسها مجنونة فعلا لأنها اللي راحت
بنفسها وقعدت مع راجل متجاهلة أو متناسية خوفها
بس آدم مافشلش ابدا أنه يقتحم سور خوفها اللي
مغلقة نفسها بيه-

بصت حوليها على الجو و آدم أبتسم وهو بيزين طبق
كيك بكل رقي : دقه قديمه مش كده ؟
داليدا : هو ايه اللي دقة قديمة ؟

آدم بصلها : أنا

داليدا : ليه بتقول كده ؟

آدم بابتسامة : يعني ، عشان الأغنية

داليدا : هو فعلا كتير من شباب اليومين دول مش
بيسمعوا الاغاني دي

آدم بص للطبق تاني : معاكي حق

داليدا سرحت شوية مع كلمات الأغنية الرومانسيه
وبصت لآدم : شكلك مايقولش إنك هادي أو
رومانسي خالص

آدم أبتسم : زي مانتى شكلك مايقولش إنك صلبه
خالص

بصلها وسند على البار : انا متأكد إنك رقيقه جدا
وبسكوته بس أنتى اللى مصره تحبسي نفسك جوه
قوقعة وتتعللي عن الناس

داليدا اتكسفت وهربت من عينيه ماكانتش تعرف إنه
جريئ أوي كده

آدم بعد ماخلص اللي بيعمله : اتفضلي يا سنيوريتا
داليدا بصتله : أفضل أيه ؟

آدم : كولي عينك هتطلع على الأكل فبدل مايجيلي
تسمم ولا حاجة اتفضلي كولي معايا

داليدا اتكسفت أكثر هي ماكنش قصدتها تبص على
الأكل هي بس كانت بتهرب من عينيه وماركزتش
هي بتبص فين

داليدا قامت بكسوف : لا شكرا أنا اصلا مش جعانه
، كنت بس نازلة أجهز فطار دولت هانم

بطنها عملت صوت بيدل على الجوع فاتكسفت و آدم
ضحك بكل صوته : واضح جدا إنك مش جعانه

خالص ، أنا كنت بهزر معاكي على فكره ماتقفشيش
كده وتعالى كولي

شاور على الاطباق قدامه : ده انشيلادا ودي
تيراميسو هاا حابه تجربى ايه الأول

داليدا تنحت قدامه وهي مش فاهمه هو بيقول ايه
وهو ضحك وقدملها طبقين : ده تورتيللا جنبه ودي
كيك اتفضلي وقوليلي رأيك واوعى تعملي زي
البنات الفرفورة وتقوليلي دايت ولا مابطرش فطار
زي ده ، ده أنا اتقهر فيها ، دي التيراميسو لوحدها
اخذت منى اكثر من ٨ ساعات وبعمل فيها من
امبارح حرام والله

داليدا ضحكت بخفوت ورجعت تانى لكرسيها
وقعدت وبدأت تاكل وعينيها بتوسع بانبهار مع كل
قطعه بتاكلها وحطت صوابها على شفائيفها : حلو
أوي لا بجد تحفه جدا

آدم أبتسم بثقة وقلع الجوانتيات البلاستيك اللى فى
ايدى : أكيد طبعا وهو أنا أي حد ولا ايه ، ده الشيف
آدم بنفسه يا بت

راح عمل قهوة ووقف قصادها : اعملك عصير ولا
بتشربى لبن

داليدا : ليه حضرتك شايفني طفلة ؟

آدم ضحك وقعد قصاها : اه طفلة

داليدا بصتله بغيظ : حضرتك بجد شايفني طفلة أنا
من ساعة ما جيت هنا وأنت بتقولي كلام كأني عيلة
صغيره

آدم شرب شوية من القهوة وهو مبتسم : لا مش
شايفك طفلة بصراحة بس بحب اغلس عليك
وادايك بحسك كابته مشاعرك ومش عايزه أو خايفه
تطلعها ودي الطريقة الوحيدة اللي بتحركك وتخليكي
تتصرفي بتلقائية

قاطعهم صوت كمال اللي دخل عليهم فجأة وكلم آدم
بغضب : أنت مش هتبطل اللي أنت بتعمله ده ؟

آدم ببرود : يا فتاح يا عليم يا رزاق يا كريم وهو أنا
عملت حاجة ولا جيت جنبك ؟

كمال : أومال قصدك ايه بالزفت اللي أنت مشغله ده
واللي أنت بتطبخه في ساعة زي دي ؟

آدم بنفس البرود : والله اللي مش عاجبة لا يسمع ولا
يبص

بدأ ياكل : ناس غريبه والله حتى الأكل مش مسموح
بيه هنا

كمال فضل يبصله فترة بغضب : ماشي يا آدم كل
واحد وليه آخر

سابه ومشى وساب القصر كله و آدم قاعد بياكل
وحاسس بغصه في حلقه

.

داليدا كانت متابعه كل ده بصمت بصت على آدم
واخذت بالها ان في نديه قوية اوي اول مره تلاحظها
فوق جفنه الشمال واستغربتها جدا ، بصت لملامحه
الحزينه وحببت تغير الجو شويه : ممكن اسألك سؤال
؟

آدم : اتفضلي اسألي

داليدا : هو أنت ليه دخلت كلية للطبخ ؟ يعني بي غالباً
الرجاله بيكونوا مش بيحبوا الطبخ و كمان ابن رجل
اعمال طبيعي يبقى زيه عشان الشركة وكده فحساها
غريبه الصراحه

آدم أبتسم بحب كان واضح جدا في عيونه : الطبخ ده
عشق من صغري مع أغاني عبد الحليم وام كلثوم

اتنهد بحزن : جمالات الله يرحمها كانت بتحب الطبخ
 جدا مع صوت الأغاني القديمة دي وكانت طول
 الوقت بتطبخ وكنت معاها كنا بنطبخ كثير سوى
 بصلها : يلا كانت أيام

قعد ياكل بصمت وداليدا حست إنها عكت الدنيا أكثر
 فسكتت وكملت أكل في صمت وبعد ماخلصت قامت
 تجيب مياه ، ووقفت جنب آدم ومسكت ازازة المياة
 اللي جنبه وحطت شوية في كباية ولسه هتشرّب هو
 أتكلم بجمود : ماتقفيش على شمالي كده تاني لو
 سمحتي

داليدا بصتله واستغربت : ليه ؟ هو في حاجة ولا ايه
 ؟

آدم بصلها : معلى مش بحب حد يقف على شمالي
 داليدا استغربت لأنها بتشوف جسر دايمًا واقف على
 شماله بس احترمت رغبته وقعدت تاني مكانها
 قاطع هدوئهم صوت جسر : أهى دي الخيانة بعينها
 بقى

آدم بصله وأبتسم : نصيبك أهو والله ماحدث جه
 جنبه

جسار أبتسم وراح قعد على شمال آدم تحت
استغراب داليدا : احلى حاجة لما يكون عندك
صاحب بيعرف يطبخ هاتلي بقى الصينيه دي كلها
عشان انا مايمشيش معايا جو الأطباق والسكاكين
بتاعك ده

آدم : الله يكسف يا شيخ أنت على طول كده همك
على بطنك

داليدا اخرجت منهم وكانت عايزة تنسحب فقامت
بإحراج : أحم ، ميرسي أوي يا آدم بيه على الأكل ده
حقيقي كان طعمه جميل أوي تسلم ايدك ، أنا هطلع
أتمشى شويه في الجنينه لما تخلصوا هبقى اجي
اغسل الأطباق زي نوع من المساعدة يعني ، عن
إذنكم

انسحبت بسرعة وآدم بيراقبها لحد ما خرجت من
باب المطبخ الخلفي وبص لجسار : هبله دي ولا ايه
؟

جسار : باينلها كده ، احيه يا آدم البتاع ده مسكر أوي
فين الشاي يا راجل ؟

آدم شد طبق الكيك من قدامه : أنا بقول بلاش تاكل
منه أصلا أنا خايف على صحتك وعضلاتك برضه

جسار أبتسم بسماجه وشد الطبق من ايده : لا
ماتخافش يا حبيبي أنا عارف مصلحتي كويس اخرج
أنت بس منها

وفضلوا الاتنين باصين لبعض بغيط لحد ما هند
دخلت عليهم : استر ياللي بتستر في ايه ياولا أنت
وهو ايه البصات دي ؟ ده انتوا شوية وهتقوموا
ترفعوا سكاكين على بعض

آدم بصلها وأبتسم : صباح الخير يا بسبوسه بالقشطه
جسار : الدنيا نورت يا حلويات والله

هند : ايوه ياخويا كول بعقلي حلاوة أنت وهو شيفيني
عيله مرأهقه قدامكم ولا ايه ؟

آدم ضحك : أحلى مرأهقه دي ولا ايه ، تعالي دوقي
عمايل ايدي بقى يا هنوده

هند قربت منهم وبصت بطرف عينها على الأكل :
ايه ده كيك وحلويات عايز تبوظ الرجيم بتاعي ياولا
، أنت عارف أنا بعمل ايه عشان احافظ على
رشاقتي دي

آدم وجسار ضحكوا جامد عليها وآدم بيسقف بايديه :
ايوه بقى يا هنود يا جامد

هند : اتلم ياولا اما أنت عيل ناقص ربايه بصحيح ،
قولولي بقى الكيك ده بيقول ايه ؟

آدم ضحك : ما كان من الأول

سكت شويه : الا صحيح يا هنود هي بنتك دي كانت
واقعه على دماغها وهي صغيره ولا ايه ؟

هند : ليه خير مالها داليدا ؟

آدم : لا كانت بس قاعده تاكل معانا وبعدها قامت
وقالتلي لما تخلصوا أكل هبقى اجي اغسل الأطباق
كأني كنت هطلب منها يعني

هند اتنهدت وراحت وقفت قدامه : سيبها على
راحتها وبلاش تقسى عليها يا آدم عشان خاطري هي
فيها اللي مكفيها

آدم : وهو أنا كنت جيت جنبها لا إله الا الله

هند : بقولك يعني المهم تفطروا ايه يا حلوين ولا
فطرتوا كده خلاص

جسار : شوفي يا هنود ومالكيش عليا حلفان ياختي ،
هو الواحد كده لسه واكل السندوتشات بتاعة آدم دي
اللى مش عارف اسمها ايه فعائزين حاجة خفيفه
خالص ، يعني ، ست سبع بيضات على طبقين فول

وعلبة جنبه واربع خمس ارغفه عيش وبلاش
التوست المايح بتاعكم ده عشان مايشبعش واه شوية
مربات على شوية لانشون وكده يعني ، وكباية شاي
نحبس بيها ، بس

هند و آدم بصينله ومتتحين من الصدمة يا عيني
هند : بس ؟؟ وليه يا حبيبي تيجي على نفسك كده ؟؟
حرام تحرم نفسك من الأكل يا بابا يحصلك حاجة
بعد الشر

جسار بصلها وبيمثل العياط: اه يا هنود انتى الوحيد
اللي حاسه بيا هاتي راسك ابوسها

آدم بضحك : هي عادته ولا هيشترىها يا هند الواد ده
أنا بخاف اقعد معاه أصلا وهو جعان أحسن يبلعني
ده بياكل كمية آكل تكفي أمه بحالها والمشكلة مش
بيبان عليه ، اموت واعرف بيودي كل الطفح ده فين
؟

جسار : خمسه في عينك أنت بتحسدني يالا ولا ايه ؟
قل أعوذ برب الفلق

هند بضحك : بالهنا عليك يا حبيبي ماتسبب الواد
ياكل يا آدم الله

آدم : ماشي ياختي هسكت أهو

قاطعتهم داليدا اللي دخلت من الباب ولقتهم كلهم
بيصولها فارتبكت : في ايه ؟

هند : صباح الخير يا قلب أمك تعالي

داليدا دخلت وآدم بص لهند : طيب هنطير احنا بقي

هند : مع السلامه يا بني

آدم قلع المريلة وشد جسار من قفاه عشان يطلع من
الصينية اللي نازل فيها أكل ومشى وجسار وراه
وبرضه ماشي على شماله وداليدا مش فاهمه فبصت
لهند : هو ليه آدم باشا مش بيحب حد يقف على
شماله ؟

هند بصتلها : وانتى عرفتي منين ؟

داليدا : هو اللي قالي كنت واقفه بشرب جنبه وقالي
ماتقفيش على شمالي تاني

هند اتنهدت بحزن : عشان مش بيشوف بعينه الشمال

داليدا شهقت جامد : مش بيشوف بيها ؟

هند بألم وعيونها بتلمع بالدموع : دي قصه طويلة
أوي يا داليدا اختصارها ان آدم حصلت معاه حادثه
وهو صغير وعينه كانت التمن وبقي مش بيشوف

بيها كويس عشان كده مش بيحب حد يقف على
شماله عشان مش بيعرف يشوفه كويس وأكيد
الشعور بيربكه

داليدا حطت صوابها على بوءها : بس انا بشوف
جسار يعني على طول واقف على شماله

هند : عشان جسار الحارس بتاعه هو عينه اللي
بيشوف بيها وهو اللي بيحميه لو اى حد فكر ياذيه ،
آدم بيتق فيه أكثر من نفسه فهو الوحيد اللي
مسموحه يمشي على شماله

داليدا كانت عايزة تسمع قصة حياة آدم كلها كان
عندها فضول رهيب تعرف عنه أكثر وعن سبب
الوجع والحزن اللي في عيونه وصوته بس فونها رن
وكانت دولت اللي صحت

داليدا : دي دولت هانم هروح اشوفها ، عايز حاجة
منى يا ماما ؟

هند : لا يا قلبي روعي شوفي وراكي ايه
داليدا طلعت بسرعة على اوضة دولت وبدأت في
روتينها اليومي بس عقلها كله كان مع آدم واياه اللي
حصله ؟

جوه عربية رولز رويس لونها سيلقر ، قاعد آدم
وبيبص على الناس الخارجين من المطار : أهو ده
اللي كان ناقص كمان

جسار صفر بمعاكسة : اوبالا ما هذا الصاروخ اللي
مع ابن عمك ؟

آدم ضربه بظهر ايده على صدره : اتلم يالا ده اللي
اختشوا ماتوا بصحيح

نزل من العربية : ما لسه بدري يا جماعة
إياس إبتسم و آدم راح سلم على عمته وحضنها جامد
: ليكي واحشه والله يا كرملة

كارما طبطبت علي ظهره : حبيبي يا آدم وحشتني
أوي

آدم بعد عنها بابتسامه : ادينا أهو هنقعد شهرين مع
بعض وماحدث يقدر يقولنا حاجة ولا سي يعقوب
ولا دياولو

كارما ضحكت و آدم راح سلم على إياس : أنت يالا
جايب البت دي معاك ليه ؟ ايه الجنان ده ؟

إياس : وفيها ايه هي كان زعلان أنى بيسيبيها لوهدها
وقرر يجي معايا

آدم بسخرية : يا حنين ، أنت حر بس ماتبقاش تزعل
لو دولي علقتك من رجلك

إياس : لا تقلق أنا متأكد ان دولي ستحبها كما أحبها
أنا

آدم بيبرطم : اه دي هتحبها أوي العروسه الحلاوة
دي

جسار نزل من العربية وسلم عليهم واخذ الشنط
بتاعتهم حطها في العربية ، كل ده وعينين سيلفيا
مانزلتش من عليه

ركبوا كلهم وآدم وكارما واياس عمالين يتكلموا طول
الطريق وسيلفيا بتفصص جسار بنظراتها وهي
بتلعب في شفايفها

وصلوا القصر وكلهم نزلوا وآدم وقف جنب جسار
وهمس : البت مانزلتش عينيها من عليك من ساعة
ما شافتك

جسار ضحك : عارف وواخذ بالي كويس
بصله بمشاغبه : تحب اعلقها لك

آدم ضحك : لا ماتتعبش نفسك مروان هيقوم بالمهمة
دي ، هو أصلا ما هيصدق

جسار ضحك وكلهم دخلوا القصر وطلعوا عند دولت
، كارما خبطت ودخلت : أمي

دولت : حبييتي يا بنتي اخيرا وصلتني

كارما اترمت في حزن مامتها وبدموع : وحشتيني
أوي يا حبييتي

دولت : انتى أكثر عامله ايه يا بنت قلبي ؟

كارما : أنا الحمد لله كويسه انتى اخبارك ايه ؟

.

دولت وكارما فضلوا شوية يتكلموا مع بعض وكل ده
تحت نظرات داليدا اللي رجعت كذا خطوة لورا
ووقفت جنب الحيطه ودموعها نزلت في صمت أول
ما سمعت كلمة بنت قلبي وافكرت مامتها اللي دايم
كانت بتناديها كده وماخذتش بالها من العيون اللي
محاوطاها بنظراتها

داليدا باصه في الأرض وبتمسح دموعها بهدوء من
غير ما حد يلاحظها وفجأة لقت منديل قطن قدامها ،
رفعت عينيها كان آدم : اتفضلي

داليدا أخذت المنديل بصمت ومسحت دموعها

آدم : بتعيطي ليه ؟

داليدا بتهز دماغها : ولا حاجة افكرت بس حد

عزيز عليا

آدم هز دماغه بفهم : ربنا يرحمه

داليدا بصتله باندهاش : يرحمه !! عرفت منين إنه

متوفي ؟

آدم بصلها وأبتسم : أنا أكثر واحد أفهم شعور الفقد ده

مستحيل تعيطي كده على حد عايش ، صح ولا ايه ؟

داليدا : معاك حق ربنا يرحمها

آدم بفضول : أنا لو سألتك مين هتقوليلي ؟

داليدا بتفكير : لو قولتلك هتقوللي ايه في المقابل ؟

آدم ضحك : انتي طلعتي مادية كمان

داليدا : أنا مش مادية ، هو هو بس

آدم : خلاص خلاص خليه ديل سؤال بسؤال

داليدا هزت دماغها بموافقة وهو سأل : هاه مين بقى

الشخص العزيز ؟

داليدا بحزن : أمي

آدم : أنا آسف مش قصدي
داليدا هزت دماغها : ولا يهملك

كارما بعد كلام كتير مع دولت بصت لابنها : تعالا يا
إياس سلم على نانا

إياس قرب منها بتردد وهي أبتسمت وفتحت دراعتها
: تعالا يا حبيبي

إياس راح حضنها وهي حضنته جامد بحب وحنية :
اخيرا شوفتك يا إياس بقى ينفع أول مرة أشوفك
تكون ٢٨ سنة كده ؟

إياس كان غريب عليه أوي حضنها حس بدفى وحب
مش بيحسه مع جدته الثانية : كان نفسي كتير
بیشوفك نانا

دولت مسكت وشه بين ايديها : واديك شوفتني أهو يا
غالي خلينا بقى نعوض كل السنين دي

إياس أبتسم وبص على سيلفيا اللي واقفه بعيد : نانا
خليني اعرفك سيلفيا كتيبتى

دولت بصت عليها بذهول من شكلها كانت لابسه
فستان ضيق وقصير مقسم جسمها كله كأنها مش
لابسه حاجة ورافعه شعرها لفيق كحكه

دولت : دي خطيبتك ؟

إياس : Yes

راح اخدها من ايدها : سيلفيا سلمي على جدتي

سيلفيا : هاي

دولت : هاي ياختى ورحمة الله وبركاته

إياس : نانا هي ما بيعرف عربي

دولت هزت دماغها فهم : أخذت بالي

اتكلموا شوية وبعدها راحوا على اوضهم عشان
يرتاحوا من السفر

دولت بصت لأدم : أنت كنت عارف موضوع البت
دي

أدم هز دماغه باحراج وهي كشرت : وساييه كده ده
ايه هو ده ؟

أدم : دولي ماتنسيش ان تربيته مختلفه عننا هو عاش
حياته كلها في ايطاليا واطبع بطبعهم وده هناك عادي

جدا فهو شايف ده طبيعي وانه مش بيعمل حاجة
غلط

دولت : برضه كان المفروض تنصحه على الأقل
آدم : والله نصحته كثير وعمتي روحها طلعت معاه
من كتر المناهده بس هو مقتنع جدا باللي بيعمله ،
نعمله ايه بقى

تاني يوم على الفطار الكل متجمع وهد أول ما
شافت سيلفيا نازله على السلاالم شهقت : يا نهار مش
طالعله شمس ايه ده ؟

سيلفيا كانت لابسه توب ضيق وقصير مبين بطنها
وهوت شورت قصير جدا

آدم وجسار حطوا وشهم في الأرض وبيحاولوا
يكتموا ضحكهم وهد راحت ناحيتها بسرعه : ايه يا
حبيبتي اللي انتى مش لابساه ده ؟

سيلفيا : واات !

هد : هو انتى من اللي بيوطوطوا دول ؟

كارما قامت وراحتلهم : سيلفيا رجاءا بدلي ثيابك تلك
لا يمكنك ارتداء مثل هذه الثياب هنا

سيلفيا بتشاور على تمارا : إنها ايضا ترتدي مثلي
كارما : أجل لكن ليس لتلك الدرجة على الأقل ارتدي
مثلا ليس هكذا

مروان : ماتسببها يا عمتي براحتها البت حرانه فيها
ايه يعني ؟

راح حط ايده على كتفها : الجميل اسمه ايه بقى ؟

إياس شد سيلفيا عليه : الزم حدودك يا هذا إنها
خطيبيتي

دولت زعقت تنهي الموضوع : بالاس كفاية ، كارما
خوديا خلياها تغير لبسها ده وأنت يا مروان لم نفسك
واحفظ ادبك دي خطيبة ابن عمك مش عايزة
مشاكل

كلهم اتحركوا ينفذوا أوامرها وأدم بيتوشوش مع
جسار : مش قولتلك مروان هيشقظها

جسار بضحك : حصل

بتعدي الأيام واياس كان مبسوط بقعدته مع قرابيه
وخاصتا دولت بس كان مضايق من رفضهم لسيلفيا
وهو مايعرفش أصلا باللي هي ناوية عمله من وراه

داليدا واقفه عند بوابة القصر من جوه لحد ماجالها
واحد من الحرس ومد ايده بكيس بلاستيك : اتفضلي
يا هانم هو ده العلاج مظبوط ؟

داليدا اخدت الكيس وبصت فيه وشافت العلاج
وبصتله بامتنان : ايوه هو مظبوط ، شكرا

الحارس : العفو ، عن إذتك

الحارس راح وقف مكانه وداليدا اخدت علاج دولت
اللي خلص ومشت هي كمان ، كانت بتتمشى في
جنينة القصر الكبيرة وهي سرحانه ومكتفه ايديها
ورا ظهرها

فوقها من سرحانها صوت آدم اللي كان قاعد لوحده
جنب البيسين وحاطط على التراييزة الصغيره قدامه
تورته صغيره فيها شمعة واحده وبيغني هابي بارث
داي فور يو آدم

آدم بسخرية : هابي قال أكيد اللي ألف الأغنية دي
كان واقع على دماغه

داليدا : أنت بتكلم نفسك ؟

وللمرة الثانية داليدا تكسر حواجزها وتروح بنفسها
تتكلم معاه و آدم بصلها : سبحان الله دايمما بتيجي في
وقتك اتفضلي اقعدى

داليدا قعدت قصاده : ليه بتحتفل لوحدك ؟

آدم : عشان انا طول الوقت لوحدى

داليدا : إزاي بقى ! أنت حوليك ناس كتير دولت هانم
وماما هند وجسار باشا وكارما هانم واياس بيه
ولوجين كلهم بيحبوك

آدم : ده هنا بس إنما أنا طول عمري عايش بره
لوحدى غير كده معظم الناس دي بيشفقوا عليا مش
اكثر مشاعرهم نابعه من الشفقة مش الحب

بصلها بحماس ورجاء في نفس الوقت : عارفه ،
نفسى أوي اجر ب حب يكون ليا أنا وبس ، يعني مثلا
دولت و هند بيحبوني عشان هما طبيين وقلوبهم بيضا
فلو أي حد كان مكاني كانوا حبوه برضه إنما أنا

عايز حب يكون ليا لوحدى ، أحس بالانتماء لصاحبة
والسكن معاه بس هل ممكن يحصل ده فى يوم ؟

داليدا : ولىه لا ؟

آدم : كل واحد ادرى بظروفه قوليلى انتى عمرك
جربتى الحب ده ؟

داليدا بصت فى الارض وسكتت هى اه لقت حب
ليها هى وبس ، بس كان لدرجة الهوس والجنون

.

آدم : بتسكتى كتير ، انتى غامضه اوى على فكره
مسك التورته وقطع منها قطعه حطها فى طبق
وحطه قدامها : اتفضلى

داليدا : أنت اللي عاملها ؟

آدم : لا تحبى اقوم اعملك واحده ؟

داليدا هزت دماغها برفض : ما تتعفش نفسك

داقت حته منها : مش بطاله

حطت الطبق تانى وماكملتش آكل وآدم فضل يراقبها
وبيتأمل ملامحها الجميلة وقلبه بيدق بسرعه وهمس
بينه وبين نفسه : فى ايه مالك ؟ حبتها ولا ايه ؟ لالا

حب ايه ده اللي من يوم وليلة ؟ أحم هو مش يوم
وليلة أوي يعني بس برضه بسرعة أوي كده

داليدا : صحيح افكرت أنا كان ليا سؤال

آدم ضحك : أنتى لسه فاكره ؟

داليدا : أنا في العادي مش بنسى بسرعة

آدم أبتسم : ماشي يا ستي اسألي

داليدا شاورت على النظارة السودا بتاعته : ليه دي ؟

آدم : عشان اللي تحت دي واللي أنا متأكد إنك

شوفتيه واحنا في المطبخ قبل كده

داليدا باحراج : فعلا شوفته بس انا لو سألت ايه

السبب هتجاوب ؟

آدم : لا

داليدا هزت دماغها بفهم وسكتت

آدم : ايه ده مش هتزني على دماغي عشان تعرفي ؟

داليدا : لا ، دي حاجة تخصك أنت وأنا ماليش حق

اعرف طلا ما أنت مش عايز

آدم بصلها كتير : ممكن اقولك بس في المقابل

تحكي لي عن نفسك انتى كمان

داليدا : أنا آسفة بس مش هقدر

آدم هز دماغه بفهم : براحتك

والاثنين فضلوا قاعدين بصمت مع بعض وكل واحد
سرحان في حياته ومشاكله لحد ما داليدا اعتذرت
ومشت

جسار كان قاعد مع آدم بس قام يروح الحمام وهو
راجع لقي سيلفيا في وشه

سيلفيا : هاي

جسار : خير ؟

سيلفيا : ما رأيك ان نصبح اصدقاء ؟

جسار : اصدقاء من اي نوع ؟

سيلفيا : ماذا تقصد ؟

جسار : أعني اصدقاء عاديين ام

قرب منها وغمز بابتسامه وقحه : اصدقاء من نوع
آخر ؟

سيلفيا ضحكت ضحكة مش تمام وحطت ايديها على صدره : ليس فقط جسدك المغربي ولكنك ذكي ايضا
إذا ماذا بعد ؟

جسار فضل باصصلها بقرف شويه وبعدها نزل ايديها عنه وأبتسم بسماجة : آسف لكنك لستي نوعي
المفضل

حط ايديه في جيب البنطلون : تشاو بقى يا حلوة
سابها ومشى وهو باصص للي واقف متابع كل ده
وخبطه على صدره : إحنا بره
سابه ومشى وهو واقف مخنوق ومتعصب

سيلفيا كانت واقفه متعصبه وحاسه ان كرامتها
اتمسح بيها الأرض ولقت اللي بيشدها من دراعها
بعنف بصتله بصدمة : ديفيد !

إياس : أيتها الحقيرة كيف تفعلين شيئاً كهذا ؟ وأنا
الذي ظننت إنك تغيرتي يبدوا ان آدم كان على حق
ايتها الساقطه

وبتحذير : غدا ستأخذين أول طائرة الي ايطاليا ولا
أريد ان أرى وجهك مرة أخرى، اتفهمين ؟

سيلفيا بصتله بقرف وسابته ومشت وهو نفخ بضيق :
حقيرة

افتكر كلام جسار « احنا بره » فأخذ بعضه وطلع
يقعد معاهم وفي طريقة في الجنينه شاف داليدا اللي
بتتمشى لوحدها بهدوء واستغربها جدا ، رغم إنها
لسه شابه والصيف والحر لابسه واسع وطويل
وطرحة ، قرر إنه يفهم اكثر عن الدين والعادات
اللي مايعرفش عنهم حاجة

جسار راح قعد قصاد آدم وبص على طبق التورته
اللي قدامه : هو كان في حد هنا ؟

آدم كان سرحان وماردش وجسار مسك الطبق :
أحسن برضه خليك على وضع الصامت كده

لسه هياكل من التورته اللي داليدا داقتها لقي آدم بيشد
الطبق والشوكه من ايده

جسار : في ايه يا عم خضتني ؟

آدم حط الطبق قدامه وعطاه الطبق بتاعه : كول ده ؟

جسار برفعة حاجب : اشمعنى بقى مين اللي واكل
من دي ؟

آدم : مالکش فيه

جسار : كده كده هعرف

قاطعهم إياس : ممكن بيقعد معاكم

جسار وسعله مكان جنبه : تعالا يا حزين اقع

إياس قعد معاهم والتلاته فضلوا سهرانين يتكلموا
وياكلوا وآدم كل فترة صورة داليدا بتظهر في خياله
ويبتسم

كمال كان قاعد في مكتبه وماسك صوره صغيرة في
ايدته لشابه جميلة جدا وباين عليها الهدوء والرقّة

كمال : ليه عملتي فينا كده ؟

رجع بذكرياته أيام ما كان لسه شاب ٢٥ سنة كان
في يوم مع اصحابه في حديقة عامة وقاعدين كلهم
يضحكوا ويهزروا وعلى الترابيزة اللي قصادهم
قاعدين شلة بنات مع بعض بيضحكوا ويهزروا
برضه ، لفت انتباهه واحده من البنات اللي قاعدين

بتشاور بايدها لبعيد وبتنادي على حد : جمالات إحنا
هنا

كمال لفته الاسم الغريب وبص لصاحبته كانت بنت
جميلة فعلا ، لابسه فستان رقيق وعامله شعرها
البنّي تسريحة جميلة وكانت عامله زي الفراشه ،
راحت للبنات وسلمت عليهم كلهم بحب وطلعت
منديل من شنطتها ومسحت الكرسي بتاعها وقعدت
معاهم

كمال قلبه دقلها من أول نظرة واللي شدة أكثر
هدوءها ورقتها وحرركاتها اللطيفة كل حاجة شدته
فيها

ومن اليوم ده فضل يروح نفس الحديقة كل يوم في
محاولة إنه يشوفها تاني ولو مرة واحده بس بلا
جدوى

وفي يوم مهاب والد كمال بلغه إنه هيقابل واحد من
أكبر رجال الأعمال اللي هيتعامل معاهم وهيساعدهم
في شغلهم ولازم يبقى معاه هو واخوه ، وفعلا كمال
وعاصم الاتنين راحوا معاه عشان يقابلوا الراجل ده
واللي كان بمثابة كنز ليهم أو طاقة قدر زي ما
بيقولوا

وللصدفة يطلع الراجل ده والد جمالات اللي كانت
جايه معاه باعتبارها شريكة في الشركة بتاعته وبنته
الوحيدة وكل عيلته

كمال ماكانش مصدق نفسه أول ما شافها بقى معقوله
البنات اللي فضل أكثر من شهر يدور عليها كأنها
إبرة في كومة قش قاعده قدامه دلوقتي

ومن اليوم ده زادت المقابلات بين جمالات وكمال
لحد ما طلب ايدها للجواز ورغم إنها كانت لسه
صغيره ٢٠ سنة الا إنها وافقت واتجوزوا فعلا
وخلفوا آدم في أول سنة جواز

قاطع سرحان كمال خبط على الباب ودخل عاصم :
كمال مش يلا ؟

كمال : يلا ايه ؟

عاصم : يابني مش النهارده حفلة الذكرى السنوية
للشركة ولا ايه أنت نسيت ؟

كمال بتذكر : لالا أنا فاكر روح أنت القصر وأنا
جاي وراك أهو

عاصم مشي وكمال بص في صورة جمالات لفترة
وبعدها شالها في الخزنه اللي في مكتبه وروح هو
كمان عشان يجهز للحفلة اللي كانت في جنينة القصر
الضخمه

الليل ليل والناس جت والحفلة بدأت
فوق عند دولت : ها حلو كده ؟

داليدا : زي البدر

دولت : يا بت يا بكاشة بقى أنا زي البدر برضة ؟
أنا راحت عليا خلاص الدور والباقي عليكي انتى يا
ست البنات

داليدا أبتسمت : والله بجد مش بهزر انتى فعلا جميلة
أوي ما شاء الله ، وبعدين ده أنا اللي راحت عليا
خلاص

دولت بحنية : يا حبيبتى ده أنتى لسه في عز شبابك ،
أنا يمكن ما عرفش حياتك زمان كانت عائلة إزاي
ولا أيه اللي حصلك عشان الوجع اللي أنا شيفاه في
عيونك ده بس الأكيد ان الحياة مش بتقف على حاجة

، كثير بيمر علينا وجع بس الحلو فيه انه بيعدي
 وبيجي بعده الفرح والجبر من ربنا خلي يقينك في الله
 كبير وهو هيعوضك ويسعد قلبك

داليدا : يا رب يا هانم

دولت : يلا بقى يا ست البنات خلينا ننزل

داليدا بتردد : هو أنا لازم أنزل بجد أنا ممكن استتى
 هنا ولو احتاجتيني كلميني

دولت قامت وشدتها من دراعها : يا شيخه قولي كلام
 غير ده بقى إحنا جايبين فساتين وحاطين ميكاب
 وعاملين كل الهيلمان ده عشان تقوليلي اقعد هنا ، يلا
 يلا

دولت نزلت وداليدا في ايدها لحد ما خرجوا من
 القصر للجنية اللي فيها الحفلة

آدم كان واقف بيتكلم هو وإياس مع شوية رجال
 اعمال لحد ما داليدا طلعت وهو لمحها وعينة
 اتسمرت من اللي شايفة

داليدا كانت لابسه فستان تركواز رقيق جدا وحزام
 أسود عريض وعليه طرحة مناسبة وحاطه ميكاب
 خفيف بس كان بيبرز جمالها جدا

آدم الدم غلا في عروقه واتجنن منها واللي جنبه
 أكثر اتنين شباب واقفين جنبه كانوا بيتكلموا عليها
 وبيتغللوا في مفاتها بألفاظ قذرة جدا وهو سمعهم ،
 استأذن من الناس اللي معاه ومشى ناحيتها وهو
 بيتوعدلها

داليدا ساعدت دولت إنها تقعد ولسه بتتعدل :

حضرت

مالحقتس تكمل كلامها ولقت آدم مسك دراعها مرة
 واحده وشدها وراه ودخل القصر تاني ، ودولت
 بتبص عليهم وبتضحك : والله ووقعت يابن جمالات
 ومابقاش أنا دولت لو ماكنتش واقع في دباذيبها البت
 دي

هند شافتها فقربت منها : دولت هانم قاعده لوحدك
 ليه فين داليدا ؟

دولت بصتلها وضحكت : عندك فساتين سواريه يا
 هنود عشان شكلنا هحتاجهم قريب

هند استغربت : فساتين سواريه ! ليه وده ايه علاقته
 بداليدا هي فين أصلا ؟

دولت : داليدا الله يرحمها آدم شكله عايزها في
 كلمتين كده

هند قلقت على داليدا ودولت شدتها : ياختى تعالى
 اقعدي وماتقلقيش كده آدم مش بعبع يعني هو أنا اللي
 هقولك برضة

في القصر جوه آدم شد داليدا لحد اوضتها ودخلها
 وهي شدت ايدها منه بغضب : في أيه اللي أنت
 بتعمله ده ؟

آدم لفلها وبغضب أكبر : أنتى اللي ايه الهباب اللي
 انتى مهيباه في نفسك ده ؟

داليدا : هباب ايه وهو أنا عملت حاجة ؟

آدم : ايوه اتزفتي انتى مش شايفة نفسك ولا ايه ؟ ايه
 هدومك اللي مقسمه وسطك دي وايه القرف اللي
 انتى حطاه في وشك ده هاه وبعدين حجاب ايه ده
 اللي انتى لبساه حجاب ده ولا حته قماشية حطاها
 على شعرك اللي بإذن الله هقصهولك قريب عشان
 تفرحي بيه وتطلعيه بره الطرحة كويس

داليدا رغم إنه كان متترفز عليها الا إنها ماكانتش
 خايفه منه بالعكس كانت مطمئنه أوي وهي مستغربة

من نفسها وبدأت ترد عليه زي ماكانت بتعمل زمان
 بشخصيتها القويه وكأنها سولاف قبل ماتمر بالأربع
 سنين العذاب اللي كسروها : اولا أنا ألبس وأعمل
 اللي أنا عايزاه وأنت مالكش كلمة عليا ، وبعدين
 ماتروح تشوف تمارا اختك اللي بتلبس نص هدومها
 وتنسى الباقي ولا أنت مش لاقى حاجة تعملها فجاي
 تتلكك وخلص

أدم قرب منها وهي اتوترت جدا وبترجع لورا الحد
 ما خبطت في الحيطه وراها وهو وقف قدامها واتكلم
 بصوت هادي بس يخوف : داليدا اتقي شري احسنك
 لأنك مش هتستحملي اللي ممكن اعمله فيكي

سحب منديل من على التسريحه جنبه وحطه في
 ايدها وعينيه مثبتته على عينيها : ماتطرنيش أعمل
 حاجات تندمي عليها

داليدا جسمها كله تلج من قربه وصوته وهو بعد
 عنها ووقف بعيد : شيلي الهباب اللي انتى حطاه على
 وشك ده

شاور بصباعه قدامها : وقبل ماتعترضي حطي في
 دماغك إنك لو مامسحتيهوش أنا اللي همسجهولك
 وبيتهيالي ان طريقي مش هتعجبك ابدأ

داليدا اتوترت جدا وقلبها كان هيخرج من مكانه من
 كتر الدق و آدم بيراقبها لحد ما راحت ووقفت قدام
 المرايا ومسحت وشها كله

آدم : براقو احبك وأنتى بتسمعي الكلام كده

داليدا بتبصله في المرايا ووشها جاب ميت لون من
 كلمة أحبك دي و آدم كمل كلامه : يلا بقى تقومي زي
 الشاطرة كده تعدلي طرحتك دي وتطوليها وتولعي
 في الحزام ده فاهمه يا بطه

أخذ بعضه وماشي : جتك القرف في شكلك وانتي
 زي القمر كده

خرج وقفل الباب وهي وقعت على الارض وحطت
 ايديها على قلبها اللي هيخرج من مكانه من كتر الدق
 : مجنون ده ولا أيه ؟ لا بجد البني آدم ده مجنون
 بجد

قامت وبصت لنفسها في المرايا ولاحظت ان في
 خصله من شعرها طالعه فعلا بره الطرحة ، اتنهدت
 وفكت الطرحة ولمت شعرها كويس ولفت الطرحة
 تاني بس المرادي طولتها ووقفت تبص لنفسها
 وافتكرت جملة آدم (جتك القرف في شكلك وانتي
 زي القمر كده)

ضحكت وبهمس ورقه : مجنون

قلعت الحزام وحطته في الدولاب واخذت بعضها
ونزلت تاني للحفلة

آدم طلعت من اوضة داليدا وقفل الباب وراه وسند عليه
وحط ايده على قلبه : حبيتها ؟ اه حبتها ، حبتها
وبتغير عليها ، يا نهارك يا آدم

نزل السلالم وطلع بره واول ما هند شافته وقفت :
آدم فين داليدا أنت عملت فيها ايه ؟
آدم : قولي هي عملت فيا ايه ؟

هند باستغراب : عملت ايه ؟ وهي دي بتعمل حاجة
أصلا ؟

آدم : لا ياختي وانتي الصادقة دي ماشاء الله عليها
ملاك كده نازل من السما مش بتعمل حاجة
هند ضحكت : لا بجد في ايه لكل ده ؟

آدم : بصي خلاصة الموضوع آدم شكله هيموت
مجلوط قريب وبنتك السبب ، ثواني كده

سابهم ومشي و هند بتنادي عليه بس هو ماردش

.

داليدا خلصت ونزلت تاني ، راحت عند البوفيه
ووقفت قدام العصاير وبتفكر هتختار انهو واحد

آدم فجأة من وراها : بتعملي ايه تاني ؟

داليدا اتخضت : خضتني ايه مافيش لا أحم ولا
دستور ؟

آدم : أحم دستور بتعملي ايه تاني ؟

داليدا متغاظة منه : مالکش فيه وبعدين انت ليه
محسني أنى مراتك ولا خطيبتك ؟

آدم بصلها بغموض : طيب ما تحسي فيها ايه يعني ؟

داليدا اتكسفت أوي وهو كرر سؤاله تانى : قولي
بتعملي ايه بقى ؟

داليدا : بجيب عصير لدولت هانم

آدم : هتشربي دولت من ده ؟

داليدا : اه ماله ده ، ده حتى ألوانهم حلوة خالص

رفعت كاس وشمته : رغم ان ريحته مقرفه بس ده

اللي عندكم أعمل أيه بقى ؟

آدم أبتسم : داليدا انتى عارفه انتى ماسكة ايه في
ايدك دلوقتي ؟

داليدا باستغراب : اه عصير ملون

آدم اخذ منها الكاس وحطه مكانه وأبتسم بسماجة : لا
يا حلوة ده مش عصير ملون ده خمره بعد الشر
عليكي

داليدا شهقت ورجت خطوة لورا : يا ليلة سودا على
دماغكم انتوا بتشربوا خمره ؟

آدم : لا بجد !! ده على اساس يعني اننا فارشين
الأرض مصليات وكل واحد ماسك مصحف بيقرأ
فيه

شاور على الحفلة : بصي كده ، ده كباريه مفتوح
تحت مسمى حفلة

داليدا : وأنت مبسوط كده ليه وأنت بتتكلم كأنها
حاجة تتمدح ؟

آدم : أنا بمدح والله ماحصل وبعدين اه طبعاً مبسوط
عشان عمال ادعي عليهم في سري ربنا ياخذهم فلو
ربنا استجاب كوووول دول هيلعوا في نار جهنم
بإذن الله

داليدا بتبصله باستغراب : أنت غريب أوي مش دول
أهلك برضه ؟

آدم ضحك جامد : قمر أوي يا داليدا والله قال أهلي
قال اتلهي بالله عليكي ، روعي يا بابا وبطلني لعب
في كل حاجة حوليكي ، أمك كانت بتسأل عليكي
روحيلها

داليدا : حاضر ماتزقش

داليدا مشت وهي جواها مبسوطه كانت حاسة براحه
وهي بتتكلم مع آدم وده حاجة غريبة عليها ومش
عارفه أيه مصدر المشاعر دي ، المفروض ان قلبها
اتدبح من زمان ففي ايه بقي

قاطع تفكيرها صوت هند : أيه يا ديدا يا حبيبتى فينك
؟

داليدا : هاه لا أنا هنا أهو

دولت ضحكت : اه ماهو واضح

بصت عليها من تحت لفة بتفحص وضحكت : والله
الواد آدم ده طلع نمس

داليدا اتكسفت : قصدك ايه ؟

دولت : ما قصدش يا حبيبتى ، اقعدى اقعدى

داليدا كانت محرجة ومتلخبطة بس قعدت وفضلوا
 التلاته يتكلموا لحد ما دولت زهقت من الحفلة وداليدا
 طلعتها اوضتها وعطتها العلاج بتاعها وأول مانامت
 راحت هي على اوضتها غيرت ودخلت سريرها
 وهي بتفكر في آدم وشخصيته المتناقضة ومش
 فاهمه هو انهو واحد فيهم وقح وقاسي ولا هادئ
 وحنين؟ ممكن وقح وحنين، ده أقرب وصف ليه
 فعلا، غمضت عينيها وحاولت تنام عشان تريح
 مخها شوية من كتر التفكير

تحت آدم كان واقف لقي جسار بيكلمه فجأة من وراه
 : ممكن أفهم ايه اللي حصل من شويه ده ؟
 آدم شرق في المياه اللي كان بيشربها : هتموتني الله
 ياخذك

جسار : حبيبي والله قولي بقى ايه ده اللي أنت عملته
 من شويه ؟

آدم : وهو أنا عملت ايه ؟

جسار : آدم ماتخلنيش اسيحلك وانطق بالذوق

آدم : مافيش حاجة

قاطعهم صوت تمارا : آدم

آدم بهمس : آدم على اللي جابوا آدم في يوم واحد
بصلها وهي لفت قدامه : ايه رأيك في اللوك ده حلو
صح ؟

جسار : هو من ناحية حلو فهو حلو فعلا

آدم بصله بضيق وقلع جاكيت بدلاته حطه على كتافها
وقفله كويس : تمارا ، ارجوكي بلاش لبس زي ده ،
اتقى الله في نفسك شوية ، أنتى جميلة وماحدش يقدر
ينكر ده ، بس جمالك ده لنفسك مش لكل الناس ،
مافيش أى حد ليه الحق يشوف جسمك باللبس ده
غير جوزك في المستقبل فعشان خاطري بلاش لبس
عريان كده تاني

تمارا قربت منه : بس أنت مش أى حد ، آدم أنا بحـ

آدم قاطعها : تمارا

أخذ نفس طويل : تمارا أنا اخوكي ماشي عارف ده
كويس بس برضه ولو ماينفعلش أشوفك كده
طبطب على كتافها بحنية : ماشي يا بابا

سابها ومشى وجسار راح وراه : أنت عارف إنها
مش بتعتبرك أخوها

آدم : عارف

دخل القصر ووقف فجأة ولف ضربه في وشه على
خوانه

جسار حط ايده على أنفه : في ايه يا عم ؟

آدم : عشان عينيك الحلوين دول ولسانك اللي بينقط
عسل

جسار : اعمل ايه يعني ؟ هي اللي عامله في نفسها
كده

آدم : ولو ده مايدكش الحق تبصلها كده واوعى تنسى
يا جسار إنها تعتبر اختى ، لو اتكرر ده تاني مش
هكتفي بضره

جسار رفع ايديه باستسلام : خلاص ياعم مش هعمل
حاجة ده انت ايدك ثقيله أوي

آدم سابه وراح يشوف لوجين لقاها نايمه قعد جنبها
شويه بصمت وهو بيبيص على ملامحها اللي فيها
سلام الدنيا كله ، وبعدها باس جبينها وطلع على

اوضته وهو بيفتكر داليدا وبيفكر في مشاعره دي
مش عارف يتعامل معاها إزاي

بتعدي الأيام والمواقف اللي بتجمع آدم وداليدا بتزيد
وآدم بيقع في حبها أكثر مع كل موقف وحاسس إنه
خلاص هينهار قدامها في أي لحظة

أما مروان كان قاعد مع نفسه زي الفترة الأخيرة
بيفكر ، قاعد على مكتبه وحاطت قدامه ورقة بيضا
راسم فيها راجل زي اللي الأطفال بيرسموه دايره
وخط رفيع دلالة على الجسم وخطوط صغيرة ايدين
ورجلين وعامله شعره منكوش وسانه زي سمكة
القرش

كان ماسك قلم في ايده كتب بيه آدم فوق شعر
الراجل المنكوش ورسم دايره حوليه وكتب حولين
الدايره (نانا ، هند ، لوجين ، تمارا) وحط دايره على
تمارا

مروان : نانا وداده كبار عيب ندخلهم في خناقتنا ،
لوجين حبيبتني قبل ماتكون حبيبتة هو ومش هسمح

لحد يزعلها ، تمارا ، اممممم ، تمارا تمارا ، لازقه
في آدم زي البرغوت ، أعمل معاها ايه ؟

قعد يفكر لحد ما فونه رن فرد عليه : حبييتي اللي
مش ببطل تفكير فيها

البننت : بجد يا مارو كنت بتفكر فيا ؟

مروان : ألا كنت ، هو أنا ببطل تفكير فيكي أصلا يا
نوني ؟

نوني بدلع مبالغ فيه : أنا بحبك أوي يا مروان ، ما
ايه رأيك تيجي نسهر سوى النهاردة أنا زهقانه موت
وعايزة اخرج

مروان : نسهر وماله وهو أنا عندي أغلى من نوني
برضه

اتكلم معاها شوية وقفل وهو بيضحك : يارب نص
سزاجتهم دي وحياتي هتكون فل الفل

فونه رن تاني ، بص فيه كان منبه مكتوب عليه
(الذكرى السنوية) ، ملامحه اتغيرت من الهزار
للحزن ومسك الفون وقفل المنبه وبعث لنوني رسالة
أنه حصل عنده مشكلة ومش هيعرف يخرج النهاردة
وقفل الفون خالص

بص على صورة محطوطة على الكومود جنبه كانت
 فيها العيلة كلها ، بص لجماليات لفترة وبعدها قلب
 الصورة على المكتب وقام جاب كتاب قصص أطفال
 من المكتبة الصغيره اللي فى اوضته وقعد على
 السرير يقرأ فيه

على الناحية الثانية

ادم كان قاعد فى اوضته وسرحان فى داليدا وبيكلم
 نفسه : حبيتك وماعرفش ليه وازاى وامتى بس اللي
 اعرفه أنى حبيتك

قام وبص لنفسه فى المرايا وقرب أوي وبص على
 عينه الشمال اللي لونها باهت شوية عن العين الثانية
 وبص للندبه اللي فوقها

مرر صوابه عليها بهدوء : بس علاقتنا دي
 ماتنفعش ابدا واحد زيي مستحيل يعمل علاقة زي
 دي أكيد هظلمك معايا وهتعبك بمشاكلي ، أنا عايش
 فى جحيم يا داليدا ومستحيل واحده رقيقة زيك
 تستحمل عيشة زي دي

حط ايده على قلبه وبيتنهد جامد نفسه يكلمها أكثر أو
يقعد معاها وقت أطول نفسه ياخدها في حضنه
ويشبع منها بطريقته بس لا ماينفعلش ، وقرر جوه
نفسه إنه هيبعد دي أحسن طريقة إنه يحميها من نفسه
وحياته المشتته

بعد تفكير طويل دخل أخذ شاور وطلع لبس بدله كلها
سودا وطبعا نظارته السودا اللي مش بتفارق عينيه
وطلع من اوضته كان جसार مستنيه بره وبرضه
لابس هدوم كلها سودا

جسار بهدوء : دولت هانم و هند و كارما هانم عايزين
يروحوا معاك

آدم راح عند دولت لقاهم كلهم هناك ولا بسين أسود
هما كمان

دولت : آدم

آدم : ماتخليكم

هند : ونخلينا ليه ؟ هي حبيبتك لوحدك ولا ايه ؟ دي
تبقى بنت دولت هانم واختي أنا و كارما هانم ليه
نخلينا ؟

آدم فكر شوية : خلاص براحتكم

سابهم ومشي وداليدا بصت لهند : هو في ايه
النهارده وانتوا رايعين فين ؟

هند اخدتها على جنب : النهارده ذكرى وفاة جمالات
هانم والدة آدم واحنا رايعين نزورها ، تيجي معانا
؟؟

داليدا ارتبكت واطرددت وهند مسكت ايديها : ألبسي
نضارة سودا لو قلقانه وكده كده المقابر خاصه ومش
اي حد بيدخلها

داليدا : وأنا هروح بصفتي ايه ؟
هند : بنتى ، يلا عقبال ماننزل تكوني غيرتي لبسك ،
بسرعة يلا

داليدا راحت اوضتها وغيرت لبسها لهدوم سودا
ولبست نظاره تخبي وشها ونزلت معاهم

آدم قابل باباه وهو رايع ناحية عربيته : رايع فين
؟؟

آدم : ده شئ مايخصش حضرتك أنا حر أروح
المكان اللي يعجبني

كمال مسكه من هدومه : لا مش حر يا آدم لابس
اسود يعني رايحها صح ؟ النهارده ذكرى وفاتها
مين عطالك الإذن او الحق أصلا ؟

آدم بعد ايده عنه : أنا مش محتاج اذن حد وبعدين
اروحها ولا لا ده يدايقك في ايه مش أنت بتقول أنى
مش ابنك وكل شوية تقولي يابن جمالات يبقى حقي،
أنا ابنها وحقي ازورها

ركب عربيته وجسار ركب قدامه وساق وكمال
متابعه لحد ما اختفى من قدامه ولسه هيدخل القصر
لقى دولت واللي معاها طالعين

كمال بضيق : ايه !! ماتخدوا القصر كله معاكم
احسن

دولت : كمال اخرس خالص مش عايزة أسمع
صوتك وبعدين دي جمالات الغالية بنت الناس
الاكابر تستاهل اكثر من كده مش بس إحنا ، أوعى
تنسى نفسك يا كمال لولاها ماكانش زماننا عايشين
في المستوى ده وأنت في الآخر جازتها شر على
خيرها معاك ، فحذاري اسمعك تاني بتتكلم عنها
كده

بصت لكارما : يلا يا بنتى

كارما مسكت ايدها ونزلوا الإيتين ركبوا عربية
دولت ومشوا وهند وداليدا ركبوا في عربية تانية آدم
مخليها لهند توصلها القصر والبيت وحصلوهم هما
كمان

دولت واللى معاها كلهم وصلوا المقابر وراحوا عند
قبر جمالات بس مالفوش آدم هناك
كارما : او مال فين آدم ؟ ده نازل قبلينا
دولت : دلوقتي يجي

قعدوا كلهم قرأوا الفاتحة على روح جمالات وفضلوا
قاعدين شوية وداليدا ماسكه دموعها بالعافية ، شوية
وآدم وصل وماسك في ايده بوكيه ورد أبيض ، كلهم
وسعوله وهو راح حط الورد على قبر مامته وقعد
قرأ الفاتحة وقعد بصمت يببص على القبر ودموعه
بتنزل ، ما حدش كان شايف وشه بس كلهم كانوا
متاكدين إنه بيعيط

عدت ساعات كتير دولت و هند و كارما تعبوا من
القاعده فقرروا يروحوا ماعادا آدم اللي كأنه في دنيا
تانية ومش سامع ولا حاسس بحد حوليه

جسار بص لدولت : خليه براحتة وأنا معاه ماتخافيش

دولت : ماشي يابني خلوا بالكم من نفسكم

جسار هز دماغه وكلهم مشوا وداليدا بتبص على
القبر ومش عايزة تمشي ، في حاجة شداها للقبر
ومش عايزة تروح دلوقتي

هند : مالك يا داليدا ؟

داليدا : مش عارفه ، القبر ده ، حاسه أنى مش عايزة
امشي من عنده

هند وقفت وحاسه بداليدا وتعلقها بأي ام : عايزة
تقعدى شوية كمان ؟

داليدا بصتلها وسكتت

هند : هروح أنا مع دولت هانم وخليكي انتى شوية
لو عايزة، هاا ؟

دولت قاطعتهم : في حاجة يا جماعة ؟

هند : لا يا هانم ، داليدا بس كانت عايزة تقعد شوية
فبقولها خليها لو عايزة

دولت : لو عايزة تقعدى خليكي وتعالى مع آدم

داليدا بصت بتردد على آدم اللي قاعد بعيد عند القبر
 و هند طبطبت علي ايدها : روعي يا حبيبي، روعي
 طلعي الكبت اللي جواكي كله
 داليدا زي ماتكون ماصدقت ورجعت فعلا عند آدم

دولت : كبت ايه ده يا هند اللي هتطلعها في المقابر يا
 هند ؟

هند مسكت ايدها وبتتكلم وهي بتمشي : خليها تعيط
 شوية، هي شايله كتير اوي في قلبها

داليدا رجعت تاني لآدم بخطوات متردده وقبل
 ماتوصل عنده جسار وقف قدامها : في حاجة ولا ايه
 ؟

داليدا هزت دماغها برفض : كنت عايزة أفضل
 شوية كمان بس

جسار هز دماغه بفهم ووسعلها تعدي وهي راحت
 وقفت ورا آدم، شوية وقعدت على الارض وضمت
 رجليها لصدرها وصوت شهقات آدم المكتومه كانت

كفيلة تخليها تعيط ، حطت دماغها على ركبها
وفضلت تعيط كثير

وفضل الاتنين كده لوقت طويل كل واحد واقع في
دوامه من الحزن والألم ومش عارفين يطلعوا منها،
لحد الليل ما ليل وهما مش حاسين

جسار راح قعد جنب آدم : آدم، مش كفاية كده يا
حبيبي ؟

آدم هز دماغه برفض وجسار : طيب عشان الغلبانه
اللي قاعده وراك دي

آدم استغرب وبص وراه لقي داليدا قاعده وحاطه
دماغها على رجليها ، استغرب جدا إنه محسش بيها
كل ده

بص لجسار : هي كانت هنا كل ده ؟

جسار : اه ، من ساعتها قاعده كده وبتعيط

آدم مسح وشه وقام راح عندها ونادها بصوت
مبحوح : داليدا

داليدا ماتحركتش وهو قعد قصاها : داليدا انتي
نمتي ولا ايه ؟

داليدا مسحت دموعها وبصتله : لا مانمتش

آدم اتصدم من شكلها عيونها منفخه من كتر العياط
والعروق اللي في دماغها بارزة ووشها أحمر

آدم : طيب انتى بتعيطي كده ليه بس ؟

داليدا هزت دماغها : ولا حاجة، افكرت حد عزيز
عليا

آدم فهم إنها بتتكلم عن مامتها فقام وقف : طيب يلا
نروح، الوقت اتأخر أوي ولو فضلنا هنا أكثر ممكن
نتلبس

داليدا أبتسمت وقامت مره واحده بس داخت وكانت
هتقع بس آدم لحقها : هووه هووه براحه، في حد
يقف كده مره واحده

داليدا بعدت ايده عنها : آسفه

آدم : ولا يهملك

راحوا ركبوا العربية وداليدا سندات على الازاز
ومكملة عياط

آدم ببص عليها : كل دي دموع بتجيبهم منين ؟
داليدا ماردتش بس فضلت باصه لبره وفجأة اتعدلت
في قعدتها وتحت شوية وهي بتراقب حد : لا مش
ممكن

آدم بيبيص مكان ماهي باصه : في ايه ؟

داليدا حطت وشها بين ايديها بتخبية وسندت علي
الكرسي اللي قدامها وفضلت تتمم بكلام مش واضح
وآدم مش فاهم هي مالها

فضلوا كده لحد ما روحوا القصر وداليدا فتحت باب
العربية ودخلت جري على جوه وآدم نزل هو كمان
: مالها دي ؟ الا تكون اتلبست بجد يانهار أبيض

جسار : شكلها اتلبست فعلا

آدم ضربه في صدره وسابه ومشى راح اوضته

داليدا دخلت اوضتها وقعدت في الارض جنب
السريير : يا ليلة سودا على دماغك يا سولاف، هو
كان بيعمل ايه هنا ؟

هند دخلت عليها الأوضة وشافتها قاعده كده فقلقت :
في ايه يا داليدا ؟

داليدا قعدت على ركبها ومسكت ايدين هند : ماما،
عارفه شوفت مين وأنا مروحه دلوقتي ؟

هند بقلق : مين ؟

داليدا : دكتور ، ابيه معاذ يا ماما هنا في اسكندرية ،
أعمل ايه ؟

هند : مش دكتور معاذ ده هو اللي ساعدك تهرابي
من اللي مايتسمى وهو اللي جابك عندي أصلا يعني
عارف مكانك من زمان خايفه ليه بقى منه ؟

داليدا بخوف كأن أي حاجة ليها علاقة بحسام من
قريب أو من بعيد عمالها رعب : ايوه هو بس ،
بس ، حسام ، هو على طول معاه، أنا خايفه يكون
عرف حسام مكاني ، أنا خايفه أوي يا ماما ،
خايفه

هند حضنتها جامد بحزن على حالها : ماتخافيش يا
داليدا، ماتخافيش يا حبيبتى، ماحدث يقدر يوصلك
هنا خالص

داليدا فضلت مكلبشه في حضن هند وهي حاسه إنها
في دوامه، وبتفكر ايه اللي جاب معاذ هنا وياترى
جاي لوحده ولا معاه حسام، ياترى حسام عرف
مكانها ولا لا، وكانت حاسه إن قلبها هيخرج من
مكانه من كتر الخوف

في مكان ثاني في مستشفى كبيره

معاذ : علوه ليك واحشه يا راجل

علي صاحب إسلام ابن هند : ايه ده ميزو بذات نفسه

هنا، يادي النور يادي النور

الاتنين حضنوا بعض جامد

علي : فينك مختفي كده ليه يابني ؟

معاذ : الدنيا بقى يا علوه المهم اخبارك ايه يا حبيبي

؟ نويت تتجوز بقى ولا ايه ؟

علي ضحك : اه ان شاء الله قريب

معاذ : ربنا يعينك، ماتتساش تعزمني على الفرح

وإلا هعملكم فضيحه والله

علي ضحك : قادر وتعملها

معاذ سكت شوية و علي سأل : ايه يابني في ايه ؟

معاذ قرب منه و اتكلم بهمس : أحم، هو ااا، هو يعني،

البنيت الليبي

علي ضحك : ايه يا ابني ده ؟

معاذ : اف بقى، فاكر البنيت اللي حكنتي عليها من

فترة دي و قلتلي صاحبك لقاها قدام بيتهم ؟

علي : ااه البت دي مالها ؟

معاذ : كنت عايز أعرف اخبارها يعني وكده

علي بصله بمكر : ايه ده يا ميزو أنت نويت تتجوز
على دكتورة منى ولا ايه ؟

معاذ : أنت أهبل يالا مين ده اللي يتجوز على منى؟
الفكرة بس ان البنت حالتها كانت صعبه أوي وكنت
عايز اطمن خفت ولا لا

علي : بص هي جسديا الحمد لله خفت بس بيتهياي
نفسيتها لا وهي للأسف رافضه العلاج

معاذ : طيب وهي فين دلوقتي أنت قولتلي إنها
روح مع الحجة

علي رفع كتافه : ماعرفش والله يا معاذ أنا مش
بتقابل معاهم كثير والله أعلم بقى هما فين

معاذ هز دماغه بفهم : بقولك، الكلام ده ___

علي حط ايده على كتفه : ماتنساش ان مهنتي بتحتم
عليا ما قولش حاجة لحد عن اي مريض ولولا إنك
دكتور وعارف الحالة دي وساعدت في علاجها من
بعيد انا ماكنتش قولتلك حاجة عنها

معاذ أبتسم : حبيبي يا علوه والله

علي : تعالا بقى لمارفك على دكتورة ساجده
مراتي المستقبلية

معاذ: ايوه يا عم الله يسهلك

الاتنين راحوا مع بعض وسلموا على ساجده واتكلموا
شوية مع بعض وبعدها معاذ أخذ بعضه وروح على
طنطا تاني وهو بي فكر في سولاف وياترى هي فين
دلوقتي وعائشه إزاي

آدم من ساعة اليوم اللي راح فيه لقبر مامته وهو
متغير، ساكت طول الوقت وما حدش بي شوفه كثير،
معظم وقته بيكون في مطعمه ويرجع البيت يقعد في
اوضته لوحده أو في أوضة مامته

باب الاوضة خبط فسمح للي بره يدخل وكانت تمارا
اللي دخلت وقفلت الباب وراها وقعدت قصاده :
دومي عامل ايه ؟

آدم كان قاعد على مكتبه بيشتغل على اللاب بتاعه :
الحمد لله يا تمارا انتى عامله ايه ؟

تمارا فرحت أوي إنه سأل عليها : أنا كويسه طول
مانت كويس

قربت منه : ماحدث بيشوفك يعني اليومين دول
آدم : معلى مشغول شوية زي مانتى شايفه

تمارا قربت منه أوي بتبص على اللاب و آدم اخرج
منها جدا ومن جسمها المكشوف قدامه بطريقة مش
كويسه فبعد شوية عنها واتحنح : تمارا

تمارا بصتله وهو : اقعدى كده عايزك فى كلمتين
تمارا قعدت جنبه وهو أخذ نفس طويل : انتى عارفه
ان العلاقة بينى وبين مامتك مش كويسه، وعمرها ما
هتبقى كويسه فى يوم صح ؟

تمارا : ايوه، ممكن اعرف ليه ؟

آدم : ده مش مهم دلوقتى المهم إنكم عيال الست اللي
أنا مش بحبها بس أنا ماتعودتش احكم على حد بسبب
حد تانى، لوجين رغم انها بنت فريال الا أنى بحبها
جدا وبعبرها اختى الصغيره عشان اتعاملت معاها
وعرفتها كويس

تمارا قاطعته : ايوه وايه علاقة ده بينا دلوقتى ؟

آدم : علاقته أنى عايزنا نقرب من بعض اكر
ونعرف بعض زي أنا ولوجين كده، ايه رأيك ؟
تمارا في اللحظة دي كان في فراشات بتطير من
قلبها وقلوب بتطلع من عينيها وقربت منه أوي : بجد
؟ بجد يا آدم ؟

آدم رجعها مكانها تاني : ايوه بجد، خلينا نتعرف
على بعض اكر، موافقه ؟

تمارا هزت دماغها بسرعه : اكيد طبعا موافقه
آدم أبتسم : طيب كويس، بصي بقى عشان اي اتنين
يقربوا من بعض ويقعدوا يتكلموا لازم يكونوا
مرتاحين في قعدتهم مع بعض صح كده ؟

تمارا : اه صح

آدم : حلو

تمارا : هو ايه ؟

آدم : فستانك ده، حلو أوي ولايق عليكي

تمارا بسعادة : بجد عجبك، حلو بجد

آدم : اممم حلو أوي بس مشكلته إنه مفتح حبتين
يعني ماينفesch خالص تطلعي بيه بره اوضتك، أنا
قولتك الكلام ده قبل كده بس هقوله تاني ماينفesch

لبسك ده اللي مبين كل مفاتك كانشي ده مايصحش ده
غير إنه بيخالف شرع ربنا، انتى مطلوب منك تلبسي
الحجاب كمان، ماتخليش كلام صحابك أو الموضة
هي اللي تمشيكي على مزاجها، أنتى واحده كبيرة
كفاية إنك تميزي الصح من الغلط وتعرفي ايه اللي
المفروض يحصل وايه لأ

تمارا كشرت: أنت عايز تمنعني من حرיתי وتخليني
البس الخيم اللي الناس بتلبسها دي؟

آدم بهدوء: لا يا بابا ماسمهاش كده اسمها أنا بحرיתי
جوه بيتي وقدام محارمي بس قدام أي حد غريب
ألبس واسع وحجاب ومحامي معناها الأب والاخ
والعم والخال بس، ولاد العم والخال والخالة وكل
الناس دول يعتبروا غرباء، جسمك كنز ربنا وهبه
ليكي عشان تحافظي عليه، زي اللؤلؤة مش اي حد
بيطولها جميلة وتخطف العين صحيح بس محفوظة
للي يستاهلها مش اي حد، انتى كمان كده لؤلؤة غالية
أوي يا تمارا ومش أي حد يقدر يوصلك بسهولة،
خليكي عصرية، صعبة، اللي يوصلك يبقى هو ده اللي
يستاهل فعلا، زي ملكة النحل كده، وده مش معناه
إنك تدفني نفسك أو تلبسي مبهدل، خالص، ألبسي
على الموضة وحلو ومهندم وكل حاجة بس محتشم

تمارا مش مقتنعه بكلامه، فريال ربتها على ان قيمة
البنات في جسمها، كل ما تلبس عريان وضيق اكثر
كل ماتكون مرغوبة أكثر وده طبعاً غلط

آدم : ها يا تيمو ماشي اتفقنا ؟

تمارا : بس أنت مش اي

آدم قاطعها : تاني يا تمارا الكلام ده، قولتلك قبل كده
حتى ولو ده مايدينيش الحق اشوفك كده، إحنا الاتنين
مطلوب مننا نحافظ على بعض، أنا مش هبصلك
بصه وحشه بس انتي كمان ماتلبسيش ملفت أوي كده
، عشان إحنا الاتنين نكون مرتاحين

تمارا قامت وقفت وهي بتهز دماغها برفض : أنا
ماكنتش أعرف إنك كده، أنت المفروض عايش بره
طول عمرك يعني ده بالنسبالك عادي

آدم بصلها : يعني انتي بنفسك أهو معترفه ان كل ده
عادات الغرب اللي بيحاولوا يغزونا فكريا ويهدوا
ديننا مش كده؟ وبعدين حتى لو عايش بره ده مش
معناه انسى ديني واخلاقي، المكان بيتفرض علينا
أحيانا اه بس ماحدث ليه الحق يفرض علينا معتقدات
غلط ويبوظلي ديني

تمارا : انت كلامك غريب أوي ، أنا همشي ، ورايا
سهره النهارده مع صحابي

مشيت بس آدم وقفها قبل ماتخرج من الباب : تمارا
تمارا بصتله وهو أبتسم بحزن: أنا بس خايف عليكي
مش عايز اخنقك زي مانتى فاكراه

تمارا ماردتش عليه وسابته ومشيت وهو اتنهذ بعنف
: شكلك هتتعيبني يا تمارا عشان تتغيري يارب خيب
ظني وماتكونش زي مامتها ويكون فيها ولو جزي
بسيط نقي أعرف اغيرها منه

عند قبر جمالات ، واقف شخص ولابس أسود
ونظارة سودا وفي ايده ورد أحمر ، حطه على قبرها
وقعد : لو بس كنتي سمعتي كلامي من الأول
ماكانش كل ده حصل ، فماتلوميش حد غير نفسك ،
أنا كنت مستعد افرشلك الأرض ورد ولو عايزة
اجيبلك نجمة من السماء، بس انتى اللي رفضتيني ،
ليه ؟ ده أنا حتى كنت بحبك ، بس تستاهلي ، عشان
مش أنا اللي يترفض ، ولسه ، لسه يا جمالات ، ده
مش أخري ، لسه ابنك هكرهه في عشته وهخر بهاله

لحد ما يحصلك عشان امحي وجودك خالص من
الدنيا

قاطعته صوت واحده : كنت عارفه أنى هلاقك هنا
قربت منه وهو قام وقف وبصلها : عايزه ايه ؟
الست : أنت اللي عايز ايه ؟ مش كفاية أذى بقى في
خلق الله ؟

الراجل : ما تدخليش انتى في اللي مالكيش فيه ،
ماتخلينيش احسرك على جوزك وابناك أنتى كمان
وانتى عارفه أنى اقدر فخليكي شاطرة كده واسكتي
خالص

الست : حسبي الله ونعم الوكيل فيك ، أنت يمكن
بتهددني أنى أسكت بس أنا متأكدة انه هيجي يوم
وكل حاجة هتتكشف وابن جمالات مش هيسكت ،
صدقني

سابته ومشيت وهو بص للقبر وخطى عليه خطوة
وداس الورد برجله ماسابش ولا واحده سليمه ،
وبعدها مشي هو كمان

خلص الشهرين واياس ومامته خلاص هيرجعوا
 ايطاليا تاني ، في مدخل القصر الكل واقف يودعهم ،
 آدم حزن كارما : هتوحشيني أوي يا كرملة
 كارما : أنت أكثر يا حبيبي مش عارفه هقابلك امتي
 تاني بس أتمنى تبقى كويس لحد الوقت ده
 آدم باس جبينها : حبيبتى أنتى يا كرملة والله بإذن الله
 نتقابل قريب

إياس هو كمان سلم على آدم : هتوهشني يا كويا
 آدم حزنه: وأنت كمان وربنا يعوض عليك ويرزقك
 ببنت الحلال اللي تصونك
 إياس أبتسم : وأنت كمان
 إياس وكارما مشوا ورجع البيت تاني لروتينه المعتاد

وتمارا مبسوطة ان آدم بقى بيقعد معاها بس مش
 بتحب لما ينصحها عن لبسها أو شخصيتها
 وتصرفاتها ، بتسمع من وذن وتطلع من الودن الثانية
 كأنها ماسمعتش حاجة

في يوم آدم كان مروح متأخر من مطعمه وشاف
باباه قاعد في التراس على المرجحة الكبيرة وفيري
قاعده في حضنه وبيتكلموا ويضحكوا
اتعصب جدا عشان دي مرجحة مامته ، كانت دايمًا
بتقعد عليها معاه ، إزاي يستجروا أو يقعدوا عليها
بالمنظر المقرز ده ؟

خطى خطوة واحدة ناحيتهم بغل ووقف وجسار كان
ماشى بنفس خطوته ناوي يوقفه

آدم : مش هعمل حاجة ماتقيليش كده

أخذ كذا نفس ورا بعض ولف عشان يطلع اوضته
بس قبل ما يتحرك شاف دولاب إزاز ضخم كان
محطوط في الليفنج روم وفيه كمية كبيرة جدا من
شهادات التقدير والجوايز والدروع بتاعة العيلة،
بص عليه ونفسه بدأ يعلا وهو بيبتكر لقطات من
مواقف قديمة ، حط ايده على عينه الشمال وانحنى
شوية وأنّ بصوت مكتوم وجسار قرب منه بسرعه :
أنت كويس ؟ مالك ؟

آدم بوجع : مافيش حاجة ، أنا عايز أطلع اوضتي
بس

جسار اخده طلعه اوضته وهو راح وقف قدام المرايا
وبص لعينه : كأنه حصل امبارح، عمري ما هنسى
عملتك دي يا كمال ابدا

حس إنه تعبان وعايز يستفرغ فدخل بسرعه على
الحمام

داليدا كانت معدية من جنب اوضة ادم وسمعت
صوته التعبان وقلقت جدا فخبطت ودخلت بهدوء
واتفاجئت بمنظرة، قاعد في الحمام على الارض
وبيكح جامد ووشه أحمر جدا وبيتنفس بصعوبة
وبيتاوة بوجع وجعها هي شخصيا، قعدت جنبه على
الارض وحطت ايدها على ظهره بتردد تطببت
عليه

آدم اتفاجئ لانه ما حشش بيها لما دخلت من وجعه
وبصلها : أنتى بتعملي ايه هنا ؟

داليدا مش عارفه ترد تقوله ايه هي نفسها مش
عارفه هي بتعمل ايه ؟ ولا ايه التصرفات غير
المسؤوله اللى بتعملها دي

آدم قام وقف بصعوبه وسند على الحوض : اطلعي
بره

داليدا وقفت بصمت وهو نفخ : لو حد دخل علينا
دلوقتي هيفهمنا غلط فاتفضلي بقى بره

داليدا خرجت من الحمام ولسه هتخرج من باب
الاولية سمعته بيتأوه تاني بوجع فتراجعت ودخلتله
تاني وهو بصلها في المرايا : خير رجعتي تاني
ليه ؟

داليدا : خليني أساعدك

آدم بتهكم : وهتساعديني إزاي بقى سعادتك ؟ تقدرني
أنتى تعملي ايه تساعدني بيه ؟

داليدا : اقدر اقيسلك الضغط والسكر ، واقدر اديك
محلول أو مسكن يهدي الوجع شويه

.

آدم بصلها كتير أوي في المرايا وبعدها قفل الحنفية
ولف ناحيتها وفضل يقرب منها ببطئ لحد ما وقف
قدامها وهي هتموت من التوتر

آدم بهمس : مالك متوتره ليه كده ؟

داليدا عينيها بتزوغ عن عينه ونفسها بدأ يعلا وهو
اتنهد ومشى ناحية السرير : مش عايز منك حاجة
اتفضلي اطلعي بره وسيبيني في حالي

رمى نفسه على السرير باهمال وغمض عينيه
بيحاول ينام بس هو تعبان فعلا ومن الوجد مش
عارف ينام

داليدا فضلت متسمة مكانها لفترة وفاقت على صوته
بيئن فاستجمعت نفسها وقربت منه بتوتر

آدم : خير عايزه ايه تاني ؟

داليدا : خلىني أساعدك

آدم : ايه يا بت البرود اللي انتي فيه ده ؟ انتي ايه
مش بتزهقي ؟

داليدا : دي وظيفتي

آدم : ااه ملاك الرحمة مش كده ؟

داليدا سكتت وماردتش وهو كمل : طيب يا ملاك
الرحمة خليكى في دولت وسيبيني انا في حالي ،
مهمتك هنا تاخدي بالك من دولت وبس يلا هويانا
بقى

عطاها ظهره وغمض عينيه على امل إنها تمشي
بس هي لسه واقفه مكانها، وآدم خلاص مش قادر
يسيطر على نفسه أكثر من كده، وجودها جنبه
بيوتره وبيضعفه وعايزها تمشي بأي طريقه

داليدا شيفاه بيتوجع فقربت منه وقعدت على السرير
قصاده وشدت ايده تقيسله الضغط وهو بصلها
وعينيهم اتقابلت في نظرة طويلة أوي فيها مشاعر
كثير متلخبطه ومكبوته

آدم : وبعدين معاكي ؟

داليدا بصوت خافت : خليني أساعدك مش هينفع
اسيبك كده

آدم ببيصلها وبيراقب حركة شفايفها وهي بتتكلم
ونفسه لو يقرب منهم يلمسهم أو يحس بيهم وهمس :
وجودك جنبي بيتعبنى أكثر يا داليدا

داليدا بصتله وهي مش فاهمه ليه وجودها جنبه
بيتعبه اتوجعت أوي من كلامه ودموعها كانت
هتنزل بس هي منعتها واتكلمت بصوت مهزوز :
اسفه ، هقيسلك الضغط بس وهديك مسكن وهمشي
على طول صدقني

جابت جهاز الضغط وقاستله ضغطه : نبضك سريع
شويه، الظاهر عملت مجهود

آدم كان بيسأل نفسه هي للدرجة دي غبية ولا ايه ؟
مجهود ايه ده اللي عمله هيخلي قلبة يدق كده

داليدا علقتله محلول مغذي وجهزت حقنه مسكنه
وبصتله : ده مسكن هيخفف الوجع شوية عشان
تعرف تنام وياريت تروح المستشفى تكشف وتشوف
ايه سبب اللي أنت فيه ده

مسكت ايده عشان تديله الحقنه بس هو شدها تاني
فبصتله : انتي مش دكتوراه إزاي عايزة تديني حاجة
كده ؟

داليدا بصتله باستغراب : ده مسكن مش محتاج
لدكتور يوصفه ، وبعدين أنا بقولك أهو تروح لدكتور
يكشف عليك ، إنما ده عشان بس نخفف عنك الوجع
شوية دلوقتي لحد بكرة الصبح وبعدها تشوف هتعمل
ايه

آدم بيسمعها وهو خلاص وصل لآخر تحمله
وطريقتهما اللطيفه في الكلام بتستفز رجولته

قام بهدوء من مكانه وقرب منها وهي رجعت لورا
باستغراب وهي بتتكلم بضعف بيلعب بمشاعره : آدم
باشا في ايه مالك ؟

آدم مسك وشها بهدوء وزى المغيب قرب من شفايفها
باسهم بشغف ولهفه مش عارف يتحكم فيهم

وفجأة فاق على صوت داليدا : آدم بيه ممكن تسبب
الحقنه لو سمحت

آدم فتح عينيه بصدمة من اللي بيتخيله وللمرحله اللي
بقي فيها ولاحظ إنه ماسك الحقنه بايده فسأبها بهدوء
وبص لداليدا اللي اتكلمت تظمنه : الحقنه دي هتسكن
الوجع بسرعه

آدم غمض عينيه عشان يهرب من عيونها وعشان
مايقومش يبوسها بجد زي ما تخيل وهي عطته
الحقنة ولمت الحاجات بتاعتها ولسه هتقوم

آدم بضعف : خليكي

داليدا استغربت جدا وبصتله أما هو كان مقرر إنه
هيبعدا عنه بس مش هيقدر ، عايزها تفضل عايز
يفضل معاها ، عايز ياخذها في حضنه ، عايز وعايز
حاجات كثير

اتكلم وهو مغمض عينيه : خليكي شوية بس لحد ما
أنام ، شويه

داليدا فضلت مكانها وهو مسك السلسلة اللي لابسها
في رقبتة وحضنها بكف ايده وخلال دقائق كان غرق
في النوم وداليدا بتبص عليه بصمت وهي بتسأل
نفسها، ليه بتحس بالأمان معاه ؟ ليه عايزه تفضل

جنبه كده حتى لو مش هتعمل حاجة ؟ ليه كلامه
القاسي ليها بيجرحها جدا وبيوجع قلبها ؟ ليه هي
حاليا عايزه تططبب عليه أو تاخده في حضنها أو
تستخبي هي في حضنه ؟

فاقت من افكارها الفظيعة دي وهي مصدومه من
نفسها إزاي فكرت كده ؟ إزاي فكرت في راجل
وهي لسه على ذمة راجل تاني ؟ اضايقت جدا من
نفسها وحست بالإشمئزاز من أفكارها وهزت دماغها
بعنف كأنها بتطرد الأفكار دي

بصت على آدم لفته نايم بعمق وهدوء من أثر
المسكن اللي فيه نسبة صغيرة من المنوم ، وبصت
على المحلول لسه قدامه كتير فقررت تنسحب
دلوقتي وترجع تشوفه بعدين لان وجودها جنبه
دلوقتي خطر عليها

لسه بتقوم لقت تمارا دخلت من الباب اللي كان
مفتوح واتصدمت أول ما لقت داليدا قاعده كده

تمارا : انتي بتعملي ايه هنا ؟

داليدا قامت وقفت بتوتر : آدم بيه كان تعبنا وأنا بس
كنت _____

تمارا قاطعتها بزعيق : كنتي ايه يا زبالة ؟

راحت مسكتها من شعرها من فوق الطرحة جامد
وهي بتزعق وبتشدها بره الاوضة : إزاي تدخل
اوضة نومه كده لا وقاعده جنبه في السرير عايزة
ايه بالظبط ؟

داليدا بتحاول تفك شعرها من ايدها وهي بترتجف
وذكرياتها مع حسام بتهاجمها لما كان بيشدها من
شعرها كل شوية

الكل اتجمع على صوت تمارا العالي

فيرى : في ايه يا تمارا بتصرخي كده ليه ؟

تمارا وهي بتحرك داليدا يمين وشمال : الحيوانه دي
أدخل عند آدم الاقيها قاعده جنبه في السرير

كلهم اتصدموا من الكلام

مروان : لا وعاملة فيها الخضرة الشريفة، طيب
ماتقولي وأنا أهو موجود

فيرى بصتله : أنت اتجننت، وانتى يا زبالة أما
عرفتك مقامك مابقاش فيرى هانم

كمال : ممكن نفهم الأول بس ايه اللي حصل ؟

تمارا : تفهم ايه يا بابي بقولك جيبها من سريره

دولت : ده مش ممكن، مستحيل داليدا تعمل كده ،
وسيبى شعرها حالا

جسار : ايوه فعلا، داليدا مستحيل تعمل اللي بتقوليه
ده

لوجين : ابله داليدا حد محترم مش ممكن تعمل كده
ابدا

تمارا بصريخ : انتوا بتدافعوا عنها ليه؟؟ بقولكم انا
جيباها من اوضته من سريره جوه ، شفتها بعيني
قاعده جنبه

ظهر صوت آدم من وراهم : ايه اللي بيحصل هنا ؟
كلهم بصوله باستغراب وهو لاحظ داليدا اللي في ايد
تمارا فكشر وفكها منها بعدها عنها وزعق : أنتي
بتعملي ايه فيها ؟ مسكاها كده ليه ؟

داليدا في اللحظة دي مابقتش قادرة تستحمل أكثر من
كده ، شد شعرها والصريخ وزعيق آدم كلها حاجات
بتفكرها بذكريات تتمنى تتمحي ، الدنيا لفت بيها
ووقعت على الارض مغمى عليها ودولت جريت
عليها بتحاول تفوقها بس هي مش بتفوق
آدم : اتصلوا بدكتور بسرعة

دولت بصت لجسار : تعالا شيلها يا جسار ندخلها
اوضتها على ما الدكتور يوصل

جسار هز دماغه بفهم وراح شال داليدا وودها
اوضتها تحت نظرات آدم اللي مضايق وغيران إنه
شايلها كده

تمارا : هتجيبها دكتور كمان مش كفاية اللي هي
عملته لا جاييلها دكتور وخايف عليها ؟ ليه هاه
تهمك في ايه وقلقان عليها كده ليه ؟

آدم : قسما بالله يا تمارا كلمة زيادة وهنزل بالقلم
على وشك

فيرى : عايز تمد إيدك على بنتي عشان الخا*يه دي
؟ ماتشوف ابنك يا كمال

آدم اتعصب : أنا ماسمحلكيش تتكلمي في عرض حد
بالشكل ده يا محترمه، ماتشوف مراتك يا كمال باشا
ولا هتفضل ساكت كده ؟

كمال : انت بتكلمني أنا بالأسلوب ده ؟

آدم : أهى كملت، أنا كنت مستني منكم ايه صحيح
سابهم وماشي تمارا مسكت في هدومه : أنت رايح
فين ؟

آدم زقها بعيد عنه : أولا أنا أروح في المكان اللي
يعجبني وماحدثش ليه دعوة بيا، ثانيا رايح اشوف
البنى آدمه اللي مش عارف عملتي فيها ايه دي
وقعها من طولها

كمال راح وقف قدامه : أنت مش هتروح في حته
غير لما تفهمنا ايه اللي حصل بالظبط وايه اللي
البنى دي عملته

آدم : اسأل بنتك ما هي دخلت وشافت كل حاجة
بنفسها ولا ايه يا تمارا هانم ؟

كلهم بصوا لتماما اللي اتوترت جدا وقالت بلجلجه :
ايه شوفت واحده زبالة قاعده جنبك في السرير
آدم رجع وقف قدامها وبصلها بنظرات رعبتها : بس
؟

تماما : اااه بس

آدم : يعني ما شفتيش الكانيولا ولا الحقن ولا جهاز
الضغط ولا اي حاجة من الحاجات دي ؟

تماما سكنت وآدم قال بضيق : كنت تعبان جدا
وداليدا فضلت جنبي بتحاول تعالجني وفي الآخر ده
جزاتها

ز عق : عشان تيجي واحده تافهه زيك كل همها
 السهر واصحابها والموضة وتتكلم عنها كده وداخله
 اوضتى كأنها بيت ابوكي لا وكمان جاية تصرخي
 وتزعقي عشان تصحيني من النوم ولا كأني بني ادم
 وليا حق ارتاح

بصلهم كلهم : فمايكونش الغلط راكمم انتوا من
 ساسكم لراسكم وتلوموا على البت
 آدم مشي كام خطوة وبص لتماما وقال عشان يدايقها
 اكثر : واه هي عطتني المسكن وكانت هتمشي بس
 أنا اللي قولتها تفضل جنبي عشان ترتاحي بس

اخذ بعضه وراح لداليدا وساب تمارا هتموت من
 نرفزتها، وفيري دخلت اوضة آدم ولقت المحلول
 والحقنه وجهاز الضغط والسريير شكله بيقول ان آدم
 كان نايم عليه فعلا بهدوء

خرجت وكمال بصلها : ايه كلامه صح ؟
 فيري سكتت وكمال عرف ان كلامه صح فاتعصب
 وبص لتماما : أنتي ايه يا شيخه مش بترحمي ابا ؟
 تمارا : اناااااا

كمال : انتى ايه ؟ شايفاه تعبان بدل ما تراعيه رايحه
تعملي كل ده ؟

تمارا بنرفزة : كنت عايزني أعمل ايه وأنا شايفه
واحداه معاه في السرير ؟

كمال بنرفزة هو كمان : معاه ولا جنبه عشان في
فرق، دخلتي لقيتها نايمه في حضنه يعني ولا ايه ؟

تمارا بخفوت : كانت قاعده على حرف السرير
وماسكه جهاز الضغط في ايدها

كمال زعق: وطلاما انتى شوفتها كده بتعملي مشاكل
ليه ؟ جاية تزعقي ليه ؟ وبعدين هو ليه حق لما يكون
تعبان واللي المفروض في حكم خطيبته سيباه
ورايحه تسهر مع صاحبها يبقى ليه حق

بص لفيري : لمي بنتك يا فريال بدل ماتلاقي رد فعل
منى مش هيعجبها

مشي كام خطوة بس فيري وقفته : وأنت بتدافع عنه
ليه كده ؟؟ مش ده آدم اللي نفسك تخلص منه بايديك
؟؟

كمال بصلها بصره خوفتها : ده آدم كمال هارون
واوعي تنسي نفسك، ده ابني يا هانم

فيري : هه ! ابنك ؟

كمال سابهم ومشي تحت نظرات الكره من فيري
وتمارا

فيري بهمس : أنت كده عديت حدودك يا كمال يا
هارون واخرتك هتكون على ايدي قريب

هند راحت بسرعة لداليدا أوضتها تشوف مالها بعد
ماعرفت من واحد من مدبرات القصر اللي حصل ،
وصلت اوضتها ودخلت كانت داليدا نايمه في السرير
والكل متجمعين حوليها وآدم قاعد جنبها بيخبط على
خدها بظهر ايده : داليدا، داليدا فوقي ، جसार معلش
هات أي برفان كده نفوقها بيه

هند قربت منهم : مالهوش داعي البرفان

كلهم بصولها باستغراب وهي قربت من داليدا
وقعدت جنبها وهي بتملس على وشها بحنان
ودموعها بتنزل غصب عنها : هي هتكون كويسه،
داليدا يا حبيبة قلبي ماتوجعش قلبي عليك ، فوقي
يا بنتي

الكل واقف يبص عليهم ومش فاهمين حاجة و هند
 بلت ايدها بشوية مياه وفضلت تمسح وش داليدا
 بحنيه لحد ما بدأت تفوق واحده واحده

داليدا بصت لكل الوشوش حوليها بتوهان لحد ما
 عينيها وقعت على هند وأول ما شافتها دموعها نزلت
 و اترمت في حضنها وقعدت تعيط و هند بتطبطب
 عليها : حقك عليا يا بنتي حقك عليا

داليدا بترتجف في حضن هند وهي بتطبطب براحه
 على ظهرها : خلاص يا بنتي خلاص، مافيش حاجة
 تخوف خلاص، وأنا هنا جنبك ماتقلقيش
 هند بصتلهم : ممكن تسيبونا لوحدنا شويه معلش،
 عشان تهدي بس

كلهم خرجوا من الاوضة ودولت بصت لآدم : هو
 ايه ده اللي حصل دلوقتي ؟
 جبار : صدمة عصبية

كلهم بصوله وهو كمل حسب تجربته مع آدم قبل كده
 : داليدا غالبا عندها صدمة عصبية من حاجة معينة
 ولما اتحطت فيها ماقدرتش تتكيف معاها فعقلها

حاول يهرب من الواقع فاغمر عليها، يظهر إنها
مرت باحداث شبه دي قبل كده

دولت : يعني داليدا حياتها زمان كانت قاسية جدا
لدرجة توصلها للحالة دي، صح ؟

جسار هز راسه بتأكيد و آدم بيسمع بصمت وهو
بيبص على باب الاوضة وقلبه بيوجعه على داليدا

.

الباب اتفتح وخرجت هند وداليدا اللي مستخبية في
حضانها : اسفين يا بهوات على الدوشة دي ، عن
إذنكم هتنزل اوضتنا اللي تحت بعيد عن هنا

آدم : لا يا دادة روحوا بيتكم أحسن

كلهم بصوله باستفهام وداليدا بصت لعينييه وهو كمل
بعد صمت طويل شوية : وجودها هنا مش كويس
ليها فروحوا بيتكم يومين كده تهدوا وتعالوا تاني ،
جسار معلىش روح وصلهم بيتهم

آدم قال كلامه ومشى بسرعه لانه لو كان فضل
لحظة واحدة كان هياخد داليدا في حضانها ومش
هيخرجها منه بعد كده

جسار : يلا يا دادة هوصلكم

هند بابتسامة : حبيبي ماتحرمش منك ابدًا
جسار اخدهم ومشي يوصلهم

آدم دخل اوضته لقي تمارا قاعده على السرير
مستنياه وأول ما دخل وقفت بتوتر : آدم

آدم : بره

تمارا : آدم أنا

آدم : كلمة ومش هتنيها يا تمارا بره

تمارا زعقت : أنا مش فاهمه أنت ليه بتعمل كده ليه
كل ده يعني ؟

آدم : عشان انتي انسانه غبية ، ارتحتي ؟

شدها من دراعها طلعتها بره الاوضة : أخفي بقى من
خلقتي السعادي عشان ماتزعلش

قفل الباب وراح نام على سريريه وبص على حاجة
داليدا اللي جنبه : وبعدهالك ؟ انتي فيكي ايه أنتي
كمان ؟

حط ايده على قلبه : وبتعملي فيا كده ليه ؟

تمارا بعد ما آدم طردها طلعت على الدور اللي فوق
ودخلت اوضتها وقعدت تكسر في كل حاجة حوليها
بنرفزة

مروان في اوضته اللي جنب اوضها سمع صوت
التكسير فراحلها ومسكها بسرعه : تمارا ايه اللي
أنتى بتعمليه ده ؟ كده تاذي نفسك

تمارا اترمت في حضنه و عيطت : شوفت بيعاملني
إزاي يا مروان ؟؟ كل ده عشان بحبه يعمل فيا كده
؟؟

مروان : وهو ما يستاهلش الحب ده ، هو أصلا
إنسان حقير ومنبوذ ماصدق لقي حد يحبه وعايز
يتفرد عليه ، واحد دون عايز يحس بقيمته بس
بتعذيب غيره

قعدا على السرير وباس ايديها : انتى أعلى من كده
يا تمارا ، آدم ده قليل أوي عليكى ، انتى تستاهلي
واحد يقدر جمالك ومكانتك مش يعاملك كده عشان
حتة خدامه

تمارا كانت في حالة لا يرثى لها وما صدقت حد
يقولها كلام زي ده وكانت بتتمنى لو كان آدم هو
اللي بيقولها كده ، ومروان طلع من جيبه كيس
صغير شفاف فيه بودره بيضا وحطه في ايدها :
خودي ده

تمارا : ايه ده ؟

مروان قرب منها بخبث وهمس جنب ودنها بصوت
زي فحيح الأفاعي : ده اللي هيرحك من العذاب
اللي أنتى فيه، صدقيني مش هتندمي ابدا
قرب ايدها من وشها وهي فعلا كانت عايزة ترتاح
وتغيب عن الدنيا فشمت التذكرة وواحدده ورا الثانية
لحد ما فقدت الوعي خالص

هند وداليدا روحوا بيتهم وهي دخلت أوضتها وقعدت
بصمت و هند وقفت قدامها : اجيبلك تاكلي ؟

داليدا هزت دماغها برفض

هند : طيب ايه رأيك اعملنا كوبايتين سحلب ونقعد
سوى نتكلم شوية ؟

داليدا : ماشي ، أساعدك ؟

هند : لا يا حبيبتي قومي انتى بس غيري هدومك
عقبال ماجي

داليدا هزت دماغها بموافقة و هند طلعت تعمل
السحلب ، وبعد دقائق رجعت بعد ما غيرت هي
كمان ، والاتنين قعدوا في السرير و هند هي اللي
بدأت كلام

هند : ممكن تفهميني ليه اللي حصل في القصر من
شوية ؟ أنا مش بشك فيكي بس عايزة أفهم ايه اللي
حصل خلاكي يغمى عليكى كده ؟

داليدا حكاتها كل حاجة حصلت : بس ، غصب عني
اغمى عليا

هند طبطبت علي شعرها بهدوء : معلىش يا حبيبتي
حقك عليا

داليدا بصتلها : كنت عايزة اسالك على حاجه

هند : اسألي يا حبيبتي

داليدا : هو آدم بيه يعني ، هوا ، أحم ، تعبان يعني
أو مريض بحاجة عشان يستفرغ بالشكل ده

هند انتهت : لا مش مريض ، بس هو بيستفرغ كده
لما يفتكر اليوم إياه

داليدا بتركيز : يوم ايه مش فاهمه ؟

هند : دي حكاية طويلة أوي يا داليدا

داليدا : وماله احكيها إحنا مش ورانا حاجة

هند بصتلها وشافت لهفتها إنها تعرف فاتتهت
وسندت علي المخده ورا ظهرها وشربت شوية من
السحاب وبدأت تحكي

هند : بدأت الحكاية من أكثر من ٣٠ سنة لما كمال
بيه حب جميلة الجميلات جمالات هانم، كنت أنا
بشتغل في القصر ده من قبلها بكتير مع ابويا الله
يرحمه ، يوم ما كمال بيه اتجوز جمالات كان يوم
عيد عندنا في القصر ، دولت هانم كانت مبسوفة جدا
وطايره طير لأن كمال بيه من صغره شخصيته
كانت ضعيفة عن اخوه وكان بيتكسف ويضرب
لخمه كل ما يتعامل مع حد وماصدقوا إنه حب
واتجوز ، وماتجوزش أي حد لا ، ده اتجوز جمالات
بنت سيمه وقيمة واخلق وجمال واسم ومنصب ،
دولت هانم كانت مبسوفة بيها بيها أوي هي ومهاب
باشا جوزها الله يرحمه ، وكارما كمان اللي اتعرفت

عليها وحببتها زي أختها ، وهي الشهادة لله كانت
محترمة جدا وبنت ناس أوي ، كانت بتعامل الكل
بحب وعمرها ماتكبرت على حد ابداء، كان قلبها ده
مليان حب يكفي الدنيا كلها ويفيض وكانت بتدي منه
بدون مقابل

بصتلها : عارفه ، رغم أنى كنت مجرد بنت شغاله
هناك زي كثير غيري بس هي عمرها ما حسستني
بده ابداء ، كانت بتعاملني ولا أختها ، كانت دايمًا
تقولي إنها كان نفسها في أخوات بس ربنا ما ارادش
، من ساعتها اعتبرتنى أختها لاني كنت أصغر حد
هناك ، كانت دايمًا بتعاملني باحترام ، عمرها في
مرة ما قالتلي كلمة توجعني بالعكس كانت دايمًا تقعد
تتكلم معايا وتحكي وتفضفض وكثير كانت تساعدني
في شغل البيت وتقولي إحنا أخوات ، كنت بحبها
أوي

أبتسمت بحب : بعد كام شهر من جوازها حملت في
آدم حبيب قلبي، كانت فرحانه جدا والدنيا مش
سيعاها وبصراحة القصر كله كان في حالة سعادة
كبيرة أوي ، كانت تقعد طول الوقت تقولي أنا اللي
هولدها وكنا نقعد نضحك ، ويوم الولاده مسكت فيا
وحلفتني أدخل معاها واخلى بالي من ابنها وفعلا

دخلت معها واستقبلته، شمس البيت وفرحته، كان
نسخه كربون عنها من وهو صغير ، لحد دلوقتي
اللي يشوفه يقول جمالات بالملي ، بعدها عاصم بيه
سافر بره مصر وقال عندي شغل، قعد بره قيمة ٣
سنين ورجع تاني ومعاها واحده وقال عايز يتجوزها
وفعلا اتجوزوا وخلفوا مروان، أهو مروان ده كان
لوحدته حكاية، ماتشوفيش جمالات كانت بتعامله إزاي
ولا كأنه ابنها وحته منها، كانت حنينة عليه أوي
وبتحبه جدا لدرجة إنه في فترة كان فاكرها هي اللي
امه مش كاميليا ، وادم كمان كان بيحبه أكثر من
عينيه ، بعد حوالي سبع سنين من ولاده مروان
عاصم وكاميليا اطلقوا بسبب المشاكل اللي كانت
بينهم وكمان كارما كانت اتجوزت وسافرت وخلفت
إياس ومهاب بيه كان توفى هو ووالد جمالات الله
يرحمهم كلهم ويحسن إليهم

بدأت تحكي كأنها شايفه اللي حصل بيتعاد قدامها
تاني : عدت الأيام ولما آدم كمل ال ١٤ سنه اتشقلب
كل حاجة في القصر في اليوم اللي اتغير فيه كل
حاجة واتحولت البهجة لغم والورده الجميلة دبلت
ووقع ورقها

فلاش باك

كمال دخل القصر ومعه فريال وجماليات زي عاداتها
قامت تستقبله بحب : حبيبي ألف حمد لله على
سلامتك

بصت لفريال باستغراب : فيري حبيبي، مابلغتنيش
إنك جاية يعني

فيري بصتلها بتكبر : وأنا أقولك ليه هي ست البيت
محتاجة تقول لحد إنها جاية بيتها ؟

جماليات باستغراب : ست البيت !

فيري : اه ست البيت يا هه ضررتي

جماليات بصدمة : ضررتي ! يعني ايه ؟ كمال أنت ،
أنت اتجوزت عليا ؟

كمال : ايوه يا جمالات اتجوزت فيري بنت الناس
المحترمين ، ومن يوم ورايح هي ست القصر ده
وهي الكل في الكل وانتي هتعيشي يا حيا لله خدامه هنا

دولت اتدخلت في الكلام بغضب : أنت اتجننت يا
كمال ايه الجنان ده مين دي اللي اتجوزتها لا وعلى
جماليات أنت أكيد مجنون

كمال : لا ياما مش مجنون فيري أنا اتجوزتها
 النهارده وهي مراتي زيها زي جمالات، ولا لأ
 جمالات خلاص راحت عليها، هي دي مراتي وست
 البيت وولادها هما ولادي، ومن يوم ورايح هيعيشوا
 هنا معايا وابقى أعرف بس ان حد زعلم بكلمة مش
 هيطلع عليه صبح

جمالات بدموع : وهو أنا كنت عملتك ايه لكل ده؟
 قصرت معاك في ايه عشان تتجوز عليا ؟ لا ومين
 صحبت عمري اللي امنتها على حياتي واسراري ،
 جالك قلب إزاي تعملي فيا كده ده أنا اعتبرتك اختي
 ؟

فيري : بلاش بالله عليكى دموع التماسيح دي عشان
 مش بتاكل معايا، واوعي تكلميني كده تاني ماتنسيش
 ان انا ستك

جمالات فضلت تهز دماغها برفض وهي بتعيط لحد
 ما وقعت من طولها واغمى عليها ، دولت جريت
 عليها بسرعه بتحاول تفوقها، وكمال جه يقرب فيري
 شدة دراعه : ايه يا حبيبي ؟ سييها هي ماتفرقش
 حاجة معانا، يلا بينا إحنا على اوضتنا، ده حتى
 النهارده دخلتنا

كمال وفيري طلعا على اوضتهم وفيري أمرت
واحدة من مدبرات القصر تاخذ تمارا ولوجين على
اوضتهم

في الوقت ده آدم كان راجع من المدرسة ، دخل
القصر لقي مامته واقعه على الارض ودولت و هند
وكام واحدة من الخادماات بيحاولوا يفوقوها
رمي شنطته على الأرض وجرى بسرعة عليها :
ماما ! نانا مالها ماما واقعه كده ليه ؟
دولت بصت لهند : اجري اطلبى دكتور بسرعة يا
هند

هند راحت جري طلبت دكتور اللي جه كشف عليها
: ماتلقوش شوية وهتفوق

وفعلا شوية وفاقت جمالات بس صحيت واحده
تانية، حزينه ومهمومه وكانت طول الوقت بتعيط

هند : من يومها كل حاجة اتغيرت والحال بقى غير
الحال ولحد دلوقتي ما حدش يعرف ليه كمال بيه عمل
كده فيها

داليدا : يا عيني دي شافت كثير أوي يا قلبي

هند : شافت ده ايه ؟ لسه اللي جاي أسود

داليدا : كملې طيب

هند اخدت نفس طويل : من اليوم ده جمالات
اتمرمطت في القصر ده كتير من ناحية جوزها ومن
ناحية فيري اللي كانت بتستغل أي فرصه عشان تسم
بدنها بكلامها واهاناتها لولا الست دولت الله يكرمها
كانت بتدافع عنها كتير وبتتخناق مع كمال وفيري
كل شوية عشانها

عدى كام شهر من الوقت ده كانت جمالات بتضعف
كل يوم أكثر والمرض عرف طريقة لجسمها
الرقيق، كانت بسكوته أوي وماستحملتش يا قلبي
اللي بيحصل فيها ودخلت المستشفى وأدم حبيبي
اتمرمط معاها كتير، من ناحية مرات ابوه الشرانية
ومن ناحية امه اللي بتضعف كل يوم قدام عينيه
ومش عارف يعملها ايه يا حبة عيني، كان لسه
صغير خالص على كل ده

بصلتها والدموع بدأت تشق طريقها على خدها : لحد
اليوم الحزين

فلاش باك

جماليات كانت نايمه بتعب على السرير في المستشفى
 و هند قاعده جنبها وماسكه منديل قطن في ايدها
 وبتمسحها العرق اللي على جبينها ، جمالات مدت
 ايدها بضعف ومسكت ايد هند : هند

هند : جمالات هانم انتى صحيتى ؟

جماليات : هند حبيبتي عايزة اقولك على حاجة

هند : او مريني يا أميرة الاميرات

جماليات : ابني، آدم يا هند، أمانه في رقبتك

هند : ايه اللي انتى بتقوليه ده بس يا ست البنات ؟

جماليات : هند عشان خاطري ، آدم امانتي ليكي ،

حبيه عشاني ، عامله حلو زي إسلام ابناك ، أمانه

عليكي تخلي بالك منه ، واوعي في يوم تقسي

عليه

هند عيطت : ألف بعد الشر عليكي يا جمالات ، انتى

هتقومي صدقيني ، هتقومي وهتاخدي بالك منه

وهتشوفيه بيكبر يوم بعد يوم

جماليات أبتسمت : انتى بجد ونعم الأخت، أنا كنت

صح لما استأمنتك على حياتي مش زي ناس

ماطرش فيهم

الباب خبط ودخلت دولت : بنتي حبيبي، عامله ايه
النهارده ؟

جماليات قامت و هند ساعدتها تتعدل : ماما تعالي
عايزاكي في حاجة

دولت قعدت جنبها : قولي يا بنتي عايزة ايه ؟
جماليات : انتى عارفه ان والدي لما مات الله يرحمه
سابلي ورث كبير أوي صح ؟

دولت : ايوه عارفه

جماليات مسكت ايديها : انتى عارفه أنى ماليش
غيرك في الدنيا دي ، أنا كتبت كل ورثي باسم آدم
بس هو لسه صغير اوي على استلامها ، عايزاكي
انتى اللي تكوني الوصية عليه لحد ما يكبر ويستلم
الفلوس

دولت كشرت بقلق : ليه بتقولي كده يا بنتى ؟ انتى
ان شاء الله هتقومي بالسلامة وهتكوني معاه لحد ما
يكبر

جماليات عيبت : لا، لا يا ماما، أنا حلمت ببابا من
شوية، قالي أنا مستنيكي ماتتأخريش عليا، أنا حاسه
ان ماقدميش وقت خلاص، عشان خاطري

دولت عيظت هي كمان وحضنتها : انتى خاطر ك
بالدنيا عندي يا جمالات

جمالات : أوعي تزعلي مني يا أمي أنى حرمت
كمال من فلوسه، بس انا خايفه على ابني منهم خايفه
لما أموت يتبهدل من بعدي وما فيش في ايدي حاجة
اديها له غير فلوس تامن حياته ومستقبله

دولت طبطبت علي ظهرها بحنان : مش ز علانه
منك يا ضنايا، أنا فهماكي كويس ولو انتى ما كنتيش
عملتي كده كنت عملت أنا

جمالات باست ايديها : ربنا يكرمك يا أمي، انتى بجد
ونعم الام

حضنتها الحزن الاخير وكمان هند اللي كانت
منهارة من العياط حضنتها جامد وهي مسكت ايد
دولت وايد هند : ابني أمانه في رقبتم هسألکم عنه
يوم الحساب

الباب خبط ودخل آدم اللي كان راجع من المدرسة :
ماما

جمالات : حبيب قلبي تعالا يا نور عيني

آدم راح اترمی في حضنها واتنهد براحة كأن هموم
الدنيا كانت فوق كتافه وانزاحت أول ما دخل حضنها
وجمالات بصت لهند ودولت : سيونا لوحدنا شوية
لو سمحتوا

دولت و هند سابوهم وخرجوا وجمالات مسكت آدم
من كتافه : حبيبي كنت عايزة اقولك على حاجة
مهمه

آدم : قولي يا حبيبي

جمالات : أنت عارف ان دادو كان غني أوي صح
وساب لماما فلوس كتيره أوي صح ؟

آدم : اه، أنتي قولتيلي

جمالات : الفلوس دي كلها هتبقى بتاعتك أنت
آدم كشر بتوجس : ماما انتي بتقولي الكلام ده ليه
دلوقتي ؟

جمالات : آدم اسمعني كويس الفلوس دي بتاعتك
أنت فاهم وماحدث ليه الحق فيهم ابدا ، او عدني يا
آدم إنك هتاخذ الفلوس دي وحتافظ عليها
آدم : م ماما

جمالات مسكت كتافه جامد : او عدني، احلف يا آدم

آدم حلف فعلا وهي أبتسمت براحة : حبيبي ، أنا
أسفه على كل اللي حصلك الأيام اللي فاتت دي ،
أسفه أنى كنت ضعيفه وماعرفتش أحملك ، بس
اوعدني إنك هتكون مختلف

بصتله جامد أوي : لازم تبقى أسد واوعى يا آدم
تخلي حد ياخذ حقك منك أو يظلمك ولو بكلمه، خليك
قوي بس ماتبقاش غشيم، قوة من غير رحمه قوة
ظالمه ، قوة من غير حنية ضعف وقلة حيلة ، عشان
لما تقوى ماتقواش علي اللي منك يا آدم ، اقوى على
عدوك ، اقوى على اللي يضرك على اللي يحب
يشوف اذيتك ، ماتبقاش قاسي زي الدنيا ، ولما تبقى
قوي أحمي ، طمن ، طبطب وافتكر كويس لاقوة
هتدوم ولا حال هيفضل زي ما هو وهيجي يوم مش
هتقوى غير بالناس اللي بيحبوك من غير مصلحه
وفضلوا معاك على الحلوه ومره

آدم بيسمعها ودموعه على خده مش عارف يوقفها :
ماما انتى بتقولي كده ليه ؟ انتى هتسيبيني ؟

جماليات حضنته جامد أوي كأنها عايزة تدخله بين
ضلوعها : أنا مش هسيبك ابدا يا حبيبي ، أنا هفضل

على طول جنبك ومعاك في كل مكان ، كل ماتكون
عايز تكلمني بص للسما بس وهتلاقيني

بعدت عنه وقلعت سلسلة ألماس بتاعتها ولبستها
وحطت ايدها على قلبه : أنا هفضل هنا على طول
وكل ما اوحشك احضن السلسله دي وهتلاقيني
بطبطب عليك

مسكت وشه بين ايديها ودموعها بتنزّل وبتمسحله
دموعه هو : اوعى تعيط قدام حد يا آدم ، اوعى
توريلهم ضعفك ، انا بحبك اوي

آدم اخدها في حضنه وحاوطها بدراعاته جامد : وأنا
بحبك اكثر ، أنا مابحش حد غيرك في الدنيا دي
فاوعي في يوم تسيبيني يا ماما

جماليات بعدت عنه وفضلت تبوس راسه وايديه :
ربنا يحميك يا ابني

آدم : ويحفظك ليا يا أمي

جماليات : أنا عايزه أنام شوية يا آدم، خليني أنام على
رجليك

آدم اتعدل في قعدته وهي حطت دماغها على رجليه
، شويه وهو حس بيها بطلت تتنفس خالص ، حط

ايدہ علی قلبہا لقاء وقف نبض ، رفع ايدہ وبدأ
 يطبطب علی شعرها بحنان وجسمه كله بيرتجف
 وايدیه متلجه و عيونہ مش مبطله دموع وبصوت
 متحشرج : نامي، نامي يا نور عيني، نامي
 وارتاحي، نا_____

ماقدرش يكمل الكلمة وصوت عياطه علا ورفعها
 من علی رجليه ودفن وشه في حضنها وفضل يعيط
 زي طفل عنده سبع سنين وصوته كان مسمع المكان
 كله

دخل الدكاترة والممرضين علی صوته ودولت قربت
 منه : آدم

آدم رفع وشه اللي بلون الدم و عيونہ اللي مش مبطله
 دموع بيزينهم ابتسامه حزينه تقطع القلب واتكلم
 بصوت مهزوز : ارتاحت خلاص ، نانا

قعد يعيط والدكتور قرب منهم عشان يكشف عليها ،
 قاس النبض لقاءها خلاص فارقت الحياة و آدم مسك
 ايدہ وهو بيهز دماغه برفض : خلاص ، خلاص
 صدقني ، خلاص

الدكتور بعد عنها و آدم حضنها تاني وفضل يعيط
 بقهر لحد ما هدومها اتغرقت بدموعه : ربنا يرحمك

يا غاليه ، مش هنساكي ابدًا ، بحبك ، بحبك أوي يا
أمي

كل الموجودين بالدكاترة والمرضيين كلهم فضلوا
يعيطوا بحزن و آدم ماسك في مامته وبيتمسح في
حضنها لآخر مره في عمره و هند راحت قعدت وراه
وحضنته جامد وفضلت تعيط معاه

هند سكتت وفضلت تعيط وداليدا هي كمان ماقدرتش
تستحمل وانهارت من العياط

هند بدموع : كل ده حصل معاه وهو لسه عيل مش
فاهم حاجة ، اتخطف يا عيني من حضنها بدري أوي
، ومش بس كده ماكتفوش بكده لا ، كملوا عليه كمان
، بعد الجنازة آدم فضل عند قبر مامته قيمة يومين
مش عايز يمشي وكان هيفضل أكثر لولا دولت هانم
اخذته بالعافية وروحته ، يومها راح اتخانق مع ابوه
و عمل خناقه للسما

فلاش باك

آدم روح القصر وأول ما دخل لقي والده قاعد مع
 فيري في الليفنج روم ، فيري كانت واقفه قدام
 الدولاب الكبير اللي فيه الجوايز والدروع بتاعة
 العيلة وكانت ماسكة درع منهم كان عامل زي فارس
 واقف وماسك في ايده سيف ورافعه لفوق

فيري : حلو أوي التمثال ده

كمال : ده مهاب بيه ابويا كان كاسبه في واحده من
 مسابقات المبارزة بالسيف

فيري هزت دماغها بفهم وحطته على الرف مكانه
 وفضلت تبص على باقي الدروع

قاطعهم آدم اللي راح ناحية أبوه والغضب بيتطاير
 من عينيه ، وقف قدامه وزعق : ماما ماتت وأنت
 قاعد هنا ولا على بالك، ايه للدرجة دي مش فارقه
 معاك ؟

كمال بغضب هو كمان : ولد ، انت بترفع صوتك
 عليا كده ؟

آدم بصوت أقرب للصريخ : ايوه برفعه وهرفعه
 أكثر كمان ، لان كل ده بسببك أنت ، كل ده عشان
 اتجوزت عليها الست القذرة دي ، كله بسببك يا كمال
 بيه

كمال في اللحظة دي خرج عن شعورة وضرب آدم
 بالقلم بكل قوته، و آدم اختل توازنه بسبب القلم واتهد
 جامد على دولاب الدروع اللي وراه
 كمال بص فوق آدم بصدمه : لأ

آدم رفع وشه وبيص فوقيه بس للأسف درع الفارس
 وقع عليه والسيف صاب عينه الشمال، كل اللي كانوا
 موجودين صرخوا حتى كمال وقع في الارض على
 ركبه من الصدمة، و آدم فضل يصرخ بكل صوته
 وهو بيتلوى في الارض من الوجع لحد ما اغمى
 عليه

هند أول حد جريت عليه وشالته بين ايدها وفضلت
 تصرخ باسمه ودولت ضربت على صدرها : يا خبر
 أسود يا خبر أسود ، اطلبوا الإسعاف بسرعه ، الولد
 هيروح معنا

في اللحظة دي عاصم دخل وشاف المنظر ده
 واتصل بسرعه على الإسعاف اللي خلال دقائق
 كانت جت واخذت آدم على المستشفى وبسرعه دخل
 العمليات

داليدا كانت باصه لهند بصدمة وهي مبرقة وحاطه
ايديها على بوءها ودموعها مش بتبطل

هند : بعد ساعات كتير أوي خرج الدكتور وقالنا ان
الإصابة كانت جنب العين جدا وللأسف العين
اتضررت جامد وممكن مايشوفش بيها تاني، ولو ده
حصل هيبقى الحل الوحيد إنه يعمل زرع قرنية ثانية
بس ده هياخد وقت طويل جدا عشان يلاقوا متبرع
ويكون مطابق ليه

مسحت دموعها : يومها آدم صحى ميت ماكانش
بينطق ، زي مايكون فقد كل مشاعره واحاسيسه
وفضل كده لوقت طويل أوي مش بيتكلم غير معايا
أنا ودولت بس وقليل كمان ، وبعد ما خف شوية
وطلع من المستشفى لاقينا كمال بيقول إنه هيسفره
بره عشان هو بقى شاب وخايف على مراته منه
وكلام مايدخلش عقل عيل صغير والاكيد ان مراته
هي اللي لعبت في دماغه كده ، أصل معلش يعني
خايف على مراته من عيل ١٥ سنه ومن عاصم لا ،
المهم هو سمع كده يا حبة عيني وماقالش حاجة، زي
مايكون عايز يمشي ويبعد عن كمال خالص، في
الوقت ده كارما نزلت مصر واتحايلت عليه كتير لو
مش عايزة يسيبه معاها بس هو رفض وجوزها

كمان للأسف رفض، فقالتله لو هيسفره يوديه ايطاليا
عندها، مش هيكون معاها بس على الأقل في نفس
البلد، وفين وفين لما وافق وقدمله فعلا في أكبر
مدرسة داخلية في ايطاليا، ولما دولت هانم عرفت
قومت الدنيا وما قعدتهاش

فلاش باك

دولت : والله يا كمال ابقى أعملها وساعتها لا تبقى
ابني ولا أعرفك

سأبته وطلعت اوضة آدم اللي كان بيلم في حاجته
بصمت، شدت الهدوم من ايده بعنف ومسكت ايديه
الإثنين : آدم أنت بتعمل ايه ؟ أنت مش هتمشي من
هنا فاهم، اللي مش عاجبه يمشي هو انما أنت مش
هتروح في حته

آدم فضل باصص كثير في عيون جدته وبصوت
تعبان : نانا سيبييني أمشي لو سمحتي

سحب ايده منها وكمل اللي بيعمله وهي مش عايزة
ولا قادرة تتقبل حاجة زي دي، خرجت من عنده

وراحت اوضتها وحطت دماغها بين ايديها ومش
عارفه تفكر

هند دخلت عندها وراحت قعدت قصادها وبصتلها
بدموع : سيبيه يمشي يا أمي

دولت : بقى انتى اللي بتقولي كده يا هند ؟ وقلبك
هيطاو عك تسيبيه ؟ طيب ووصية جمالات ؟

هند عيظت : عشان كده بقولك سيبيه يمشي، أنا يعلم
ربنا بحبه قد ايه وقلبي بيتقطع على فراقه بس ده
احسنله، لو فضل هنا مانعرفش ايه اللي ممكن
يحصل فيه تاني

دولت باصرار : أنا هحميه منهم

هند هزت دماغها : كنا حميناه من اللي حصل، كنا
كلنا واقفين معاه وماحدش قدر يعمل حاجة، عشان
كده بقولك سيبيه، يمكن لو بعد عنهم يرتاح شوية،
خليه ياخذ هدنه شوية ويرجع تاني، يكون كبر شوية
وساعتها نمسك فيه ومانسيبهوش

دولت فضلت تعيظ كثير و هند كمان دموعها ما
نشفتش

واقفين على الباب كلهم وواحد من الحرس بيحط
شنت آدم في العربية

آدم بص لدولت و هند : كفاية عياط بقى

راح باس ايد دولت : كفاية عياط يا نانا أنا مش بحب
أشوفك ز علانه خالص

دولت حضنته وباست دماغه وهو راح وقف قدام
هند ومسح دموعها بلطف : ماتعيطيش أنتى كمان،
أنتى بالذات ماما كانت بتحبك أوي وأنا كمان، على
طول كنتي جنبى زي أمى وعلى طول واخده بالك
منى، أنا بحبك أوى

هند مسكت ايده وباستها واخدته فى حضنها : حبيبي
وأنا بحبك أكثر

ادم حضنهم الاتنين جامد : انتوا الاتنين أجمل حاجة
حصلتلى بعد ماما الله يرحمها ، ربنا بس اللي يعلم
أنا بحبكم قد ايه ، هتوحشونى أوي

الاتنين حضنوه جامد أوي هما كمان وبعدها هو بعد
عنهم ومسك نظارته السودا ولبسها لأول مرة : مع
السلامة يا غالين

هند : ومشي آدم واخذ حته من قلوبنا معاه ، كنا
بنكلمه كثير في الموبايل بس ده ماعوضناش عن
وجوده ، رجع بعدها بأربع سنين ، كان دخل الجامعه
وبقى شاب طول بعرض ، بس رجع آدم مختلف ،
متمرد ولسانه طويل زي ما شوفتیه كده ، اللي بيقوله
كلمه بيرد عليه بعشره واللي يضربه كف
مايسمحلوش يفرح ويكون رادد عليه، بقي الناس
يخافوا يعملوله حاجة مش خوفا منه لا، خوف من
رده اللي أكيد هياذيهم حاولنا معاه يفضل ومايسافرش
تاني بس هو رفض ومهما نقول ونحاول هو برضه
ركب دماغه وسافر ، قعد كذا سنه تانيين كان ساعتها
أستلم ورث أمه وكمان دولت هانم كتبت ورث كمال
وعاصم باسمه ، ماعرفش ليه عملت كده بس هي
قالت عشان مستقبله ، بعدها رجع آدم بعد ما خلص
دراسه وبنى نفسه وعمل لنفسه اسم في المجتمع بس
رجع مع جزار المرادي وبمعرفته لجزار تمرده زاد
وبقى ماحدث يقدر يقف في وشه
بصتلها : بس يا ستى ، دي الحكاية كامله

داليدا بغياط : كل ده حصله !! وأنا اللي كنت فاكره
 مافيش اقسى من اللي عشته طلع في اقسى بكتير ،
 إزاي استحمل كل الوجة ده لوحده ؟ إزاي أصلا حد
 يجيله قلب يعمل في حد كده ومين ابنه ؟

حطت وشها بين ايديها : حرام والله اللي بيحصل ده
 ، حرام ،

هند حضنتها وقعدت تعيط، هي كمان كانت موجوعه
 على ابنها الثاني ومحتاجة اللي يواسيها

اليوم ده داليدا قعدت طول الليل بتفكر في آدم
 وبتدعي بالرحمة لجماليات، وهدت نفس الشئ

في القصر كمال قاعد في اوضته وحاطت دماغه بين
 ايديه وسرحان ، فيري دخلت عنده وكانت ماسكة
 صينية عليها فنجانين قهوة، حطت الصينية على
 ترابيزة صغيرة وراحت قعدت على السرير جنبه :
 كمال

كمال ماردش وهي حطت ايدها على رجله : كموله
بقي، ماتز علش كده وماتعصبش نفسك ، مافيش
حاجة تستاهل كل ده

كمال بصلها : يعني انتي شايفه ان كل اللي حصل ده
عادي ومش مستاهل ؟

فيري : حبيبي دول شوية عيال عمالين يلطشوا في
كل حاجة هتخط عقلك بعقلهم

مسكت ايديه وبتتلون زي الحرباية : وبعدين آدم
وتمارا بكرة نجوزهم وهما هيعرفوا إزاي يتعاملوا
مع بعض كويس وكل واحد هيطبع نفسه بطباع
التاني لوحده، ليه نكبر الموضوع أوي كده ونتعب
نفسنا ؟

كمال : مش عارف والله يا فيري، موضوع الجواز
ده نفسه مش داخل دماغي، يعني عندك آدم، كلنا
عارفين إنه لو في حاجة مش عاجباه مش هيعملها لو
مين عمل ايه

فيري بضيق : وهو ايه اللي يخليه مايعجبهوش
تمارا، هي بنتي قليلة ولا ايه ؟

كمال : يا فيري مش حكاية قليلة ولا كتيره ، أنا بتكلم
عن الجواز بشكل عام

فيرى بتفكير: طيب ليه ماتحطهوش قدام الامر الواقع
، يعني هو أكيد مش هيفضل طول عمره خارج
طوعك كده، أنت بقى لازم تشكمه شوية وتعرفه مين
الكبير ومين اللي كلمته بتمشي ، حطه قدام الامر
الواقع وهو مش هيقدر يعمل حاجة

كمال : ودي اعملها إزاي بقى ؟

فيرى : يعني مثلا جهاز حفلة لأي سبب وفي وسط
الحفلة قول إنها على شرف الخطوبة وهو أكيد مش
هيقدر يعمل حاجة قدام الناس، يعني أكيد هيحافظ
على شكله وبرستيجه قدام الناس، وبعدها حاول بقى
تلاقي أي حاجة تعرف تمسكها عليه عشان
مايخرجش بره طوعك تاني

كمال قعد يفكر شوية : اه صحيح افكرت، كمان
شهرين في مؤتمر تبع الشركة ولازم كل الشركا
يحضروه وانتي عارفه من ساعة ما جمالات كتبت
كل نصيبها في الشركة لأدم وكمان امي، هو بقى
صاحب أكبر أسهم ولازم يحضر غصب عنه

فيرى كانت مخنوقه من سيرة جمالات الا إنها
حاولت تكتم غيظها : يبقى خلاص تعلن في المؤتمر

كل حاجة وهو هيامن اكيد على كلامك عشان شكله
قدام الناس

كمال: ماشي يا فيري، وربنا يسترها علينا ومايتجنش
ويعمل حركة من بتوعه دول

فيري قامت تجيب القهوة وقعدت جنبه تاني :
ماتقلقش، كل حاجة هتكون تمام، خد أشرب ده روق
دماغك

كمال أخذ الفنجان من ايدها وشربه وهي بتبص عليه
بشر وسعادة

فيري : حاول تناملك شوية يمكن تهدي وتبطل تفكير
وبكرا تبقى حدد هتعمل ايه

كمال فعلا نام لانه ماكانش قادر يفتح عينيه وحس
فجأة بخمول رهيب في جسمه وهو نايم فيري سمعته
بيتمتم بصوت خافت، قربت منه عشان تسمعه لفته
بيردد اسم جمالات فاتعصبت جدا والجن ركبها
واخذت فناجين القهوة ونزلت المطبخ تحت

دلقت الفنجان بتاعها كله في الحوض ووقفت تغسل
الفناجين بغل والكل واقف يبص عليها بذهول عشان

دي أول مرة يشوفوها بتعمل حاجة في البيت من
ساعة ما دخلت القصر ده

خلصت اللي بتعمله وهدبت الفجانين على الصفاية
ومشت وهي بتفكر في خطتها الشريرة

بعد يومين هند وداليدا رجعوا تاني للقصر ، وتعامل
تمارا مع داليدا بقى اسوء من الاول بس هي بتحاول
تتجنبها معظم الوقت وبتجاهل كلامها على قد ما
تقدر

في يوم آدم كان قاعد في التراس على المرجيحة
الكبيرة بتاعت مامته وييلعب في الفون هو وجسار

آدم : يا عم وسع كده ماتزاو لنيش

جسار ضحك : أعترف إنك فاشل في اللعبة، بص
هيلب المزة الشقرا اللي هناك دي

آدم : أبو شكلك حتى في اللعبة مش عاتق، يا راجل
أرحم نفسك شوية

جسار ضحك جامد : يادي الغيرة اللي هتودينا في
داهية

جسار فونه رن فقام يرد وداليدا كانت معدية راحت
وقفت قدام آدم بصمت

آدم رفع وشه وبصلها : إزيك ؟

داليدا : الحمد لله

آدم : أنا آسف على اللي حصل اليوم إياه ده، كله
بسببي

داليدا هزت دماغها برفض : ماحصلش حاجة

سكتت شويه فآدم سأل : هو في حاجة ؟

داليدا بصتلته : اه في حاجة عايزة اقولها لك

آدم ركز معاها وهي أخذت نفس طويل بتدعم نفسها
: كنت عايزة أقولك أنت إنسان عظيم جدا

آدم شاور على نفسه ببلاهة : ده أنا !!

داليدا هزت راسها بتأكيد : اه أنت

آدم بلع ريقه بصعوبة وهو نفسه دلوقتي يقوم ياخذها
بالحضن بس جسار انقذة من أفكاره دي وخط فونه
قدامه : الرجالة اللي عند المخزن عايزينك

آدم حمم واخذ الفون ورد : ألو

سمع المتصل ورد : تمام ماشي مسافة السكة وهكون
عندكم

قفل وداليدا بصتله باحراج : الظاهر حضرتك
مشغول ، مش هعطلك، عن إذناك

أخذت بعضها ودخلت جري على جوا بتهرب من
أسخف موقف حطت نفسها فيه من ساعة ما دخلت
القصر ده، و آدم كان متابعتها وهي ماشيه بنظرات
بلهاء ومرسوم على وشه ابتسامه سخيفة

جسار : يانهار أبيض يا جدعان ، كل ده

آدم فاق ومد ايده بفون جسار وبتحذير: أنت ماشفتش
حاجة صح ؟

جسار ببلايه هو كمان : ماشفتش ايه ؟ هو في حاجة
حصلت اصلا ؟

آدم ضحك وجسار كمان والأتنين راحوا على
المخزن عشان آدم يشوف مين الناس المهمين اللي
عايزينه

ومن اللحظة دي آدم قرر جوا نفسه ان داليدا هتكون
حبيبته وشريكة حياته وزوجته وكل حاجة في دنيته
بعد ماتأكد إنه مش هيقدر يبعد عنها

أما داليدا فطلعت السلالم ووقفت قدام اوضة دولت
 وخبطت على قلبها اللي بيدق جامد : يخرّب بيت
 جنانك يا سولاف ، انتى شكل مخك لسع خالص ايه
 الجنان اللي أنا عملته ده ؟

آدم وجسار وصلوا المخزن ولقوا البوليس مستنيهم،
 واحد من الحرس قرب منهم وده اسمه لؤي ويبقى
 الدراع اليمين لجسار

آدم : في ايه يا لؤي ؟

لؤي : باشا بيقولوا لقوا مخدرات في البضاعة
 بتاعتك

آدم بصدمة : نعم !!

البوليس قرب عليهم : مساء الخير ، آدم باشا

آدم : مساء الزفت على دماغكم، ممكن أفهم هو ايه
 ده اللي بتقولوه ؟

عسكري : زي ما سمعت ، إحنا لقينا كمية كبيرة من
 الهيروين في البضاعة بتاعة مطعمك اللي لسه جايه

فحضرتك هتيجي معانا بهدوء كده على القسم عشان
نحقق معاك

آدم : معاك أذن من النيابة ؟

العسكري طلع ورقه وعطهاله : ايوه

آدم بصله شوية وبعدها ضحك بعلو صوته ضحكة
متأكد إنها وترت العساكر

آدم : يعني أنت عرفت ان البضاعة بتاعتي فيها
مخدرات، لا واخذت أذن تيجي تفتشها وطلعت
البودره وكشفت عليها واتاكدت إنها هير.وين وطلبت
أذن من النيابة بالقبض عليا وكل ده والبضاعة لسه
واصله مابقلهاش نص ساعة ، ده أنا حتى لسه
مافرزتهاش ولا شوفت فيها ايه

قرب منه ومسك ياقة قميصه بيعدلها : لا ده أنت
خارق بقى، ولا نقول إنك مطبخها مع اللي عايز
يوقني بالطريقة السخيفة دي

العسكري اتوتر وبدأ يعرق وبعد ايدين ادم من عليه :
لو سمحت أتفضل تعالا معايا بهدوء وبلاش تجبرني
أستعمل العنف معاك

آدم كشر : لا استعمله يا روح أهلك على أساس أنى
هخاف يعني

بص لجسار : رنلي على فريق أول عز الدين باشا
[اسم وهمي] أما نشوف الموضوع ده بقى

العساكر كلهم اتلبشوا أول ما سمعوا اسم فريق أول
وده رتبة عالية جدا في الشرطة

عسكري : باشـ

آدم : اخرس يالا

راح وقف قدامهم بقوة : لو فكركم ان آدم هارون
لقمه سهلة تبقوا غلطانين ده أنا اللي يرشني بالماية
ارشة بالدم ولا يفرق معايا، ومحضر قصاد محضر
بقى وخلينا نروح النيابة ونشوف مين فينا اللي
هيطلع منها

بص لقائد الفرقة وقال بصرامه وحزم : لم شوية
الاوباش بتوعك دول وخذ الهباب اللي أنت ماسكة ده
واخفوا من وشي وإلا ورب الكعبة لكون مطربقها
على دماغ اللي خليفوكم ومخليكم تقعدوا في بيوتكم
زي الولايا

العساكر انسحبوا بسرعه ورنوا على اللي محرضهم
يبلغوه باللي حصل

آدم : هي حصلت يا ولاد ال@#\$

جسار : تفتكر هما ؟

آدم : مافيش غيرهم، كمال وعاصم وابنه

خبط على العربية بغيط : طيب ماشي، طلا ما انتوا
اللي بدأتوا ماتبقوش تزعلوا بقى

طلع فونه وكلم حد : باشا ___ حبيبي واحشني والله
___ وأنت الدنيا اخبارها ايه معاك ؟ ___ طيب
واللي يظبطها لك تديه ايه ؟ ___ هههه لا يا عم
مش عايز اتجوز أنا ___ خرينا نتقابل عايزك
ضروري ___ ماشي على ١٠ بالليل حلو ؟ ___
تمام ماشي أختار المكان اللي يريحك وهتلاقيني
عندك في المعاد

قفل معاه وبص قدامه بشر : خرينا نشوف مين بقى
اللي هيصمد للآخر

بص لجسار : عندنا معاد مهم أوي بالليل ، عايزك
على الساعة

جسار : اللي تؤمر بيه

آدم بص للؤي : لؤي ، اطلع أنت والرجالة وفرغولي
البضاعة دي حته حته ، وشوفوا لو في أي حاجه
لسه فيها

لؤي : أمرك يا باشا

آدم ركب عربيته وجسار ساق ووصله للقصر وهو
طلع على اوضته والنار بتطلع من عينيه

.

تمارا كانت نازلة من اوضتها شافت آدم داخل
اوضته نزلت السلالم بسرعة وجت تخبط لقت جسار
مسك ايدها : لو عايزة وشك الحلو ده يتعمل شاورما
ادخلي عنده ، آدم العفاريت دلوقتي بتتنطط فوق
دماغه، وأنتى حرة بقى يا قطه

تمارا شدت ايدها منه وبصتله بقرف من فوق لتحت
وسابته ومشت

جسار : أستغفر الله العظيم، هما اللي بيخرجوا
الواحد عن شعوره أهو

خبط كف بكف وراح هو كمان يجهز عشان معاد
بالليل

عاصم كان بيتكلم مع حد في الفون وبعدها قفل
ومروان بصله : ها يا بابا عملوا ايه ؟ مسكوه ؟
اتحبس خلاص ؟

عاصم بغیظ : لا ، طلع منها ، هدهم بفريق أول
مروان : طيب وبعدين هنعمل ايه ؟

كمال بتوهان : هنعمل ايه يعني ؟ هنستنى رده علينا
اللي أنا متأكد انه مش هيبقى سهل
عاصم بصله بضيق : متأكد ؟

كمال : اه متأكد ، كلکم عارفین آدم اللي بيدوسله
على طرف بيرد عليه وبيدوسله على اطرافه كلها ،
استعدوا بقى

عاصم بنرفزة : على اساس إنك مش معانا في نفس
المركب ؟

كمال قام وقف : عارف أنى معاكم عشان كده هستعد
أنا كمان، عن إذنکم

أخذ بعضه ومشى ومروان بص لآبوه : هو عمي
عامل كده ليه اليومين دول ؟ حاسس إنه مش في
وعيه

عاصم : ما عرفش ومش عايز أعرف حاجة
سكت وقعد يفكر يا ترى اللي في دماغه حصل ؟ دي
تبقى كارثة

مروان : بابا ، يا بابا روحت فين ؟

عاصم : هاه ! أنا معاك أهو مارحتش في حته

مروان : طيب وهنعمل ايه دلوقتي ؟

عاصم : هنستنى ، أنت عارف أننا داخلين في
مناقصه كبيرة اليومين دول ومحتاجين تركيز وكمان
المؤتمر اللي بعد شهر ده كمان، خلينا نهدي خالص
دلوقتي نعدي الفترة دي وبعدها نرجع نشوف هنعمل
ايه

مروان قام وقف : طيب، أنا هروح بقى أشوف اللي
ورايا

عاصم كشر : يا ريت تتلم شوية اليومين دول،
ماتنساش ان العيون علينا الفترة دي، مش عايز
فضايح

مروان بزهدق : حاضر

وسابه ومشى

بعد مرور كام يوم ، في ليلة داليدا كانت مش عارفه
 تنام وعماله تتقلب في السرير بز هق لحد ما قامت،
 دخلت الحمام وغسلت وشها ولبست طرحتها وطلعت
 البلكونه وفضلت تبص للقمر في ليلة تمامه وسرحت
 في جماله لحد ما فاقت على صوت في البلكونة اللي
 جنبها

بصت كان آدم قاعد وفي ايده كباية شاي بالنعناع
 بيشر ب منها وهو بيدندن بهدوء أغنية رومانسيه
 حزينه

داليدا فضلت تبص عليه وسرحت في ملامحه اللي
 حقيقي جميلة جدا نسخه من مامته بس بلامح
 رجوليه جذابه أوي

داليدا : مين دي اللي مغلباك ومخلياك تغني اغنية
 بالشكل الكئيب ده ؟

آدم بصلها وأبتسم وراح وقف عند الفاصل بين
 البلكونتين جنبها وسند على السور : أميرة حلوة أوي
 داليدا انتبهت لكلامه وهو كمل : بنت اموره كده
 وملامحها عسل أوي، طولها ، اممم

حط ايده قدام صدره : يعني قد كده اوزعه يعني
ورفيعه، شعرهاااا امممم يمكن أسود أو بني مش
متأكد بصراحة بس أكيد حلو، رقيقة وناعمة زي
الورده

بص في عيونها : وعيونها زيتوني تسحر سحبت
قلبي من أول نظرة

داليدا كان وشها أحمر زي الطماطم وهي سمعاه
بيوصفها وبيتغزل فيها بكل صراحة وجرأة، أخذت
بعضها ودخلت بسرعة من غير ماترد وهو ضحك
بكل صوته وقعد مكانه وكمل الشاي وبيدندن :
بتلوموني ليه؟ لو شفتم عينييه، حلوين قد ايه، هتقولوا
انشغالي وسُهد الليالي مش كثير عليه

داليدا دخلت اوضتها وسندت علي الحيطه وهي
حاطه ايديها على قلبها : أهبل ده ولا ايه؟ الظاهر
كده ياما أنا اللي اتجننت؟ احبييه احنا ابتدينا الهبل
ولا ايه؟ سولاف اعقلي مايصحش كده

راحت شربت مائة وقعدت على السرير : ماتنسيش
نفسك، انتي سولاف مش داليدا، وجوزك حسام اللي
لو عرف مكانك هيقتلك، انتي مجرد ممرضة لدولت

هانم مالكيش حق تعيشي الوهم ده، أوعي تفرحي أو
تسيبي قلبك يدق كده، ده مش من حقاك ابداء، ماتنسيش
يا سولاف

غمضت عينيها وفضلت تعد القطط شوية بتحاول
تبعد آدم عن تفكيرها

تاني يوم الصبح

الكل صحى على دوشة وزعيق ، كان عاصم اللي
الشياطين ركباه من فوق لتحت ، طلع لآدم اوضته
وفتح الباب بكل غضب من غير ما يخبط حتى لقاها
قاعد مع جسار بيلعبوا شطرنج

آدم : كش ملك

ضحك بصوت عالي : هو كش ملك فعلا ، مش كده
ولا ايه ؟

عاصم راح وقف قدامه وزعق : أنت اللي عملتها
صح ؟؟ أنت اللي خسرتنا في المناقصة ؟؟ دي كانت
راسيه علينا لحد آخر لحظة أنت اللي عملت كده
صح ؟؟

آدم وقف : زي مانت اللي حطيتلي هي.روين في
بضاعتي وكنت هتوديني في داهية ، واحده بواحدة
بقي

عاصم مسكه من هدومه وهزه جامد : أنا عملتلك
شوشرة مش اكثر ، تقوم مخسرني مبلغ بالحجم ده ؟
أنت ايه ؟ مجرم ؟

آدم فك ايديه عنه : لا يا عمي أنا مش مجرم بس أنا
بتعامل معاكم بطريقتكم؟ مافيش دخان من غير نار؟
أوعى تنسى إنكم اللي خلقتوا الوحش ده بأيديكم ،
يبقى استحملوا بقي نتيجة افعالكم

قعد تاني ومسك واحد من العساكر بتوع الشطرنج :
واه العسكري الخرونج اللي أنت بعتهولي ده بيمسي
عليك من التخشيبه ابقى روح اديله عيش وحلاوة
بقي، ويلا أنا ورايا لعبة مهمة جدا ومش عايز اخسر
فيها

ضحك ببرود : ايوووووو، نسيت أنى مش بخسر
ابدا

حرك واحد من القطع : كش ملك تاني، ههههه،
إعب يا جزار إعب

عاصم فضل يبصلهم بغل وسابهم ومشي ورزع

الباب وراه

آدم بص قدامه بحزن

جسار : آدم !!

آدم بحزن : كان نفسي أعيش حياة طبيعية زي باقي

الناس

بصله : يا ترى لو ماكانوش موجودين في حياتي

كان الوضع هيبقى إزاي ؟

جسار : هتبقى متشرد زي كده

آدم : على رأيك ، خرينا متشردين كده، كش ملك يا

جسار

جسار قلب التراييزة باللي عليها : أبو شكلك على ام

اللعبة المستفزة دي

آدم ضحك : أعترف إنك عضلات من غير مخ

جسار رفع ايده : أعترف

آدم ضحك تاني : رحم الله امرئ عرف قدر نفسه

قام وقف : ما بقولك ايه ؟

جسار : قول يا سلطان زمانك

آدم : ايه رأيك ناخد دولي وهنود والببت داليدا
ولوجين ونروح ابعده شط مفتوح ونعمل حفلة باربكيو
جامده ؟

جسار : طلا ما فيها اكل انا راشق طبعاً

آدم : كنت عارف انك هتيجي عشان تاكل، ههههه يا
بتاع كرشك يا معفن، تعالا بقى نبلغهم

جسار : يلا نط قدامي

آدم وجسار راحوا بلغوا دولت باللي عايزينه وهي
وافقت جدا وهند فرحت أوي ووافقت وداليدا كانت
خايفه بس هند طمنتها

وفعلاً بعد أربع أيام جهزوا فيهم كل حاجة واخدوا
بعض ونزلوا

تمارا : انتوا رايعين فين لوحدكم كده ؟

آدم: امشي ابت من وشي، الحاجات دي للناس الكبار
مش العيال اللي زيك

تمارا بغيط : على فكرة أنا مش عيلة وبعدين ما
لوجين اصغر منى ورايحه معاكم أهو

آدم أخذ لوجين تحت دراعه : لوجي دي ست البنات
هتقارني نفسك بيها ولا ايه ؟

آدم مشي خطوتين وبصلها : هتيجي بشرط
تمارا عينيها لمعت جامد : ايه هو ؟

آدم : تروحي دلوقتي في خمس دقائق تلبسي فستان
طويل شوية وواسع وتشيلي كل الميكاب الخز عيلي
اللي أنتي حطاه ده

تمارا كشرت وادم : براحتك بقي
وقال وهو ماشي ناحية الباب : هستناكي بره،
ماتتأخريش علينا

جسار : ليه هتاخذها معانا ؟

آدم : دي آخر محاولة مني اني اكسبها في صفنا بعيد
عن شرهم وهي حرة بقي تختار اللي عايزاه
شد لوجين من خدها زي الأطفال : أنتي يابت عسولة
أوي كده ليه ؟

لوجين بغيط طفولي مناسب ليها : ابيه هتوقع وشي
آدم ضحك وضمها لصدره أكثر : والله بحبك يابت يا
بسكوته أنتي

لوجين أبتسمت : وأنا كمان بحبك أوي يا أبيه

تمارا واقفه بتفكر، إزاي هتنزل بلبس زي ده؟ طيب
مش مهم اللبس تستحمل بس الميكاب لا مستحيل هي
مستحيل تقعد من غير ميكاب ماتقدرش
قاطع سرحانها مروان : الفرس بتاعنا واقف سرحان
كده ليه؟

تمارا بصتله وحكتله على كل اللي آدم قاله وهو
ضحك : يابنتي انتي بجد من كل عقلك بتفكري؟
انت عارفه الحفلة دي هتبقى عامله إزاي؟ شوية
آكل وعصير، واخده بالك عصير برتقال وهيلعبوا
في المياه شوية وهيرجعوا تاني، انتي مش وش
البهدلة دي ولا ده مقامك ابدأ

شدها من دراعها وراه : تعالي معايا، ده أنا
محضرك حته سهرة ايه، وجايبلك فستان من باريس
مخصوص

تمارا اتعلقت في دراعه : بجد يا مارو؟

مروان بخبث : بجد يا قلب مارو

طلع معاها اوضتها وعطاها الفستان اللي كان مفتوح
جدا

تمارا حطته عليها قدام المرايا : اطلع يلا بقى عقبال
ما البسه

مروان بوقاحة : وليه ؟ ماتغيري وأنا واقف فيها ايه
يعني ؟

تمارا بتحذير : مروان

فونها رن وكان آدم لسه بتمسك الفون مروان اخده
منها وحطه بعيد وحضنها جامد : فكك بقى من آدم
دلوقتي واللي خليفوه وخليكي معايا أنا يا جميل ، دي
الحفلة النهارده فيها بنبوني نوع جديد حاجة كده
فاخر من الآخر مش هتلاقياها في أي حته في مصر

تمارا بعدته عنها : أنت بتتكلم جد ؟

مروان : ايوه طبعا بتكلم جد هتتبسطي جدا

تمارا : طيب ماتهات تذكرة اضبط بيها دماغى لحد
مانروح الحفلة عشان وجعاني أوي

مروان أبتسم : بس كده ده أنتى تشاوري

ونسيبهم بقى في العك ده ونرجع لآدم

تحت بعد ما حطوا كل حاجة في العربيات وركبوا
كلهم ، آدم واقف ببيص على الباب مستنى تمارا
تنزل، خمس دقائق ، عشر دقائق ، طلع فونه ورن
عليها مرتين بس هي ماردتش ، بعث واحده من
مدبرات القصر تستعجلها

البنات : خبطت عليها يا بيه وماردتش عليا
آدم اتنهد بخيبة امل وركب عربيته : يا لا يا جسار
بيننا

جسار ركب وساق والعربيات التانية مشت وراه
وراحوا فعلا شاطئ جميل جدا وهادي، فرشوا على
الرمل وجابوا كراسي للي مش هيقدرنا يقعدوا على
الارض، وفضلوا يلعبوا شوية كلهم زي الأطفال
وآدم وجسار قاموا يجهزوا الشواية وبدأوا يشوا وهند
وداليدا ولوجين بيجهزوا باقي الحاجة والسلطات
والحلويات وكل حاجة في جو لذيذ جدا لدرجة ان
داليدا نست نفسها واندمجت معاهم وكانت بجد
مبسوطه من قلبها

بعد ماتغدوا قعدوا كلهم يحكوا ويهزروا ويضحكوا
لحد وقت الغروب كل واحد راح يقعد مع نفسه شوية

، دولت و هند كانوا قاعدين مع بعض بيتكلموا
 بهدوء، وقدام شوية لوجين قاعده بترسم الغروب
 وجسار قاعد جنبها بيتفرج على الرسمه وبياكل آيس
 كريم وبيأكلها معاه ، وداليدا راحت قعدت قدام المياه
 اللي كانت بتتحرك بخفة على رجليها وترجع تاني،
 كانت لابسه طاقية قش بتداري بيها وشها وقلعت
 النظارة حطتها جنبها، وفضلت تلعب في الموجه
 بصوابها

آدم : طفلة أوي

داليدا بصتله وهو أبتسم وقعد جنبها وفضل يلعب في
 المياه هو كمان بصوابه : حلوه أوي اللعبة دي ،
 شكلك بتحبي البحر

داليدا : أول مرة اشوفه

آدم : بتهزري !!

داليدا : لا بتكلم جد ، انا ماعشتش في اسكندرية غير
 من مدة قصيره ، والمكان اللي كنت عايشه فيه قبل
 كده ماكانش فيه بحر

آدم هز دماغه بفهم : ايه رأيك بقى لو تشوفي البحر
 كل أما تحبي ؟

داليدا بصتله : قصدك ايه ؟

آدم بصلها بحب : يعني خليكى معايا وأنا هخليكى
تشوفيه كل أما تحبى

داليدا اتوترت من كلامه وبصت بعيد : اناااا

آدم قاطعها وقال بدون مقدمات : أنا بحبك

داليدا قلبها وقع من كلامه وغمضت عينيها واخذت
نفس طويل : ماينفعش

آدم : ليه ؟ أنا هخليه ينفع

داليدا عينيها بدأت تلمع بالدموع : ماينفعش صدقنى

.

آدم كان فاكرها بتتكلم عن فرق الطبقات اللي بينهم
فقرب منها شوية وقال عشان يطمئنها : داليدا ما
تخافيش، أنا هتصرف صدقيني بس

داليدا قامت بسرعة من مكانها : أنا آسفه، بجد آسفه
بس مش هينفع بجد ، آسفه

اخذت نظارتها وراحت بسرعة قعدت جنب هند
وهي بتحاول تسيطر على نفسها ومشاعرها اللي
بدأت تتحرك لآدم بجد

آدم فضل قاعد مكانه وببيص للبحر بتوهان ، هي
معقوله رفضته كده حتى قبل ما تسمع باقي كلامه ؟

الشمس غرقت في البحر وغرق معاها قلب آدم في
حزن ووجع جديد ، قام ورفض هدومه من الرمله
وراح لجسار : مش يلا بينا ؟

لوجين : ابيه ماتخلينا شوية

آدم مسك خدودها : معلىش يا لوجي ، الوقت اتأخر
ويادوب نلحق نروح

لوجين : طيب اوعدني أننا هنيجي تاني

آدم أبتسم : اوعدك ، قومي يلا لمي حاجتك دي وأنا
وجسار هنلم الحاجات هناك ماشي ؟

لوجين هزت دماغها بموافقة وقامت تلم حاجتها وآدم
وجسار قاموا يلماوا باقي الحاجة ومعاهم هند وداليدا
اللي بتحاول تتجنب آدم على قد ما تقدر

اليوم خلص وكل واحد سرحان مع نفسه

داليدا قاعده في اوضتها وعماله تقنع نفسها ان اللي
هي عملته ده الصح ، ده اللي كان المفروض يحصل ،

هي واحده متجوزه وعلاقة زي دي غلط وماتصحش
ولازم توئد مشاعر ها دي قبل ما تكبر أكثر من كده

آدم هو كمان قاعد بحزن في اوضته وبيفكر قد ايه
الموضوع قاسي أوي ، هي إزاي ترفضه كده من
غير ما تسمعه حتى

حسام [وحشكم صح هههههه] كان في اوضته بيلم
هدومه وبيحطها في شنطة سفر ، دخلت مامته عليه
وشافته : بتعمل ايه يا حسام ؟ ورايح فين بشنطتك
دي ؟

حسام : في اجتماع كده لمجموعة كبيرة أوي من
مدربين ألعاب كمال الاجسام هيتعمل في واحده من
اكبر القاعات في مصر وأنا هروح
سهير : هتسافر وهتسيبني يابني ؟
حسام : كلها إسبوعين وراجع تاني
سهير : طيب هتروح لوحدك ؟ أخاف عليك

حسام : تخافي على مين ياما وهو أنا حد يقدر
يكلمني ؟ وبعدين معاذ جاي معايا، بيقولي عنده شغل
في مستشفى هناك وكان مسافر فهاخدني على سكتة
، أهو نروح بعربيته بدل المواصلات والدوشة

سهير : خلي بالك من نفسك طيب

حسام بيقفل شنطته : حاضر ياما ماتخافيش
راح ناحية الكومود واخذ صورة لسولاف وخطها في
جيبه

سهير بضيق : برضه يا حسام؟ مش تنساها بقي
يابني؟

حسام : لا ياما مش هنساها

راح اخذ شنطته : يلا بقي أنا نازل
نزل وقابل باباه على السلم : بابا أنا مسافر ا____
محمد : طيب ماتسافر وأنا مالي

اخذ بعضه ودخل شقته وقفل الباب في وشه وسهير
راحت مسكت دراعه : ماتزعلش يا حسام منه،
تلاقية بس مدايق شوية ولا حاجة

حسام : بابا من ساعة اليوم إياه وهو بيعاملني كده،
مش هتفرق بقي

نزل وهي نزلت وراه وسلمت على معاذ وخطوا
الشنط في العربية

معاذ : يلا بينا ؟

حسام ركب : يلا

معاذ بص لسهير : عن إذنك بقي يا خالة

سهير : روح بابني ربنا يحفظكم ويسهلكم طريقكم

.

معاذ آمن على كلامها وساق عربيته وبدأوا طريق
سفرهم وكل واحد من حسام ومعاذ ساكت بس دماغه
فيها ألف حاجة وحاجة بيفكر فيها وكل واحد غرقان
في افكاره لحد ما وصلوا الفندق اللي هيقعدوا فيه
الإسبوعين

بعد كذا يوم المؤتمر اللي كمال كان بيتكلم عليه
اتعمل وكل الشركا حضروا ومنهم آدم اللي حرفيا
كان موجود كماله عدد وبس ، وفي وسط كل ده
كمال بتوجس أعلن عن خطوبة آدم وتما را زي ما
هو مخطط مع فيري ، وده طبعا كان خبر الموسم ،

والصحفین اتجمعوا حولین آدم وبدأوا یسألوه أسألة
کثیر

آدم کان قاعد سرحان و عقله کله مع دالیدا ورفضها
لیه، قطع تفکیره تمارا اللي خبطته فی جنبه جامد
عشان یفوق

آدم بضیق : فی أیه ؟

تمارا بابتسامه مصطنعه وبتتکلم من تحت سنانها :
الصحفي بیسألك من ساعتها و أنت مش بترد

آدم بص قدامه للصحفي بتوهان وهو عاد سؤاله :
آدم بیه تحب تقول أیه لتمارا هانم بما إنها بقت
خطيبتك ؟

آدم سکت کثیر لحد ماتکلم أخیرا، أخذ نفس طویل :
مین قال إنها خطيبتي ده إحنا کنا بس بنقول إقتراح
لسه مافیش حاجة رسمية

کلهم اتصدموا وتمارا حست ان حد دلق علیها مایة
متلجة ، الصحفین کلهم اتجمعوا حولین آدم وکل
واحد بیسأل سؤال شکل واصواتهم کلها بتدخل فی
بعض

آدم وقف : أنا شايف ان وجودي هنا مش مؤثر قد
 كده ولسه ورايا إجتماعات تانية فبعتر منكم مضطر
 انسحب دلوقتي، عن إذنكم
 آدم مشي وجسار ساعده يطلع من الزحمة دي
 وركبوا العربية ومشوا

الصحفين اتجمعوا حولين تمارا وبيسألوا أيه اللي
 بيحصل بالظبط وهما كده مخطوبين ولا لأ؟ وهي
 مش عارفه ترد تقول أيه كانت عايزة تهرب منهم
 ومش عارفه فبصت لمروان باستتجاد وهو قرب
 منها بسرعه وبعدها عن الصحافه وخرج بيها بره
 المكان وساعدها تركب العربية وركب جنبها : أطلع
 على القصر

السواق ساق فعلا رايح للقصر

كمال و عاصم وفيري كانوا بيحاولوا يلماوا الفضيحة
 دي زي ماسموها، وأضطروا ينسحبوا هما كمان
 وهما الشياطين بتتنطط فوق دماغهم من الموقف اللي
 آدم حطهم فيه

جسار بيسوق وبيبص لآدم كل شوية في المرايا
وعايز يفهم هو بي فكر في ايه : باشا

آدم : جسار معلى مش عايز اتكلم

جسار بص للطريق وساق في صمت لحد القصر
وآدم نزل من العربية وطلع على اوضته بسرعه،
دخل وجاب شنطة سفرة رماها على السرير وفضل
يلم في كل حاجاته المهمه واللي ليها قيمة في قلبه
واى حاجة مايقدرش يستغنى عنها

دولت كانت بتشوف المؤتمر على التلفزيون
واتصدت من اللي آدم عمله ومن تسرعه، عرفت
انه وصل القصر فقامت راحتله وداليدا معاها ،
دخلت اوضته لفته بيلم في حاجته

دولت : آدم

آدم : لو سمحتوا ، لو سمحتوا مش عايز اتكلم
دلوقتي

دولت : طيب فهمني بس ليه عملت كده ؟ وليه بتلم
حاجتك أنت هتروح فين ؟

آدم بعصبيه : هروح في أي داهية تاخديني

دولت بوجع : ليه يابني كده حرام عليك ، ايه سبب
كل ده ؟

آدم : كله بسببك أنتي وأمي ربنا يسامحكم ، عملتكم
ايه أنا عشان تعملوا فيا كده

دولت بدموع : وهو إحنا عملنا فيك ايه بس ؟

آدم: كتبتوا كل ورثكم باسمي، أمي كتبت كل املاكها
باسمي قبل ما تموت وحلفتني اخدها وحرمت ابويا
منها وانتي عملتي زيها وكتبتي كل نصيب ابويا
وعمي من فلوسك باسمي وكل ماقولك ارجلهم
فلوسهم تقولي هغضب عليك

دولت : وهو إحنا عشان بنأمنك مستقبلك بيبقى كده
بنأذك ؟

آدم زعق بكل وجع : ايوه بتؤذوني ، انتوا عملتوا
كده على أساس تأمنوا مستقبلي بس اللي ماتعرفهوش
ان ده ولد الكره ناحيتي ، الكل بقى طمعان فيا وفي
فلوسي ولو يطولوا يقطعوني حتت وأنا عايش
هيعملوا كده ، وأنا مش عايز فلوسكم دي، مش عايز
حاجة أنا

دولت سندات على باب الاوضة وسكتت ودموعها
بتنزل وداليدا واقفه صعبانه عليها ومش عايزه آدم

يلومها كده : أنت ليه بتلومها على حاجة مش في ايدها ؟ هي كانت خايفه عليك وعايزة تحميك وبس ، تعرف منين هي ان كل ده هيحصل ؟

آدم بصلها بغيط : وانتى ايه دخلك بالموضوع ؟ انتى مين أصلا عشان تتكلمي ؟

داليدا قلبها وجعها من كلامه بس ردت : مش هتفرق أنا مين ، اللي يفرق هو الكلام بغض النظر عن اللي بيقله

آدم : وانتى مين سمحك تتكلمي أساسا ؟ بتحشري نفسك لبيبيه ؟

داليدا : عشان ماينفعش اشوفك بتجرحها كده بالكلام وفي الآخر تاخذ بعضك وتهرب، واسكت

آدم اتترفز ورمى الحاجة اللي كان ماسكها في ايده : وأنا مين يحس بيا وبجروحي ؟ ليه أنا دايم اللي مطلوب منه يستحمل ويسكت ؟ ليه كلهم بيرموا حمولهم عليا وأنا اللي مطلوب مني اسكت واكتم في قلبي ؟ مش بني آدم أنا ولا حيوان ؟ ده لو حيوان كانوا رحموه عن كده ، حتى أنتى عملتي زيهم قولت إنك هتفهميني بس طلعتي زيهم

تمارا حطت ايدها على خدها وهو مسك كتافها ونزل
لمستواها : أنتى عارفه أنا قربت منك الفترة الأخيرة
دي ليه ؟

تمارا مصدومه من القلم اللي اخذته وساكته وهو
هزها جامد : عارفه ولا لا ؟

تمارا هزت دماغها بلا وهو اتكلم : عشان انقذك
منهم، من أمك وابوكي وعمك وابنه اللي مش فارق
معاهم حاجة غير الفلوس وبس ، كنت بوهم نفسي
إنك من جواكي نظيف ويمكن تتغيري ، اعتبرتك
أختي بجد وحاولت احتويكي ، كنت فاكرا أني لو
اخذتك في حضني وفهمتك براحه هتفهمني، بس انتى
عملتي ايه هاه ردي ؟

تمارا دموعها نزلت وهو كمل : ردك كان العكس ،
السواد اللي جواكي كان بيكبر اكثر، وتكبرك وظلمك
بيزيدوا أكثر واكثر ، ولا عايزة تفهمني ولا تحسي ،
وقذارتك بتكثر يوم بعد يوم ومش عامله احترام لحد،
ودلوقتي بتسألني عن الالهانه والاحترام

تمارا بعياط : كنت عايزني أعمل أيه وانت بعيد عني
، قولتلك بحبك ومع ذلك كنت بتتجاهل كلامي
وتسيبني أنا أموت بقهرتي

آدم زعق: تقومي تلجأي لحيل قدرة زي دي؟ مجنونه
 انتى ولا أيه ما عندكيش عقل تفكري بيه؟ وبعدين أنا
 عارف إنك مش بتحبييني، عارف إنك هتفوقي في
 يوم وما كنتش عايز ادمرك، كنت عايز أول واحد
 يتجوزك يكون الشخص اللي انتى بتحبيه بجد، اللي
 قلبك اختاره مش أي واحد والسلام بس انتى عملتي
 ايه؟ ضيعتي نفسك بنفسك انتى ماشيه ورا هواكي
 وكلام أمك وخلص تقولك يمين وراها شمال وراها
 وكل همكم الفلوس، اتجوز آدم عشان أضمن فلوسه
 في جيبي وماتروحش لحد غريب

زعق بكل صوته: يلعن أبو الفلوس اللي تعمل في
 الناس كده يا شيخة

سابها وراح قفل شنتطته ونادى بأعلى صوته: جسار
 جسار دخل: باشا

آدم: خد الشنطة دي

راح ناحية دولت ومسك ايديها: هتيجي معايا؟
 دولت بصتله باستفهام: أنا مش راجع هنا تاني، لو
 خرجت من البيت ده مش داخله تاني، انتى بقى
 هتيجي معايا ولا لا؟

دولت بحزن : بس ده بيتي يا آدم يابني ، وكل
ذكرياتي مع مهاب هنا ، كل ذكرياتي مع جمالات
ومعاك هنا

آدم : وأنا آسف مش هقدر استحمل اكثر ، أنا حبل
صبري اتقطع خلاص ومش هقدر اصبر أكثر ،
عموما فكري خدي راحتك لو عايزة تيجي معايا
هبعثلك جسار ياخذك بس أنا آسف قعاد هنا تاني مش
هينفع خلاص

باس ايديها وراسها وبص لداليدا لآخر مره، نفسه
ياخذها معاه، طيب يضمها مره واحده بس على
الأقل بس هي مش عايزاه

سابها ومشى وجسار وراه وقابل كمال في وشه اللي
أول ما دخل مسكه من هدومه : أنت أكيد اتجننت
عشان تعمل الغباء ده ، بتحطني أنا في موقف زبالة
زي ده ؟؟ أنت جرى لمخك حاجة يابن جمالات ولا
ايه ؟؟

آدم نزل ايديه من عليه بعنف وزعق : ماتنطقش
اسمها تاني على لسانك ، وايوه يا كمال يا هارون
اتجننت وهجننكم كلكم معايا قريب ، ولا أنتوا مش
محتاجين صحيح ، انت خلاص اتمحيت بالنسبالي

من ساعة ماتجوزت على أمي وموتها من القهر
 والمرض وأنت بتتفرج عليها ومبسوط ومن ساعة
 مارميتني في آخر الدنيا وعشت حياتك مبسوط
 ومرتاح ولا كأنك عملت حاجة ولو تطول كنت
 قتلتني بنفسك ، مش كده برضه ؟ بس ده في أحلامك
 يا كمال بيه ، أنا هفضل عايش قدام عينيك عشان
 تفتكر جمالات كل ما تشوفني ، أنا هفضل زي
 الشوكة في زورك ومش هسيبك تتهنى ابدا في
 حياتك، أنا مش جمالات هسكت واسمحك تختارلي
 حياتي على مزاجك لاااا ، أنا ما حدش يقدر يمشيني
 على كيفه ، اصبروا انتوا بس عليا لو ماكرهتكمش
 في عيشيتكم مابقاش آدم

آدم خلص كلامه وساب البيت باللي فيه ومشى،
 ركب عربيته وجسار ركب قدامه : على فين ؟

آدم : أي داهية تاخدني

جسار سكت وشغل العربية وساق في صمت وفضل
 يلف في الشوراع بلا هدف معين

دولت نزلت من فوق لما سمعت صوت كمال
وبصتله : كله بسببك أنت واخوك، منكم لله يا بعده ،
قلبي غضبان عليكم ليوم الدين
كمال بصلها كثير وساكت وبعدها أخذ بعضه وطلع
اوضته وفي اللحظة دي كان في صوت هبده على
الارض وداليدا بتصرخ : دولت هانم

لوجين اللي كانت سامعه كل الزعيق ده طلعت على
الصوت وشها غرقان دموع وقربت منهم : داليدا
اعملي حاجة ، مش تسيبي نانا كده

كمال سمع دوشه كثير وهو واقف على باب اوضته
في الدور الثاني بس مانزلش يشوف في ايه ودخل
الأوضة كأنه تايه ومش حاسس بنفسه

في الوقت ده هند طلعت من المطبخ على الصوت
ولقت دولت على الارض وداليدا ولوجين جنبها ،
قربت بسرعه منهم : في ايه مالها دولت هانم ؟
لوجين بدموع : داده الحقينا

هند قامت نادت على حد من الحراس يساعدهم
وشالوا دولت واخدوها المستشفى بسرعه

الليل ليل وكل واحد في ملكوت

كمال قاعد في اوضته مغيب عن الدنيا وفريال رايحه
جاية قدامه عماله تسب وتلعن في سرها على آدم
واللي خلفوه ودولت كمان

تمارا لسه مكانها في اوضة آدم بتعيط وبتلوم نفسها
على غبائها وبتسأل نفسها هي ليه فعلا ماسمعتش
كلامه ؟ ليه في كل مره حاول معاها عشان تتغير
هي كانت بتصدده

لوجين قاعده في اوضتها زي العادة ودموعها مش
بتتنشف كانت قلقانه على دولت وقلبها واجعها على
آدم وعلى نفسها

عاصم قاعد مع ابنه بيخطط للخطوة اللي جاية
ومروان قاعد سرحان ومش مركز معاه

داليدا وهند فضلوا مع دولت اللي اتحجرت في
المستشفى

جسار فضل سايق عربية آدم لحد ما وصل لقبر
جمالات زي ما هو قاله ، ونزلوا الإتنين ، وآدم قعد
قدام القبر يتكلم مع مامته ، وجسار سامع صوت
بكاءه وكان صعبان عليه ومش عارف يتصرف
إزاي

آدم كان بيبكي على حال نفسه، والدته اللي لسه
بيتعذب لفراقها لحد دلوقتي، والده اللي بيكرهه
ونفسه يخلص منه وهو مش فاهم هو بيعمل كده ليه
، وداليدا اللي اتخلت عنه هي كمان، حاسس إنه
موجوع وتعبان ، كل الطرق بنتسد في وشه والدنيا
مصره تعاند معاه وتقهره اكثر واكثر وقلبه خلاص
مش قادر يتحمل كل الهم ده

آدم بعد مده من قعدته عند القبر مشي وفي الطريق
شاف شاب بيتخانق مع ست كبيرة ووقعها على
الارض ، فتح باب العربية ونزل جري في نص
الشارع وكان هيتخبط كذا مرة لولا ستر ربنا ،
وجسار اتخض عليه ووقف العربية ونزل جري
وراه

آدم ضرب الشاب في بطنه جامد بعده عن الست
ومسكه من هدومه وفضل يضرب فيه والست
بتصرخ على ابنها لحد ما جسار مسك آدم كتفه
وبعده عن الشاب وادم بيزعق : أمك دي اللي بتمد
ايدك عليها مافكرتش في يوم لو ماتت انت هتعمل
ايه يا حيوان ؟ هتلاقي نفسك ضايع وهتندم ميت مرة
على عمايلك دي

دموعه نزلت : هتتمنى لو تشوفها مرة واحده وتملي
عينك منها او تسمع حتى كلمة منها

وقع على الارض وبوجع : هيبقى نفسك تترمي في
حضانها لمرة بس هيكون فات الأوان خلاص

الست الكبيرة صعب عليها آدم ولسه هتقرب منه
جسار سبقها وشده من ذراعه وقفه ثاني : اسفين يا

حجة على اللى حصل هو بس تعبان شوية ، عن
إذنك

جسار أخذ آدم وراح فندق و آدم فضل طول اليوم نايم
كنوع من أنواع الهروب من الواقع

تاني يوم آدم صحى على خبط كثير على الباب
ازعجه ، قام بكسل وفتح الباب بضيق : في ايه ؟
خبط خبط ما براحه ، هو الواحد ما يعرفش ينام
ساعتين على بعض

جسار بذهول : ليلتك سودا يا آدم ، أنت لسه نايم
لحد دلوقتى ؟ أنت نايم أكثر من ٢٤ ساعة في ايه ؟
ده لو ميت كان صحى يابني

آدم سابه على الباب ودخل رمى نفسه على السرير
تاني واستغطى كله : معلىش

جسار : ده اللى ربنا قدرك عليه ؟

آدم : جسار انزل من فوق دماغي أنا مش ناقص ،
دماغي هتتفرتك أصلا من الصداع

جسار دخل وقفل الباب : ما هو لازم سعادتك، أنت
بقالك يوم كامل نايم كنت مستنى ايه ؟

آدم طلع راسه من تحت الغطا وبصله : أنت جاي ليه
هاه ؟ عايز تقرفني في عيشتي وخلص ؟ أنا كده
كده قرغان منها فشكرا لمجهوداتك ، ويلا هويانا
بقى

جسار سكت فترة طويله وآدم قلق : لا بجد هو في
ايه ؟

جسار : دولت هانم

آدم اتنفض من مكانه : مالها ؟ حصلها حاجة ولا ايه
؟ ماتنطق يا جسار ماتوترنيش

جسار بزعل : تعبت جامد ونقلوها المستشفى

آدم اتصدم وقام يجري على بره وجسار وراه مسكه
من دراعه : أنت رايح فين بمنظرك ده ؟

آدم : جسار مش وقتك، سييني اروحلها

جسار : حاضر هنروح بس ألبس هدومك الأول ولا
هتنزل بالبنطلون كده ؟

آدم حط ايده على صدره وادرك إنه قالع التيشيرت
بتاعه ، بص حوليه واخذ أول تيشيرت عينه وقعت

عليه وراح ناحية الباب وهو بيلبسه : أنا جاهز أهو
يلا

جسار : يابني اهد _____

آدم قاطعة بز عيق : جساار ، أرجوك

جسار سكت لأنه عارف إن آدم روحه في دولت
واعصابه بتبوظ من أقل حاجة بتحصلها، مشى وراه
والاتنين نزلوا راحوا لدولت المستشفى ، آدم نزل من
العربية واخذها جري لحد اوضتها وأول ما دخل
لقاها نايمه لا حول ليها ولا قوة وداليدا قاعده معاها
أما هند فراحت تجيب هدوم لدولت من القصر

آدم راح قعد على ركبته جنب دولت ومسك ايدها
وباسها : حبييتي دولي مالك يا قلبي اصحى ؟ أنا آدم
، أنا جيت قومي

دولت بدأت تصحى بتعب وبصتلته : حبيبي

آدم بوجع : مالك بس ايه اللي حصلك ؟

دولت اتعدلت في قعدتها : أنا كويسه يا ادم ماتقلقش ،
الضغط علا شوية بس عليا

آدم باس ايديها : أنا آسف، أنا السبب حقك عليا

دولت حطت ايدها على خده : حبيبي أنت مش
السبب ولا حاجة، أنت ماعملتش حاجة غلط ، أنا
اللي اسفه ، أنا اللي غلطت في حقك و حملتك فوق
طاقتك ، ماتر علس يا بني حقك عليا

آدم : ايه اللي انتى بتقوليه ده بس يا نانا، أنا افديكي
الساعة اللي انفذك فيها اللي تطلبه

دولت : حبيبي ربنا مايحرمنيش منك ابدا

آدم بص حوليه : هما فين الدكاتره اللي هنا ؟ هما
إزاي سيبينك كده لوحدك ؟

دولت : يا آدم الموضوع مش مستاهل كل ده
آدم قام وقف وهو بيضغط جرس التمريض : مش
مستاهل ازاي ؟ ده أنا هطربقها على دماغ اللي
خليفوهم دلوقتي

طقم التمريض جه بسرعه : خير يا فندم ؟

آدم بعصبية : انتوا إزاي

دولت شدته من دراعه جامد وبصتلهم بابتسامه : ولا
حاجة يا جماعة هو بس كان عايز يطمن على حالتي
مش اكثر

آدم بحدّة : نانا

دولت : ماتتهد بقى ياولا الله تعبتني

ممرضة : هطلب لحضرتك الدكتور يطمنكم

طقم التمريض مشى و آدم قعد تاني على الارض :
في ايه ؟

دولت : أنت اللي في ايه ؟ ماشي قطر كده ليه
وطايح في كل اللي حوليك ، ماتهدى على نفسك
شوية

آدم بذهول : هو انا عشان قلقان عليكى أبقى طايح
في الناس و قطر ؟

دولت : يا حبيبي قولتلك أنا كويسه والله ايه لزمته
المشاكل بقى ؟ وبعدين ما داليدا معايا أهى ولا مش
ماليه عينك ديه ؟

آدم خطف نظرة لداليدا : داليدا اه ، قولتيلي ؟
دولت بحده : آدم

داليدا حست إنه بيتريق عليها فوقفت : عن إذنكم أنا
رايحه الحمام

انسحبت بسرعة قبل ما حد يكلمها ودولت بصت
لآدم : عجبك كده ؟

آدم : وهو أنا عملت ايه يعني ؟

دولت ضربته على كتفه : يا ولا هو أنت ما عندكش
دم ؟ كل ده وبتسأل عملت ايه ؟ ده انت ناقص بس
تقوم تاكلها قلمين

آدم ضحك : لا مش للدرجة يعني

دولت : بس أنت بجد زعلتها يا آدم ، دي يا حبة
عيني من ساعة ما زعقت فيها قبل ما تمشي وهي
مهمومه وبتعيط تيجي انت دلوقتي وتطينها بكلامك
أكثر

آدم زعل عليها واضايق من نفسه بس هي اللي
اضطرت له هي اللي رفضاه وهي اللي بتبعده عنها
ومش عايزه تسمعه حتى هيعمل ايه يعني ياخذها
غصب

دولت حست بيه : طلاما أنت زعلان كده عليها
بتزعلها ليه من الأول

آدم بص في الارض : هي زعلتني الأول

دولت : وعشان هي زعلتك تقوم رادد لها الزعل ؟
أنت المفروض تحتويها مش تزعلها ، مافيش حد
بيحب حد ويزعله يا آدم

آدم بصلها : عارف والله وماكانش قصدي بجد ، أنا
بس كنت مضغوط من كل حاجة بتحصل حوليا ومن
كثر مانا ساكت ماقدرتش استحمل وانفجرت غصب
عني، ماكانش قصدي خالص ازعلها ، أنا مايهونش
عليها زعلها والله

دولت طبطبت علي كتفه : يبقی تصالحها ، تفهمها
موقفك مش تهب فيها زي البابور

آدم سكت فدولت زفته : ما تتلحح يا منيل على عينك
، هتفضل قاعدلي كده ، روح صالحها قبل ما تطير
منك

آدم : لا مش هتطير ماتقلقيش ، وبعدين ، وبعدين
يعني ، أنا ، الموضوع مش زي مانتى فاهمه على
فكره

دولت بتريقة : لا يا راجل بجد ؟ ده أنت عينيك
بتطلع قلوب لوحدها ، وسامعه صوت قلبك من هنا
آدم بتلقائية حط ايده على قلبه وبغباء : بجد هو عالي
أوي كده ؟

دولت ضحكت : شوف إزاي ، طيب بالله عليك كل
ده ومش عايزني أخذ بالي

آدم أبتسم : طول عمرك واخذه بالك مني
 قاطعهم الدكتور اللي دخل وكلم آدم وطمنه على حالة
 دولت وإنها ممكن تخرج من المستشفى عادي لو
 عايزة

آدم لما الدكتور خرج طلع هو كمان يشوف داليدا
 فين عشان اتأخرت أوي

داليدا بعد ما خرجت من اوضة دولت راحت الحمام
 ، دخلت وقعدت مكانها تعيط شويه وبعدها بصت
 للاحواض قدامها وأبتسمت : الظاهر مكتوب عليكم
 تشهدوا على عياطي ووجعي كل شوية
 مسحت دموعها وقامت غسلت وشها وخرجت ،
 وهي ماشية سمعت مجموعة ممرضات بيتكلموا مع
 بعض

ممرضة ١ : احبيبيه يابت الواد مز مز أوي

ممرضة ٢ : بجد للدرجة ؟

ممرضة ١ : الا للدرجة ده يتاكل أكل كده، ولا شعره
 اللي نازل على عينيه ، شكله بيقول إنه جاي من

السريير على هنا على طول حتى جاي بلبس البيت
بس ايه، يالهوي عليه

ممرضة ٣ : ولا عليه واحده نانا تجيب الأرض ،
يارب واحد زي ده

ممرضة ٢ : ههههه يابنتي النوع ده مش بتلاقيه
كثير ومش أي واحده كده يكلمها لازم تكون زيه
عشان يرضى يرد عليها اصلا

ممرضة ١ : فعلا والله، بس مش قادرة بجد الواد ده
دخل دماغي أوي

داليدا واقفه بتسمع وبتبصلهم بغیظ لأنها افكرت إنهم
الممرضات اللي دخلوا اوضة دولت من شوية ، دمها
كان بيتحرق من الكلام اللي سمعاه عن آدم وغيره
غير مبرره بالنسباليها بتاكل في قلبها ونفسها تروح
تجيبهم من شعرهم

قطع تفكيرها الشرير صوت آدم وراها : يعني انتي
واقفه سرحانه هنا وسيباني ألف عليكي المستشفى
كلها ؟

داليدا اتخضت وبصتله وقبل ما تتكلم هو ضحك :
أحم دستور قبل ما تقولي

داليدا ضحكت هي كمان واخذت بالها من البنات اللي
مركزين معاهم وعينيهم هتطلع على آدم فبصتله :
أنت كنت بتدور عليا ؟

آدم : شايفاني أعرف حد غيرك هنا ؟

داليدا : لا

آدم : أو مال بتسألني ليه ؟ ولا ماتكونيش عايزة
تسمعيها مني تاني ؟

داليدا اتوترت ورجعت خطوه لورا بس آدم قرب
منها هو : كنت بدور عليك ، اتأخرتي أوي وقلقت
عليكي وطلعت ألف في المستشفى كلها وأشوفك فين

.

داليدا اتكسفت جدا ، هي كانت بس عايزة تغيب
البنات اللي واقفين شوية ماتخيلتش ان هي اللي
هترتبك كده ، آدم دايمًا بيقول كلام صريح من غير
مايتكسف أو يحسب حساب لحد وهي مش هتعرف
تجاريه

داليدا: ااا، ط، أحم، طيب يلا نرجع

مشت خطوتين بس آدم مسك ايدها : استنى أنا عايز
أتكلم معاكي شوية الأول

داليدا وشها جاب ميت لون من لمستته فسحبت ايدها
من ايده بهدوء ومشت بس هو راح وراها ومسك
ايدها تاني : بقولك عايز أتكلم معاكي، في كلام في
قلبي لازم تسمعيه

داليدا اتوترت جدا ومش عارفه تعمل ايه، سمعت
ممرضة بتتكلم بغیظ وصوت خافت : تقلايه على ايه
ياختي ؟ هو في حد عاقل القمر ده يقوله تعالا ويتقل
أنا بس لو بصلي هروحله راکعه والله
ممرضة تانية : يا رب يسيبها تمشي

داليدا اتضايقت منهم ولسه هتسحب ايدها تاني عشان
تمشي آدم ضغط عليها وهي بصتله بتوتر : مش
هينفع هنا

آدم : طيب امتي ؟ يناسبك فين وامتي وأنا هجيلك ؟
داليدا بتتويه : بص ، خلينا الأول نطمئن على دولت
هانم وبعدها نشوف الموضوع ده

آدم : أنتي بتهربي ليه ؟ قولتيلي أني بهرب بس اللي
أنا شايفه دلوقتي إنك أنتي اللي بتهربي

داليدا بصت في الارض ومش عارفه ترد وهو قرب
منها أكثر : خايفه من ايه ؟ ايه اللي قالك كده ؟

كلميني يا داليدا واحكي لي اللي في قلبك ، أرمي عليا
كل همومك ومخاوفك وفضفضي

داليدا بصتله وعيونها بتلمع بالدموع من كلامه اللي
بيطبطب على قلبها ، وأدم أتوتر لما شاف دموعها
اللي بتهدد بالنزول : طيب أنتي بتعيطي ليه دلوقتي
هو أنا قولت حاجة زعلتك ؟

داليدا مسحت دموعها بظهر ايدها وهي بتهز دماغها
برفض : بالعكس

آدم : مش فاهم

داليدا كانت لسه هترد بس سمعت آخر حاجة كان
ممکن تتوقع تسمعها دلوقتي : سولاف ؟

داليدا قلبها اتخلع من مكانه ووشها أحمر جامد
وعينيها برقت ودموعها بتنزّل غصب عنها وجسمها
بدا يرتجف وهمست بصوت ضعيف : حسام ؟ يارب

لا

آدم استغرب حالتها وبص لصاحب الصوت، كان
شاب طويل وضخم رابط راسه بشاش ، قرب منهم
وشد داليدا من ايدها لفها ليه : سولاف ؟ ده انتي بجد
؟

داليدا كانت هتقع من طولها و آدم حس بيها فشدها
عليه بسرعة : سولاف مين ياباشا ؟ أكيد حضرتك
غلطان

حسام : لالا دي سولاف أنا مش هتوه عنها

ولسه بيمد ايده تاني داليدا مسكت في هدوم آدم كأنها
هتموت وهو كشر ومسك ايد حسام : ايدك لتوحشك
يابا ، قولتلك مش سولاف ، سولاف مين دي أصلا ؟
دي داليدا مراتي

داليدا تتحت من الكلمة و آدم بصلها بابتسامة : يلا بينا
يا مزتي ؟

داليدا : هاه !

آدم بهمس : لا بالله عليكي مش وقته هاهاهاه خالص
دلوقتي

آدم مشي خطوة بس حسام مسك ايد داليدا تاني
وزعق : سولاف

آدم اتعصب وبعد ايده بعنف وزعق هو كمان : في
ايه يا عم ماقلنا مش زفت سولاف أنت اتجننت ولا
ايه ؟

حسام مسك آدم من هدمه : أنا اللي اتجننت برضه
ولا أنت ؟ بقولك دي سولاف يعني هي ، أنا اعرفها
لو من بين ميت واحده شبهها

في اللحظة دي جسار اتدخل وفك آدم من ايد حسام
وزقه بعنف لدرجة إنه كان هيقع : في ايه يالا ؟
مجنون أنت ولا ايه ؟ أنت فاكر نفسك مين عشان
تمسكه كده ؟

قاطعهم صوت معاذ اللي جاي يجري : حسام ، أنت
هنا ، مش قلتك ماتمشيش لوحداك ___ في ايه ؟
حسام شاور على داليدا : معاذ سولاف دي ولا مش
سولاف ؟

معاذ اتسمر في مكانه وبرق وبصلها كأنه بيقلها ايه
اللي جابك هنا

ادم : بقولك ايه يا اخ أنت وهو خودوا بعضكم كده
واتكلوا على الله وابتعدوا عن مراتي خالص ، ياربي
ايه الاشكال اللي بتتحدف علينا دي على الصبح ؟
راح مسك ايد داليدا اللي كانت متلجة : يالا يابنتي
الواحد مش ناقص وجع دماغ

آدم مشي وحسام لسه هيطلع خطوة لقدام جسار وقف
 في وشه : في ايه يا حيلتها ماقالك اتكل ولا لازم
 نطول ايدينا ونقل بأدبنا يعني ؟
 حسام لسه هيتكلم معاذ شده من دراعه : حسام بس،
 اهدى

بص لجسار : لمأخذه ياباشا
 جسار : لمأخذتك معاك يا شبح ، يلا اتطرقوا بقي

معاذ أخذ حسام ومشي تحت نظرات جسار اللي
 هتحرقهم وحسام كل شوية يبص وراه لحد ما
 خرجوا من المستشفى

معاذ : في ايه يا حسام ؟ انت رايح تتخانق مع الناس
 أنت اتجننت ولا ايه ؟

حسام زعق : لا ماتجننتش، بقولك دي سولاف، والله
 هي سولاف

معاذ بيحاول يتوه على الموضوع : ياعم سولاف
 مين بس مش قلنا ماتت ؟

حسام بجنون : وأنا قولتلكم ميت مرة إنها ماماتتش،
 أنا قلبي لسه بيدق يعني هي لسه عايشه ، أنا عارف،

سولاف مستحيل تموت لوحدها وتسييني ، أنا قولتها
لو متنا هنموت مع بعض

معاذ بلع ريقه وبل شفاية وهو مصدوم من صاحبة
اللي اتجنن خلاص : طيب حتى لو ماماتتش ايه اللي
هيجيبها هنا، دي سولاف بتتوه في شارع بيتنا،
هتيجي اسكندرية لوحدها

حسام بيلف حولين نفسه : ماعرفش ماعرفش، بس
وحياة سولاف دي هي

مسكه من هدومه : أنت عارف أنى مش بحلف بيها
كذب صح ؟ بقولك هي ، أنا حسيت برعشة جسمي
وقلبي لما مسكت ايدها، أنت مصدقني صح ؟

معاذ بتوتر : بص خلينا نمشي دلوقتي نخلص اللي
ورانا ونشوف الموضوع ده بعدين

حسام سابه : لا أنا هدخل اجيبها، مش همشي من
غيرها ، أنا ماصدقت لقيتها تاني

حسام مشى ومعاذ راح وراه بسرعه وقفه : يابنى
أنت اتجننت؟ أنت ماشفتش التور اللي جوا معاهم ده
؟ ده لو مسكك مش هتطلع من تحت ايده عايش
أصلا

حسام : مش مهم ، المهم اخدها

معاذ : يا حسام بقى ، طيب بص خلىنا نمشي دلوقتي
وأنا هاجي بنفسى بكرة أخلى واحد حبىبي فى
المستشفى يجيبلى اسمهم وكل حاجة عنهم، أنا لقطت
رقم الأوضة اللي دخلوها ، خلىنا بس نمشي دلوقتي
وبكرة تشوف هي فعلا سولاف ولا لا

حسام : بجد هتجيبلى كل حاجه عنهم ؟

معاذ : ايوه بجد، يلا بينا بس دلوقتي

حسام مشى بتردد مع معاذ اللي قلبه هيخرج من
مكانه من القلق والرعب ومش عارف يتصرف
إزاي ، ومش عارف اصلا ايه اللي جاب سولاف
المستشفى ديه ؟ واشمعنى فى الوقت ده بالذات ؟
ومين اللي كان معاها ده وازاي بيقول مراتي ؟ هي
اتجوزت ؟ طيب إزاي وهي لسه مرات حسام ؟ حس
ان برج من دماغه هيفرقع من كتر التفكير وفضل
يدعى ربنا يسترها عليه وعلى سولاف ويرحمهم من
تحت ايد حسام

عند دولت

أول ما آدم خرج من الاوضة لوجين جت ومعاها حد
من الحرس بيساعدها : نانا ؟

دولت : حبييتي تعالي أدخلي

لوجين قربت منها ومسكت ايدها باستها : عامله ايه
دلوقتي أحسن ؟

دولت أبتسمت : الحمد لله يا حبييتي أنا كويسه

حطت ايدها على خدها وبصت في عيونها اللي

منفوخه من العياط : قلقتك معايا ، حقك عليا يا

غاليه

لوجين هزت دماغها برفض : أنتي اللي غالية مش
أنا

دموعها نزلت : أوعي تتعبي تاني يا نانا أنا مش ليا

غيرك انتي وادم ، مش تسيبوني لوحدي كده

دولت حاوطت وشها بايديها بكل حنية : حبييتي أنا

الحمد لله كويسه ، وادم كمان موجود هنا ، هو راح

بس يشوف حاجة وجاي تاني ، ماتقلقش إحنا

معاكي

لوجين هزت دماغها بفهم ودولت لسه هنتكلم سمعت
صوت آدم بيزعق بره : خير اللهم اجعله خير ، في
ايه؟ آدم بيزعق كده ليه ؟

لوجين بتوتر : مش عارفه ثواني آشوف
دولت بخوف : لا يابنتي بلاش اخاف عليكي
لوجين : بس

دولت : هو معاه جसार أكيد هيتصرف ، استني بس
شوية

قامت من السرير ولوجين سندها وراحوا الاتنين
ناحية الباب وفعلا سمعوا صوت جसार ، وثنواني
والباب اتفتح ودخل آدم وداليدا وقفلوا الباب بسرعة

.

آدم يا دوب قفل الباب وداليدا وقعت من ايده على
الارض وفضلت تعيط بهستيريا ، وآدم نزل على
ركبه : داليدا مالك ؟

يادوب لمس كتافها لقاها اتنفضت ورجعت لورا
وبصريخ كأنها شايفة جن قدامها : أبعد عني ،
ماتلمسنيش ، لا لا ، أبعد ، ابعده ماتلمسنيش ،
ماتلمسنيش ابداء ، لااااا

داليدا ماكملتش كلامها وحطت وشها بين ايديها
 وفضلت تعيط برعب و آدم قرب منها بيحاول يهديها
 : داليدا ، داليدا اهدي ، دكتور ، لوجين نادي دكتور
 بسرعة

لوجين اتحركت بتوتر وخرجت من الاوضة بسرعة
 لقت جسر في وشها : خير يا هانم ؟

لوجين : دكتور ، دكتور بسرعة

جسر لمح داليدا اللي على الارض بتعيط و آدم
 بيحاول يهديها وراح جري جاب دكتور ورجع تاني
 ، الدكتور عطى لداليدا حقنه مهدئه عشان تنام وتبطل
 صريخ و عياط : الأستاذة عندها إنهيار عصبي
 وضغطها عالي جدا ، أنا عطتها حقنه تظبط الضغط
 والمهدئ هينيمها شوية ، سيوها وهي هتفوق
 لوحدها

الدكتور خرج من الاوضة ودولت قربت من آدم
 ومسكت دراعه بقلق : ايه اللي حصل يا آدم يا
 ابني ؟؟

آدم : نانا معلى اتصلي على هند استعجليها بيتهياي
 هتحتاجها لما تفوق

دولت لسه هتتكلم كان آدم خرج بسرعة بره الأوضة
وقفل الباب، سند عليه وجسار وقف جنبه : هو ايه
اللي بيحصل ؟

آدم هز دماغه بما عرفش

جسار : طيب و هتعمل ايه دلوقتي ؟

آدم اتنهذ : مش عارف والله يا جسار ، أنا ما عرفش
أصلا هي مالها ؟ أنت ماشفتش شكلها أول ماسمعت
صوت الواد ده، أنا ساعتها حلفت ميت يمينا ان ملك
الموت جنبها بياخد روحها و كنت مستعد تقع في اي
لحظة، شكل الموضوع أكبر من اللي أنا عارفه

جسار : يبقى لازم تفهم الموضوع كويس الأول قبل
ما تتصرف

آدم : هو ده اللي أنا ناوي عليه هند بس توصل
وهسألها اكيد هي تعرف حاجة

جسار : ولو عايز ممكن ادور ورا الواد ده ؟

آدم : ياريت يا جسار والله، الظاهر ان داليدا كانت
صح، أنا مش فاهم حاجة فعلا، بس لازم أفهم بقى
ايه الموضوع بالضبط

جسار : خلاص يبقى أعتبر شريط حياته قدامك

آدم : تمام

جسار لمح هند جاية بتجري : أهي داه هند جات
أهي

آدم اتعدل في وقفته وهند قربت وهي بنتهج : في ايه
يا آدم يابني ؟ مالها داليدا ؟ هي فين خليني اشوفها

آدم : نايمه في الأوضة جوه

فتحلها الباب وهي دخلت بسرعه شافت داليدا نايمه
وفي ايدها الكانيولا فمسكت ايدها : يا حبيبة قلبي
يابنتي ، مالك ايه اللي بيحصل فيكي ده بس ؟

.

بعد شوية آدم قرب منها : ممكن نتكلم شويه

هند بصتله : خير هو في حاجة ولا ايه ؟

آدم : اه في حاجات أنا عايز أفهمها ومافيش غيرك
انتى وهي اللي هتفهموني

هند : قول يابني في ايه ؟

آدم : تعالي بره بلاش كلام كثير حوليها خليها ترتاح
هند فهمت إنه مش عايز يتكلم قدام حد فخرجت معاه
بهدوء وهو دخل اوضة فاضيه جنبهم

هند : خير يا آدم عايز تسأل على ايه ؟

آدم قعد قصادها : حسام

هند وشها اتغير و آدم فهم إنها تعرفه : كده نتكلم على المكشوف بقى، فهميني كل حاجة، حسام ده يبقى مين بالنسبة لداليدا ؟ ومين سولاف دي ؟ أنا عايز أفهم كل حاجة دلوقتي

هند اتنهدت : مش هقدر اقولك من غير اذنها

آدم : هند انتى ماتعرفيش اللي حصل دلوقتي

حكاها عن اللي حصل : فأنا عايز أفهم بقى مين الكائن ده وليه داليدا كانت خايفه منه أوي كده ؟ عملها ايه يوصلها للحالة دي ؟ أفهم

هند اتنهدت : حاضر هقولك اللي اعرفه كله

بصتلته بتردد : حسام ده يبقى جوزها

آدم برق جامد بصدمة : جوزها !!

جسار : هي متجوزه ؟

هند هزت دماغها بتأكيد وبدأت تحكي حياة سولاف كلها زي ما هي حكتهلها بالظبط تحت صدمة آدم وجسار

جسار بعصبية : ابن ال@##\$ ده حيوان مش بنى
 آدم، وحياة ربنا أنا لو لمحتة بس بعيني تاني لأكون
 معرفه ان الله حق

آدم ساكت وبيفكر و هند مراقباه في صمت لحد ماقام
 وقف : تمام ، ارجعي لبنتك يا دادة هي مرعوبة جدا
 وبيتهايالي هتحتاجك جنبها لما تصحى

هند وقفت : أنت ناوي على ايه يا آدم ؟

آدم : ماتشغليش بالك انتى بيا روي لبنتك يلا
 هند مشت وجسار راح قعد قصاد آدم : أنت ناوي
 على ايه فهمني ؟

آدم : بيقولوا الجزاء من جنس العمل مش كده ؟
 جسار بتركيز : اه وهو عمله أسود ومهيب على
 دماغ اللي خليفوه أنت بقى هتردله ده إزاي ؟
 آدم طلع كرديدت كارد من جيبه : الأول استقر أنا في
 مكان عشان اتكتكله كده على رواقه، خد دي

جسار : ده اغراء يعني ولا رشوه ؟

آدم : لا إغراء ولا رشوة، أنا هسيب الفندق وعائز
 شقة اقعد فيها، اتصرف

جسار وقف : ايوووو على الاستغلال يا جدع

آدم : يا عم أنت لسه هتبرطم خلصلي الموضوع ده
بقي عشان اتجوز

جسار بصدمة : افندم ودي مين دي اللي هتتجوزها ؟
وعرفتها امتى أساسا وأنا ماعرفش عنها حاجة ؟

آدم : داليدا

جسار تنح : نعم ! ايه ! مين ؟ مش دي متجوزه ولا
أنا بيتهياي؟؟ هتتجوزها إزاي بقي أنت بروح أهلك
؟؟

آدم أبتسم : أنا قولت سولاف؟ أنا قولت هتجوز داليدا
ماجبتش سيرة سولاف خالص

جسار فهم قصده : ااه، أنت كده ماشي في سكة غلط
يا آدم

آدم : ماتحبكهاش بقي، هما ورقتين مضروبين عشان
اعرف بس اتحرك براحتي وماحدش يقدر يقولي
تلت التلاته كام

جسار : ده تزوير

آدم : بقولك ايه أعمل اللي بقولك عليه وأنت ساكت،
أنا قولتله إنها مراتي ومتأكد إنه هيدور ورانا فلان
احبكها صح

جسار رفع كتافه : خلاص ماشي طلا ما مش هتعمل

حاجة غلط يبقى واي نوت

آدم أبتسم : أهو كده تعجبني

اخده تحت دراعه: يلا بقى خلصلي اموري أنت مش

شاييف ان أنا عريس ولا ايه ؟

جسار ضحك جامد وهو بيخبطه على ظهر آدم :

أنت يالا كدبت الكدبه وصدقته ولا ايه ؟

آدم ضحك : خايني أعيش اللحظة الله أعلم هشوفها

في يوم ولا لا

جسار : هشوفها بإذن الله وهتقول جسار قال

آدم سكت وبيقول جوا نفسه : يارب يا جسار

جسار : يا عم ماتوسع بقى ظهري اتقطم ايه الرخامه

دي

آدم ضحك وسابه : ماشي يا عم

جسار خرج من الاوضة وراح ينفذ اللي آدم عايزه

وآدم قعد مع نفسه شوية يفكر هيعمل ايه ، لازم

الأول يعرف كل حاجة عن حسام ده ، لازم يعرف

نقط ضعفه اللي يدخله منها، بس يظمن دلوقتي على

داليدا وبعدها يشوف هيعمل ايه

بعد شوية ساعات آدم رجع لاوضة دولت تاني ،
 وأول ما دخل لقي داليدا صاحيه وقاعده على السرير
 وعماله تشد في المحاليل اللي في ايديها بعنف لدرجة
 إنها اتعورت وجسمها بيرتجف : أنا لازم أمشي من
 هنا، أنا همشي من هنا

هند بعياط : يا بنتي حرام عليكى اللي انتى بتعمليه
 في نفسك ده

داليدا بتهز دماغها برفض وصدرها بيعلى ويهبط
 بسرعة : لا أنا عايزة أمشي سيبوني أمشي

آدم راح وقف قدامها : وهتمشي تروحي فين ؟

داليدا بصتلته : اي حته المهم أمشي، أنا ماينفعلش اقعد
 هنا أكثر، ماينفعلش ياخدني تاني

آدم اتتهم بعنف : حاضر يا داليدا هنمشي ، يلا يا
 جماعة

دولت : احنا هنمشي بجد ؟

آدم : ايوه يلا ، هند معلش خليهم يجهزوا أنا هروح
 اخلص اجراءات الخروج وراجع

آدم خرج وهند ساعدت دولت تجهز هي وداليدا وبعد
شوية آدم رجع تاني : يلا

كلهم قاموا معاه وداليدا قامت ورجليها بيخبطوا في
بعض ومشت ببطئ و آدم ماشي جنبها على نفس
خطوتها ، ركبوا كلهم عربية آدم اللي اتحرك وخرج
من المستشفى ومسك فونه رن على جيسار : ايوه يا
جيسار فينك لقيت ___ تمام ماشي هوصل دولت
ولوجين وجاي

آدم ساق للقصر وبص لدولت : حبييتي أنتي كويسه
صح ؟

دولت : ما تقلقش عليا يا حبيبي أنا كويسه

آدم : معلىش حقاك عليا هاخذ منك هند وداليدا يومين
كده هتقدري تقعدني لوحدك ؟

دولت : ماتخافش يا حبيبي أنا معايا لوجين هناخذ
بالنا من بعض مش كده يا لوجين ؟

لوجين هزت دماغها : ايوه كده، ابيه مش تخاف أنا
هعرف أخذ بالي منها

آدم أبتسم : حبييتي أنتي يا لوجي والله، هعتمد عليك

لوجين عينيها لمعت بسعاده وأبتسمت وهزت دماغها
 بموافقة واخذت دولت ونزلوا، أول ما دخلوا من باب
 القصر آدم اتحرك بالعربية وراح عند جسر اللي
 كان في واحده من الأماكن الراقية في الإسكندرية
 واقف قدام برج على التراز الكلاسيكي القديم ، نحت
 وزخرفة عريقه وشبابيك خشب كبيرة تستشعر
 الهدوء والراحة من مجرد النظر ليها

جسار أول ما شاف عربية آدم اتعدل وراح ناحيته
 آدم نزل من العربية وبص لجسار : هنا ؟

جسار : اه، الدور الأخير، هي واخده الدور كله
 لوحدها، أنا جهزتهالك من كل حاجة، وجبت ناس
 تنضف كمان

آدم : كل ده في كام ساعة بس ؟

جسار : يابني وهو أنا أي حد ولا ايه ؟

آدم ضحك : لا أنت أكبر نشال فيكي يا ايطاليا

جسار ضحك : أنت لسه فاكِر ؟

آدم : وهي دي أيام تتنسي ؟

بص على البحر : حلوة كمان على البحر على طول
 ، برافو يا جسار

راح فتح الباب لهند : يلا يا هنوده ولا ايه ؟

هند : إحنا فين يا آدم ؟

آدم أبتسم : مخبأنا السري يلا انزلوا

هند وداليدا نزلوا من العربية وكلهم طلعا على
الشقة فوق

هند : بسم الله ما شاء جميله جدا يا آدم الشقة ربنا

يباركلك فيها يا حبيبي

آدم : يارب

كمل وهو بيخطف نظرات لداليدا : ويباركلي في

أهلها كمان

جسار كتم ضحكته وبعدها شاور لهند على اوضة :

هنود الأوضة دي بتاعتكم ، جاهزه من كل حاجة ،

لو حابين تريحوا شوية

هند : وايه لزمته كل ده مش فاهمه ؟ ايه اللي يقعدنا

هنا في حين القصر موجود ؟

ادم : هنا أمان أكثر

هند رفعت حاجبها باستغراب : هنا أمان أكثر من

القصر ؟ اللي متلغم حرس وكلاب بوليسي ؟

آدم لعب في شعره بإرتباك : اه ، اصل أصل ، أصل
هو يعني القصر مكان معروف برضه وكده وأي حد
يقدر يوصله أما هنا لأ

هند : والله ؟

آدم : اه والله ، يلا بقى روحوا ارتاحوا وماتشغلوش
بالكم بحاجة

هند : ماشي يا حبيبي ، يلا يا داليدا يا بنتي قومي
معايا

داليدا قامت وراحت وقفت قدام آدم : مش أنت
عرفت كل حاجة قولى بقى أنا المفروض هعمل ايه
دلوقتى ؟

آدم بحنيه: دلوقتى هتدخلي ترتاحي شويه وماتفكريش
في اي حاجة، من دلوقتى أنا اللي هتصرف
ماتشغليش بالك انتى

داليدا : وهنتصرف إزاي يعني مش فاهمه ؟

آدم : مالكيش فيه انتى بقى

داليدا : ماليش فيه إزاي وهو موضوعي أنا وبعدين
أنت ماتعرفش حسام كويس حسام وصل بيه
الموضوع للقتل فده مجرم أنت مش _____

آدم قاطعها : أنا عارف كل ده وبرضه هقولك تاني
ماتقلقيش أنا هتصرف ، اقعدني انتي على جنب
وسيبيني أنا أتعامل معاه

داليدا فضلت بصاله بصمت وهو أبتسم : ثقي فيا مرة
واحد بس في حياتك

داليدا قلبها كان مطمئن بوجوده فعلا وحاسه باحتوائه
ليها فهزت دماغها : أنا واثقة فيك

آدم أبتسم : جميل أوي كده، دلوقتي بقي اتفضلوا
ارتاحوا البيت بيتكم

بص لجسار : أنا وجسار ورانا كام حاجة كده
هنعملها ، فخدوا راحتكم على الآخر وماتقلقوش
الحرس ملغم المكان، يلا يا جسار بينا

جسار مشي وآدم راح غير هدومه ونزل وراه

جسار : هنروح فين دلوقتي ؟

آدم : نخلص الورق الأول

ركبوا العربية وراحوا يخلصوا الورق اللي آدم
عايزة ورجعوا تاني عند شقة آدم

جسار ركن العربية وبص لآدم : ها وبعدين هتعمل
ايه ؟

آدم : عايزك تبعت حد يعرفلي مكان الواد ده
ويعرفلي كل تحركاته

جسار : أنا بعت واحد وراه فعلا من ساعة ما كنا في
المستشفى ، قاعد هو واللي معاه ده في لوكانده في
بحري

آدم : ايوووو قريب أوي مننا، المهم هو بيعمل ايه
هنا ؟ الأکید انه ماكانش يعرف مكان داليدا لانه
اتصدم أول ما شافها

جسار : جاي هنا لاجتماع لمجموعة من مدربين
ألعاب كمال الاجسام، حاجة كده تبع شغله

آدم هز دماغه بفهم : اللي معاه ده اسمه معاذ مش
كده ؟

جسار : اه دكتور

آدم بصله : دكتور ؟ تفتكر ده معاذ اللي هند قالت
عليه ؟

جسار : غالبا اه، يعني صاحبه ودكتور وكمان شكله
يعرف داليدا فغالبا هو

آدم : غريبه، اللي أنا فهمته إنه هو اللي هرب داليدا،
بيعمل ايه بقى تاني مع الواد ده ؟

جسار : مش عارف يا آدم والله، عموما حسام ده
هيروح طنطا كمان يومين

آدم : ماتفرحش أوي كده، هيرجع تاني ده لو روح
أصلا ، باللي عرفته عنه مستحيل يسيبها تفلت من
تحت ايده كده بعد ما لقاها

جسار : والحل ؟

آدم : عايزينه بقى يقتنع إنها داليدا مش سولاف ويبعد
عنها بهدوء

جسار : ليه ؟

آدم : عايز ادور وراه واجيب كل جرايمه بس ده
عايز وقت فلازم نبعده عنها على قد ما نقدر ونكسب
وقت

جسار : ولو ماقتنعش ؟

آدم بنرفزة : نقنعه بالعافية يا جسار ، أنا لو عليا
عايز امسكه افرمه وماسك اعصابي بالعافية ، عايز
اطلقها منه بس خايف لو عملت كده دلوقتي يتأكد إنها
سولاف ويعمل فيها حاجة

جسار : طيب ما تتزرزرش عليا كده ، وبعدين
خايف ليه ؟ أنت بس شاور وأنا هروح اكسر هوك
واجيبه تحت رجلك

آدم أخذ نفس طويل ونزل من العربية راح قعد على
سور الكورنيش الطوب وربع رجليه : عارف يا
جسار ؟

جسار نط قعد جنبه : اممم ؟

آدم: ساعات بحسبك على قلبك الجامد ده، أنت عندك
أستعداد ترمي نفسك في اي حاجة ولا بيتهزلك شعره
أما أنا لا ، أخاف ، بخاف أوي لو عملت حاجة في
حد يرد هالي في الناس القريبه مني عشان كده عمري
مابدأت الاذي ابدا ، دايمًا بيكون ردي على حاجة
هما عملوها الأول رد فعل يعني، وساعتها ماحدث
يقدر يعمل حاجة

جسار طلع مصاصة من جيبه وفتحها حطها في بوءه
: عارف أنت بقي ؟

آدم : امممم ؟

جسار : أنا بخاف برضه ، عليك وعلى هند ودولت
، ماتنساش إنكم كل حاجة ليا في الدنيا دي
وعوضتوني كتير بس دي عادتي من وأنا صغير

أنت عارف مش بعرف اخطط ولا اتكتك كده زيك ،
 متعود أخذ حقي بدراعي على طول مهما كان رد
 فعل اللي قدامي ايه ، بس دي الفكرة
 آدم سكت شويه وبعدها حط ايده على خده وبصله :
 أنا بفكر في حاجة

جسار : قول

ادم : إحنا هنروح فين دلوقتي ؟ هند وداليدا قاعدين
 في البيت فوق إحنا هنروح فين بقي ؟

جسار ضحك : فندق يا حلو

آدم : أستغفر الله، هو أنا طالع من فندق أرجع فندق
 تاني

جسار : اه، عشان انا جببتك الشقه دي وأنا مش
 راضي عنك، شوفت بقي آخرة اللي يزعلني ايه ؟
 آدم : يا راجل! طيب صدقني مانا مهنك بقي وروح
 دورلنا على فندق نقعد فيه يلا

جسار : أنت رخم يالا والله

لف في قعدته وعطى ظهره للبحر وشاور : شايف
 الفندق ده ؟ هنقعد فيه ، ما هو أحلى حاجة هنا بقي
 ان كل حاجة متاحه قدامك

آدم بص وراه : تصدق فعلا

الاتنين ضحكوا وفضلوا يتكلموا شوية مع بعض

في الشقة فوق داليدا دخلت اوضتها غيرت لبسها
ولبست بيجامه من بتوع آدم وكانت كبيره اوي عليها
، بصت لايديها اللي مش باينه من كم الهدوم
وأبتسمت ورفعت الكمام شوية وراحت فتحت القرندا
وبصت على البحر الصافي قدامها على مد البصر
واخذت نفس طويل بتلمي رئتها بريحة البحر يمكن
ترتاح شوية، لمحت آدم وجسار تحت قاعدين في
الشارع وجسار بيعزم على آدم بمصاصه

أبتسمت وقعدت تبص عليهم أو على آدم بمعنى أصح
: يا ترى لو ظروفى كانت مختلفه عن كده كانت
حياتنا هتكون إزاي ؟ بس اسفه أنا مانفكش ابدأ،
أنت تستاهل واحده أحسن منى، واحده حياتها مش
كارثية زي

بصت في الارض بحزن : واحده تكون أنت أول
راجل في حياتها ، وأول راجل يلمسها ، مش زي
ابدا

حطت ايدها على قلبها وفضلت تطبطب عليه بوجع :
 عارفه إنك موجه أوي بس مش في ايدي حاجة
 اعملها، هو مش من حقنا ابدأ، مش من حقنا نحب
 واحد زيه

حطت ايديها على وشها وبدأت تعيط : بس انا بجد
 حبيته ، أتصرف إزاي أنا دلوقتي ؟

هند كانت واقفه على الباب وسمعتها وهي بتكلم
 نفسها وزعلت عليها، يعني اخيرا بعد ما الحب دق
 بابها من راجل يستاهل بجد تكون دي ظروفها؟
 انسحبت بهدوء وقعدت بره وفضلت تدعيها من كل
 قلبها

تاني يوم معاذ راح المستشفى بتردد ومش عارف
 يتصرف إزاي ، رجع بذاكرته لورا وافتكر من
 اسبوعين لما عرف ان حسام هيسافر اسكندرية
 عشان شغله وكان متوتر جدا وخايف على سولاف ،
 منى مراته دخلت عليه الأوضة لفته ماشي فيها رايح
 جاي بتوتر فوقفت قدامه : في ايه يا معاذ أنت مالك
 مش متظبط بقالك يومين ؟

معاذ قعد على السرير وبصلها : حسام هيسافر
اسكندرية

منى كشرت : طيب مايسافر ولا يروح في ستين
داهية تاخده أنت شاغل نفسك بيه ليه ؟

معاذ مسك كتافها وقال بنرفزة : أنا مش شاغل نفسي
بيه الفكرة إنه رايح اسكندرية

منى : مش فاهمه يا معاذ ما يروح فين المشكلة ؟
معاذ بتردد : س، سولاف هناك

منى برقت جامد : وأنت عرفت منين ؟
معاذ بلع ريقه : أنا اللي وودتها

منى : يعني ايه أنت اللي وودتها ؟

معاذ : يوم ما هربت أنا قابلتها في الشارع واخذتها
معايا وودتها هناك

منى : يا نهارك مش معدي يا معاذ ، طيب إزاي
وأنت كنت ساعتها في العمليات ؟

معاذ : كدبت ، قولت كده عشان اعرف اوديتها
وارجع

منى : وماقتلش ليه كل ده ؟

معاذ : ماكنتش عايز حد يعرف ، خوفت حسام

يعرف حاجة فسكت وخبيت جوايا

منى : طيب ولو عرف هتعمل ايه ؟ قولتلك ميت مرة

صاحبك ده مجنون وبلاش توقع نفسك معاه

معاذ زعق : كنتي عايزاني أعمل ايه يعني ؟ انتي لو

كنتي شوفتي شكلها يوميهما كنتي عملتي نفس اللي أنا

عملته

منى زعقت هي كمان : برضه وأنت مالك بيهم ده

واحد ومراته إحنا مالنا ؟

معاذ قام وقف : يعني ايه يا منى ؟ دي اختي

منى : لا مش اختك يا معاذ

معاذ زعق : حتى لو مش اختي يا منى أنا بعتبرها

كده ، وبعدين _____

صدره بدأ يعلى ويهبط بسرعه بغيط : وبعدين انتي

ماتعرفيش ابن ال @\$ عمل فيها ايه ، أنا لما سألت

على حالتها في المستشفى متخيله قالولي اي ؟ حد

مغتصبها كذا مرة وعندها تهتك في الحوض وكذا

ضلع في القفص الصدري مكسور ، انتي متخيله لما

واحد تطلع من بيت جوزها بالشكل ده يبقى كان

بيعمل فيها ايه؟؟ إزاي كنتي عايزاني اسببها يعني
؟؟

منى حطت ايديها على بوءها بصدمة : طيب وهي
كويسه دلوقتي ؟

معاذ : مش عارف

منى : إزاي مش عارف مش أنت اللي ودتها هناك
أكيد كنت بتظمن عليها ولا سبتها في الشارع

معاذ قعد جنبها : أنتي فاكره دكتور على
الغرباوي ؟

منى : مين ده ؟

على : يا بت دكتور على اللي قابلناه قبل كده في
مؤتمر الطب الدولي

منى : اه ايوه ايوه على بتاع اسكندرية

معاذ : ايوه هو ده ، قابتلته قبل كده في كذا حمله
تطوعيه وبقينا صحاب أوي ، وكان بيحكيلي دايم
عن واحد صاحبه اسمه إسلام يعرفه من أيام اعدادي
كان بيحكيلي كتير اوي عنه وعن والدته الست
الطيبه اللي عايشه لوحدها من ساعة جواز ابنها ،
المهم أنا يوميا لما شوفت سولاف وكنت عايز

ابعدھا عن حسام مالمقتش غير الحجة دي اوديھا
عندھا ومن ساعتھا وهي معاھا

منى : طيب اديك أھو تعرف مكانھا في ايه بقى ؟

معاذ بصلھا : لا مش عارف مكانھا ، أنا روجت
البيت عندها ومالمقتش حد ولما سألت على قالي إنها
بتشتغل وكثير بتبات عند الناس اللي بتشتغل عندهم
بس هو مايعرفش هي بتشتغل فين وخوفت الح في
السؤال يفهمنى غلط وأنا دلوقتي مش عارف هي فين
ولا بتعمل ايه ولا إذا كانت عايشه اصلا ؟؟ مش
عارف

منى : لا حول ولا قوة الا بالله ، وأنت هتعمل ايه
دلوقتي ؟

معاذ : أنا دلوقتي لازم أروح اسكندرية، ماينفعش
اسيب حسام لوحده هناك ، افرضي لقاها أو قابلھا
صدفه

منى : طيب هو رايح عشان شغل أنت هتروح ليه ؟

معاذ : شغل برضه ، هقوله عندي اي شغل في أي
مستشفى هناك وخلص ، المهم إنه مايبقاش لوحده

منى قربت منه أوي بخوف : بس يا معاذ ، أنا خايفه
عليك ، الراجل ده وحش أوي أخاف ياذيك

معاذ حضنها جامد : ماتخافيش ، أنا معايا ربنا ،
ادعيلي انتى بس وادعي ربنا يسترها على سولاف
مكان ما هي دلوقتي

منى اتعلقت في حضنه : ربنا يحفظك ليا يا حبيبي،
وابقى طمني عليك ، أنا هرن عليك كل شوية ابقى
رد عليا

معاذ باسها : حاضر يا حبيبي ماتخافيش

وفعلا معاذ جهز نفسه وسافر مع حسام وقعدوا كذا
يوم في اسكندرية لحد ما في يوم وفي واحد من
الإجتماعات واحد استفز حسام بالكلام وحسام رد
عليه فهو غلط فيه فقام حسام اتخانق معاه وفين وفين
لما الناس عرفوا يفكوهم من بعض ومعاذ اخذ حسام
وراح اقرب مستشفى منهم عشان يعالج جروحه
وللأسف دي المستشفى اللي سولاف كانت فيها
وحصل اللي حصل

معاذ فاق من سرحانه على صوت موظفة الإستقبال
: أتفضل يا فندم حضرتك عايز تسأل عن ايه ؟

معاذ حمم : أنا ، هو أنا كنت عايز اسأل عن
المريض اللي في اوضة ٢٠١

الموظفة دورت شوية في الكمبيوتر قدامها : للاسف
يا فندم المريضة دي سجلت خروج امبارح

معاذ : خرجت ! طيب هو يعني ممكن تقولي اسمها

الموظفة بصتله بشك : حضرتك المريضة دي من
الطبقة المخملية وبياناتنا كلها مشفرة ، اسفه

معاذ استغرب جدا ايه اللي وصل سولاف للطبقة دي
؟ معقوله تكون مش سولاف فعلا ؟ بس إزاي هو
متأكد إنها هي

أخذ بعضه ومشى وأول ما طلع من باب المستشفى
في واحد لابس بالطو دكتور وقف قدامه : أهلا

معاذ باستغراب : اهلا خير ؟

الدكتور : خلينا ندخل في الموضوع على طول من
غير مقدمات ، سمعتك وأنت بتسأل عن الأوضة
٢٠١ ، أنا كنت دكتور الحالة دي واقدر أساعدك

معاذ بصله بقلق : وده ايه المقابل بتاعه بقى ؟

الدكتور ضحك : أكيد في مقابل ، أنا مش هساعدك
 كده لله وللوطن ، الظاهر ان الموضوع ده يهيك أوي
 ، فشخل جيبك كده هتلاقي كل اللي أنت عايزة
 قدامك

معاذ اتردد شوية بس فضوله خلاه يطلع فلوس فعلا
 وكان مبلغ محترم وقبل ما الدكتور يمسك الفلوس
 معاذ سحب ايده : تقولي اللي أنا عايزة الأول ، أنا
 ايش عرفني إذا كنت بتكذب ولا لا

الدكتور ضحك جامد : حقك ، شوف يا سيدي الحالة
 اللي كانت محجوزة في الأوضة دي إسمها دولت
 هانم

معاذ : دولت مش داليدا ؟

الدكتور : لا ، دولت هي اللي كانت محجوزة ودي
 من عيلة كبيرة أوي عيلة هارون، اكيد سمعت عنها
 قبل كده اما بقى داليدا دي فهي الهانم الصغيرة مرات
 حفيد الست الكبيرة وسمعت إنهم هيعلنوا عن
 جوازهم قريب

معاذ : ثانية كده عشان انا توهدت ، يعني داليدا دي
 تبقى زوجة حفيد العيلة صح كده ؟

الدكتور : اه صح

معاذ : طيب وايه كمان ؟

الدكتور شد الفلوس من ايد معاذ : مافيش هو كده بس، الاحفاد جم يطمنوا على الهانم الكبيرة عشان ضغطها كان عالي شوية ومشوا امبارح روحوا

معاذ بتحذير : عارف لو كنت بتكذب عليا

الدكتور : وأنا هكذب عليك ليه وعموما تقدر تروح تسأل وتتأكد ده لو حد رضى يقولك حاجة أصلا

.

الدكتور ضحك وسابه ودخل المستشفى تاني ومشى لحد آخر الطرقة وطلع من الباب الخلفي للمستشفى وقلع البالطو رماه في الزباله فظهرت هدومه السوداء وعضلاته الكبيرة ومشى شوية راح عند رصيف كانت في ست غلبانه قاعده جنبه بتبيع مناديل وراح قعد جنبها : إزيك يا حجة ؟

الست بصتله باستغراب فهي ماتعرفهوش : إزيك يابني ؟

الشاب طلع ظرف ابيض كبير محطوط فيه حاجة : اتفضلي

الست أخذت الظرف باستغراب وفتحته لقت فيه
فلوس كثير بصت جنبها مالمقتش الشاب بس فضلت
تدعيه بدموع ربنا يبارك فيه ويوسع رزقه

أما الشاب بعد ما عطى الفلوس اللي اخدها من معاذ
للست الغلبانه راح ركب عربية سودا وطلع فونه
ورن على جسار : باشا

جسار : ها عملت ايه يا لؤي ؟

لؤي : كله تمام يا باشا كل حرف قولتهولي قولته
للدكتور بالظبط

جسار أبتسم : حبيبي يا لؤي تسلم ، كمل بقى زي
ماحنا كده خلي حد يوصله القسيمة الفيك دي ، إزاي
ماعرفش المهم توصلهم

لؤي : ماتقلقش يا باشا كله تحت السيطرة

لؤي قفل مع جسار وطلع نظارة سودا لبسها وساق
العربية لحد مكان زمايله اللي بيراقبوا معاذ وحسام
عشان يكملوا الخطه المتفق عليها

حسام كان قاعد في اوضته في الفندق وعمال يهز
رجله جامد بتوتر و عصبية مستني معاذ اللي أتأخر
جدا من ساعة ما خرج الصبح ومدايق وندمان انه
ماراحش معاه، شويه والباب اتفتح ودخل معاذ
بملاح مش مفهومه فقام بسرعه مسكه من كتافه :
ها عملت ايه ؟

معاذ بعده عنه : ولا حاجة يا سيدي قولتلك مش هي
ومارضتش تصدق

حسام : يعني ايه بقى ؟ أنا متأكد إنها سولاف

معاذ رمى ورقه في وشه وزعق : وأنا بقولك مش
هي ، دي واحده اسمها داليدا المصري تبع عيلة ثقيلة
أوي هنا إحنا حتى مانجيش قد ظفرهم الصغير ودي
تبقى مرات الحفيد الكبير للعيلة يعني نحمد ربنا انهم
سابونا نمشي ساعتها وماقتلوناش مكاننا على وقفنا
قصادهم ، والورقه اللي معاك دي أنا خلّيت واحد
يدورلي عليها ودفعت دم قلبي عشان اجيبها ، قسيمة
جوازهم قدامك مش بكذب عليك أنا

حسام أخذ الورقه وبص فيها وهو بيهز دماغه
برفض ومعاذ راح مسك كتافه : حسام أنساها بقى ،
أنت عارف أنى كمان كان نفسي تكون هي بس نعمل

ايه ، سولاف خلاص انتهت خلينا ننساها بقي ، يلا
قوم جهز شنطتك إحنا لازم نتحرك دلوقتي قبل الليل
يليل علينا

معاذ سابه وراح يجهز شنطته هو كمان وهو جواه
متأكد ان داليدا دي تبقى سولاف بس إزاي مايعرفش

وحسام بعد ما بص في الورقه كتير قطعها بعصبية
ميت حته ورمها في الباسكت وراح يجهز شنطته
وهو حرفيا بيتخاقق مع دبان وشه

بعد ساعة تقريبا كان الإثنين خلصوا وركبوا عربية
معاذ وفي طريقهم لطنطا مرة ثانية

تاني يوم الصبح آدم خبط على باب شقته لحد ما هند
فتحتله : حبيبي صباح الخير

آدم : صباح النور ايه ساعة على ماتفتحوا ؟
هند ضحكت : أصل الشقه حلوه أوي يا آدم وهاديه
كده وهواها يرد الروح الواحد نام ماحسش بنفسه
والله

آدم أبتسم : يا حلاوة لا ده انتوا تدفعوا اجار القاعده
بقي

هند ضحكت وضربته في كتفه : جاك ايه يا آدم ،
ربنا يهديك يا بني

آدم بجديه : يارب، المهم يلا عشان هتروحوا القصر
النهارده

هند : أنت متأكد ؟

آدم : اه ماتقلقيش حسام روح طنطا خلاص

هند : طيب ماشي هروح اصحي داليدا وأقولها تجهز

آدم : هي لسه نايمة لحد دلوقتي ؟

هند بشفقه: اه يا حبة عيني فضلت سهرانه كثير تتقلب
في السرير وفين وفين لما نامت

آدم بعطف : خلاص يا أمي سيبها نايمة وتصحى
براحتها لما ترتاح ماتستعجلوش إحنا مش ورانا
حاجة

هند أبتسمت على حنيته وحبه : ماشي يا بني

آدم اخذ بعضه ونزل وهند راحت تجهز حاجتهم لحد
ماداليدا صحيت وبلغتها تجهز ، وبعد شوية الباب

خبط و كان دليفرى من مطعم آدم جايبيلهم آكل ، بعد
ما خلصوا آكل آدم وجسار ولؤي طلعو الهم تاني

آدم : يلا يا شباب

هند : يلا إحنا جاهزين أهو

آدم بيشاور على لؤي : هنود ده لؤي هيفضل معاكم
زي ضلكم هو وكام راجل تاني

هند : ليه يابني تتعب الناس معانا وهو القصر كان
ناقص حرس ؟

آدم : معلىش ده عشان ابقى مطمئن بس وبعدين ده
عيني في القصر عشان اعرف الأفاعي والعقارب
بيعملوا ايه من ورايا

هند : ماشي يابني

لؤي قرب منهم واخذ شنطهم الصغيره : اتفضلوا يا
هوانم

هند : لا هنبتيها من أولها هانم وماهانمش هسيبها لكم
وامشي

لؤي استغرب و آدم وجسار ضحكوا

آدم : بص يا لؤي ، هند ممكن تقولها أمي هنود هند
 كده أي حاجة الا هانم دي بتجيلها حموضه بسبب
 ناس كده

آدم كان بيتكلم على فيري ولؤي هز دماغه بفهم
 واخذهم ومشى

عدى كذا يوم والجو كان مستقر وداليدا وهند مكملين
 حياتهم الروتينية بهدوء ، اللي زاد بس وجود لؤي
 وتعلق لوجين الكبير بيه وهو كمان بدأ يميل ليها
 ويعجب بيها

فيري كانت قاعده في اوضتها وهي حاطه رجل على
 رجل وبتخبط بضوافرها الطويلة على الترابيزة
 جنبها بكل غيظ وهي بتكلم نفسها : أنا خلاص زهقت
 واتخنقت اففف ، لا وكمان البت المستفزة دي اللي
 رجعت تاني ماصدقت دولت رجعت من غيرها
 وقولت خلاص غارت ، ايه اللي رجعتها بس تاني ؟
 لا وراجعته مع حرس كمان كنت ناقصه هم انا

سمعت صوت عربية تمارا اللي جاية من بره فنزلت
بسرعه لتحت واستقبلتها على الباب : تمارا حبيبتي
تمارا : مامي بليز أنا مصدعه ومش عايزة أتكلم
خالص دلوقتي

فيرى مسكت ايدها : انتى هبلة يا بت ، إحنا لازم
نقعد مع بعض نفكر هنعمل ايه فى المصيبة الجديده
اللى اتبلينا بيها دي
تمارا : مصيبة ايه ؟

فيرى بغىظ : داليدا هانم ياختى
تمارا باستغراب : مالها دي كمان ؟
فيرى : هو ايه اللي مالها! انتى يا بت هتفضلى طول
عمرى غبية كده ؟

تمارا بضيق : طيب فهميني فى ايه ؟
فيرى شدتها وراها وراحوا قعدوا لوحدهم : فى ان
البت دي خطر علينا كلنا

تمارا : إزاي خطر علينا يعني مش فاهمه ؟
فيرى : انتى أكيد غبية ، يعني انتى عمرى ماسألتي
نفسك هو ليه آدم رفضك وفشكل الخطوبة ما هو
بسببها

تمارا بتركيز : بسببها ليه هي عملت ايه ؟

فيري حست ان تمارا بدأت تقع في شباكها : أكيد
لفت عليه واكلت عقله ، وانتى قولتي قبل كده البت
حلوه وصوتها بيسحب اللي قدامها

تمارا : طيب مانتي قولتي ان مستحيل آدم يبصلها
؟

فيري : كنت فاكراه كده أنا ايش عرفني بقى إنه طلع
رمرام وذوقه بلدي بالشكل ده وبعدين انتى مش
شايفه الحرس اللي باعتهم مخصوص عشانها ؟

تمارا : طيب والعمل ؟

فيري : لازم تخلصي منها طبعاً ، ارميلها شوية
فلوس وخليها تبعد تهدديها بقى ان شالله تعمليلها
حادثه وتغور في ستين داهية فيها

تمارا خافت وفيري حست بده فمالت عليها تبخ سمها
في ودنها : اوعي تنسي إنها بقالها يومين مختفية هي
وهو والله اعلم كانت بتعمل ايه معاه واكيد امها
مداريه عليها تلاقيه رمالها شوية فلوس عشان يتسلى
ببنتها شوية، هي كده هند تحب الفلوس زي عينيها
وبنتها طلعالها، اكيد هي من البداية جاية هنا عشان
فلوس آدم

تمارا كانت مصدومه وهي بتتخيل ان داليدا و آدم
كانوا فعلا مع بعض اليومين اللي عدوا

فيري مسكت ايديها جامد: انتى لازم تنتقمى لكرامتك
اللي آدم بعترها بسبب الحثالة دي اوعي تنسى إنها
من ساعة مادخلت القصر ده و آدم منفضلك
وماتنسيش انه مره كان هيضربك لما شفتيها في
حضنه و كمان القلم اللي ضربهوك قبل ما يمشي ،
انتى لازم تنتقمى يا تمارا من كل اللي اهانوكي
واولهم داليدا دي

تمارا قامت و قفت بغل و طلعت على اوضتها وهي
بتهد الأرض تحت رجليها من خطواتها العصبية
وفيري ابتسمت بانتصار و رجعت ظهرها لورا وهي
بتحط رجل على رجل بكبر و بتربع ايديها : مابقاش
أنا فيري لو ماخلصتش منك ، ما هو أنا ماخلصتش
من جمالات عشان تطلعي جمالات جديده و انتى
شبهها أوي في كل حاجة ، جمالها ورقتها و قلبها
التافه ده

قامت و قفت : أنا هي الهانم ست القصر ده و ماينفعلش
يبقى فيه حد أحسن مني فيه

ضحكت بشر وطلعت على اوضتها بتخطط لضحيتها
الجديده اللي هتخلص منها

عند آدم

كان قاعد مع جسار بيتكلموا : جسار عايزك بقى
اليومين دول تدورلي كويس أوي ورا حسام ده ،
عايز كل الاثباتات على جرايمه كلها ، ضرب وقتل
، كل حاجة ،

جسار : تمام ماشي بس هتعمل بيهم ايه دول ؟
آدم : هسلمهم للناييه هعمل بيهم ايه يعني ، أنا أصلا
مش فاهم حاجة زي دي إزاي فانت على الدكتور
معاذ ده، يعني الطبيعى واللي أي حد عاقل
المفروض يعمله إنه أول ما يشوف منظر سولاف
كده ياخذها على اقرب قسم ويعمل محضر على
طول

جسار : معلىش برضه في ناس لما بتتخط في موقف
صعب بيتلبشوا ومش بيعرفوا يتصرفوا بالعقل يعني
هو تلاقيه شافها هربانه بمنظرها ده أول حاجة جت

في باله إنه يبعتها عن المكان واللي فهمته انه
ماعرفش يشوفها بعدها لفترة طويلة

آدم هز دماغه بفهم : مش مشكله ملحوقه ، إذا كان
هو ماعملتش حاجة أنا اللي هعمل وهوصله للبدلة
الحمرا بزفه كمان

جسار : انت عارف ان كل ده حصل من يجي سنتين
يعني هحتاج وقت لحد مانعرف نوصل للادله دي
آدم : كل الوقت معاك يا جسار المهم نوصل ونخلص
بقي من الواد ده

جسار : ماتقلقش هنخلص منه بإذن الله

آدم : قولي بقي لؤي كلمك

جسار : اه ، كل حاجة تمام والوضع مستقر ومافيش
اي قلق

آدم استريح في قعدته ورفع الهاي كول على وشه
وغمض عينيه بيفتكر ملامح داليدا وصوتها اللي لسه
بيتردد في عقله

وجسار سابه براحته وقام دخل اوضته

عدى كذا يوم من الاحداث دي وفي يوم دولت و هند
 وداليدا ولوجين كانوا قاعدين الصبح بدري في جنينة
 القصر تحت شجرة كبيرة جدا ومعاهم لؤي وواحد
 تاني من الحرس ، والباقيين متفرقين في القصر من
 كل مكان

دولت كانت قاعده على كرسي مريح وداليدا قاعده
 جنبها على الزرع وبتقرأها كتاب زي عاداتها و هند
 قاعده بتسمع معاها ، ولوجين قاعده جنب لؤي
 وماسكه ايده بترسم عليها ساعه وهو كان أتعود على
 حركاتها الطفولية دي خلاص وكان مبسوط بقربها
 منه كمان فسابها تلعب براحتها

قاطع هدوئهم واحد من حرس القصر اللي قرب من
 لؤي : باشا في قلق عند البوابه الرئيسية ، ممكن
 تيجي دقيقه

لؤي قام بقلق وبص للبودي جارد التاني : عينك
 ماتترفعش من عليهم

البودي جارد : أمرك يا باشا

لؤي مشي خطوتين لقي لوجين قامت معاه ومسكت
 طرف الجاكيه بتاعه : أنت هتمشي ؟

لؤي أبتسم وطبّط على شعرها بحنية : ثواني
وراجع

سابهم ومشى ولوجين وقفت تراقبه لحد ماخنتى من
قدام عينيها فقعدت مكانها بتبص للطريق اللي مشى
منه تستناه يرجع تاني

عدى شوية وقت وحت واحد من مدبرات القصر
ووقفت بتوتر جنب داليدا : داليدا هانم لو سمحتي
الهانم الصغيرة تعبانة شوية وعايزه حضرتك
تروحي تديها حقنه مسكن

داليدا قامت وبصتلهم : ثواني وراجعه تاني
البودي جارد قام معاها وهي بصتله : مش لازم أنا
هدخل دقيقه وجاية

حاول يعترض بس هي قالتله مش هنتاخر وراحت
مع البنات ودخلت القصر قدام عينين البودي جارد

مدبرة القصر وقفتها قبل ما تطلع السلالم : هانم
العلاج في المطبخ هنا

داليدا راحت معاها تاخذ العلاج من المطبخ قبل ما
تطلع لتمارا

عدى شوية وقت ولؤي رجع وعمال يزعق في
الرجالة بتوعه : مش عارفين توقفوا شوية صيغ
عاملين نمرة بالعربييات وجايين تنادوني ؟
وقف وبصلهم : مش قد الشغلانه بتشتغلوا ليه ؟
بص حوليه في المكان وبص للبودي جارد : هي فين
داليدا هانم ؟

البودي جارد بتوتر : يا باشا طلعت القصر فوق
عشان تمارا هانم تعبانة وعيزاها تديها حقنه
لؤي : وأنت واقف هنا بتعمل ايه ؟
البودي جارد : ياباشا ما هي قالت
لؤي قاطعه بز عيق : وأنا قولتلك ماترفعش عينك من
عليها

سابه ودخل جري على جوه وقابل تمارا في وشه
واللي كانت خارجه من المطبخ : هي فين داليدا هانم
؟

تمارا بتوتر : وأنا ايش عرفني ؟

لؤي : حضرتك اللي طلبتيها تطلعك ؟

تمارا : وماطلعتش ، نزلت أنا بنفسي اشوفها
ومالقتهاش

لؤي : ازاي يعني ؟

تمارا زعقت : بقولك ايه يا بني ادم أنت أنا تعبانه
ومش ناقصه صداع روح شوف هي راحت منكم
فين ولا في أنهي داهية ؟

لؤي دخل المطبخ ومالقاش حد فيه فطلع بسرعه ولم
رجالته : حالا تفتشولي القصر ده حته حته، اقلبوا
المكان عليها ، اتحركوا

كلهم اتحركوا بتوتر يدوروا عليها ولؤي على
اعصابه وقلبه بيقوله ان اللي جاي مش خير ابدأ

.

شوية وسمعوا دوشه كثير لدرجة ان كل اللي كانوا
في القصر اتجمعوا بره، ولؤي وقف يشوف في ايه،
لقى واحد من الرجالة بتوع آدم جاي عليه وهو
متبهدل ووشه كله دم وواحد تاني ساندده فجرى
بسرعه ومسكه : في ايه مالك ؟ مين اللي عمل فيك
كده ؟

الحارس مسك دراع لؤي : باشا ، اد ، آدم باشا ،
ألقه

لؤي بلع ريقه بتوتر : في ايه اللي حصل انطق ؟

فلاش باك

جسار زي عادته نزل الصبح بدري يجري شوية
على البحر ، وصل لمكان فاضي خالص ووقف
يتنفس ، شرب شوية مياه ولسه هيكمل جري لقي كذا
راجل جسمهم كله عضلات ووشم محاوطينه من كل
مكان وكل واحد ماسك شومه كبيره في ايده

جسار أبتسم بهبل : صباح النور ، ايه الوجوه
السمحة دي على الصبح ، بيتهيألي إنكم مش جاينين
في خير ، صح كده ؟

انحنى بحركة سريعة جدا وسحب مطوة كانت في
جيبه وعور واحد جامد ودخل معاهم في حرب
حرفيا ، تعبهم كلهم فيها وأذى منهم كثير بس للأسف
دايما الكثرة بتغلب الشجاعة ، اتكاتروا عليه ونزلوا
فيه ضرب بغباء

على الناحية الثانية

آدم كان قاعد في اوضته على السرير وماسك فونه
بيشوف رسالة مربية اتبعثله من رقم غريب
«ماتفرحش كثير»

فونه رن وكان جسار : ايه يا جسار اتأخرت ليه كده
؟

واحد من اللي ضربوا جسار : حضرتك صاحب
التليفون ده في المستشفى

آدم اتنفض من مكانه : مستشفى ايه ؟ هو ايه اللي
حصل اخويا حصله حاجه ؟

الراجل : اهدى لو سمحت ، أنا ماعرفش هو ايه اللي
حصله ، بس هو دلوقتي موجود في المستشفى
الفلانيه

آدم كان نزل جري على تحت وركب عربيته :
ماشى ، دقائق وهبقى عندك

شغل العربية وساق بسرعة مجنونه رغم ان ده خطر
بس هو ماكانش حاسس بأي حاجة غير ان صاحب
عمره اتأذى

في نص الطريق في عربية وقفت قدام آدم واضطر
يقف بسرعة وطلع من الشباك : أنت يا بني ادم مش
تفتح شارع ابوك هو ولا ايه ؟

نزل من العربية كذا راجل وفي عربية تانية -اللي
كان واضح جدا إنها مراقباه من ساعة ماتحرك-
وقفت وراه وسدوا عليه الطريق ونزل منها كذا
راجل برضه وراحوا كسروا العربية على آدم
واتكاتروا عليه هو كمان ونزلوا فيه ضرب ،
الحرس بتوعه حاولوا يتدخلوا بس اتمسكوا هما كمان
واتبهدلوا

آدم فقد الوعي خالص من الضرب والرجالة اخدوه
معاهم ومشوا

الحارس : ده اللي حصل ألحقهم يا باشا ؟
قال آخر كلمة ووقع على الارض مغمى عليه وواحد
تاني من الحرس جه بسرعه : لؤي باشا داليدا هانم
مش موجوده في القصر كله

لؤي وقف تايه مش عارف يتصرف إزاي ودولت
قربت منه : يعني ايه الكلام ده حفيدي اتخطف ؟

هند : ماتنطق يا لؤي ؟

لؤي ساكت وتمارا قربت منه شدت دراعه : يعني
ايه ؟ آدم اتخطف ؟ إزاي ؟

وقعت على الارض وهي بتتهج برعب وبتكلم نفسها
بصوت ماحدش سامعه : أنا قولتله داليدا، قولتله هي
مش آدم، آدم لا

كلهم قعدوا يعيطوا ولؤي واقف وسطهم مش عارف
يتصرف إزاي وهيلحق مين ولا مين ولا مين ؟

.

فيري كانت واقفه بتراقب كل ده من بعيد وراسمه
على وشها ابتسامه عريضة من الشرق للغرب : آدم
وجسار وداليدا في يوم واحد ، أنا أكيد ربنا راضي
عليا

أخذت بعضها وطلعت اوضتها بسعادة عارمه وهي
بتضحك من كل قلبها

بعد فترة طويلة آدم فاق ، بص حويليه شوية لحد ما
أدرك الوضع اللي هو فيه، كان قاعد على كرسي
وايديه ورجليه مربوطين جامد بالحبال وكمان متربط
بحبال على صدره وبوءه متكمم والكرسي نفسه
مربوط بسلاسل في عمود وراه

شخص بسخرية : يا رب تكون مبسوط معانا هنا
آدم بص لمصدر الصوت لقي حسام جاي عليه
بابتسامة نصر و آدم بيحاول يتحرك أو يتكلم بس مش
عارف

حسام ضحك : ماتحاولش، ده أنا متوصي بيك آخر
حاجة

نزل قدامه وبص في وشه بتحدي : ودلوقتي بقى
هنشوف هتختار مين ، أنا ولا ، هه انت ؟

آدم كشر بعدم فهم وحسام أبتسم بسماجة : قصدي
مراتك يوه مراتي ، ههههه داليدا ولا سولاف، ياخي
دي الدنيا دي طلعت غريبة والله

آدم نفسه يفك نفسه ويقوم يضربه، وحسام سابه
ومشى و آدم غمض عينيه الوارمه من كتر الضرب
ورجع راسه لورا وبيدعي : يارب ، يارب ساعدني
، أرجوك أنا ماليش غيرك ، يارب أنا ماعرفتش انقذ

أمي زمان أرجوك خليني أنقذها هي دلوقتي، يارب
 أنت عارف أنى بحبها ، ايوه مش حقي بس أنا بجد
 بحبها ، أرجوك ماتاخدهاش مني زي اللي قبلها ،
 أرجوك أنا ضعيف وماعنديش حد استنجد بيه غيرك
 ، أرجوك يارب ، يارب

شويه و آدم سمع صوت عربيات ودوشه وبيحاول
 يحلل الصوت بس في صفارة في دونه مخلياه مش
 عارف يركز ، الباب اتفتح ودخل كذا راجل ضخام
 ومسكين سولاف من دراعتها

سولاف بغضب : سيبوني، أبعده عني أنت وهو

وهي بتحاول تفلت منهم عينيها وقعت على آدم اللي
 قاعد بمنظرة ده ومرجع راسه لورا ومغمض عينية ،
 قلقت عليه جدا وبصوت متوتر : آدم

آدم سمع صوتها جز جامد على اسنانه وادايق إنها
 هنا ، وقلبه موجوع عليها وعلى اللي ممكن يحصل
 فيها

الرجالة حدفوها على الارض جامد وخرجوا وهي
 اتعورت واتوجعت بس تجاهلت وجعها وقربت من
 آدم وقعدت تحت رجليه وبعياط : آدم رد عليا ، آدم
 أرجوك لا ، بالله عليك فوق

آدم نزل راسه تاني وبصلها وهي بصت على
جروحه والحبال : أنا آسفه كل ده بسببي ، أنا اسفة ،
أسفة

آدم بيحاول يفك نفسه، نفسه ياخذها في حضنه
ويطمئنها بس مش عارفه

طيب نرجع كده فلاش باك

عشان نفهم ايه اللي بيحصل

حسام بعد ما روح طنطا كلم الباطجي اللي بيدورله
على سولاف مع رجالاته وقاله على مكان سولاف
وان في واحد بيقول إنها مراته وهو عايزه يتأكد من
الموضوع ده

مرزوق : وأنا هستفاد ايه من كل ده ؟

حسام بنرفزة : في ايه يالا ده أنا مغرقك فلوس من
ساعة ماشتغلت معايا امتي اكلت عليك فلوسك هاه ؟
وبعدين الواد التوتو ده تبع عيلة غنية أوي ؟ لو طلع
اللي في دماغه صح هسيبهولك اشفى بس غليلي منه
وهسيبهولك تعمل فيه اللي أنت عايزة ، هاللا ؟

مرزوق بضحكه مقرزة : أهو كده تعجبنى أنا هروح
اسكندرية عشان اشوفلك ايه الحوار ده

وفعلا مرزوق راح اسكندرية واتاكد ان داليدا تبقى
سولاف وكل ده كان ملعوب من آدم وده طبعاً جن
جنون حسام اللي قال لمرزوق إنه هيسافرله بس هو
يجيبهمله

فمرزوق خطت لكل ده الأول بعت رجالاته يبهدلوا
جسار لان باختفاء هيبقى سهل الوصول لآدم ،
وبعدها رنوا على آدم يبلغوه ان جسار اتصاب فينزل
من البيت وهما يطلعو عليه ويخطفوه ، أما بقى داليدا
فتمارا هي السبب في كل اللي حصلها

في يوم كانت تمارا خارجة من القصر وشافت حسام
بالصدفة واقف بعيد شوية من البوابه وسمعتة بيتكلم
مع واحد تبعه

حسام: بقولك داليدا دي تبقى سولاف مراتي ، ياعم
وسع خليني اجيبها من جوا

تمارا فرملت بسرعه وهي مش مصدقه اللي سمعتة
، نزلت من العربية ونادت عليه : أنت ياا

حسام بصلها : أنت قولت ايه دلوقتي ؟ داليدا تبقى
مراتك ؟

حسام كشر بتوجس وهي قربت منه : أنت قولت كده
صح وقولت عايز تاخدها مش كده ؟

البلطجي : وانتى مين بقى يا عروسه ؟

تمارا بقرف منه : أنا اللي هتساعده ياخذ مراته

حسام مسك دراعها بعنف : أنتى بتتكلمي جد ؟

تمارا شدت دراعها منه : ما تلم ايدك كده، ايه القرف
ده ؟ وبعدين ايوه بتكلم جد ده لو طلع كلامك صح
فعلا

حسام : ايوه بجد سولاف مراتي

تمارا ركبت عربيتها : أركب لما أفهم ايه موضوع
سولاف وداليدا ده كمان

حسام ركب وبعد مده من الكلام

تمارا بفهم : يعني داليدا دي اسمها سولاف وتبقى
مراتك الهربانه منك ؟

وقالت في سرها : والله ووقعتي يا داليدا ، وعملاي
فيها شريفة وانتى واحده ف**ره بتلغي على واحد
وانتى متجوزة واحد تاني ، طيب وحياة أمى مانا

سيياكي ، مابقاش أنا تمارا هارون لو مانفتكيش من
على الارض دي

حسام قاطع سرحانها : هتعملي ايه أنتى بقى ؟

تمارا : هتشوف دلوقتى

وبدأت تمارا تحكيه هيعملوا ايه، الأول رجالة حسام
هيعملوا شوشرة عند البوابة الرئيسية للقصر عشان
يغطوا عليهم وبعدين تمارا هتفضي مطبخ القصر
وتطلب داليدا هناك ومنه هتاخذها للباب الخلفي
للقصر اللي هتكون مشت الحارس من عنده باي
حجه وهناك رجالة حسام هياخدوا داليدا ويروحوا
لحسام اللي مستنيهم في محل قديم مقفول

نرجع للوقت الحاضر

سولاف قاعده قدام آدم وماسكه الحبال اللي عليه
بتحاول تفكها بس قاطعها صوت من وراهم : سو
رغم انهم حرفين بس اللي سمعتهم سولاف بس كانوا
كافين يوقفوا قلبها من الرعب ، جسمها بدأ يرتجف
وبصتله : حسس ، الامم

حسام شافها قاعده كده وماسكه في آدم دمه فار
ومسكها من شعرها من فوق طرحتها وجرها وراه
وهبدها على الارض جامد وفضل يزعق : أنا قولتلك
كام مره ماتقربيش من راجل غيري ؟ انتى ليه مش
بتفهمي، لبيبيه ؟

سولاف عماله تعيط بانهيار وصوته العالي بيفكرها
بكل حياتها معاه وبدأت تنهج وحاسه بدوشة كثير في
دماغها ومستعده إنه في أى لحظة هينزل فيها ضرب

وآدم عمال يتحرك بعنف بيحاول يفك نفسه لدرجة ان
ايديه الاتنين اتعوروا جامد مكان الحبال وبدأوا
ينزفوا

حسام راح قعد قصاد سولاف : أنا قولتلك ايه قبل
كده ؟ أنتى بتاعتي أنا ، ملكي أنا ، أنا وبس
مسك وشها جامد : انتى كنتى كل حاجة ليا، كنتى
عمري كله، عملتلك ايه أنا عشان تعملي فيا كده،
سيبتيني وهربتي رغم اني اترجاتك كثير ماتبعديش
عني، نسيتيني وعشتى حياتك وسبتيني أنا بموت كل
يوم في بعدك وععيش على ذكرياتك زي القليل ، ليه
، لبيبيه ؟

زعق : لا ورايحه تعرفي راجل غيري ، قصرت
معاكي في ايه أنا ؟ ده أنا حبيتك ، بس وحياتك عندي
وحياة حبي ليكي لأكون قاتلهولك وقهرك عليه

حسام قام وطلع من هدومه سكينه كبيرة وبيقرب من
آدم بكل شر وغل وسولاف رغم رعبها الا إنها أول
ماشافت السكينه اتنفضت من مكانها وراحت بسرعه
وراه ومسكت في رجله : حسام بالله عليك لا ، ابوس
إيدك ، بالله عليك بلاش

حسام كأنه مش سامعها وبيجر رجله اللي هي متعلقة
فيها بغضب وهي عماله تتوسله وتعيط بس لا حياة
لمن تنادي، سولاف افكرت حاجة كانت آخر امل
ليها

سولاف بترجي : حسام لو بتحبي بطل ، كفاية
أرجوك

حسام وقف وزعق : ماكفاية بقي

نزل على ركبه قدامها : أنا هبطل بشرط

سولاف هزت دماغها بموافقة وهو كمل : ترجعي
معايا البيت

سولاف بعياط : حسسام

حسام بجنون : ارجعي معايا وانا هسامحك على كل
حاجة ، هسامحك والله بس ترجعي هعيش زي الخاتم
في صباك بس ترجعي ، اختاريني أنا يا سولاف
مش هو

سولاف ساكته وبتعيط ومش قادرة تتكلم وعماله تنقل
نظراتها بين حسام و آدم اللي الدم بيغلي في عروقه
وعمال يزق بصوت مكتوب وبيهز دماغه برفض
عشان يمنعها ، وحسام نفخ بضيق ووقف رايح ناحية
آدم تاني

سولاف بصريخ : أنا موافقه ، هرجع معاك ، حاضر
هرجع ، هختارك انت ، هختارك يا حسام خلاص ،
خلاص عشان خاطري

حسام أبتسم كأن روحه اتردته من جديد ورمى
السكينة جنبه وقعد على ركبه قدامها تاني ومسك
وشها : بجد ؟ بجد هترجعي ؟

سولاف هزت دماغها بموافقة وهو بسعادة : أنا
بحبك أوي بجد بحبك خالص

قعد بيوس في وشها وهو بيردد : انا بحبك بحبك يا
سولاف ، أنتى كمان بتحبيني صح ؟ قوليلي إنك
بتحبيني

سولاف بانكسار و عياط : بحبك ، بحبك يا حسام
حسام حضنها جامد لدرجة إنها حست إنه هيكسر
عظمها بين دراعاته وهو بيمشي ايده على جسمها
بسعاده مش سيعاه من كلامها ، وأدم بيراقب كل ده
ودموعه في عينيه على حالة حبيبة قلبه واللي
بيحصل فيها وعلى نفسه وعجزه إنه يعملها حاجة ،
غمض عينيه ودعى بصدق من قلبه : يارب

في اللحظة دي كلهم اتصدموا بعربية مدرعة هدت
جزء من الحيطه ودخلت بسرعه مجنونه ووراها
حوالي ست عربيات دفع رباعي

الكل تنح واتصدم من الموقف وبصوا للمدرعة اللي
نزل منها جزار المجنون -اللي أول ما فاق في
المستشفى وعرف ان آدم اتخطف جمع رجالته ودور
عليه لحد ما وصله- كان وشه كله كدمات ودماغه
ملفوفه بشاش ودراعه متجسس وماشي بيعرج وبيجر
رجله بالعافية

حسام بصدمة : أنت ، إزاي ؟

جسار فرقع بصوابعه فنزل من العربيات رجالة
عاملين زي المدرعات شكلهم مرعب ومسكوا حسام
وبعدوه عن سولاف خالص ومسكوا كل رجالة حسام
ونزلوا فيهم ضرب

جسار قرب بتعب من آدم وأبتسم : باشا

آدم عينية لمعت وأبتسم وجسار بيفكه : حقك عليا
اتأخرت عليك ، آسف

آدم : أنت ايه اللي جرالك ، ايه كل ده ؟

جسار : ماتشغلش بالك بيا

شاور على سولاف اللي قاعده على الارض بتعيط :
بيتهيألي هي أهم دلوقتي

آدم يادوب أول ما جسار فكه راح جري وقعد قدام
سولاف ومسك كتافها : خلاص يا داليدا خلاص ،
حقك عليا أنا ، حقك عليا

سولاف بصتله بتوهان وبصت لجسار ورجالته
وحسام اللي متكفف وبيز عق ومابقتش قادره تستحمل
أكثر من كده ، مش متخيلة إنها من لحظة واحده
كانت هترجع تاني مع حسام للسجن اللي كانت فيه ،

وفي الآخر الدنيا لفت بيها ووقعت في حضن ادم
مغمى عليها

آدم بيحاول يفوقها : داليدا ، داليدا مالك ؟ عشان
خاطري ماتعمليش فيا كده ، بالله عليكى فوقى
جسار : قوم يا آدم ، تعالا نروح المستشفى بسرعة
آدم قام وشال سولاف بين ايديه ولسه بيخطي حسام
زعق : سييها ، نزلها ، أبعدها ماتلمسهاش ، دي
بتاعتي انا ، دي ليا أنا

آدم نفخ بضيق وقرب منه وضربه برجلة جامد :
أنت تخرس خالص ، أنت حيوان وماتستحقش واحده
نقية زي داليدا ، وبحق كل وجع واذى سببتها أنا
هوجعك زيه ، لسه حسابك ثقيل معايا بس صبرك
أنت بس عليا يا حسام الكلب

آدم مشي وجسار شاور لواحد من رجالته يروح معاه
وبص هو لحسام بغيط : بقى انت يا كلب يابن
ال#@\$ تعمل فيا كده ، تبعتي بلطجيتك يتهجموا
عليا يا#@\$ ، طيب وديني لاربيك من أول و جديد
عشان أنت شكل أهلك نسوا يربوك

جسار مسك حسام من هدومه بدراعه السليم : عارف
أنا اللي غلطان أنى سمعت كلام آدم وسبيتك تروح

بلدك، كان المفروض ادفنك حي في ساعتها بس
 ملحوقه اديك أهو تحت ايدي ومش هرحمك
 ضربه بدماغه جامد ضربه جابته الأرض وبص
 لرجالته : روقوه

الرجالة مسكوا حسام وفين يوجعك ونزلوا فيه
 ضرب لحد ماستوى على الآخر ، اخدوه هو وكل
 رجالته وراحوا المخزن بتاع آدم وحبسوهم هناك
 ووقفوا يحرسوا المكان لحد ما آدم يروح لهم

في المستشفى آدم دخل زي المجنون عمال ينادي
 على اي حد يلحق سولاف لحد ما مجموعه من
 الدكاتره والممرضين اخدوها منه ودخلوا يكشفوا
 عليها

وهو واقف بره على اعصابه وموجوع من كل مكان
 ، وجع جسدي ونفسي وعقلي ، حاسس إنه تايه
 ومشتت ومتلخبط وكمان مصدع

وقف قدام الحيطه وسند دماغه عليها وغمض عينيه
 بيحاول يتماسك بس صورة سولاف وهي يتعيط

وتترجى حسام عشان مايقتلهوش مش مفارق باله ،
 ضغط على قبضة ايده جامد وقال بغل : وربى مانا
 سايبك يا كلب ، حقك هرجعهولك يا داليدا ، اوعدك

جسار وصل المستشفى وشاف آدم فقرب منه وأتكلم
 فجأة من وراه : أنت اتجننت خلاص بتتكلم مع
 الحيطه ؟

آدم بصله بغيط : انت يالا لطح كده ليه ؟ يخربيت
 رخامتك

جسار ضربه فى كتفه : ياعم أنا غلطان قولت اطمن
 عليك قبل ماتتجنن

آدم : لا أنا اتجننت خلاص

جسار : اه ماهو واضح أهو

آدم قعد على أقرب كرسي منه : وأنت ايه اللي عمل
 فيك كده ؟ ده أنت ولا اللي دايسه قطر

جسار ضحك جامد وفجأة قطع الضحك وحط ايده
 على صدره بوجع : اااااه ، دول شوية عيال بلطجية
 طلخوا عليا ، الكلب ده اللي بعثهم

آدم بقلق : طيب وايه ، الدكتور قالك ايه ؟

جسار بصله وأبتسم : الحمد لله ما فيش حاجة كنت
هموت بس فيها

آدم : بعد الشر عليك، إحنا مالناش غيرك

جسار : يار اجل قول غير كده ، انت بس عايزني
عشان تمرط في اللي خليفوني كده وبهدله رايح
وبهدله جاي

آدم ضحك وبعدها اتأوه جامد من الوجع وجسار
قرب منه بسرعه : أنت كويس ؟

آدم بوجع : ماظنش

جسار : طيب قوم خاينا نشوف مالك ده أنت
شكلك

قطع كلامه فآدم بصله : شكلي ايه ؟

جسار بيحاول يكتم ضحكته : ولا حاجة ، شكلك حلو
خالص

آدم : أنا ليه حاسس إنك بتشتمني في سرى ؟

جسار ضحك : فعلا ، شكلك زي اللي عاجنه فيل
ههههه

آدم بوجع : هه هه هه ياربي على اللطافه

جسار : قوم بس معايا نطمن عليك وبعدها نشوف
الحوار ده

آدم : لالا ، خليني الأول اطمن على داليدا ، مش
هرتاح غير لما اطمن عليها

جسار اتنهد بقلة حيلة وراح قعد جنبه وفرد رجليه :
يارب او عدني بواحدہ اتشلفط عشانها كده أنا كمان
بدل مانا بتشلفط عشان الأشكال دي، ولا أنا طایل
سما ولا أنا طایل أرض

آدم بصله : الاشكال دي يبقوا أنا صح ؟

جسار بلع ريقه وبصله بابتسامة ساذجه و آدم نفسه
يمسكه يرزعه علقه عشان يلم لسانه بس قاطعهم
صوت الباب اللي اتفتح وخروج الدكتور

آدم قام وقرب منه بسرعه : خير يا دكتور ، هي
مالها ؟

الدكتور : الأستاذة كويسه جسديا بس نفسيا لا ، يعني
كان في شوية خدوش في ايديها ورجليها وفي كدمه
في وشها بس كل ده هيعدي ، إنما نفسيتها صفر
ويمكن تحت الصفر كمان ، هي حاليا عندها إنهييار
عصبي ودخلت في غيبوبة نفسيه والله أعلم هتفوق
منها امتي ، إحنا عطيناها مهدئات عشان ترتاح

شويه ، بس حاولوا بقى تخرجوها من اللي هي فيه
ده

آدم هز دماغه بفهم : طيب أنا ينفع أدخل اشوفها ؟
الدكتور : بص هي حاليا نايمه و___

آدم قاطعه : أنا هشوفها بس مش هعمل حاجة ، عايز
اشوف وشها بس

الدكتور اتهد : مافيش مشكله لو مش هتتعبها ،
بس بيتهياي المفروض تقلق على نفسك الأول ،
أنت شكلك يعنبيي احم

جسار : دايسه قطر ، قول قول ماتتكشفش

آدم بصله بغيط واخذ بعضه ومشى : هبقى اقلق على
نفسى بعدين ، اطمن عليها هي الأول

الدكتور هز كتافه بقلة حيلة ومشى وجسار قعد بره
يستنى آدم اللي دخل الأوضة عند سولاف وشاف
شكلها الضعيف والتعبان وقلبه وجعه عليها، قرب
منها شويه وبص للممرضة : ممكن تسيبيننا لوحدنا
شويه لو سمحتي ؟

المرضة هزت دماغها بموافقة وخرجت بهدوء وأدم
 راح قعد جنب سولاف ومسك ايدها اللي فيها
 الكانيولا : حقك عليا

لف ايدها في ايده وشاف الخدوش اللي في بطن ايدها
 وحرك صوابعه عليهم بوجع : حقك على قلبي أنا ،
 اوعدك هجيبلك حقك بس قومي ، ماتوجعش قلبي
 عليكي وقومي بصيلي وكلميني ، ماتحرميش عينيا
 من عينيك ولا تحرمي ودني من صوتك ، فوقي
 وارجعيلي يا داليدا ارجوكي

حط دماغه على ايدها وفضل يدعي ربنا يشفيها

شويه والباب خبط ودخل جسار بهدوء، شاف شكل
 آدم وزعل عليه : آدم باشا ، كفاية كده، سيبها ترتاح
 وتعالا روح لدكتور يشوفلك الجروح دي
 آدم من غير ما يرفع راسه : لا خليني جنبها شويه ،
 شويه بس

جسار حط ايده على كتفه : أنا حاسس بيك والله بس
 انت كده هتتصفي وأنت قاعد قوم عالج جروحك
 الأول وتعالا تاني هي مش هتروح في حته، قوم هما
 دقائق بس وارجع تاني اقعد جنبها انشالله لحد الفجر

آدم رفع دماغه وبص لسولاف وهمس : أنا هرجع
تاني ماتقلقيش

قام بتردد وبص لجسار : خلي بالك منها لحد ماجي
جسار : رجالتني وصلوا هيحرسوها وأنا هاجي معاك
آدم بإصرار : لالأ خليك أنت هنا ، انا مش بثق في
حد غيرك ، خليك معها وانا هروح مع اي حد مش
مهم

جسار اتنهذ : اللي انت عايزه

وفعلا آدم راح عالج كل جروحه وعوض الدم اللي
نزفه ورجع تاني لسولاف

جسار : هند ودولت هانم قالبين الدنيا عليك من ساعة
ماعرفوا إنك اتخطفت

آدم : طمنهم عليا وقولهم أني هبقى اروحلهم بس مش
دلوقتي وبلاش تقولهم على مكاني أنا حاليا مش عايز
اشوف أي حد خالص

جسار : اللي تحبه

آدم بارهاق : معلىش يا جسار سييني معاها لوحدنا
شوية ، وأنت كمان لو تحب تروح روح شكلك تعبان

أصلا ، وكفاية عليك أوي اللي بيحصلك بسببي كل
شويه

جسار كشر : ايه ياعم ده كله هو كان حد اشتكالك ؟
وبعدين أنا افديك الساعة اللي احميك فيها أنت ناسي
فضلك عليا ولا ايه ؟

آدم : فضل ايه ده بس يا جسار اللي بتتكلم عليه ؟
ربنا يهديك يابني ده انت اللي مغرقني بافضالك من
ساعة ماعرفتك

جسار : مش وقته الكلام ده والله دلوقتي ، خليك أنت
معاها وأنا هقعد بره مش هروح في حته من غيرك ،
رجلي على رجلك

آدم قعد جنب سولاف بتعب : أعمل اللي يريحك ، انا
عاطيك حرية التصرف والاختيار بس بالله عليك
ماتجيش على نفسك وتتعب أنا مش حمل حد تاني
يتعب بسببي

جسار هز دماغه وانسحب بهدوء وآدم فضل يبص
لسولاف وقت طويل في صمت لحد ماتكلم : عاجبك
اللي أنا فيه ده دلوقتي ؟ عاجبك حالي واللي وصلته
بسببك ؟ فوقى بقى ، ابوس ايدك قومي ، خليكي
عارفه أني مش هسامحك لو فكرتي بس تسيبيني ،

كفايا اتخليتي عني من شويه بس أنا عاذرك كنتي
 مجبره بس دلوقتي لا مش هسمحك ابدأ
 قرب منها وهمس جنب ودنها بعشق : بحبك

فضل قاعد جنبها كتير جدا لحد ما النوم غلبه ونام
 على الكرسي مكانه وهو ماسك أيدها كأنه خايف لو
 سابها تضيع منه

دولت بتتكلم في الفون : بجد يا جسار لقيته ؟
 جسار : ايوه يا هانم ، هو معايا دلوقتي ماتقلقيش
 دولت : طيب هات اكلمه
 جسار : هو نايم معلش يا نانا يصحى بس وهخليه
 يكلمك حاضر
 دولت : جسار اوعى تكون بتكذب عليا
 جسار أبتسم : والله ابدأ انتي عارفه أنى مش بحلف
 كذب، آدم معايا فعلا بس نايم ومسكنا اللي عمل كده
 كمان

دولت : اللي هما مين دول وعايزين ايه من حفيدي ؟
 جسار : هنعرف قريب ماتلقيش ، رجالتى بيروقوهم
 دلوقتى

هند اخدت الفون من ايد دولت بعد ما خلاص
 اعصبها باظت: جسار هي داليدا معاكم؟ البت مختفيه
 من ساعتها ومش عارفين نوصلها

جسار : ماتخافيش يا أمي داليدا اه معانا وهترجع
 لحضنك قريب ، ارتاحوا انتوا بس النهارده وبكرا
 نتكلم ، ادي الموبايل للوئى معلش

هند عطت الفون للوئى : باشا

جسار : حسابك معايا لما اشوفك

لوئى سكت وبص في الأرض وجسار قفل معاه
 دولت : قالك ايه ؟

لوئى وهو بيمد ايده بالفون : حسابك معايا

لوجين مسكت دراعه بخوف : يعني ايه ؟ هيعمل ايه
 يعني ؟

لوئى ماردش عليها وبص لرجالته : اجهزوا في اي
 لحظه هنتحرك

سحب دراعه من لوجين وبصلهم : عن إذنكم
أخذ الرجالة وراحوا وقفوا في اماكنهم بصمت
مستنين أمر جبار

دولت مسكت ايد لوجين : يلا يا حبيبي تعالي ندخل
نرتاح بكرة يومنا طويل

دخلوا كلهم ولوجين عينيها بتلمع بالدموع وهي
متعلقه على لؤي اللي عاطيها ظهره وواقف بثبات

تمارا أخذت بعضها وطلعت اوضتها وقعدت على
السريير وهي بتتنفس بتعب ، إزاي بغبائها كانت
هتضيع آدم

الباب خبط وكان مروان اللي عرف باللي حصل بعد
ما جه هو وابوه وعمه من الشركة، تمارا أول ما
شافته عيطت ورفعت ايديها قدامها ، ومروان قفل
الباب وراه وراح مسك ايديها

مروان : بتعيطي ليه دلوقتي ؟

تمارا : انا ، انااااااا السبب في كل ده ، أنا اللي اتفقت
مع الناس ، بس انا كان قصدي داليدا بس ، كنت

عايزاهم يخطفوا داليدا بس ويبعدوها عن حياتي
وساعدتهم في كده بس ماكنتش أعرف إنهم هيخطفوا
آدم كمان وهيضربوا جسار

مروان : وانتى ليه عملتي كده ؟ هي داليدا عملتلك
ايه عشان تعملي فيها كده ؟

تمارا : أخذت آدم مني ، ايوه اخدته وبسببها آدم بطل
يحبني

مروان : بس آدم ماكانش بيحبك أصلا عشان يبطل
يحبك

تمارا كشرت جامد وهو : بتبصيلي كده ليه ؟ كلنا
عارفين ان آدم مش بيحبك ولا بيحب حد في البيت
ده غير دولت و هند ولوجين بس منين جبتها بيحبك
دي ؟

تمارا : ايوه ماما هي اللي قالتلي ، قالتلي ، قالتلي
هي السبب ، آدم كان بيدافع عنها فاكر لما لقتها في
حضنه دافع عنها فهو ، هو كده حبها

مروان بملامح أول مرة تشوفها عليه : أنا لو كنت
مكان آدم كنت عملت زيه مش عشان بحبها ولا
حاجة بس عشان كلنا عارفين إنها محترمه ومستحيل

تعمل كده وهي كانت بتعمل دورها كمرضه مش
اكثر وبعدين أمك هي اللي قالتلك تخلصي منها ؟

تمارا هزت دماغها : اه

مروان باستغراب : طب ليه ؟

تمارا : عشان هي خطر علينا ، هي لفت على آدم
وكانت هتاخده وتاخذ فلوسه

مروان عمال يحلل الكلام بعقله ، بصلها : المهم ان
مافيش حاجة حصلت وجسار عرف يلم الليلة، نامي
أنتي دلوقتي وماتخافيش ماحدث هيعرف إنك ورا
كل ده

تمارا حضنته : خليك معايا لحد ما أنام ، أنا خايفه
أوي

مروان قلبه كان بيدق بطريقة جديدة عليه ، عمر ما
قلبه دق كده وهو مع بنت ابدأ ، طيب ليه دلوقتي
ومع مين ، تمارا ؟؟

بعدها عنه : أنا ورايا مشوار مهم دلوقتي ولازم
أمشي

قام ومشى خطوتين بس تمارا مسكت ايده : عشان
خاطري يا مروان خليك معايا شوية

مروان سحب ايده منها : خاطر ايه ده يام خاطر
وانتى كنتى مين عشان اعملك خاطر مش فاهم يعني
؟

تمارا دموعها لمعت في عينيها : انت ، بس أنت
كنت ، دايمًا معايا__

مروان قاطعها : لو قصدك على الفترة اللي عدت
دي فعادي يعني انتى زيك زي غيرك كثير ، أنا بس
زهقت من الرمرمه مع البنات الاى كلام فقولت
أجرب النوع النضيف بس ماكنتش أعرف أنك
هتفهميني غلط، سوري بقى

سابها ومشى وهي مش مصدقه اللي هي سمعته ده
وقعدت تعيط ، بس هي ليه بتعيط دلوقتي ؟ هو
مروان كان يفرق معاها في ايه عشان تعيط كده ؟ ما
آدم كان على طول بيقولها كلام صعب ومع ذلك
عمرها ما عيظت بسببه ، ليه دلوقتي مش عايزة
تصدق أصلا اللي مروان قاله ؟

على الناحية الثانية مروان واقف قدام الباب وحاطط
ايده على قلبه اللي بيدق بعنف : موجوع ليه دلوقتي

عليها ؟ مانت ياما قولت كلام زي ده لناس تانية
وبعدين دي تمارا ماتفرقش حاجة معاك

بس صوت عياط تمارا كان هيجنن مروان فمشي
بضيق وطلع فونه : حبييتي وحشاني موت ، طيب
ماتيبي تخرج شوية

قفل معاها وهو بيتنفس بعنف : أنا هتبتلك دلوقتي
إنها ماتفرقش معاك في حاجة ، ايوه صح مروان
أنت ماحدثش يفرق معاك حاجة في الدنيا دي

عاصم : رايح فين يا أستاذ ؟

مروان : رايح مكان ماروح هتفرق ؟

عاصم : خليك كده لحد ما في يوم هتقع ومش هتلاقي
اللي يسمي عليك حتى

مروان : ماشي

عاصم : عرفت اللي حصل لأدم ؟

مروان : اه عرفت ما هو أنا اللي بعث الناس دي
تخطفه أصلا بس البت الممرضة دي اتاخذت معاها
في الرجلين وبوظتلي كل حاجة بس مش مشكله
ملحوقه أكيد ليه يوم ويقع هو والزفت جसार ده اللي
بسبع ارواح

عاصم بعدم تصديق : وأنت كنت هستفيد ايه بده ؟

مروان : طلا ما مش عارفين ناخذ منه فلوسنا بالذوق
يبقى نخليها بقلة الذوق أو يمكن يموت ياكشي نخلص
منه ونرتاح بقى واهو نورثه بالمره ، يعني في كل
الحالات مستفيدين

سابه ومشي وعاصم بيراقبه بشك هو متأكد إنه مش
السبب طيب ليه بيكذب بيداري على مين بالظبط

مروان أخذ بعضه وراح قابل البنات اللي كلمها في
نايت وحاول يهرب من الواقع بالهزار والشرب بس
صورة تمارا وهي بتبصله بصدمة ودموع مش
بتطلع من دماغه

اتعصب جدا ومسك كمية كبيرة من الفلوس وحذفها
في وش البنات : غوري من وشي مش عايز حد
معايا

البنات خافت بس لمت الفلوس ومشت ومروان قعد
يشرب كثير يمكن مخه يبطل تفكير شوية وبعد وقت
طويل خرج من النايت بيطوح زي عادته وركب
عربيته وساق لحد القصر بعد ما خبط العربية كذا

مرة وكان هيعمل أكثر من حادثه ، نزل وكان رايح
على اوضته بس وقف قدام باب اوضة تمارا
مروان : الوقت متأخر زمانها نايمه صح ؟ ايوه
زمانها نايمه ، طيب ماتنام هي كانت نايمه فوق
دماغي يعني

مشي خطوتين ورجع تاني دخل بهدوء لقي تمارا
نايمه فعلا بنفس شكلها لما سابها، راح قعد جنبها ولم
شعرها من على وشها وربطه بتوكه كانت على
التسريحه جنبه ومسحها وشها من الميكاب
مروان : انتى حلوة أوي من غير مكياج بحب شكلك
أكثر من غيره يا ريت لو تبطلي تحطيه خالص
هتبقى امورة اوى

حط دماغه على المخذه جنبها وماحسش بنفسه لما نام
بسبب الشرب الكثير

تاني يوم الصبح تمارا صحيت من النوم لقت مروان
نايم جنبها ، قامت بكل غضب زقاه موقعاه على
الارض

مروان بوجع : اه يا بنت ال#@ \$ ظهري يا غبية

تمارا : امشي اطلع بره يا كلب واوعى تدخل هنا
تاني ، ولا اقولك حذاري توريني وشك تاني يا زبالة
والا والله هز علك

مروان قرب منها : وهتعلمي ايه بقى بروح أمك،
هتبعيلي ناس يخطفوني ؟

تمارا زقته وقعته تاني : لا يا مروان هبعثلك ناس
يقتلوك على طول واهو اخلص منك

قامت أخذت هدوم من الدولاب ودخلت الحمام
ورزعت الباب في وشه وتربسته وقعدت على
الارض: هو رجع ليه مش قال مافرقش معاه ؟ طيب
ماشى يا مروان أنت اللي بدأت وماتبقاش تنزل بقى

مروان قام بوجع وهو ماسك ظهره وطلع بره
الايضة : البت دي غبية أوي، أنا ماشفتش غياب كده
قبل كده والله

دخل اوضته ونام على السرير بس ظهره وجعه :
ربنا يخذك يا تمارا الكلب ، اه ياظهري

آدم صحى الصبح بيتوجع من كل حته بسبب نومه
على الكرسي ، بص على سولاف لقاها لسه نايمه ،
اتنهد بعنف وقام طلع بره لقي رجالاته كلهم واقفين
صف وجسار واقف قدامهم بغضب

جسار : معين شوية عيال أنا مش كده ؟

ضرب واحد في رجله : كنت بتعمل ايه أنت وهو لما
آدم حصله اللي حصل ده هاه ؟

راح وقف قدام لؤي وضربه في وشه بكل قوته :
وأنت ؟ أنا قولت هتاخذ بالك من داليدا ممكن أفهم
اتخطفت من قدامك إزاي ؟

.

آدم اتدخل ومسك جسار من كتفه : كفاية يا جسار ،
الرجالة مالهمش ذنب في كل ده ، ماحدثش كان
متوقع كل ده يحصل وهما الصراحه لعبوها صح
وعرفوا يوقعونا إزاي

جسار : حتى ولو ، مهمتهم إنهم يحموك مهما
يحصل ، ما هو أكيد اي ضرر هيكون غير متوقع
ولازم يكونوا جاهزين في أي لحظة بس أنا اللي
مشغل شوية @\$@

آدم عض على شفايفه من اللفظ البشع اللي سمعه
واتنهد: طيب خلاص معلىش اللي حصل حصل خلىنا
نفكر دلوقتي هنعمل ايه؟

جسار : ماشي ، دولت و هند هروني اتصالات من
ساعتها خد كلمهم بقى أنا اعصابي باظت والله منهم
الفون رن وجسار بصله : مش بقولك ، خد يا عم

آدم ضحك واخذ الفون وأول ما فتح الخط لقي هند
بتزعق : ايه يا جسار ، سنه عشان ترد ؟ ماشي لما
أشوفك أنت والجزمه الثاني ده اللي نايم بقاله قرن
فاكر نفسه من أهل الكهف ده ولا ايه ؟ أنت ياولا
مش بترد ليه ؟

آدم بضحك : وهو انتى سييالي فرصة ارد أصلا ؟
هند شهقت : آدم يا حبيبي انت صحيت، قولي أنت
كويس حصلك حاجة يابني ؟

آدم : يالهوي يا هند انتى ايه راديو واشتغل
هند : اتلم ياولا وبعدين طمني عليكم ، انتوا كويسين
؟ وفين البت داليدا ؟ حسابها معايا الجزمه لما اشوفها
هي كمان

آدم سكت شويه

هند : آدم في ايه مالك ؟

آدم بهدوء : هند حبيبتى هقولك على حاجة بس
تمسكي نفسك كده

هند : في ايه ؟

آدم : داليدا في المستشفى

هند شهقت بخوف : ليه مالها ايه اللي حصل تاني ،
طيب اديها لي اكلها

آدم : مش هينفع هي دخلت في غيبوبة

هند : يا خبر أسود يا آدم البت حصلها ايه ؟ قولي
انتوا فين وأنا هاجي

آدم : هبعثك لؤي يجيبك اجهزي أنتى بس وهتلاقيه
عندك

دولت سمعت هند بتكلم آدم فقربت منها : ده آدم ؟

هند : اه هو

دولت : طيب هاتي اكله

هند عطتها الفون وهي كلمته واطمنت عليه وقالهم
لؤي جايلهم في السكه فيجهزوا وقفل معاها

جسار : هاءا ؟

آدم عطاءه فونه : جيين او عى تقولهم حاجة عن اللي
حصل

جسار : حتى هند ؟

آدم : هي كده كده هتعرف بس بلاش دلوقتي كفايه
الخضه اللي هما فيها

عدى شوية وقت ودولت و هند ولوجين جم المستشفى
وقابلوا آدم وجسار اللي واقفين جنب رجالتهم
بيتكلموا

لوجين أول ما لمحت آدم جرت بسرعة واترمت في
حضنه : ابيه أنت كويس ؟

آدم ضمها : حبيبتى يا لوجى أنا كويس يا قمر
ماتخافيش

دولت قربت منه ومسكت وشه : يا خبر أسود يا آدم
مين اللي عمل فيك كده ؟

هند بصت لجسار هو كمان : انتوا ايه اللي مشلفطكم
كده يا اولاد ؟

جسار بهزار : تيران يا حجة تير انا

هند : وأنت مالك مبسوط كده ليه يا خيبه ؟ او مال
فاردلي عضلاتك دي ومغلبنا معاك اكل ولبس وفي
الآخر طلعت اسفنج ونفخ عجل

آدم ضحك : الست دي بتقول كلام حلو أوي
جسار ضربه في كتفه : ماشي يا عم اللذيذ على
الأقل أنا عملت حاجة وعلمت على اللي عملوا فيا
كده أنت بقي عملت ايه ؟

آدم بابتسامة : ولا حاجة ماهو الصمت لغة العظماء
يابني

جسار ضحك : أنت أكيد حافظ مش فاهم

دولت : المهم انتوا كويسين يا ولاد ؟

آدم : زي الفل ماتقلقيش

هند : داليدا فين يا آدم ؟

آدم شاور بدماغه على اوضة داليدا وهي دخلت
تشوفها

دولت : هو ايه اللي حصل بالظبط ؟

آدم : ماتشغليش بالك يا حلويات دول شوية بلطجية
وأنا هربيهم من أول وجديد

دولت مسكت دراعه بخوف : اوعى يا آدم توقع
نفسك مع ناس زي كده أخاف عليك

آدم : انا ماتعودتش اسيب حقي وانتى عارفه ، وهما
اللي بدأوا بيقول يستحملوا ، ده أنا هخليهم يشرفونا
على البورش قريب بإذن الله

دولت: ربنا يحميك يا ابني، المهم أنت قولت داليدا
جوه مالها وايه اللي وصلها ليك أصلا ؟

آدم : بصي هي داليدا حياتها معقده شوية كده واللي
عمل كده كان قاصدها هي ، انا هحكملك كل حاجة
بعدين ماينفمش هنا ، المهم أدخلني اطمني عليها لو
عايزة

دولت هزت دماغها بفهم ودخلت الأوضة وأول ما
شافت داليدا نايمه افكرت جمالات وقالت بحزن :
فكرتني بجمالات الله يرحمها

هند بحزن : الله يرحمها ويرحم داليدا هي كمان من
اللي هي فيه

دولت قعدت جنبها : هو في ايه يا هند بالظبط حساكم
مخبين حاجة عليا ؟ أنا يوم ماجيتي وقولتي داليدا
بنتي استغربت بس قولت يمكن واحده قريبتك أو بنت
ناس معرفه بس اللي أنا شيفاه ده مش طبيعي ابدا ،

ليه البت دي اغمى عليها في القصر قبل كده ويوم ما
كنت في المستشفى قعدت تصرخ بهستيريا ودلوقتي
وصلت للخطف وغيوبه ، البت دي مش طبيعیه فيها
ايه بالظبط ؟

هند وهي بتمشي أيدها على خد سولاف بحنية : البت
دي طبيعية جدا بس الظروف هي اللي حطتها في
حياة مش طبيعية ، البنت دي شافت ذل وعذاب
ماتخيليهوش ابدأ ، ربنا يرحمها بجد
دولت : أنا مش فاهمه حاجة يا هند و آدم برضه
بيقولي مش هينفع احكيك دلوقتي

هند : هو فعلا مش هينفع دلوقتي دي قصه طويلة
ومحتاجة قاعده ، هبقى احكيك أول ما نروح القصر

الباب خبط ودخل الدكتور : لو سمحتم كفاية قاعده
كده عندها ده غلط عليها

دولت و هند قاموا وطلعوا لآدم بره

آدم : خلاص مروحين ؟

هند : أنت عايز تطردنا ولا ايه ؟

آدم : لا بس قعدتكم هنا مالهاش لازمه الصراحة
هتبقى تعب ليكم على الفاضي

دولت : طيب مش نطمئن عليك يا بني الأول ؟
آدم : مانتوا اطمنتوا أهو ، أنا وجسار كويسين
وداليدا

سكت شويه : داليدا هتبقى كويسه

دولت طبطبت علي كتفه بحب : هتقوم ان شاء الله
آدم هز دماغه وشاور للوئي : معلش يا لوئي تا عبك
معايا عايزك بس تروحهم القصر

لوئي : أمرك يا باشا

دولت وهند مشوا ومعاهم الحراسه ولوئي لسه
بيخطي خطوة لقدام لقي آدم مسكه من قفاه : اختي
دي اللي عمال تبصلها بعينيك الحلوين دول هاه،
واخذ بالك ؟

لوئي رفع ايده على رقبته باحراج فادم شاف الساعة
اللي لوجين رسماها على ايده : هي حصلت ؟

لوئي : هي ايه ؟

آدم قرب منه وهمس بتحذير : لوجين دي اي نعم
ما فيش صلة دم بيننا بس هي اختي ، اعرف بس إنك

قربت لها بطريقه وحشه ولا بصتلها بصبه ماتعجبنيش
وربي لكون مقطك حنت وراميك للكلاب أنت فاهم
يالآ ؟

لؤي بصله بقوة : أنا عمري ماعمل كده ابدأ ،
حضرتك أنا بعرف في الأصول كويس وليا اخوات
بنات بخاف عليهم ومستحيل اعمل حاجة وحشه في
بنات الناس

آدم : أو مال بتبصلها كده ليه هاه ؟

لؤي باحراج : هو اا ، أحم مش قصدي والله هي ،
هي بس ، غصب عني عيني بتيجي عليها ومش
بعرف امنع نفسي

آدم كان من الأول شايف نظرات لوجين اللي متعلقه
علي لؤي طول الوقت كأن مافيش حد غيره في
المكان وهي عماله تفرك في صوابها بكسوف ولولا
الملامه هتروح تقعد معاه

آدم : ايه بتحبها ؟

لؤي بص في الارض : ماقدش أقول حاجة زي دي
، حضرتك أنا فين وهي فين ؟

بصله : أنا آسف بجد لو دايقتك بس او عدك مش
هبصلها تاني ، أنا آسف يا باشا

آدم كان حاسس بيه لأنه في نفس المركب معاه ،
حبيبته قدامه بس مش عارف يوصلها ، غضب عنه
، حط ايده على كتفه : خاينا نتكلم بعدين ، روح
روحهم دلوقتي

لؤي : أمرك يا باشا

لؤي مشي وجسار قرب من آدم : هو في حاجة ؟
آدم : لا بوصيه بس عليهم ، المهم أنا عايز اغير
لبسي ده

جسار : تعالا نروح شوية ونرجع تاني

آدم : واسيب داليدا لوحدها ؟ ده لا يمكن طبعا
جسار : يا بني ما هو كده كده الدكتور منع ان حد
يدخل عندها وبعدين ماحنا مسكنا حسام وكل رجالاته
، ورجالتي هنا في كل مكان ، عايز ايه تاني ؟

آدم فكر شوية وبعدها راح معاه فعلا ، هو محتاج
ياخد شاور ويغير ويرتاح شوية من التعب اللي هو
فيه ده

في العربية ، آدم : الا بقولك يا جسار ، أنا شاكك في
حاجة كده

جسار : حاجة ايه ؟

آدم: مين اللي طلع داليدا من القصر وازاي خرجت
من غير ما حد يحس بيها ؟

جسار حكاله كل حاجة حصلت ساعتها زي ما
الحرس حكوله

آدم: تمارا ! لا مستحيل ، هي وصلت بيها للدرجة
دي ؟ صحيح اللي خلف ماماتش، بس هي تعرف
حسام ده منين أصلا ؟

جسار : ما عرفش والله

آدم غمض عينيه بوجع وسكت بيفكر في كل حاجة
بتحصل : جبتي الورق اللي طلبته منك ؟

جسار : من كلام هند روجت المستشفى اللي سولاف
اتحجرت فيها وقابلت علي ده وعرفت أجيب تقرير
حالتها وقتها ، إنما الورق اللي يثبت قتل حنان فلسه

آدم : مش طولت أوي كده ؟

جسار: أنا قايلك من بدري إنه هياخد وقت فماتقوليش
اتأخرت وماتأخرتش

آدم : ماشي يا عم ماتزقش كده في ايه ؟

جسار : بقولك ايه ؟

آدم : هممم ؟

جسار : عمك

آدم كشر : خير ماله ده كمان ؟

جسار : أحم بيتاجر في المخدرات

آدم فتح عينيه وقرب من كرسي جسار : أنت بتهزر
صح ؟

جسار : كان على عيني والله بس للأسف دي الحقيقة

آدم : طيب وهو كمال معاه في العك ده ؟

جسار : لحد دلوقتي لا

آدم بقلق : ومروان ؟

جسار : مش عارف والله أنت قلقان على الواد ده ليه
بعد كل اللي بيعمله ؟

آدم سند ظهره تاني : مروان جواه نظيف يا جسار ،
أنا صحيح ماعرفش ايه اللي قاله عليا كده بس
الأكيد إنه بسببهم ، عاصم وكمال وفيري جواهم
سواد يكفي أمه بحالها وكانوا بيربوا مروان وتمارا

على كده ، مروان اخويا بتاع زمان مستحيل يكون
هو البني آدم بتاع دلوقتي ده ابدأ

جسار اتنهذ بضيق : أنت حر ، نفسك وأنت حر فيها
بقي ، أنا بجد تعبت منك وزهقت ، كل أما أكلمك عن
الناس ال\$#@ دي تقولي يا جسار أهلي ، أهلي يا
جسار ، رغم ان كل مرة بيعملوا فيك عمايل أسود
من المرة اللي قبلها وأنت برضه حمار ، عموما
مروان زفت مش شغال في المخدرات برضه لحد
دلوقتي بس بتمنى يشتغل فيها قدام عشان يروح في
داهية بقي ونرتاح منه

آدم أبتسم على عصبية جسار : براحه على نفسك
أحسن تفرقع بس وياسيدي أنت شاغل نفسك بيهم ليه
؟

جسار وقف العربية بنرفزة وبصله : عشان أنت
اخويا ، وعشان كل مرة بيونوك فيها بتعمل فيها
جامد قدامهم وفي الآخر تقعد مع نفسك وتتوجع
لوحدك وأنا اللي بشوف كل ده وبفضل ساكت
عشانك ، واتفضل أنزل بقي شوف أنت رايح فين
وماتقر فنيش في عيشتي

آدم ضحك : ماشي ياعم براحتك

فتح باب العربية وبصله : أنا نازل

جسار ماردش وهو نزل رجله وكرر تاني : بقولك
نازل

جسار : ماتنزل ولا تتنيل ولا عايزني انزل اجيبك
من شعرك ده وانزلك بنفسي يعني ؟

آدم ضحك جامد ونزل ووقف جنبه : طيب ايه رأيك
تنزل أنت كمان وهطلع اعملك محشي وبشاميل
عارف إنك بتحبهم

جسار بصله بشك : بتتكلم جد ؟

آدم ضحك : والله ماكدبتش لما قولت إنك بتاع كرشك
، ولا طبعا مش بجد أنا متكسر أصلا اقوم اعملك
بشاميل ومحشي ليه كنت لاقى صحتي في كيس
شيبسي ؟

سابه وطلع البيت وجسار تحت ببييرطم : اه يا واطي
، كده ؟ وأنا اللي صدقتك واتعشمت

ركن العربية وطلع على البيت هو كمان يغير ويناام
شوية

عدى كذا يوم وسولاف لسه في غيبوبه زي ما هي
وآدم قاعد عندها طول الوقت، و هند بتيجي كل شويه
تشوفها وترجع القصر تاني، ودولت بتطمن عليهم كل
يوم في الفون بعد ما عرفت كل حاجة عن سولاف من
هند اللي حكلتها

في القصر لوجين بتراقب لؤي اللي بيحي كل فترة
والتانية ياخذ هند ويوديها المستشفى وفي مرة كان
جايها ولسه هيمشي طلعت هي جري وراه قابلته في
جنينة القصر الضخمه ومسكت دراعه

لوجين : لؤي

لؤي قلبه دق جامد من لمسة ايدها وصوتها اللي بيحبه
، ولف بس مابصلهاش : أو مريني يا هانم
لوجين استغربته طريقة كلامه مش هي اللي تعرفها :
ايه هانم دي أنت مش هتقولي لوجينا زي ما كنت
بتعمل ؟

لؤي : أنا آسف يا هانم المقامات محفوظة برضه
لوجين كشرت جامد : يعني ايه ؟

لؤي بصلها و اتكلم بهدوء : يعني المقامات محفوظة يا
هانم ، أنتي هانم وأنا يا حيالله بودي جارد
لوجين : طيب ماننت من ساعة ما جيت هنا و أنت
بتعاملني حلو كأننا أصحاب ، ليه دلوقتي جاي تقولي
الكلام ده ؟

لؤي بص في الارض : آسف، انتي عندك حق كان
المفروض التزم حدودي و اعرف قيمتي من الأول
وماتعاملش معاكي كده

لوجين دموعها نزلت و قربت منه : بطل اللي أنت
بتقوله ده ، أنا عمري مش بصتلك كده

مسكت التيشيرت بتاعه و بصت في عيونه : أنت
عارف أني بحبك صح عارف أني مش بصتلك على
إنك حارس وكده صح ؟

لؤي بجمود : لا مش عارف يا هانم، اللي أنا شايفه
عيلة عندها ٢١ سنة بنت ذوات واي حاجة بتشاور
عليها بتلاقيها تحت رجليها ولما لقت واحد زيي قالت
تتسل

قطع كلامه القلم اللي نزل على وشه بكل ضعف كأن
ايدها ورقه خبطت وشه برقه ، بصلها لقاها واقفه
وشها أحمر والدموع على خدها وبتتهج كأنها كانت

بتجري في تراك : أوعى تقول عني كده ، أنا مش
كده ابدا ، عمري ماتسلى ابدا بحد ولا أقلل منه

فضلت تضربه على صدره وبتزقه بضعف وهي
بتزق : ولو كنت فاكرا أنى هانم وكل حاجة عايزاها
بلاقيها تبقى غلطان ، وأنا اللي غلطانه أنى حبيتك
اصلا ، أنت حد مش حلو ابدا

سابتة وطلعت تجري ببطئ على القصر وهي بتعيط
وهو حط ايده على صدره مكان ضربتها : أنا آسف يا
لوجينا آسف يا حبيبتى بس ده أحسن ليكي ، أنا فعلا
كنت غلطان لما سيبت مشاعري كده تنجرف وراكي
من غير تفكير

أخذ نفس طويل بوجع ومشى من القصر

أما لوجين كانت لسه هتدخل اوضتها لقت مامتها
بتشدها من دراعها بعنف : ايه اللي أنا سمعته ده ؟
انتى بتحبي الولد ده بجد ؟

لوجين : ايوه بحبه فيها ايه ؟

فيري ضربتها بالقلم وزعقت : انتى أكيد اتجننتى
رسمي ، يعني انتى سيبتى كل الناس من الطبقة

بتاعتنا ورايحه تحبيلي في حته بودي جارد زبالة
 اخره يقعد جنب الكلب بتاعك في الجنية
 لوجين شدت ايدها منها : مش تقولي عليه كده ، لوي
 اللي انتى بتقولي عليه كده ده ضفرة بس برقبة ألف
 واحد من عينة الناس اللي بتعرفيهم ، وبعدين أنا حرة
 احبه ولا احب غيره ، فين المشكله عندك معلىش يعني
 ؟

فيري زقتها في كتفها بضيق : غبية ، انتى طول
 عمرك هتفضلي غبية ومتخلفه كده ، مهما يحصل
 انتى بنتى وخايفه عليكى و_____

قاطعتها لوجين بانفعال : أوعي تقولي كده اوعي ،
 انتى عمرك ماخوفتي عليا في يوم عمرك ماعتبرتينى
 بنتك وعاملتيني على اساس كده

بدأت تصرخ جامد وجسمها بيرتجف بعنف : طول
 عمرك بتكرهيني وبتحبي تمارا وبس ، على طول
 شيفانى واحده مش تشرفك وعار عليكى وعلى
 شكلك، أنا طول الوقت لوحدي فمش تيجي دلوقتى
 تعملي فيها دور الام اللي خايفه على بنتها ، لو كنتي
 خايفه عليا فعلا كنتي خليتي بالك مني من الأول قبل

ما أسلم قلبي ليه ، أنا بكرهك يا ماما بكرهك ،
وهفضل طول عمري أكرهك عشان انتى حد قاسي
أوي

قعدت في الأرض ودخلت في حالة من الانفعال
الشديد وفضلت تصرخ وتضرب على الأرض جامد
لحد ما اللي في البيت فوق نزلوا ، تمارا ومروان
وهند ودولت ، ومدبرات القصر كلهم اتجمعوا على
صوتها

مروان جرى بسرعه قعد على الأرض قدام لوجين
ومسك ايديها : لوجين اهدى ، اهدى يا حبيبتى ، بس
كفاية

لوجين بصريخ : لا مش بس ، أنا بكرهها الست دي ،
أنا عايزة آدم عايزة ابيه ، عايزة لؤي ، جيوهملي ،
اهااااااه

حطت ايديها على ودانها وقعدت تصرخ جامد
وماحدث عارف يسكتها حتى مروان اللي ضمها
لصدره جامد فشل إنه يهديها

هند قامت فجأة : لؤي لسه موصلني ممكن يكون لسه
بره، اجري يا مروان ناديه بسرعه

مروان طلع جري بسرعة وبلغ الحرس على باب
القصر يكلموا حرس البوابة الرئيسية لو لؤي لسه
موجود يخلوه يرجع وفعلا لؤي كان في عربيته
بيعدي البوابة الحرس وقفه وقالوله يرجع تاني مروان
عايزة ، ماكانش فاهم في ايه بس قلق ليكون حد
حصله حاجة فرجع تاني ، نزل من عربيته ولسه
هيدخل القصر سمع صوت صريخ لوجين ، فطلع
يجري ليها

قعد على ركبته قدامها ومسك ايديها : لوجين ، لوجين
في ايه اهدي

لوجين مسكت التيشيرت بتاعه وفضلت تشد فيه
وتضربه على صدره : أنا بكرهك أنت كمان ، أنت
اتخليت عني عشان متخلفه برضه صح ، شايفني
متخلفة ومش اتحب صح ؟

لؤي اتصدم من تفكيرها هو ماكانش قصده يوصلها
الفكرة دي ابدأ ، نسي نفسه وكل الناس اللي واقفين
حوليه وشدها عليه يضمها جامد لصدره : عمري ما
شوفتك كده ابدأ ، انتي على طول أميرة الاميرات في
عيني

لوجين بتتكلم بصوت مكتوم : أنت كداب ، أنت مش
بتحبنى

لؤي بحب وصوت حنين : بحبك والله بحبك

لوجين بصتله : وديني عند آدم

عضلاتها سابت ووقعت مغمى عليها بين ايديه وهو
فضل يخبط على وشها بيحاول يفوقها فهند قربت منه
: لازم نوديتها المستشفى يا لؤي البت عندها صرع
أصلا والله أعلم حصلها ايه مع كل الانفعال ده

لؤي شالها ولسه هيمشي لقي فيري في وشه : نزلها،
أوعى تفكر إنك بالشو اللي أنت لسه عامله ده كده
وصلت للي أنت عايزة ؟ لا ، لوجين ابعذك من نجوم
السما واللي زيك دول آخرهم يبصوا عليها من بعيد
بس

لؤي بنرفزة : وكان فين كل ده لما كانت بتحتاجك ؟
كان فين مكانتها دي لما كنتي بتقللي منها وتكسريها
عشان مرضها ؟ لسه فاكره دلوقتي إنها حد كبير
ومكانته عاليه ؟

فيري بز عيق : انت ايه اللي _____

قاطعها صوت دولت الغاضب : انتى اللي ايه يا
 شيخه ؟ ماترحمي بقى شويه ، حتى بنتك العيانه
 ماسلمتش من شرك ، انتى ايه ؟ شيطان رجيم ؟ مش
 كفاية جمالات و آدم اللي دمرتهم حتى بناتك بتدمريهم
 ؟ الأول الكبيرة اللي سقتها غل وحسد وغيرة وكبر
 وافسديتها وضيعتها ودلوقتي اديرتي على الصغيرة ،
 مش مكفيكي المر اللي معيشاها فيه بتكلمي عليها
 ؟؟

راحت زقتها وبصت للوي : روح يا بني ألحق البت
 ليجر الها حاجه

لوي هز دماغه بطاعة وطلع جري وهو شايل لوجين
 بين ايديه وقلبه هيخرج من مكانه من كتر الدق
 ومرعوب يحصلها حاجة، حطها بحذر في عربيته
 وربطها حزام الامان وركب جنبها وساق زي
 الصاروخ على المستشفى اللي آدم فيها

تمارا كانت واقفه بتعيط من كل اللي بيحصل حولها
 وبصت لمامتها ولأول مرة تشوف شكلها اللي كانت

غافله عنه ، كانت عاملة زي الشيطان فعلا بنظراتها
الغلوية وصوتها العالي ، هي إزاي كده ؟
مروان : بقيتي تعيطي كتير أوي اليومين دول
تمارا بصتله بصمت وهو : شكك وحش ماتبصليش
كده

تمارا : وأنت شكك يخلي الواحد عايز يرجع
سابتة وطلعت اوضتها وهو متابعتها بنظراته :
يخربيتك انتي احلويتي كده امتي يا مصيبه ؟
دولت وقفت قدام فيري : أنا مش عارفه بجد انتي
جايبه كل السواد ده منين ، بس خليكي عارفه أي لو
ماقدرتش زمان اقف قصادك وسيبتك تبهدلي في
جماليات لحد ما موتيها مش هسيبك تعملي كده ابدأ في
العيال واولهم لوجين لأنها انصف انسانه على وش
الارض دي وواحدة زيك ماتستاهلش تبقى ام ليها
اصلا

سابتها ومشيت هي وهند ومروان طلع جري وراهم :
نانا هو انتي ليه دايمًا تقوليلها زي ما موتي جمالات
مش هي ماتت بالمرض ؟

دولت بصتله بغضب : واهو أنت كده هتفضل طول
عمر ك غبي ، غير ان من آدم على ايه وأنت حتى مش
بتحاول تشغل مخك صح ؟

مروان كشر : نانـ

دولت قاطعته : بلا نانا بلا زفت بقى ، أنت كان
المفروض تكون أول واحد يقف جنبه في اللي هو فيه
، يا شيخ ده كان بيعتبرك أكثر من أخ بس أنت عملت
ايه في المقابل هاه ؟ رميت ودنك ليهم وشربت من
سمهم من غير ماتشغل مخك اصلا وتفكر إذا كان
كلامهم ده صح ولا غلط وكل اللي بتعمله ترمي اللوم
على آدم ، وهو ذنبه ايه هو ؟

طلعت سلمتين ووقف وبصتله تاني : طول عمري
بقول مروان هو العبقرى بتاع العيلة بس أنت بتتفنن
إزاي تلغي مخك وتمشي ورا كلام الشياطين اللي في
البيت دول ، شغل مخك يا مروان وفكر صح قبل ما
بكرا تندم وتقول ياريت اللي جرى ما كان

طلعت هي وهند على اوضتها ترتاح وسابته واقف
متلخبط وتايه ومش فاهم حاجة

تحت فيري ماسكه الدور كله راичه جاية بغل ونرفزة
 وهتجنن من دولت : ماشي يا دولت ال#@ \$ أنا اللي
 غلطانه أنى ماقتلتكيش من زمان بس ملحوقة هخليكي
 تحصلي جمالات حبيبة القلب قريب ، ماشي

دببت برجليها في الأرض بغل وبصت لواحد من
 مدبرات القصر : انتى يا بهيمه

البننت قربت منها : أمرك يا هانم ؟

فيري : جيبيلي قهوة زفت سادة

البننت : امرك يا هانم

طلعت جري تعمل القهوة ورجعت تاني وعطهاها
 ولسه فيري بتشرب بوء قامت تفاه وراميه الفنجان في
 وش البننت : ايه القرف اللي انتى عملاه ده ؟

البننت بتمسح وشها بوجع : حضرتك اللي طلبتيها
 ساده

فيري قامت وضربتها بالقلم بغل : انتى كمان بتردي
 عليا ؟ غوري من وشي يا حيوانه

البننت طلعت جري على المطبخ وهي بتعيط وراحت
 غسلت وشها ورقبتها بالمائة الساعه والبنات التانين

بيساعدوها تطلع البلوزة اللي عليها القهوة عشان
جسمها مايتحرقش

لؤي وصل المستشفى وراح شال لوجين وجرى بيها
على جوا وقابل آدم المقيم هناك
لؤي : با ، باشا الهانم الصغيره
آدم كشر ونادى على دكتور بسرعة يشوفها وعلقها
محاليل

الدكتور : ماتلقوش يا جماعة إحنا لحقناها وشوية
وهتفوق ، بس بلاش حد يزعلها لان شكل اعصابها
متوتره جدا ، راعوا ظروفها شوية لو سمحتوا البنت
مریضة ومحتاجه معاملة خاصة

الدكتور مشى و آدم بص للؤي : هو ايه اللي حصل ؟
لؤي حكاله على كل اللي يعرفه
آدم بغضب : اه يا فريال الكلب انتى كده زودتيها أوي
بجد

لؤي عينيه متعلقه بلوجين و صدره بيعلى ويهبط
بسرعه : أنا السبب مش فريال أنا اللي عملت فيها

كده ، قولتلها أنى مانفعهاش ولازم أبعد ، ماكانش
لازم اعمل كده ماكانش لازم اجرها كده

آدم راح مسك كتافه : بتحبها ، وجاوبني بصراحة
ماتقوليش مقامات وفروق وزفت

لؤي بصله : ايوه بحبها ، وماتسألنيش إزاي حبتها في
كام يوم عشان انا ماعرفش بس اه بحبها

آدم : بس أنت عارف إنها مريضة صح ؟ دي عامله
زي عيله عندها ١٤ سنة ومع أقل انفعال بتقع من
طولها كده زي مانت شايف

لؤي : عمري ما شفتها مريضة في يوم ، أنا آسف
على اللي هقوله بس اللي يشوف بنت زيها مريضة
يبقى هو اللي مريض دي أجمل حاجة ممكن تحصل
للو احد ، بريئة وجميلة ورقيقة و_____

آدم : وايه كمان كمل كمل يا قلب أخوك

لؤي بصله باحراج : أنا قولتلك اسف في الأول

آدم : لا والله يا روح أمك ؟

لؤي حمحم : آسف

آدم : عيل مستفز ، المهم ، أنت داخل على حرب

مستعد تواجهه ؟

لؤي : لو هي الغنيمة فاكيد مستعد

آدم أبتسم : وأنا هساعدك

لؤي : متشكر أوي

آدم : ابقى اشكرني بعدين لما نخلص الموضوع مش

دلوقتي خالص

قاطهم صوت لوجين الضعيف : أبيه

آدم قرب بسرعه منها وقعد جنبها على السرير ومسك

ايدها : مالك بس يا وردتي مين اللي مزعلك ؟

لوجين بتشاور على لؤي بصمت وآدم بصله وكشر :

الواد ده مزعلك ! تحبي اخلي جسار يمسكه يرزعه

علقه مايقومش منها ؟

لوجين هزت دماغها برفض وآدم أبتسم : طيب عايزه

ايه ؟ اللي انتى عايزاه أنا هعمله

لوجين قامت بضعف ودخلت في حضن آدم ، الحضن

الوحيد اللي لما بتكون فيه بتحس بالأمان وإن كل

حاجة هتبقى كويسه ، وهو فضل يطبطب على

شعرها بحنان : حبيبتى أوعي تزعلي طول مانا

موجود جنبك ، واللي انتى عايزاه كله هيحصل حتى

لو عايزة تتجوزي الواد الدهل ده هجوز هولاك

لوجين بعدت بسرعه عنه وبصت في عيونه بصدمة
وهو أبتسم وخط ايده على خدها : اللي حبييتي تشاور
عليه أنا هنفذه

لوجين : بس هو مش بيحب لوجين

لؤي أتقدم خطوة : أنا ___

وسكت تاني

آدم بصلها : لوجي حبييتي ممكن دلوقتي ترتاحي
شوية ونبقى نتكلم بعدين ، وزى ما قولتلك اللي انتي
عايزاه كله هيحصل

قام وراح ناحية لؤي وهمس : ياريت تصلح اللي أنت
عملته ده الأول

سابه وخرج من الاوضة ولؤي راح قعد قصادها :
لوجينا

لوجين بصت الناحية الثانية وماردتش

لؤي بيتكلم زيها : كده برضه مش تردي على لؤي
حبيبك ؟

لوجين بصتله بعتاب : لؤي مش حبيبي ، لؤي حد
شريير حطيته في اللوحة السودا بتاعة الناس
الشرييرين

لؤي : واهون عليكي ؟

لوجين بدموع : وأنا مش هونت عليك برضه ؟
لؤي : عمرك ما تهوني عليا ابدًا بس انا قولتلك
الحقيقة حتى لو كانت مؤلمه هتفضل في الآخر
الحقيقة ، أنا وانتى من طبقات مختلفه ولو حصل
وفكرت بس اقرب منك هلاقي الرفض من أهلك
وانتى شوفتى بنفسك أهو

لوجين : أنا مش من العيلة دي أنا مش ليا أهل
لؤي مسك وشها بين ايديه : أوعي تقولي كده يا
لوجين ، دول أهلك مهما يحصل
لوجين : بس هما مش بيحبوني

لؤي : اكيد بيتهيالك ، مافيش حد مش بيحبك ، يمكن
بس طريقتهم مختلفة في التعبير عن حبهم بس مافيش
حد بيكره عياله برضه ، وبعدين

قعد جنبها على السرير وبص في عيونها : وبعدين أنا
بحبك هو أنا مش كفاية ولا لسه مش قد المقام
؟؟

لوجين رمت نفسها في حضنه ومسكت في التيشيرت
بتاعه من ورا : وأنا كمان بحبك ، لؤي أوعى تسيبني
وتمشي كده تاني

لؤي وهو بيطبطب على شعرها بهدوء : مش هسيبك
تاني ماتخافيش

آدم بره بيص عليهم وماسك أعصابه بالعافية : جسار

جسار : نعم ؟

آدم : أدخل جيب الولد ده من قفاه ابعده عن اختي والا
هتزلعل

جسار : وأنا مالي ازعل أنا ليه وبعدين أختك هي اللي
حضناه مش هو بطل تلزقها فيه

آدم بصله بشر فهو رفع ايده باستسلام : خلاص يا عم
حاضر رايح أهو

آدم سابه وراح عند سولاف يشوفها، لسه بيخطي
خطوة جوا الأوضة اتصدم لما لقاها صاحية وقاعده
بهدوء بتبص للكانيولا بشرود

راح بسرعة وقعد قصاها : أنتي صحيتي ؟
سولاف بصتله وهو : قلقتيني عليكي يا شيخه كل ده
؟

سولاف بخفوت : هو أنا فين وايه اللي حصل بالظبط
؟

آدم : أنتي في المستشفى واللي حصل إنك دخلتي في
غيبوبة بقالك أسبوع

سولاف بتوهان : اه ، ايوه ، ده أنا حلمت حلم غريب
أوي ، كنت ، كنت فيه

بصتله ولقت وشه لسه فيه كدمات وجروح : أنت ،
ايه اللي في وشك ده ؟

آدم حمم : داليدا أنا هقولك على حاجة بس خليك
هادية ماشي ؟

سولاف هزت دماغها بموافقة وهو كمل : اللي
حصل ده ماكانش حلم ولا حاجة ، حسام والمحل
وأنا وجسار ورجالته كل ده كان بجد ، مش حلم

سولاف بهدوء غير متوقع منها : بجد يعني أنا
ماكنتش بحلم ؟

آدم هز دماغه برفض وهي بصت قدامها بصمت
وهو : داليدا ! قولي حاجة

سولاف : أقول ايه ؟ عايزني اقول ايه ؟ اقولك أنى
تعبت واعصابي اتدمرت خلاص ؟ أقولك أنى بعد ما
اخيرا بدأت اشتم نفسي واعيшли يومين هاديين من
غير ذل وضرب ظهر تاني في حياتي عشان يفكرني
بالايام اللي بحاول أنساها ، عشان يرجع يكمل باقي
لوحته المسمومه في جسمي أنا ؟ أقول ايه بس ؟

آدم سكتت وهي قاعده دموعها بتنزل غصب عنها
وبتمسحهم كل شوية

سولاف : كل مرة بنام فيها بتمنى أنى لما افتح عيني
تاني الاقي نفسي كنت بحلم وكل ده مش حقيقي ،
الاقيني لسه في الجامعه مع صحابي وارجع اخر
اليوم الاقي امي مستنياني زي عاداتها ، او لسه في
المدرسة وابويا يوصلني كل يوم وياخدني في حضنه
زي عاداته ، الاقي نفسي كنت في كابوس وصحيت

منه بس كل مرة بصحى أكمل كابوسي على أرض
الواقع ، كابوس مُشين اوي

آدم : واللي يخرجك من الكابوس ده ؟

سولاف بصتله بأمل : تقدر ؟

آدم : مافيش حاجة آدم مابيقدرش عليها ، شاوري
انتى بس

سولاف بدموع : عايزة أطلق منه تعرف ؟ عايزاه
يطلق سراحي بقى ويبعد عني خالص وماشوفش
وشه تاني

آدم : حاضر ، حالا هعملك اللي انتى عايزاه

قام وقف ولسه هيمشي هي وقفته : رايح فين ؟

آدم بصلها : مش انتى عايزه تطلقى ، وأنا هطلقك
منه وهمحيه من على وش الأرض خالص

سولاف نزلت رجليها على الارض : وأنت رايحله
دلوقتي ؟

آدم : اه ، هو من يوميا في المخزن عندي والرجالة
مستنيين اروحلهم

سولاف وقفت وشدت المحاليل من ايدها بعنف
وقربت منه : خودني معاك

آدم كشر : انتى أكيد مجنونه صح ؟

سولاف : أنا فعلا مجنونة خودني معاك بقى

آدم : ليه طيب هتعملي ايه هناك ؟

سولاف : ولا حاجة ، عايزه اسمعه بنفسي بيقولها ،

انتى طالق ، عايزه اسمعها بودني يمكن اصدق

ساعتها ان كل ده خلص بجد

بصتله بدموع : عايزه أستلم شهادة الإفراج عني

بنفسي

آدم بص لعيونها المرهقه واتنهد بقله حيله : حاضر

يا داليدا اللي انتى عايزاه ، روجي اقعدى مكانك لو

سمحتى خلي الدكتور يكشف عليكى الأول وبعدها

نمشي

سولاف قعدت تاني وفعلا الدكتور جه كشف عليها

وطمن آدم إنها كويسه

آدم : اجهزي على ما خلص اجراءات الخروج

واجي

سابها وخرج وقفل الباب وراه وسند عليه

جسار : مالك في ايه ؟

آدم : سولاف عايزه تطلق من حسام

جسار : طيب وفين المشكله ؟ ما هي كده كده هتطلق

منه بأمر المحكمة لما تقدملهم الورق اللي معاك

آدم : هي عايزه تطلق دلوقتي وتسمعه بنفسها كمان

جسار كشر : ايه هو ده ولزمته ايه ؟

آدم : لزمته كبيرة أوي عندها يا جسار ، ده زي حكم

الإفراج عنها وبعدين هي أصلا ماتعرفش حاجة عن

الورق اللي معايا ده

جسار هز دماغه بفهم : والله حياتها وهي حرة فيها

بقي

آدم بص للوي : معلش روح خلصلنا إجراءات

الخروج للبنتين وخذ لوجين روحها وخلي هند تروح

بيتها عشان هودي داليدا على هناك

لوي هز دماغه بفهم وراح يخلص الإجراءات وآدم

مسح على وشه واتنهد : بلغ الرجالة إننا جايين

جسار : حاضر

الباب اتفتح وخرجت سولاف : أنا خلصت

آدم هز دماغه بفهم وراح جاب لوجين هي كمان

واخذهم كلهم ونزل ركب مع سولاف في عربيته

ولوي اخذ لوجين يروحها

سولاف طول الطريق قاعده مش على بعضها
وخايفه ومتوتره وعماله تفرك في صوابها وادم
مراقبها بصمت لحد ما جسر وقف قدام المخزن :
وصلنا

سولاف سمعت الكلمة وقلبها وقع من الخوف
وفضلت تبص حوليها بتوتر

ادم : لو عايزة تنسحبى براحتك ماحدث بيجبرك
على حاجه

سولاف هزت دماغها برفض : لا خليني ادخل معاك
ادم : براحتك ، بس خليكي هنا شوية جمعي نفسك
على ماشوف الدنيا فيها ايه وارجع تاني ، جسر
معاكي ماتلقيش

ادم نزل والرجاله بتوعه راحوا كلهم وقفوا قدامه
بتحية : باشا

ادم : تسلموا على مجهودكم يا شباب
فتحوله الباب وهو دخل بثبات زي عادته ووراه
رجالته وبص لحسام اللي مربوط في الكرسي

وما في هوش حته سليمه وراح وقف قدامه وبسماجة
 ردد كلامه اللي قالهوله لما خطفه : يا رب تكون
 مبسوط معانا هنا ههههه ياخي دي الدنيا دي طلعت
 غريبة والله كما تدين تدان

حسام : أنت فاكرا ان باللي انت بتعمله ده أنا كده
 هخضعك ؟ ده أنت بتحلم ، مش أنا اللي يخضع
 لكاب زيك

آدم : أنا اللي كلب برضة يا#@ \$ وبعدين أنا مش
 عايزك تخضعلي أنت أقل حتى من إنك تخضعلي كل
 اللي أنا عايزه اجيبك تحت رجل داليدا وهجيبك
 وهخليك تبوس رجليها كمان

حسام ضحك بسخرية: ابوس رجليها ده ايه ده ؟ انت
 نايم ولا ايه ؟ أنت تعرف أنا خليتها كام مرة تبوس
 رجليا ، على آخر الزمن انا اللي ابوس رجليها
 آدم الدم غلا في عروقه لمجرد إنه تخيل الفكرة بس
 ومسك حسام وفضل يضرب فيه بغضب وبعد ما
 تعب سابه وقعد على الكرسي وهو بينهج

حسام بيضحك وبيتكلم بصعوبة وهو بينهج : مهما
 تعمل مش هيفرق معايا ، أنا عارف أنت بتعمل كل
 ده ليه عشان بتحبها صح ؟ نفسك تبقى ليك بس ده

بعينك سولاف دي بتاعتي انا ، حبييتي انا ، هي
 اختارتني انا ، وانت كنت موجود وسامع وشايف
 بنفسك ، أخرج انا بس من هنا وهاخذها ونرجع
 بيتنا

ز عق جامد : بيتي انا وهي ، بيتنا اللي عيشنا فيه
 سنين ومواقف كتير وانت مش هتقدر تعمل حاجة

آدم أبتسم نص ابتسامه بسخرية : أنت مجنون ولا ايه
 ؟ أنت مسمي اللي هي قالتة ده كده اختارتك ؟ لا ده
 بجد ياما جنان ياما غباء

سند در عاته على رجليه وانحنى شوية وقرب منه :
 يعني بذكاء أهلك كده لما تهددها إنها ياما تختارك أو
 هتقتلني وهي تخاف عليا يحصلي حاجة وتختارك
 عشان تحميني انا ده معناه إنها بتحبك أنت ؟ هو
 اخينا اعمى البصيره ولا ايه ؟

حسام بجنون : اخرس سولاف ايوه بتحبني انا مش
 انت هي مستحيل تحبك

آدم وقف : بص عشان الحوار ده حقيقي بوخ أوي
 سواء داليدا بتحبني أو لا ده مش هيفرق ، على الاقل
 في امل انما الدور والباقي عليك أنت ، هي بتكرهك

ولو تطول تقتلك بايديها هتعمل كده فانسى موضوع
بتاعتي وبتحبنى ده

زق دماغه بصوابعه : لان ده مجرد وهم في دماغك
أنت عايز تعيش فيه بالعافية وهو مالهوش وجود
أساسا ، وعموما هنشوف موضوع الاختيار ده ، أنا
هجيبيها هنا تقولك قرارها بنفسها ونشوف بقى
هتختارك فعلا ولا لاااا

مشي ناحية الباب وسط زعيق حسام : هتختارني
وهتشوف ، سولاف بتحبنى بتحبي أنت فاهم ؟
آدم بهمس : الله يحرقك يا شيخ ايه سارينه ؟

خرج وراح لسولاف : جاهزه ؟

سولاف هزت دماغها بتأكيد وآدم أبتسم : ماتخافيش
كلنا معاكي وهو مش هيعرف يعملك حاجه
اخدها ودخل وهي مستخبية فيه وراحوا قعدوا قدام
حسام

آدم حط رجل على رجل بكبرياء : قولى بقى يا حسو
ايه شعورك وانت قاعد كده لا حول ليك ولا قوة
والرجالة نزلين فيك ضرب كل يوم والتاني ؟ شعور

مقرف صح ؟ تخيل بقى ان ده كان شعور داليدا كل
 مرة كنت بتمد ايدك عليها ، لا ومش كده وبس أنت
 ممكن تضرب الشعور ده في ١٠ ٢٠ مره كده عشان
 تقدر تحس بوجعها هي ساعتها ، بنت ضعيفه
 ومالهاش لا اب ولا اخ والمفروض جوزها اللي يبقى
 سندها بدالهم هو اللي بيضربها وبيكسر ها بالشكل
 ده

حسام ببجاحه : أنا حر أعمل اللي اعمله دي بتاعتي
 أنا وانا حر فيها وهي مالهاش تعترض

آدم بغیظ : هو حد قالك إنها كرسي ولا عربية كل
 شوية بتاعتي بتاعتي بتاعتي

حسام زعق : ايوه بتاعتي ، كل حاجة فيها بتاعتي
 وماحدش يقدر يقول غير كده

آدم بصله كتير بغیظ وهو ساكت وبعدها رد : لا أنا
 هقول لأنك يا حلو هتطلقها دلوقتي ومش هيبقى ليك
 علاقة بيها من النهاردة وابقى قول دي بتاعتي تاني
 عشان اقطعك لسانك ده واكلهولك

حسام : هه ده في أحلامك ، أنا مستحيل اطلقها ابدا ،
 ده على جنتي يحصل

آدم ضحك : اه ماهو هيبقى على جنتك فعلا لأنك لو
ماطلقتهاش هقتلك ولا ليك عندي ديه

حسام : يبقى اقتلني لأنني مش هطلق

بص لسولاف : سولاف قولي حاجة ، سولاف انتي
مش عايزة تتطلقي صح ؟ سولاف انتي بتحبيني
وعايزاني صح ؟

ز ع ق جامد : قولي حاجة انتي ساكته ليه ماتنطقي ؟
سولاف ز عقت بكل صوتها : كفاية كفاية بقى كفاية ،
كفاية بقى حرام عليك أنا تعبت منك ، أنت ايه ؟
طول الوقت تا عيني كفاية بقى

حسام بصدمة : أنا تا عبك ؟ طيب ليه ؟ ده أنا كنت
اتمنالك الرضا ترضي ، كنت على طول معاكي زي
ضلك

سولاف انفجرت فيه : وهي دي المشكله كنت زي
ضلي ، كنت حابسني ومعيشني في سجن ومحرم
عليا الحياة ، حرمتني من صحابي وشغلي وجيراني
وأهلي وعيشتي كلها وسكت وقولت معلىش بيغير
عليا معلىش يمكن شايفني مش مهتمه بيه ، عملت كل
اللي اتمنيته، اهتميت بيك أكثر وكل تركيزي كان
معاك ، رضيت بيك وبتصرفاتك المؤذية وقبلت

سجنك على امل إنك تتغير بس كان ايه المقابل ؟
 تماديت أكثر وأكثر وجنانك كان بيزيد أكثر وأكثر ،
 شتيمة وضرب واهانه وعذاب كل يوم ، اوامر
 وتحكمات وظلم ، كنت بتظهرلي في كل حته
 ماعرفش إزاي كأنك رادار ماشي ورايا ، ده حتى
 النفس اللي بتنفسه كنت بتحاسبني عليه ، وبعد ما
 كنت قابله الوضع بقيت مجبرة عليه لاني ما عنديش
 حد يقفلك ويحميني منك

اخذت نفسها وكملت : حرمتني من الخلفة والعيال
 اللي كان نفسي فيهم من زمان وقولت معلش يمكن
 مش مستعد معلش يمكن مش واثق في نفسه وخايف
 يؤذي ابنه بأي شكل معلش بكر اربنا يهديه ، معلش
 ومعلش وميت مليون معلش ، بس لا ماكانش ده
 السبب ، ويوم ما حملت كان ردك ايه ؟ ضرب
 ضرب ضرب زي العادة وأكثر قتلت ابنك بايدك ،
 حرمتني منه من قبل مايجي ، قتلت حته مني بكل
 كره وجبروت ، كل ده ليه ؟

صرخت بكل قهر ووجع ودموع مالهاش آخر وهي
 بتشده بغل من هدومه : في الآخر قتلت امي ، امي
 روحي وحياتي كلها ، اللي كانت ليا في الدنيا ،
 حضني وبيتي وراحتي قلبي ونفسي اللي كنت عايشه

بيه ، أمي اللي كان عندي استعداد افديها بروحي بس
 عشان تعيش مرتاحه ومبسوطه ، ليه ؟ لبييه ؟ هي
 عملتلك ايه ؟ اذتك في ايه ؟ دي كانت أحن مخلوق
 على وش الأرض اعتبرتك زي ابنها اللي ماخلفتوش
 ، عملتلك ايه فهمني عشان تقتلها ؟ حرمتني منها
 ومن حضانها وريحتها لبييه ؟

قعدت تاني مكانها وحطت ايديها على وشها وقعدت
 تعيط بانهييار وهي بتمتم بضعف : والله ماكانت
 تستاهل ده ، والله حرام عليك ، ربنا ينتقم منك ، ربنا
 يحرق قلبك زي ماحرقت قلبي عليها ، حسبني الله
 ونعم الوكيل فيك

كل اللي كانوا موجودين كانوا ساكتين ومنهم اللي
 دموعه خائته ونزلت على حالة سولاف وادم
 ببيصلها وقلبه بينزف من الوجع عليها ، نزل قعد
 تحت رجليها ومسحها دموعها : كفاية يا داليدا ،
 كفاية

سولاف بصتله بقهر : أرجوك ابعدي عنه حررني
 منه ، ابوس ايدك ارحمني منه بقى
 آدم هز دماغه بموافقة : حاضر

حسام بذهول : سسولاف ! انتى بتقولى ايه ؟ سولاف
 أنا ، أنا اسف والله أنا آسف ، اوعدك مش هعمل كده
 تاني ، آسف والله ، غصب عني كنت بغير منهم ، أنا
 آسف

سولاف بصريخ : اخرس بقى ، كل مرة تعيد وتزيد
 في نفس الكلام ، كل مرة آسف اسف غصب عني
 وفي الآخر ترجع اسوء وابشع من الأول ، غيرة ايه
 دي اللي تخليك تعمل كده ؟ غيرة ايه دي اللي تخليك
 تقتل جنين بريئ مالهوش ذنب ؟ غيرة ايه دي اللي
 تخليك تقتل إنسان بدم بارد ؟ أنت شيطان يا حسام
 شيطان مش بني ادم

حسام : سولاف أنا ، أنا بحبك ، ارجوكي ماتسبينيش
 ، وحياة حبي ليكي ماتبعدي عني

سولاف بصتله بكره : وأنا بكرهك ومش بكره حد
 في الدنيا قدك وبتمنى اليوم اللي تموت فيه واترحم
 منك ، أنت عمرك ما حبتني في يوم يا حسام ، أنت
 عايز تمتلكني وبس ، أنت مريض ، مريض يا حسام

مسحت دموعها ووقفت بقوة : طلقني ، طلقني
 دلوقتي أنا مش عايزة ابقى على ذمتك دقيقة واحده
 كمان

حسام دموعه نزلت وهو بيتنفس بتقل : سولاف لا ،
وحياتي عندك ماتقوليش كده

سولاف : ماتحلفنيش بحياتك ، أنت مالكش أي قيمة
ولا خاطر عندي ، ولو كنت أقدر كنت أخذت روحك
دي من زمان ، طلقني بقولك

حسام بيهز دماغه برفض وهو بيترجاها و آدم قام
وقف : كفاية عليكي كده يا داليدا ، كده دورك خلص
سيبي الباقي عليا

بص لحسام : هتطلق ولا تموت ؟

حسام من بين دموعه : مش هطلق

آدم هز راسه بفهم : تمام

.

راح ناحية جسار وسحب مسدسه من جيبيه ووجهه
ناحية حسام تحت صدمة كل اللي واقفين : يبقى
تموت ، بس مش أنا اللي هقتلك موتك هيكون على
ايد اللي قتلها بالحيا ، اللي عذبت وحرقت وقتلت كل
جزء من روحها يوم ورا يوم ، بيتهيالي ده هيبقى
أكبر عقاب ليك

بص لجسار : جهزلي قبره

آدم وقف في ظهر سولاف وخط المسدس في ايدها
ومسك ايدها بايديه الإيتين : اقتليه

سولاف بصتله بعياط

آدم : يلا ، اقتليه واشفي غليلك منه ، هو مش القاتل
يقتل اقتصي منه وخودي حق أمك منه خودي حق
كل يوم عذبك فيه

سولاف بتهز دماغها برفض وآدم حرك صمام
الأمان بتاع المسدس : يلا يا داليدا

سولاف جسمها كله بيتنفض وهمست من بين
دموعها : أنا مش قاتله يا آدم

آدم لقي مافيش امل منها فخط صبعه فوق صباعها
وضرب هو النار

صوت الرصاصة دوى في المكان كله وكلهم واقفين
يبصوا لآدم بصدمة وسولاف قعدت على الكرسي
وسندت دماغها على جزع آدم اللي واقف جنبها
وهي بتعيط

آدم بص على حسام : حظك أنى مش زيك وماقدرش
 اذيتها وبخاف على مشاعرها ، وربى لولا أنى
 عارف ان ده هيتعبها نفسيا لكنت قطعتك حتت ، بس
 ملحوقه ، الموت فيه راحه ليك وأنا آخر حاجة
 بتمناها هي راحتك

حسام كان يبص لآدم بصدمة وقلبه بيتنفض
 والرصاصة اللي عدت من جنبه لسه سامع صوتها
 في ودنه

آدم : اخلص طلقها احنا مش فاضين
 حسام : انتى ، انتى ، سولاف انتى طالق
 سولاف سمعت الكلمة وحست إنها اخيرا اخدت
 نفسها

آدم اتتهد وبص لجسار : قولى يا جسار هو الواحد
 ربنا خلقه صوابع ليه ؟

جسار أبتسم : عشان يبصم بيهم يا باشا
 آدم : خلصلى الحوار ده عايز ورقتها توصلى
 النهارده

جسار : أنت بس تشاور وأنا أنفذ

آدم أخذ سولاف ومشى ، خرج بره المخزن خالص
وركبها عربيته وركب جنبها ، كانت قاعده بتنتفض
وجسمها بيرتجف وسانانها بتخبط في بعض وهو
نفسه يخفف عنها ويطمئنها ، مد ايده بتردد عشان
يسحبها لحضنه بس تراجع ونزل ايده تانى واتكلم
بهدوء : داليدا

سولاف ساكته وهو اتكلم بهدوء وحنية : خلاص يا
داليدا ، أخيرا الكابوس خلص وانتى بقيتي حرة
نفسك خلاص ، ومن يوم ورايح او عدك حياتك
هتكون سعادة وراحة وبس

سولاف بصتله بدموع : نفسي أموت ، نفسي اموت
بجد ، عايزة أروح لامي ، وديني ليها ، أنا خلاص
تعبت ومش عايزة أعيش أكثر من كده ، خلاص
قلبي مش مستحمل حاجة تانية

آدم اتوجع من طلبها ده إزاي تقوله كده ؟ إزاي
بتطلب منه ينهي حياتها بايده ؟ هي ماتعرفش إنها
روحه ! إزاي تقوله كده : بعد الشر عليكى ربنا
يطول في عمرك وتعيشيلي

سولاف هزت دماغها برفض : روحي لو سمحت
أنا عايزة أروح

آدم : حاضر

جسار ركب وساق لحد ما وصلوا عند بيت هند و آدم
بصلها : مش هتبطلي عياط ؟

سولاف ساكته و آدم : طيب قولي أي حاجة ،
اصرخي زعقي طلعي كل اللي جواكي

سولاف : عايزة أروح لو سمحت

آدم : ماحننا روحنا خلاص

سولاف بصت حوليها وادركت إنهم فعلا روحوا
ففتحت الباب ونزلت و آدم نزل وراها و نادا عليها :
داليدا

سولاف وقفت و من غير ماتبصله : أرجوك ، أنا
عايزة هدنه من كل اللي حصل ده ، عايزة ارتاح
شوية ، ممكن تسييني على راحتي

آدم بيبصلها بحب : وأنا مافيش حاجة تفرق معايا
غير راحتك ، خودي هدنه ارتاحي يا داليدا زي
ماتحبي بس رجاء اخير ، يارب ماتخذنيش أنا كمان
بذنبه

سولاف بصتله : أنا مش هاخذك بذنب غيرك ولا
هاخذ اي حد بذنب غيره و مش هتعامل مع اي حد

أساسا ، أنا خلاص كده تعبت من الناس ومش عايزة
اشوفهم تاني ، سييني بعيده عنك وعن الدنيا كلها
وشكرا ليك لحد كده ، سييني بقى أعيش اللي فاضلي
من عمري بهدوء بعيد عن الناس كلها
سابتة ومشيت وهو قلبه بيتقطع عليها

خبطت و هند فتحلتها وهي أول ما شافتها اترمت في
حضانها و هند مش عارفه هي مالها ، بصت على آدم
اللي واقف وراها وهو شاورلها تاخذها وتدخل وهي
فعلا اخذتها ودخلتها اوضتها ، وسولاف بتعيط ومش
عايزة تسببها

هند : مالك بس يابنتي ايه اللي حصل ؟

سولاف : أنا اتطلقت يا ماما

هند : مش فاهمه ؟ مش ده اللي كان نفسك فيه من
زمان بتعيطي ليه دلوقتي ؟

سولاف : بعيط على أيامي وحالي، بعيط على سنين
المرار اللي عشتهم بسبب إنسان مريض زي ده
، تخيلي ، تخيلي بيقولي أنا قصرت معاكي في ايه
بيقولي أنا كنت اتمنالك الرضا ترضي ، حسني أن

هو ملاك وأنا اللي مفترية وظالمه ، أنا بجد تعبت
أوي ، يارب يارب خدني وريحني ، يارب خدني
لامي وابني وارحمني برحمتك

هند عيظت وحضنتها : واهون عليكي يابنتي تبعدني
عني ؟ اهون على قلبك تموتي وتسببيني لوحدني بعد
مالقيتك ؟ اهون عليكي ؟

سولاف ضمتها : والله ماتهوني عليا ، أنا يهون عليا
الدنيا كلها الا انتي ، لولاكي أنا ماعرفش كان ممكن
يجرالي ايه

هند مسحتلها دموعها : يبقى ماتقوليش كده تاني ،
وحدني الله وماتدعيش على نفسك ، أنتي مش عارفه
إن كده حرام ولا ايه ؟ ربنا يباركلي فيكي يا ضنايا
ويباركلي في عمرك

سولاف : أستغفر الله العظيم وأتوب إليه ، مش
قصدي والله ، لا حول ولا قوة إلا بالله العلي العظيم
، يارب سامحني ، يارب صبر قلبي وهون عليا ،
يارب الصبر من عندك ، لا إله إلا أنت سبحانك إني
كنت من الظالمين

سولاف فضلت مستكينه في حضن هند وهي
بتطبطب على ظهرها وشعرها بحنان وبتقرأها قرآن

عشان قلبها يتظمن لحد ما نامت أخيرا ، عدلتها في
السريير و غطتها وباست دماغها : ربنا يريح قلبك
يابنتي ويعوضك عن كل اللي شفتيه في حياتك

طفت النور و قفلت الباب وسابتها ترتاح شويه وهي
قعدت بره تفكر في اللي بيحصل فيها و قلبها واجعها
على وجعها وعلى اللي شافته وهي لسه شابيه في
بداية حياتها ، وبعد مده طويله قامت تحضر آكل
عشان لما سولاف تصحى تاكل

آدم قاعد في عربيته ساكت وجسار متابعه : آدم ،
هتعمل ايه دلوقتي ؟

آدم : هسلموا للنياية مع الورق بتاعه وهخلصها منه
للأبد بقى

جسار : وهتجوزها بعدها ؟

آدم اتنهذ بعنف : مايتهاأليش يا جسار

جسار باستغراب : ليه ده أنت روحك فيها ؟ أنا من ساعة ما عرفتك وعمرى ماشفتك زي آدم اللي شفته في الفترة اللي هي ظهرت فيها

آدم : هي مش هتوافق ، تخيل معايا كده واحده جالها صدمه نفسية من الرجالة ، وأول جواز ليها كان كارثي بالشكل ده وفقدت فيه كل شئ تملكه ، حياتها كلها باللي فيها راحت هدر بسبب شخص مريض ، تفتكر إنها ممكن تفكر تاني في الجواز ؟؟ ده استحاله طبعا

جسار : مش مستحيل ولا حاجة ما عادي كتير فشلوا في جوازتهم الأولى بس اتجوزوا تاني وعاشوا أجمل حياة ممكن حد يعيشها

آدم : يا جسار مش بالشكل ده ، دي الجواز عملها عقدة ، ده ربي جواها رعب وهلع ومش سهل تخطيه أو تجاهله

جسار : طيب وبعدين ؟

آدم : ولا قبلين

جسار : ايوه يعني مش فاهم هتتنازل عنها بسهولة كده ؟

آدم بوجع : عمره ما هيكون بسهولة يا جسار ، ده أنا
 هكون حكمت على نفسي بالموت ، آخر جزء في
 قلبي لسه سليم هيتكسر مع بعدها
 جسار بزعل : طيب وليه كل ده ؟

آدم : عشان مش عايز اجبرها على حاجة ، لو
 راحتها في بعدها عني فأنا هبعد عنها ، عندي
 استعداد اموت ميت مرة في بعدها ولا أني اذيتها في
 قربي منها ، ومش هندم لو ده هيريح قلبها
 وهيسعداها

جسار : وأنت ليه تدفع تمن ذنب مش ذنبك ؟
 آدم : أنا طول عمري بدفع تمن ذنب غيري ، طول
 عمري عايش بتعذب بسبب أخطاء غيري فماجئتش
 على دي

سكت شويه : روحني يلا أنا تعبت

جسار بقلق : أنت كويس ؟

آدم : قصدك ايه بالظبط اللي كويس نفسيتي ولا
 جسمي ؟

جسار : الاتنين

آدم هز دماغه بنفي : لو على نفسيتي فهي حاليا
 اسوء شيء ولو على جسمي فأنا بجد متدغدغ
 حظ ايداه على عينه الشمال : حاسس ان في حاجة
 غلط هنا ، من ساعة ما الاغبية دول ضربوني
 وعيني وجعاني

جسار بعصبية : وساكت يا آدم ؟ أنت اتجننت ؟ تعالا
 نروح بسرعة لدكتور معتز

آدم : لالا ، مش دلوقتي لسه عندي حاجات عايز
 أعملها هبقى اروحله بعدين
 جسار : أنت أكيد مجنون

آدم : يا ابني استهدى بالله بقى ، قولتلك هروح بس
 مش دلوقتي ، عشان خاطري ماتتعبش قلبي معاك
 في المناهدة في دي كمان ، سييني على راحتى
 جسار بصله بتردد وهو طبطب علي كتفه : ماتقلقش
 لو في حاجة هقولك ، يلا روحنى بقى

جسار اتنهذ بضيق وساق بهدوء وهو بيفكر في كل
 كلام آدم وفاق على صوته ببيضحك جامد
 جسار : مالك ؟ في ايه لهستيريا الضحك دي؟

آدم بصوت مكتوم : اطلع على معتز يا جبار
 جبار داس فرامل مره واحده ولفله لقي عينه بتتنزل
 دموع مع دم ، بصله بصدمة وقلق : أنت مالك بس ؟
 ايه اللي حصل فجأة كده ؟ ماكنت كويس ؟
 آدم بألم : مش عارف اطلع بس بسرعه
 جبار اتعدل وساق العربية بسرعه مجنونه لحد ما
 وصل لعيادة دكتور معتز ونزل فتح لآدم الباب
 ونزله واخده وطلع

معتز : ممكن أفهم سيادتك عملت ايه يخلي عينك
 بالمنظر ده ؟

آدم : ما عملتش حاجة والله
 معتز بصله : أو مال هي عملت كده لو حدها يعني
 آدم : هي مالها أصلا ؟

معتز : متلوته جدا وملتهبه وفي شعيرات دموية
 منفجره وده اللي عامل النزيف ، أنا مش قايلك يا آدم
 قبل كده عينك مش طبيعیه ومحتاجه رعاية خاصة ،
 سيادك اخر مرة حطيت قطره امتي ؟

آدم أبتسم ببلاهة : مش فاكرو الله يا عزو

معتز مسح وشه بعنف : يا رب صبرني، يا بني انت
ايه بجد حرام عليك نفسك

بص لجسار : وأنت مش تخلي بالك منه شوية ؟

آدم : يا عم سيب الراجل في حالة أنت مش شايف
منظرة ؟ المهم عيني دي أتعامل معاها إزاي دلوقتي
؟

معتز راح قعد على مكتبه وكتب علاج لآدم : أستمر
على العلاج ده الأول وخذ بالك من أستمر دي فعل
بمعنى المداومة والله يخليك خد القطرات في معادها
لحد مانشوف الالتهاب ده هيحصل فيه ايه بس هو ان
شاء الله هيروح ، وخلي بالك مش عايز اي ضغط
عليها مش عايز الشعيرات الدموية تنفجر اكر كفاية
اللي حصل فيها أصلا

آدم أخذ الروشته بزهدق وبص فيها : كل ده علاج !
قولي بجد يا عزو أنت واخدني مصدر للمال مش
كده ؟

معتز بص لجسار : خد الولد ده اخفيه من وشي

آدم ضحك وقام وقف : خلاص يا عم أنت عجزت
ومش حمل كل النرفزة دي أنا غلطان أنى بهزر
معاك أصلا ، ناس نكد بصحيح

الاتنين مشوا وآدم بص لجسار : مالك ماشي على
الصامت كده ليه ؟

جسار : أنت بجد بتهزر وأنت في الحالة دي ؟
آدم : اه بهزر ليه ؟ وبعدين ده حاجة بسيطة خالص
شوية التهاب مش اكثر

جسار : وده عادي بالنسبالك؟

آدم وقف قدامه بجدية : اه ، لما يكون عندي ١٥ سنه
وعيني يحصل فيها اللي حصل يبقى شوية التهاب
دلوقتي مش حوار وفك ام البوذ ده عشان
ماتزررش عليك أنت كمان

سابه ومشى وهو راح وراه بصمت وروحو البيت
وآدم راح أخذ شاور واخذ علاجة واترمى على
السريير بارهاق : وحشتني أوي ، أهى الحاجة
الوحيدة اللي الناس كلها بتشترك فيها ان السريير
بيوحشهم بعد يوم طويل ومتعب

بعد شوية جسار خبط ودخل : أنت كويس ؟

آدم : ماكنتش أعرف ان قلبك خفيف أوي كده يا
جسار

جسار : أنت ساقع يالا على فكره

آدم ضحك بتعب وجسار أبتسم وراح غطاه : ناملك
شويه شكلك تعبان

آدم بصله : عارف ، كان نفسي تبقى اخويا فعلا ،
أنت حقيقي أحسن اخ ممكن يكون عند الواحد

جسار أبتسم : ماتتعودش على الدلع بكرة هديك فوق
دماغك بس تفوق

آدم أبتسم وغمض عينيه وخلال دقائق كان نام من
كثر الإرهاق والمجهود الكبير اللي عمله آخر فترة

.

جسار بيبيص عليه بهدوء : مش فاهم أنا والله كان
عقلهم فين وهما بيهدلوا فيك كده ، لا حول ولا قوة
الا بالله

وسابه وراح اوضته يرتاح شوية هو كمان

معاذ في يوم كان في السوق بيشتري حاجة وهو
مروح قابلته سهير اللي القلق باين عليها جدا : إزيك
يا معاذ ؟

معاذ : إزيك يا خاله إخبارك ؟

سهير : الحمد لله ، الا قولي يا معاذ أنت ماتعرفش
حاجة عن حسام ابني ؟

معاذ كشر باستغراب : حاجة ايه مش فاهم ؟

سهير : أصل الولد سافر من كام يوم اسكندرية تاني
وبقالي اسبوع ماعرفش عنه حاجة ومش بيرد على
تليفونه ومش عارفه اوصله خالص

معاذ اتصدم : سافر اسكندرية !

سهير : ايوه هو ماقالكش ؟

معاذ : لا ماقاليش حاجة ، طيب هو ماقالكيش رايح
ليه ولا هيعمل ايه ؟

سهير : لا هو قالي رايح لشغل وبس

معاذ حط ايده في شعره وبيشده جامد بضيق وهو
بيفكر ، معقول راح عشان سولاف تاني ؟ طيب
وصلها ؟ عرفها ؟ اذاها ؟ بس لحظة هي بتقول بقاله
اسبوع مختفي معقوله يكون وقع نفسه مع عيلة

هارون ، دماغه كانت هتتفجر من كتر التفكير ، طيب
يعمل ايه دلوقتي ولا يتصرف إزاي ؟

سهير قطعت تفكيره : يا معاذ روحت فين ؟

معاذ : أنا هنا أهو

سهير : معلىش يعني هو أنت ماينفعش تسافر له تشوفه
فين ؟

معاذ : للأسف لا أنا ما عنديش إجازات حاليا عشان
أعرف أسافر بس أنا هسأل عليه وهحاول اوصله
وانتى كمان حاولي من ناحيتك أما نشوف الحوار ده
ايه

سهير : ماشي ربنا يستر

معاذ مشي وهو بي فكر هيعمل ايه وهيكلم مين عشان
يوصله وبي فكر في كل معارفه اللي يقدر وا يساعده

بعد يومين آدم أخذ كل الورق اللي معاه وراح
لسولاف وقعد يتكلم معاها وحط الورق قصادها

سولاف مسكت الورق : ايه ده ؟

قلبت فيه شوية كان تقرير عن حالتها يوم ما هربت
واجهضت وفضلت تقلب لحد ما وقع في ايدها ورقه
بصت فيها وبدأت تقرأها وهي عينيها بتوسع بصدمة
مع كل كلمه وبصت لأدم : ده ، ده

آدم بحزن : أنا آسف بس دي الحقيقة

سولاف بصت في الورقه تاني اللي كانت بتقول ان
حنان ماتت بسبب علاج غلط يموتها بالبطنى اتوصف
ليها من الدكتور بتاعها بتوصية من حسام مقابل مبلغ
كبير من الفلوس

سولاف : يعني لما حسام كان بيتكلم بوشوشه في
الموبايل كان بيكلم الدكتور وبيتفقوا على أمي ؟ يعني
حريقة السجاير اللي كان فيها سببها التوتره لانه
عارف انه بيعمل مصيبه

حطت ايدها على عينيها : كل ده كان بيحصل قدام
عيني وأنا اللي كنت مغفلة ، سامحيني يا أمي
مافهمتش حاجة وماعرفتش أتصرف

آدم : ماتلوميش نفسك أنتى كمان كنتي ضحية
ومالكيش ذنب

سولاف بصتله وهو شاور على الورق : الورق ده
 هيوصله للبدلة الحمراء ، أنا ماردتش اوصله للنيابة
 من غير إذتك ، وادي الورق أهو في إيدك وانتى
 اللي هتقرري عايزه ايه ، أرفع عليه قضية واسجنه
 ولا لا ؟

سولاف بصت في الورق تاني ومع كل كلمه بتقرأها
 ذكرى وحشه بتهاجمها وحاسه بالألم في جسمها
 كأنها عايشه الذكريات دي دلوقتى لحد ورقه مامتها
 اللي اتقتلت ظلم وبصت لأدم وهي بتهز دماغها :
 وصله ، ده مجرم

آدم لم الورق تاني : ماشي يا داليدا اللي أنتى عايزاه
 قام وقف : أنا همشي دلوقتى وهكلمك تاني
 مشي وهي قامت بصمت دخلت اوضتها وبتبص في
 الارض بتوهان ، هند دخلت عندها وقعدت جنبها :
 انتى كويسه ؟

سولاف هزت دماغها برفض وهند مش عارفه
 تعملها ايه

أما آدم فخرج مع جسار وبصله : الكلب اللي مرمي
 في المخزن ده خلي رجالتك يوصلوه بيته
 جسار بصله باستغراب : الله ! أنت مش قولت
 هتوصله للنيابة ؟

آدم : وأنت عايزني اخده من ايده يعني اوديه ولا ايه
 ؟ ولا اقولهم تعالوا خودوا الجثة اللي عندي دي ؟ ده
 مش بعيد يتهموني بالخطف

بص قدامة بشر : وبعدين أنا عايز الشرطة تاخده من
 بيته قدام كل الناس ، اللي عرفته إن شوية العجر
 جيرانهم في المنطقة دول مطلعين سمعة زي الزفت
 على داليدا وبيقولوا هربت مع عشيقها ربنا ينتقم
 منهم كلهم على كلامهم ، فعشان كده عايز الشرطة
 تقبض عليه قدامهم عشان يعرفوا المجرم ده عمل ايه
 وإن داليدا هربت منه بسبب جرايمه مش عشان هي
 مش كويسه ، فهمت ؟

جسار حرك راسه بفهم : لالأ دماغك متكلفة والله
 آدم بصله بتكبر مصطنع وهو بيعدل ياقة بدلته
 الوهمية فهو لابس تيشيرت عادي أساسا : مابقاش
 غير العيال اللي هيتكلموا ، دي القوالب نامت
 والانصاص قامت بصحيح

جسار بذهول : ال ايه ؟ مالك بس يا خالتي اللتاته
مين زعلك ؟

آدم ضحك : ياخي تبا ، دايمًا بتفصلني من المود
جسار زقه على جنب بقرف : وسع كده يالا مابقاش
غير ابن امبارح هو اللي هيعدل على كلامي كمان
آدم بضحك : مالك بس يا جدو مين زعلك ؟

الأتنين قعدوا يضحكوا وبعدها جسار وصل آدم
لمطعمه اللي بقاله فترة مهمة وراح هو مع رجالته
يخلصوا اللي آدم عايزة منهم

على الناحية الثانية حسام أول ما وصل بيته دخل
الشقة زي المجنون عمال يخبط ويكسر في كل حاجة
وهو بيصرخ بكل صوته : هقتلك يا آدم الكلب ، والله
هقتلك ، هقتلكم كلكم

صوت صريخه كان عالي جدا لدرجة إن كل اللي
في الشارع كانوا سامعين صوته وصوت التكسير
كمان وتعالق الهمسات والنميمة والأشاعات حولين
اللي بيحصل وكل واحد بيدلي بدلوه

تاني يوم كان صباح جميل هادئ ماكملش هدوءه
بكل أسف بسبب قوات الشرطة اللي اقتحمت المكان
ومجموعة منهم طلخوا لبيت حسام وجابوه بالاساور
قدام كل الناس اللي واقفين بيتفرجوا ، وحسام قاعد
يصرخ عشان يسيبوه وسهير ماسكه في ابنا برعب
بتشدة وبتشتم في قوات الشرطة عشان يسيبوه

وقف قدامها قائد القوة واتكلم بحزم وصوت عالي
سمع كل الواقفين : معانا أمر بالقبض على حسام
محمد بتهمة قتل والدة طليقته سولاف أكرم وأي
اعتراض منك هيعتبر عرقلة لعمل الشرطة وهيتم
القبض عليكى أنتى كمان فاهدى بقى وخليكى ساكنة
احسنلك

كل الواقفين اتصدموا وتعالى الأصوات اللي مصدوم
واللي مش مصدق واللي بيدعي عليه وغيره وغيره
من الكلام ، فصرخ القائد بقوة : كل واحد يتفضل
يشوف حالة يلا فضينا المولد

وسابهم وركب البوكس مع باقي القوة ومشوا تحت
نظرات الجيران وصراخ سهير وصدمة محمد للمرة
المليون في ابنه

عدى كذا يوم والنيابة بدأت في الإجراءات القانونية حولين قضية حسام ، تحقيق وتأكد من الأدلة وبحث عن شهود وغيره من كلاكيع القانون دي

وبعد كذا استداع لسولاف ومعاذ وعلي وهند واسلام وكل اللي ليه علاقه بسولاف وشاهد على اللي حصل فيها وفي مامتها نطق القاضي بالحكم على حسام والدكتور اللي ساعده

القاضي : " بعد مطالعة أوراق الدعوى ، وما تم فيها من تحقيقات ، وما دار بشأنها من محاكمة علنية وسرية ، وبعد سماع أقوال المتهم وطلبات النيابة العامة ، ووفقا لقانون العقوبات المادة 230 والمادة 233 والمادة 234 ، حكمت المحكمة حضوريا بإجماع الآراء بمعاقبة كلا من حسام محمد السيد وعوض مصطفى خميس بالإعدام قصاصا على جريمة القتل العمد للضحية حنان عبد المنعم حسين ، رفعت الجلسة "

القاضي كسر سن القلم اللي فى ايده معطن عن نهاية حياة حسام والدكتور اللي انهار لما سمع الحكم وقعد يشتم في حسام ويلعن فيه إنه هو اللي وصله لده

كل اللي في القاعة كانوا بييصوا لحسام منهم اللي
 بيوصله بضيق ومنهم اللي بيوصله بقرف ومنهم اللي
 بيوصله بشماته بس في النهاية كلهم كانوا مستنين
 انهياره زي الدكتور وده اللي ماحصلش وكان هادي
 وخلف كل التوقعات

بعد الجلسة مانتهدت سولاف قامت بصمت ولسه
 هتمشي وقفها صوت حسام اللي نادى عليها ، بصتله
 وهو أبتسم وبيتكلم بأخر ذرة عقل عنده : أنا رديتك
 ليا

سولاف بصتله بصدمة من تفكيره وهو كمل بجنون
 وبيزعق وصوته بيهز القاعة كلها : رديتك ليا يا
 سولاف ، أنتي مش هتكوني لغيري ، لآخر نفس فيا
 هتكوني بتاعتي ، رديتك عشان لما أموت تبقى
 أرملتي وتعيشي باسمي طول عمرك ، رديتك يا
 سولاف أنتي فاهمه ؟ رديتك

سولاف نفسها بيضيق وعينيها متعلقه بيه ودموعها
 بتهدد بالنزول ، عايزه تصرخ بكل صوتها وتقوله
 اسكت ، عايزه حد ينتشلها من كل ده

وده كان دور ملاكها الحارس ودرع حمايتها ، آدم
 لف دراعه حولين كتافها وشدها عليه ومشى بيها

بسرعه من القاعه وهو حاطت ايديه على ودانها
يمنع عنهم أى حاجة توجع قلبها أكثر ، وهي مسكت
في الجاكيت بتاعه كأنها بتستجد بيه بتشكره على
وجوده وبتستقوى بيه ، مشاعر كثيره أوي كانت
قبضة ايدها الصغيره بتوصلها له بصمت لحد ما
طلعوا من القاعه وهند ماشيه جنبهم ووراهم رجاله
آدم زي العاده

مها شافت سولاف خارجه من قاعة المحكمة قربت
منها بدموع

سولاف بصتلها : أنا اسفه

مها هزت دماغها برفض وهي بتعيط جواها متلخبط
جدا سولاف عانت فعلا بس حسام اخوها برضه ،
محمد كمان قرب من سولاف : أنا آسف يا بنتى على
كل اللي حصلك ده والله ما كنت أعرف حاجة
سولاف : حضرتك مالکش ذنب في كل ده ، وأنا
اسفه أوي

محمد : ماتعتذريش كلنا غلطنا والاعتذار مش هيفيد
دلوقتي

قاطعهم صوت سهير اللي بتصرخ وبتعيط ، قربت
من سولاف وشدتها من هدومها بعنف : كله بسببك

انتى منك لله يا بعيدة ربنا يولع فيكي زي ما ولعتي
 في قلبي كده ربنا ياخذك يا شيخه ، اه يا حسرة قلبي
 عليك يا بني ، منك لله يا ظالمة ، منك لله ، حسبى الله
 ونعم الوكيل فيكي

محمد شدها بعيد عن سولاف ورجالة آدم حاوطوهم
 من كل مكان

آدم : ماتولوميش غير نفسك يا ست انتى ، انتى لو
 كنتي ربيتي ابنك صح و علمتية دينه اخلاقه وأنه
 يتقى الله في بنات الناس ماكانش ده بقى حاله ، كنتي
 المفروض علمتية ان في ربنا المفروض يتخاف منه
 قبل مايفكر يعمل جريمة زي دي ، انتى سبب من
 أسباب اللي ابنك وصله ده ، كنتي بتدلعي فيه وتخليه
 يتفرعن ولا كأنك الوحيدة اللي خلفت عيال ،
 فماتشيليش الناس فشلك في تربيته وفساده

بص لسولاف : يلا بينا من هنا

آدم أخذ سولاف و هند ومشوا والرجاله محاوطينهم
 ومنعوا اي حد يقربلهم حتى معاذ لما جه يكلم
 سولاف منعوه وماعرفش يقرب منها

جسار وصل سولاف و هند بيتهم وسولاف دخلت
 اوضتها بصمت وقفلت على نفسها ونامت على
 السرير بلبسها وحجابها وبصت للسماء ودموعها على
 خدها مش بتنشف : حقك رجع يا ماما ، يارب تكوني
 مرتاحه في قبرك دلوقتي

غمضت عينيها وسمحت لنفسها تتوه وسط ظلام
 يمكن يكون احن عليها من حياتها القاسية اللي
 عاشتها

بره آدم كان قاعد مع هند وبعد شوية كلام
 هند : ربنا يجازيك خير يا بني على كل اللي عملته
 آدم : أنا ماعملتش حاجة يمكن ده يعوض اذيتي ليها
 زمان

هند : بقى أنت تأذي أنت ! والله إنك عيل خايب
 آدم : للأسف يا أمي أنا اذتها فعلا ، قولتلها كلام
 يزرع وجرحتها بغبائي ربنا يسامحني بقى
 هند أبتسمت لأنها عارفة ان سولاف بتحبه وعمرها
 ماترعل منه ابدًا وكانت مبسوطه بالحب اللي شيفاه

في عيونه ليها : ماتقلقش ، داليدا مافيش اطيب من
قلبها وهتنسى وهتعذرک

آدم : تفتكري

هند : الا افتكرك ، انتوا الاتنين ماتختلفوش عن بعض ،
انتوا الاتنين قلوبكم صافية وحنينه وعمرکم
ماتجرحوا حد ولا يهون عليكم زعل حد
آدم : يارب يا أمي يطلع كلامك صح بجد

هند طبطبت عليه : ان شاء الله خير يا حبيبي ، سيبها
بس ترتاح وتفضي دماغها من كل اللي حصلها ده ،
سيبلها هدنه تروق وترجع تاني ، وساعاتها ابقوا
اتكلموا واتعاتبوا وفضفضوا لبعض على كل

حاجة

آدم هز دماغه بفهم : حاضر هسيبها ترتاح حاضر ،
ربنا يريح قلبها ويريح قلبي أنا كمان

هند : آمين يا حبيبي

آدم قام وقف : ابقى خلي بالك منها ، دي مجنونه
وممكن تعمل في نفسها اي حاجة مش بعيد تفكر
تنتحر

هند شهقت : فال الله ولا فالك ، ايه ياولا ده ؟ داليدا
اه موجوعه ومجنونه بس مش للدرجة ، هي برضه
تعرف ربنا وماتعملش كده

آدم : يارب يا أمي ربنا يخلف ظني وتكون فعلا زي
ما قولتي ، المهم ابقى مطمئني عليها، انا هرن عليك
كل يوم

هند لوت شفايفها : طيب ماتيجي تظمن عليها بنفسك
ياخويا ولا ما عندكش رجلين

آدم ضحك على اسلوبها بس ضحكته اختفت بسرعه
: مش هعرف للأسف ، أنا هسيب مصر وهرجع
ايطاليا تاني

هند كشرت ومسكت دراعه : ليه بس يابني كده ؟ ده
أنا ماصدقت رجعت مصر تقوم مسافر تاني

آدم : حقا عليا بس أنا كمان عايز هدنه ، أنا كمان
موجوع وعايز افصل عن الدنيا كلها ، وماتقلقيش
زي ما قولتك هكلمك كل يوم وكمان رجالتني
هيفضلوا حوليكم طول الوقت ، انتوا هتبقوا في أمان
ماتقلقيش

هند : وداليدا

آدم بص على اوضة سولاف وابتسم بحزن : مش في
ايدي حاجة اعملها

هند حضنته تطبطبت عليه : ربنا يريح قلبك يا بني
ويخفف عنك ، ابقى طمني عليك يا حبيبي

آدم أبتسم وباس جبينها : حاضر يا امي ، يلا عايزة
حاجة مني ؟

هند : سلامتك يا نور عيني

آدم مشى خطوه ورجع بصلها تاني : هو أناا ، هو
يعنيبي

هند ضحكت : شوف الواد ، عاملي فيها الحزين
المنكسر وهو جواه شاب منحرف

آدم ضحك : الله يسامحك بقي أنا منحرف ؟

هند : اه ياخويا عايز تدخل تشوف البت وتتنحناك
نحنوحتين وتعملي فيها مهند التركي ده وتحضن
وتبوس مش كده ؟

آدم ضحك جامد : يادي النيلة على ام المسلسلات
التركي اللي بتشوف فيها ، دخليني بس اشوفها وأنا مش
هتتنح ولا حاجة اشوفها بس قبل ما امشي ، الله
أعلم هعيش لحد ماشوفها تاني ولا لأ

هند : بعد الشر عليك ربنا يبارك فيك وفي عمرك ،
استناني هنا هشوفها وادخلك

آدم هز دماغه بموافقة و هند دخلت عند سولاف لقتها
نايمه بلبسها وحجابها زي ما هي فخرجت : نايمه
آدم : مش مشكله خليني اشوفها بس

هند شاورتله يدخل وهو دخل بهدوء وقعد على
الارض قصادها و هند سابتة وطلعت

آدم بص على وش سولاف الدبلان ودموعها اللي
لسه مانشفوش حتى وهي نايمه وهمس : يارب أكون
قدرت ازيل حزنك و اخفف عنك شوية

مسح دموعها بلطف : مع السلامة يا وجعي ، ربنا
يسلمك من كل شر

قام وبصلها بصره أخيره وخرج وقفل الباب وراه
وبص لهند بصمت

هند : حضنت وبوست خلاص ؟

آدم أبتسم : لا ، لا حضنت ولا بوست ارتاحي بقي
هند طبطبت علي كتفه : ربنا يريح قلبك يا بني

آدم سلم عليها لآخر مره واخذ بعضه ومشى ، ركب
عربيته وجسار بيصله بصمت

آدم : بتبصلي كده ليه ؟

جسار : بحاول أفهمك ، يعني شايفك بتدي من غير
مقابل

آدم أبتسم : هو الحب كده غبي أوي ، صح ؟

جسار رفع حواجبه ونزلهم باستغراب

آدم : يلا نروح وأبقى احجزلنا في أول طائرة راичه
ايطاليا

جسار : ايه ده أنت هتسافر تاني ؟

آدم : اه

جسار : وداليدا ؟

آدم : هتفضل تحت عيني وفي قلبي لحد ماربنا
يرزقتي بيها

جسار : ودولت ولوجين ؟

آدم أبتسم بحزن : أهم دول اللي مش عارف هقولهم
ازاى أنى هسافر تاني بس دولت معاها هند مش
قلقان عليها الدور والباقي على لوجين اللي دخلت في
الحرب الباردة اللي إحنا فيها دي ومش عارف
مصيرها هيكون ايه ؟

جسار بصله : ايه ده هو لؤي مش مالي عينك ولا
ايه ؟

آدم : لا مش ماليها ، إذا كان هو مالي عين لوجين
وهي ماليه عينه ده مش معناه إن كده خلاص الدنيا
ربيع والجو بديع ، أوعى تنسى فريال اللي أنا متأكد
إنها هتعمل المستحيل عشان تفرق بينهم وهو مش
هيقدر يقف قصادها

جسار سكت لان كلام آدم صح فعلا : وأنت هتعمل
ايه طيب هتسيبها تفرق بينهم ؟

آدم : أكيد لا بس أتأكد الأول من مشاعر لوجين ،
أنت عارف إنها تعبانة وأنا مش بقلل منها بس هي
عيله وممكن تكون مشاعرها دي مجرد تعلق بحد
مش حب ، خايف في يوم تكتشف ده وتحصل مشكله
بعد كده ، وبعدين أنا أي نعم أعرف لؤي كويس بس
في الشغل ، راجل صلب وجلد وشغله مضبوط بس
ماعرفش في الحياة عامل إزاي ؟ هيعاملها إزاي ولا
ممكن في يوم يعايرها بتعبها ؟ وبعدين الحب مش
كفاية يا جسار

حط ايده على دماغه بتعب وجسار : أنت حقيقي
غريب أوي يا آدم ، مش فاهم أنت شايلى هم كل اللي

حوليك ليه وأنت همك عايز اللي يشيله معاك أصلا
؟؟

آدم : وأنا بجد تعبت مش قادر ، حاسس أنى هقع في
أي لحظة

جسار : ربنا يعينك يا صاحبي ولو عايز تقع اقع وأنا
هسندك

آدم أبتسم : إذا كان كده بقى روح قول لدولي أنى
مسافر

جسار : والله يا روح أمك ، واخد موشح التهزيئ
بتاع كل مرة وأنت عارف دولي لما بتفتح ماحدث
بيعرف يوقفها

آدم ضحك : خلاص يا عم هقولها انا وامري لله بقى

وفعلا آدم قال لدولت إنه مسافر تاني وطبعا فتحت
الموشح بتاعها وادم بيسمع ويضحك ويبوس ايديها
ولوجين كمان عملت مناحه وفضلت تعيط وادم
واخدها في حضنه وبيطبطب عليها عشان تهدى بس
هي ماسكتتش وفضلت تعيط لحد ما تعبت ونامت
على رجليه

آدم رفع راس لوجين بهدوء من على رجله وحط
مخده تحتها وباس جبينها وانسحب بصمت من
الأرضه وسلم على دولت وسابهم وسافر

بعد ٣ شهور

رجع الشتاء من ثاني في قصر هارون ، لوجين
كانت قاعده عند البسين وبتعمل مراكب ورق
وبتعومهم فيه

ولؤي قاعد جنبها : مالك زعلانه كده ليه ؟

لوجين : ابيه وحشني أوي أنت مش تعرف هو
هيرجع امتي ؟

لؤي بص قدامه واتنهد : لا للأسف

لوجين هزت دماغها بفهم وكملت لعب في المياه،
فيرى كانت قاعده في بلكونة اوضتها وبتبص على
لؤي ولوجين اللي قاعدين بيلعبوا تحت ودمها بيغلي
، هي لا يمكن توافق على العلاقة دي ابدأ لو السما
انتطبقت على الارض ، أخذت بعضها ونزلت تحت
وقفت في التراس بتفكر في خطه لحد ما وصلت

لخطه مجنونة وقررت تنفذها فنزلت الجنينة وراحت
ناحيتهم : أنت ياا

لؤي بصلها وهي : الست دولت كانت عايزاك
لؤي : عايزاني أنا ! ليه ؟

فيري بنرفزة : أنت هتحقق معايا ولا ايه تعوزك ولا
لا أنا مالي ماتروح تشوفها أنت

لؤي اتهد بضيق ولوجين بصتله بابتسامة بريئة :
روح وانا هستناك هنا

فيري كان هالين عليها تروح تضربها بالقلم بس
مسكت اعصابها عشان خطتها تمشي صح ، ولؤي
سابهم ومشى بس وقف لحظه وهو بيسأل نفسه ، هي
من امتى دولت كان ليها كلام مع فيري أو بتطلب
منها حاجة ، كشر ولسه هيرجع تاني سمع لوجين
بتصرخ وصوت حاجة وقعت في المياه فطلع يجري
بسرعة

لوجين كانت واقعه في البسين وبتغرق وفيري بتمد
ايدها عشان توصلها ، ولوجين بسبب ضعفها
ماقدرتش تقاوم كثير واستسلمت للمياه بسرعه
ونزلت للقاع بكل سهوله

لؤي كان جاي يجرب من بعيد شاف لوجين بتغرق
 كده فبدون لحظة تفكير واحده نط في البسين وراها
 وشالها على دراعه طلعا بره المياه

لوجين فضلت تكح جامد وبتحاول تاخذ نفسها ولؤي
 بيحاول يهديها : خلاص يا لوجين ، خلاص أنتي
 كويسه يا حبيبتني خلاص

لوجين كانت بتشهو وهي ساند راسها على كتفه
 وماسكه في شعره جامد وهو طلع بيها بره البسين
 ولسه هيظمن فيري لقاها بتبصله بتحدي وشر فهم
 منه إنها هي اللي تعمدت توقعها

لوجين اتكلمت بضعف : أنا سقعانه ، سقعانه اوي يا
 لؤي

لؤي اتحرك بسرعة ودخل القصر وداها اوضتها
 وسابها مع مدبرات القصر يساعدها تغير وخرج
 هو لبره ، لقي فيري داخله القصر وبتبصله بقرف
 وراحت قعدت في الليفنج روم ومسكت تقاحه تاكل
 فيها بكل برود

لؤي راح وقف قدامها بغضب : أنتي اللي عملتي كده
 صح ؟ وقعتيها عمد ؟

فيري : اسمها أنتي برضه يا بهيم ؟ أنت نسيت نفسك

قامت وقفت وسابت سكينه الفاكهة والتفاحة من ايدها
 : واه أنا اللي وقعتها ، لو فضلت متمسكه بالعلاقة
 القذرة دي يبقى الموت احسنلها ، مش تكون مالهاش
 لازمه وكمان عايزة على آخر الزمن تعرني أكثر
 وتتجوز خدام زباله

لؤي دمه فار من الكلام اللي سمعه ووشه أحمر من
 الغضب وعروقه برزت جامد : يعني أنتي شايفه كده
 ؟

قرب منها أوي وقال بصوت يخوف : أبقي حاولي
 كده تأذيها تاني وأنا هقتلك ساعتها ، انتي فاكهه ان
 البودي جارد واحد بيروح الجيم ويلعب ربع ساعة
 حديد بس اللي انتي ماتعرفيهوش _____

انحنى بسرعه واخذ سكينه الفاكهة اللي قدامه رفعها
 على رقبتها وهي شهقت جامد : اللي ماتعرفيهوش
 بقى أنى متدرب على ايد الأسد جزار وأول حاجة
 علمهالي إزاي استخدم السكينه بسهولة ، فخافي مني
 بقى

مسك السكينه بايديه الاتنين وتتاها لحد ماتكسرت
 نصين ورمها على الترايبزة وسابها ومشى

فيري قعدت على الكنبه اللي وراها وقلبها هيخرج
من مكانه من الرعب وحطت ايدها على رقبته
بصدمة وهي مش مصدقه اللي هو عمله

لؤي راح للوجين تاني كانت غيرت وقاعده على
سريرها وبترتجف فراح لف البطانيه عليها وقعد
على ركبته قدامها : أنتي كويسه ؟
لوجين هزت دماغها باه وهو سأل : أنتي وقعتي كده
إزاي ؟

لوجين بتتكلم وهي بترتجف : بعد ما أنت مشيت ماما
قالتلي إنك هتتاخر وادخل جوا من السقعه ولما قومت
مش عارفه دوست على حاجة ورايا واتكعبلت
ووقعت ، ماما حاولت تطلعني بس مش عرفت لحد
مانت جيت

لؤي هز دماغه بفهم : الحمد لله إنك كويسه ، ناميلك
شوية بقي زمانك بردانه
لوجين : وأنت مش سقعان هدومك مبلوله ؟

لؤي كأنه استوعب فعلا إنه مبلول : تصدقي كنت
ناسي أصلا

لوجين ضحكت وهو أبتسم : ايوه كده اضحكي
واوعي تخلي حد يسرق منك ضحكك دي

لوجين بصتله بحب وبعدها : ممكن تطلعني عند نانا
عايزة أنام معاها

لؤي وقف وانحنى زي الأمير : أمرك يا سمو
الأميرة

اخدها طلعتها فوق عند دولت وسابهم مع بعض
وخرج لقي مروان في وشه

.

مروان : أنت ، ايوه أنت ، أنت غريب ، واوي كمان
لؤي : شكرا عن إذتك بقي

لسه هيمشي لقي تمارا نازله قصاده وكالعادة لبسها
مش لطيف ابدأ فنزل وشه في الأرض ومشى

مروان بص على تمارا بنرفزة : انتى رايحه فين كده
؟

تمارا بلا مبالاة : هكون رايحه فين يعني أكيد بارتي
، جو عامل بارتي استقبال الشتا وأنا معزومه

سابتة ونزلت بس هو نزل وراها وسحبها من
دراعتها جامد : وهتروحي كده بمنظرك ده ؟

تمارا : اه هروح كده ليه وحش ؟

مروان : زي الزفت على دماغك

تمارا كشرت : ليه ماله ده ؟ ده لسه جديد حتى
ومافيش منه غير عدد محدود بس ومش اي حد
بيلبسه

مروان بعصيبة : مكشوف أوي يا تمارا ومقسمك
جامد ايه القرف ده ؟

تمارا سحبت دراعتها منه بعنف : وأنت مالك أنت ؟
أنا ألبس اللي يعجبني وأنت مالکش فيه

مروان كشر : طيب وديني يا تمارا لو ماغيرتي
القرف ده لاكون لاغيلك أم الحفلة دي خالص هاه
وابقى وريني هتروحي فين بقى

تمارا سابتة بعدم إهتمام : ماتقدرش

مروان طلع فونه ورن على جو : ايوه يا زفت ،
الحفلة ال#@ \$ اللي أنت عاملها دي الغيها حالا والا
وعزة جلال الله هاجي اشمعلك الديسكو بالشمع
الأحمر

جو بقلق : خلاص يا عم ما تتعصبش كده هلغيها
ماشي

مروان قفل معاه ونزل مسك دراع تمارا وطلع بيها
تاني على اوضتها : اتفضلي بقى وماشوفش وشك ده
غير تانى يوم الصبح

سابها ودخل اوضته ورزح الباب وراه وهي واقفه
مش فاهمه في ايه ولا مستوعبه اللي حصل أساسا
هو معقول مروان غار عليها دلوقتي طيب إزاي
وليه ؟

سولاف بعد اللي حصل معاها كانت طول الوقت
قاعدة في البيت مش بتعمل حاجة ، حتى الأكل
والشرب بطلته يادوب بتاكل اللي يعيشها وده بيكون
بعد الحاح ومحايلات من هند في كل مره

ولؤي بياخد باله منهم ومعين حراسة ٢٤ ساعة على
بيتهم مانع أي حد يقرب من البيت زي ما آدم أمره
وبيروحلهم كل فترة والتانية

في يوم سولاف كانت قاعدة زي عاداتها في سريرها
 وبتفكر في مستقبلها اللي مالهوش ملامح خالص ،
 وقاطع تفكيرها صورة آدم اللي مش عارفه تخرجه
 من عقلها ولا قلبها ، افكرت كلامه ليها آخر مره
 وإنها ماتاخدهوش بذنب غيره ، هو كمان اتظلم كثير
 في حياته ومش عايزة تكون هي كمان جرح من
 جروحه بس هي مش هتقدر ، ومع ذلك نفسها لو
 تشوفه انشالله من بعيد بس ، تلمحه ، تحس بوجوده ،
 الأمان اللي في حضوره

اتنهدت وسندت ظهرها وبصت على الباب وهمست
 : ياريتك تيجي

في اللحظة دي الباب اتفتح ودخل آدم فعلا وهي
 برقت واتعدلت في قعدتها : آدم !

هند : آدم مين يا بنتى ده أنا

سولاف فاقت من خيالها واخذت بالها ان دي هند
 مش آدم ، اتكسفت اوي وغيرت الموضوع : خير يا
 امي هو في حاجة حصلت ولا ايه ؟

هند قعدت جنبها : لا يا حبيبتي مافيش أنا بس جيت
 اظمن عليك

سولاف : أنا بخير يا أمي ماتقلقيش

هند : ربنا يديم عليكى الخير يا بنتى ، أنا حضرتلنا
غدا تعالى اتغدي معايا يلا

سولاف : لالأ مش قادرة ، اتغدي انتى وانا هاكل
بعدين

هند : لا حول ولا قوة الا بالله ، تانى يا داليدا هو
اللى هنعيده هنزيده كل يوم ؟

سولاف : يا ماما سيبينى براحتى لو سمحتى

هند بحزم : وهى راحتك فى إنك تموتى نفسك
بالبطئ يا بنتى ؟ أنا لو ماكلتكيش بنفسى ولا بتحطى
لقمه فى بوءك

سولاف : مش قادرة والله مش قابله الأكل خالص
مش عارفه أنا مالي والله ، فى حاجة تعباني وأنا مش
عارفه هي ايه ولا عارفه أرتاح

هند طبطبت على كتفها : ربنا يهون عليكى يا حبيبتى
ويريح قلبك

سولاف سكتت شويه وبعدها بصتلها : أنا قررت
انزل أشغل فى أي مستشفى ، أنا تقلت عليكى أوي
وجه الوقت اللي اريحك شوية

هند : وهو أنا كنت اشتكيتك وبعدين تقلتي عليا ده
ايه ؟ انتى ولا بتاكلتي ولا بتشربي ولا بتخرجي ولا
بتصرفي أي فلوس خالص ولا بتطلبي مني اي
حاجة ، بالعكس ده انتى مونساني بدل مانا قاعده
لو حدي أكلم نفسي

سولاف : معلش عشان خاطري يمكن لو خرجت
افك شوية بدل قعدتي كده

هند : طيب ماترجعي لدولت هانم دي ياعيني من
ساعة ما سيبتيتها وهي مش مبطله سؤال عليكى وكل
يوم تسألني هترجعي امتى

سولاف بحزن : لا يا ماما أنا مش هرجع القصر ده
تاني ، مش هقدر معلش اعذروني

هند كانت متفهمه عدم رغبتها إنها ترجع للقصر ،
هي اللي حصل فيها هناك ماكانش قليل برضه ،
وكمان درعها الوحيد اللي هو آدم مابقاش موجود
يحميها منهم

طبببت علي شعرها : اللي يريحك يا حبيبتى اعلميه
أنا مش هعترض طلاما فيه مصلحتك وراحتك وربنا
يوفقك

سولاف : ربنا يباركلي فيكي يا أمي

هند : وبياركلي فيكي يا حبيبي ، يلا مش هتقومي
تتغدي معايا ؟

سولاف بصتلها برجاء وهي بتحايل : طيب حاجة
بسيطة بس ، لقمه صغيرة قد كده ، حتى تفتحي
نفسى على الأكل

قامت وشدتها براحه من ايدها : يالا قومي وصدقيني
مش هضغط عليكى ، يلا بقى
سولاف قامت معاها ويادوب أكلت حاجة بسيطة
وقامت تانى

في إيطاليا

واقف في بلكونة اوضته بهدوم خفيفة جدا ورجليه
حافين على البلاط الساقع وفارد ايديه قدامه اللى
حبات الثلج بتتجمع عليها واحده ورا الثانية ، غمض
عينيه وبيهمس بصوت مشتاق : حاسه بيا ؟ يا ترى
لسه فكرانى ؟ أنا شايفك في كل تفاصيل حياتى
ياترى أنتى زيي ولا التلات شهور دول كانوا كافيين
يمحونى من ذكرياتك ؟

أخذ نفس طويل من الهواء البارد حوليه وطلعه بوجع
 : ياريتك تحسي بمشاعري وترحمي قلبي المحروق
 عليكي ، نفسي لو تاخديني في حضنك دقيقه بس
 استكين ، اظفي نار شوقي ليكي أو أشبع منك
 للحظة

صدره بدأ يضيق عليه ونفسه بيتقل ، قاطعه صوت
 جسار : آدم

آدم : اممم ؟

جسار دخل عنده البلكونه : تانى يا آدم واقف كده ،
 يابنى حرام عليك نفسك كده تتعب ، أنت هتموت
 نفسك عشان ايه بس ؟

آدم فضل في نفس وضعه لثوانى وبعدها فتح عينيه
 وبصله بهدوء: عشانها ، لو أطول اديلها روي على
 طبق من ذهب مش هتردد لحظه

جسار بيترك دماغه بضيق : وبعدين ؟ وقفك كده
 بلبس خفيف تحت الثلج هتقربك منها ، أنت كده مش
 واحد بيحب واحده ونفسه تحس بيه

قال بغیظ : لا أنت كده واحد مجنون مش فاهم هو
 بيعمل ايه ولا حاسس بنفسه ، غبي مش بي فكر في
 عواقب أفعاله ، يعنى قولي هتخسر ايه لو لبست

هدوم عدله زي البنى ادمين هاه ؟ أنا مش معترض
على وقفك تحت الثلج بس مش باللبس الخفيف ده ،
اللبس بالطو جاكيت أي حاجة تدفيك واللبس أي نيله
في رجلك واطلع اقعدي في الثلج براحتك ، إنما كده
أنت بتنتحر

آدم ماقدرش يرد عليه وهو زقه لجوا : اتفضل ادخل
كفايه كده النهارده هتتجمد من كتر القاعده في
الثلج

آدم دخل اوضته بصمت وجسار قفل باب البلكونه
وراه : أموت وافهم بتستفاد ايه من وقفك كده بره
؟؟

آدم هز كتافه : ولا حاجة ، يمكن عايز أبرد نار
الشوق اللي بتاكل فيا ، اطفى شعله قلبي اللي قايد
ومش عارف اتحكم فيها

جسار : لحد امتي ؟

آدم فتح درعاه : ماعرفش

رجع بظهره لورا لحد ماتحدف بخفه على السرير
وهو فاتح ايديه براحه : خلينا نرجع مصر ، اروح
اخطفها واتجوزها غصب عنها واحطها قدام الأمر
الواقع زي الروايات

بصله : مش كده أسهل ؟

جسار : عارف ايه اللي أسهل بجد من كل ده ؟

آدم : ايه ؟

جسار بغیظ : أنى امسكك دلوقتی افرمك في ايدي

يمكن تفوق لنفسك شويه

حذف جنبه ملف فيه ورق كثير : الصفقه اللي طلبت

معلومات عنها أهي أبقى اتأكد منها

طلع من الأوضه وهو بيبرطم : أنا كان مالي بس

ومال التخلف ده ياربي ، ايه البلاوي دي بجد ؟ هو

أنا كنت ناقص ؟

آدم بيضحك عليه : ماتبرطمش كثير عشان سامعك

.

جسار ماردش عليه ودخل اوضته وهبد الباب بغیظ

وده كان الرد على آدم اللي ضحك وبعدها ضحكته

اختفت في لحظة وبص في السقف بشرود ودندن

بصوت خافت : أهواك وأتمنى لو أنساك وأنسى

روحي وياك وإن ضاعت يبقى فداك لو تنساني

وأنساك وأتاريني بنسى جفاك وأشتاق لعذابي معاك

وألقي دموعي ففكرأك أرجع تانى

بتعدي الأيام وسولاف بتدور على شغل لحد ما لقت
مستشفى صغيرة تشتغل فيها وبدأت شغل فعلا أيام
وراها أسابيع وشهور ، الموضوع ماكانش سهل
وهي كانت بتتعب بسرعه بسبب جسمها اللي بقى
ضعيف بس كان لازم تكمل ، كفاية على هند شايلة
همها طول الوقت لازم هي تخفف عنها شوية
وترد لها ولو جزء بسيط من فضلها عليها

في يوم روحت متأخر من الشغل عن معادها تعبانه
وعلى آخرها

هند استقبلتها بلهفه : داليدا يا بنتى قلقتيني عليكى كل
ده تأخير إحنا بقينا المغرب

سولاف افكرت رد فعل مامتها لما كانت بتتأخر في
الشغل وتقلق عليها كده برضه، قربت منها وحضنتها
بحب : ماتقلقيش يا ست الكل أتأخرت شوية بس
بسبب حالة طارئة في المستشفى

هند : ماشي يا ستي تعالي اتغدي يالا زمانك جعانه

سولاف : أنا جعانه فعلا بس جعانه نوم ، مش قادره
بقالي كتير أوي ماشتغلتش كده وحاسة انى مش
قادره افتح عيني

هند : يا حبيبتى يا بنتى ، طيب تعالى كويلك حاجة
خفيفة كده تسند طولك وروحي نامي

سولاف : لالاً أنا هموت وانام ان شالله ساعتين بس
وهبقى اقوم آكل ، بجد عايزة أنام أوي
هند انتهت : خلاص اللي يريحك

سولاف باست خدها بحب : ربنا مايحرمني منك
ابدا

دخلت اوضتها غيرت هدومها ونامت على السرير
ورفعت ايدها بصت على علامة كانت في بطن ايدها
من يوم ماتخطفت مع آدم : ياريتك كنت هنا ،
ياريتك ترجع تاني يا آدم ، يا ريتني ماقولتلك تبعد
عني ابدا ، أنا غبية بجد

اتنهت بوجع واستغطت كويس ونامت

بعد وقت مش عارفه قد ايه بالظبط حست بإيد ماشيه
براحه على خدها ، فتحت عينيها ببطئ وبصت للي

هند : لا حول ولا قوة الا بالله ، اهدي يا حبيبتي
 حسام مابقاش موجود ، أعوذ بالله من الشيطان
 الرجيم ، اهدي يا ضنايا أنتى هنا في حضني
 ماتلقيش

هند فضلت تقرأها قرآن كثير لحد مانامت تاني
 وخرجت من اوضتها وبصت للوي اللي كان واقف
 مع رجالته بره البيت ودخل على صريخ سولاف :
 في ايه ؟

هند : كابوس تاني

لوي : تاني ! قولي تاسع عاشر ميه ، دي من ساعة
 اليوم اياه وهي كل شويه تصحى على كوابيس
 هند : منه لله البعيد دمرها ، أستغفر الله العظيم هو
 مايجوزش عليه إلا الرحمة دلوقتي

بصت للي واقف وساند على الحيطه وبيص على
 باب اوضة سولاف بصمت : وأنت هتفضل ساكت
 كده ؟

واحد من رجالة لوي دخل البيت وقاطعهم : باشا
 جبته

لؤي : الله ينور ، تعالالي بقى هنا لان الموضوع
كبير وعايز قاعده

بعد وقت طويل شوية سولاف كانت بتتقلب بقلق في
السريير وهي سامعه صوت أذان العشاء وبيتهيالها
إنها سامعه أصوات رجالة في الصالون بره بس
افترضت إنهم لؤي واللى معاه ، ثواني وحست بحد
دخل الأوضة وقرب منها بهدوء

سولاف : ماما ؟

هند : حبيبتى أنا صحيتك

سولاف : لا أنا كنت صاحيه

هند قعدت جنبها : بقولك يا ديدا يا حبيبتى في حد
عايز يتكلم معاكي شوية ممكن تقومي تغيري هدومك

سولاف قعدت : حد مين ؟

هند : قومي بس وأنتى هتعرفي

سابتها وخرجت وسولاف قامت تغير لبسها وبعد
شوية الباب خبط وهي سمحت للي بره يدخل ، كانت
قاعده على السريير وعاطيه ظهرها للباب وبتشرب
مياه ، حطت الازازة على الكومود وفتحت الدرج

بتدور على حاجة وهي بتتكلم : ماما ماقولتليش بقى
مين عايزني هو أنا أعرف حد هنا أصلا عشان
يعوزني ؟

الشخص همس بهدوء : داليدا

سولاف التفتت بخضه لصاحب الصوت و عيونها
بتلمع بالدموع اللي بتهدد بالنزول و اتكلمت ببحه :
آدم !

آدم همس بحب : عيونه

سولاف : أنت جيت أنت بجد هنا ؟

آدم : ايوه أنا بجد هنا جيت عشانك

سولاف كانت هتقوم تقف بس هو راح قعد على
كرسي قصاها : خليكي قاعده

سولاف بتبصله وهي مش قادرة تستوعب إنه بجد
قدامها دلوقتي

آدم : إزيك ؟ كنتي عامله ايه الفترة الأخيرة ؟

سولاف هزت دماغها يمين وشمال : ماكنتش كويسه
ابدا

آدم اتنهذ : هو أنا عملت كل ده عشان تبقى مش
كويسه برضه ؟

بصلها : طيب اعملك ايه عشان قلبك يرتاح ؟

سولاف هزت دماغها بولا حاجة وسكتت وهو فتح
معاها كلام واتكلموا شوية عن حالهم الفترة الأخيرة
وسكتوا ، صمت طويل مافيهوش غير نظراتهم
لبعض ، شوق حب لهفه مشاعر كثير متلخبطه

.

سولاف نفسها لو ترمي نفسها في حضنه وبس كده
مش عايزه حاجة تانيه من الدنيا عايزة بس تعيش
الأمان اللى بتفقدده ببعده ، وهو بببصلها وعيونه
بتقول كلام كثير كلام نفسه يعبر عنه لو مره واحده
بس ، تديله فرصه ، هي فرصه واحده بس تسمعه
وتحس بيه

سولاف : شكك عايز تقول حاجة بس متردد

آدم : أنا عايز أقول حاجات مش حاجه واحده ، بس
من بين كل الحاجات دي في حاجة نفسي اقولهاك
بجد وتسمعيها منى

سولاف : قول

آدم : لحد امتى هفضل كده ؟

سولاف سكتت ، هي ما عندهاش إجابة فعلا ، وهو
كمل بتردد : داليدا أنا _____

سكت كتير فسولاف سألت : أنت ايه ؟

آدم اتنهذ : بحبك

سكت شويه وكمل : عارف إنك ممكن ترفضيني
تاني بس نفسي أعر فك أني بجد بحبك ، أنتي أول
بنت قلبي دقلها في حياتي ، صحيتي جوايا مشاعر
ماكنتش عارف إنها عندي

أخذ ايدها وحطها على قلبه : داويتي جروح قلبي
بوجودك حوليا وبحبي ليكي ، بقى نفسي أفرح
وأعمل كل اللي الناس الطبيعيين بيعملوه ، بس كل ده
عشانك ومعاني

أخذ نفس طويل وبص في عيونها بحب وهمس :
سولاف تتجوزيني ؟



سولاف لأول مره يناديها باسمها الحقيقي وحاسه ان
الكلام منه مختلف ، قلبها بيدق بعنف كأنها أول مرة
في حياتها تسمع كلام حب ، دموعها نزلت وهمست

بضعف : أنت عايزني اتجوز تاني ؟ عايزني أعمل
كده في نفسي تاني؟

آدم : عايزك تتجوزي اه ، بس او عدك إنها هتكون
أول مرة ليكي ، لأنك هتعرفي إن اللي أنتي كنتي فيه
ده ماكانش جواز أساسا ده كان سجن ، او عدك إني
عمري ماهندمك على قرارك ده

سولاف : والحب مش كفايا ، هو كمان قالي بحبك
و عمل فيا كتير أوي باسم الحب المزيف اللي كان في
دماغه

آدم : الحب فعلا مش كفاية ، التفاهم والاحترام
والاهتمام أهم ، واللي أهم من كل ده واللي من غيره
المركب تغرق هو الدين ، وأنا أو عدك إن بيتنا
هيتبني بالدين أولا والاحترام والتفاهم ثانيا والاهتمام
والحب هيزين بيتنا الدافي عشان نعيش في أجمل
نموذج للجواز

سولاف سكتت كتير بتفكر في كلامه وبصوت
مهزوز : هتزعقلي ؟

آدم : مش هيحصل

سولاف : هتضربني في يوم ؟

آدم : تتقطع ايدي قبلها

سولاف دموعها نزلت : هتبهدلني وتظلمني وتقسى
عليا ؟ هتوجع فيا وتؤذي قلبي ؟

آدم بيمسحها دموعها بلطف وهو بيبتسم : عمري ،
سولاف انتي معجزتي اللي ربنا ادهالي مستحيل
اذيها ابدأ ، أنتي قلبي اللي بينبض لو حصلك حاجة
في يوم أموت معاكي ، او عدك هبقى أحن عليك من
نفسك ، او عدك إنك هتلاقي امانك وراحتك هنا في
حضني واني هحطك جوا قلبي وحميكي
بضلوعي

سولاف هزت دماغها كذا مره بموافقه : وأنا موافقه
، موافقه اتجوزك يا آدم ، أرجوك اخطفني من الدنيا
دي وشرها وخليني جنبك ومعاك

آدم ماكانش مصدق إنها وافقت فعلا وقام وقف :
انتى بتتكلمي بجد ؟

سولاف هزت دماغها بتأكيد وهو أبتسم : طيب قومي
معايا

سولاف قامت معاه بصمت واللاتين خرجوا من
الايضة وسولاف بتلف بعينيها على الموجودين ،

هند وجسار ولؤي وكذا واحد اجنبي من رجالة آدم

و_____

بصتله بدموع : كده ؟ بقى تعمل فيا كل ده ؟

معاذ وقف وراح ناحيتها : سامحيني يا سولي

ماعرفتش احميكي ، آسف

سولاف هزت دماغها برفض : أنت عملت أحسن

حاجة ممكن حد يعملها يا ابيه أنت هربتني من عنده

ولولاك ماكنتش عرفت اهرب يوميا ، انت اللي

جبنتي هنا عند ماما هند اللي احتوتني واخذتني

واعبرتني بنتها ، بسببك أنا اتعرفت على احن راجل

في الدنيا ، آدم ، متشكره أوي

معاذ : قلب ابيه انتى بتشكريني على ايه بس ؟ اللي

أنا عملته ده كان تكفير عن ذنبي أنا اللي عرفتك

على النبي آدم ده وأنا اللي جوزتهولك ، كان لازم

اعوض ده واصلح غبائي وأنا آسف على كل وجع

مريتي بيه ، آسف على كل حاجة يارب بس انتى

تسامحيني

سولاف هزت دماغها وهي بتمسح دموعها بظهر

ايدها : مسمحاك ، مسمحاك والله

دقايق والباب خبط ودخل واحد من الحرس ومعاه
 راجل عجوز غريب اللي دخل وقعد معاهم
 معاذ بص لسولاف : ده مأذون ، أنتى موافقه بجد
 تتجوزي تاني ، متأكدة يعني ؟

سولاف أبتسمت وهزت دماغها باحراج وهو: أوعي
 تكوني بتجبري نفسك ، سولاف زمان حاجة ودلوقتى
 حاجة ، دلوقتى أنا مستعد احميكي مهما كان التمن ،
 قوليلي بجد انتى عايزاه ولا لا ؟

سولاف بصتله باحراج : أنا حقيقي مش عارفه
 اقولك ايه على حنيتك عليا متشكره أوي يا أبيه أنت
 أحسن اخ في الدنيا دي

بصت على آدم اللي قاعد مع المأذون وبيضططوا
 اوراق العقد وهمست بصوت خافت جدا : بس انا
 موافقه بجد

معاذ بص لعينيها اللي بتلمع وهي بتبص على آدم
 وافتكر نظرات منى ليه بيبقى فيها نفس اللمعة دي ،
 أبتسم على الحب اللي ظاهر أوي ده : وأنا كل اللي
 يهمني سعادتك يا سولاف وطلاما انتى اللي عايزاه
 فخلاص أنا هنفذلك اللي بتتمنيه

سولاف بصتله وأبتسمت بهدوء والمأذون بصلها :
ممكن العروسة تتفضل معانا ، تعالي أمضي يلا

سولاف راحت قعدت معاهم واخذت العقد بصت فيه
، تمضي ولا تهرب ؟ رفعت عينيها وبصت لآدم
اللى بيراقبها وبصت في عيونه اللى بتترجاها في
صمت توافق عليه ، بصت في الورق تانى وشافت
امضة آدم ، مشت صوابها عليها بحب بيحركها
غصب عنها ومسكت القلم ومضت على العقد
والمأذون بصلها : موافقه يا بنتى على الزواج من
آدم كمال هارون

سولاف بابتسامة : موافقه

آدم حط ايده في ايد معاذ والمأذون كتب الكتاب
وسولاف مركزه مع كل كلمه آدم بيقولها وقلبها
بيرفر ف كأنها أول مره يتكتب كتابها على حد ،
المأذون خلص وباركلهم ولم حاجته ومشى ومعاذ
بص لسولاف بابتسامة وقرب خطوه منها بس آدم
وقف قدامه : ما خلصنا بقى يا عم أنت ، هي ايه
وكالة من غير بواب ؟

معاذ كشر جامد : أنت هتعمل زيه من أولها ؟

مسكه من هدومه وشده جامد : أنا صحيح ما عرفتش
اتصرف زمان بس المرة دي لا ، مستحيل ارجعها
للجحيم ده تاني

جسار قرب منهم ومسك دراع معاذ وبحركة سريعة
وقعه على الارض وكتفه : أنت اتجننت ، بتمد ايدك
عليه ؟

سولاف مسكت في هدوم آدم وهو بص لجسار :
سيبه يا جسار

جسار بضيق : باشا ؟

آدم : معلىش سيبه

جسار ساب معاذ بتردد وهو قام وقف بوجع
وسولاف اتقدمت خطوة : أبيه ، آدم مختلف عنه
ماتقلقش

معاذ بصلها بتردد وقلق وهى أبتسمت : والله بجد ،
هو بيان جامد كده وغشيم من بره بس هو مش كده
خالص والله ، أنا اللي اعرفه واتعاملت معاه ومع
غباة ده وفهماه كويس

آدم بصلها وخط ايده في وسطه : أنا غبي ؟

سولاف بصتله : أنا قولت كده ؟

آدم يببصلها ونظراتها ليه وطريقة نطقها للحروف
اللي بتستفد رجولته مجنناه ، بلع ريقة وبص للكل :
يلا يا جماعة ، المجلس اتفض ، جبار خد الدكتور
وروحه بيته ، وأنت يا لؤي شوف وراك ايه ، وانتي
يا هنود الشمس نامت من بدري يا حبيبتى ادخلي
نامي انتى كمان

كلهم ضحكوا عليه وجبار بصله : ايوال بقااا ،
اظهر وبان على حقيقتك

آدم كان بينقل نظراته بينهم بغيظ لحد ماعينه وقعت
على سولاف وشاف ضحكتها الرقيقة اللي بيحبها
وأبتسم

معاذ قاطعهم وراح وقف قدام آدم : هتوعدني بايه
إنك هتحافظ عليها ؟

آدم : باللي أنت عايزة

معاذ : اغلى ماليك

آدم نزل راسه لتحت ومسك سلسلة مامته اللي في
رقبته : دي

معاذ استغرب وسولاف مسكت ذراعه : آدم لأ ، كله
الادي

آدم بصلها : ماتغلاش عليكي ابدأ

قلع السلسلة ولأول مرة من ساعة ما لبسها من ١٦
سنه ولبسها لسولاف : اوعدك هحافظ عليكي زي
ماحافظت عليها

سولاف مسكت السلسلة وضغطت عليها جامد كأنها
بتحميها من كل حاجة في الدنيا

معاذ : أنا يمكن ماعرفش هي أيه دي ولا ايه قصتها
بس الظاهر إنها فعلا قيمة وقيمتها في معناها مش
تمناها وده يكفيني ، إنك تحافظ عليها وتحميها من
نفسك قبل الناس ده المهم

آدم بصدق : اوعدك

معاذ هز دماغه وبص لسولاف : أنا همشي ، المره
دي أنا مطمئن عليكي

طلع ورقه من جيبه : رقمي ، منين ماتحتاجيني
هتلاقيني ، واوعدك المرة دي مش هتأخر عنك
ابدا

سولاف اخدت الورقه وهزت دماغها بفهم : متشكره
أوي يا ابيه ، ابقى سلملي على خالتي وسوسو
وحشتني أوي البت دي

معاذ : هيوصل يا قمر

آدم بص للسقف : يارب صبرني وامسك لساني
وايدي عن الواد اللذيذ ده

سولاف ضحكت ومسكت دراعه : بتغير عليا من
اخويا ؟

آدم : أولا هو مش اخوكي ، ثانيا لو قولتلك أنى بغير
من الست الحلوة اللي واقفه هناك دي هتصدقيني ؟

سولاف : لا مش هصدق

آدم : ماشي ياستي أنا فعلا مش غيران منها بس اه
غيران من اخينا اللذيذ ده ، ونفسي اخده بالحضن
كده اكسر ضلوعه في ايدي

سولاف ضحكت : عنيف أوي أنت

معاذ أبتسم لانه اخيرا سمع ضحكة سولاف وحس ان
آدم فعلا هيحافظ عليها وقلبه اتطمئن : طيب يا جماعة
همشي أنا بقى لسه ورايا سفر

آدم بابتسامة واسعه : طبعا أتفضل ده عز الطلب والله
وهنكسر وراك زير ماتقلقش

معاذ ضحك ومشى خطوتين بس آدم وقفه : بس لسه
لينا قاعده طويلة مع بعض يا ابيها

معاذ أبتسم : أكيد ان شاء الله

جسار ولوئي مشوا ومعاهم معاذ و آدم طلع معاهم بره
يودع معاذ

هند استغلت الوقت ده وشدت سولاف دخلتها اوضتها
بسرعة

سولاف : في ايه يا ماما ؟

هند : تعالي غيري لبسك ده

سولاف باستغراب : ليه ما حلو ده ماله ؟

هند وهي بتقلب في دولاب سولاف : لا مش حلو ،
عمر ك شوفتى عروسه بتلبس جيبه سودا وقميص
؟؟

طلعت فستان رقيق باللون الوردي الفاتح من
الدولاب وحطته في ايدها : البسي فستان احسن ، ده
بيبقى حلو أوي عليكى ، وابقى فكى شعرك وحطى
شوية مكياج خفيف

سولاف بذهول : ايه يا ماما كل ده ليه ؟

هند ضربتها على كتفها بخفة : يا بت بطلي تتعبي
قلبي معاكي واعلمي اللي بقولك عليه بقى ، خلصي
يلا

سولاف اتنهدت بقله حيله : حاضر يا ماما
أخذت حاجاتها ودخلت الحمام تجهز بسرعه ،
غيرت ولبست الفستان اللي كان مضبوط عليها
وجميل أوي وفردت شعرها بتردد وبعدها لفته تانى
تسريحه بسيطه بس جميلة زي العرايس بالظبط بس
على أبسط وغسلت وشها عشان يروق شوية بس
مافيش فايده ، وشها باهت وباين التعب عليه ، بصت
في المرايا واترددت تحط ميكاب بس لما ركزت في
وشها لاحظت الإرهاق اللي باين عليه وبشرتها
الباهته

مشت صوابها تحت عينيها بزعل : ليه كده يا
سولاف؟؟ ليه سييتي الحزن يعمل فيكي كل ده
؟؟

بصت للميكاب قدامها واخذت الروج حطت منه
وحطت شوية كريم تحت عينيها وكحل وطلعت على
استحياء ، مش متخيله الموقف اللي هي فيه ،
مكسوفه ومتوتره وخايفه ، كانت مستغربه هي لابسه

لبس خروج واسع ليه مكسوفه كده بس يمكن عشان
مبينه شعرها؟؟

شافت آدم دخل البيت وبيقفل الباب فدخلت اوضتها
بسرعه وجابت طرحه الفستان وحطها على شعرها
كأنه شال ، كده أحسن هي كده متطمئه أكثر أو يمكن
ده اللي حاولت تقنع نفسها بيه ، بس الحقيقة إن
وجود آدم حوليها بيلخبط كيانه ، رجولته المفرطة
بتحسسها بانوثتها بزياده ، غصب عنها بتحس قدامه
بمشاعر كثير بتوترها كأنه أول راجل تقابله في
حياتها

هند شافتها واقفه على باب اوضتها فراحتلها بابتسامه
واخذتها في ايدها وكأي أم مصريه أصيلة زغردت
بصوت عالي وقربت من آدم وحضنته هو وسولاف
مع بعض وبدموع : ألف مبروك يا حبايبي ، ربنا
يفرح قلوبكم ويهنيكم ببعض

آدم وسولاف : اللهم آمين

هند بعدت عنهم : جوازة العمر يا حبايبي

آدم : ان شاء الله يا أمي

هند : أنت قولت لدولت على جوازك ده يا آدم ؟

آدم : ماحصلش دي لسه ماتعرفش أصلا أنى رجعت

مصر

هند : ليه بس يابني دي كانت أمنية حياتها تشوفك

عريس ؟

آدم أبتسم : هيحصل ان شاء الله ، أنا بس ماكنتش
عارف رد فعل داليدا ايه وهتوافق ولا لا فماكنتش
عايز اعشمها على الفاضي ، إنما أنا ناوي على ليلة
كبيرة وهعمل _____

بص لسولاف والكلام اتسحب منه واتبرجل لما شافها
غيرت شكلها ، كانت جميلة ، لا ثوانى هي على
طول جميله جدا دلوقتي بقت أجمل ، أجمل أوي ،
فستانها الرقيق اللي بيبين أنوثتها ، شعرها الأسود
اللى باين من تحت الطرحة اللي حطاها بعشوائية
محببه على راسها وكتافها ، عيونها اللي زاد جمالهم
بالكحل وشفافيتها اللي بتدعوه دعوة صريحه يقرب
منهم

هند قطعت توهانه : وهتعلم ايه ؟

آدم اتحنح : وهعمل لقلبي أجمل فرح يليق بيها
سولاف أبتسمت وهند كمان : ربنا يسعدكم يا حبايبي
ويتملكم على خير

آدم : آمين

هند : بص بقى يا آدم ، شايف يا حبيبي المطبخ ده
فيه آكل ، عايزاك تاخد البت الغلباوية دي وتأكلها
بقى لان كل مرة بتطلع روعي على ماتاكل لقمه

آدم بمكر : بس كده ده انتى تؤمري

هند ضحكت ودخلت اوضتها وسابتهم براحتهم شوية

آدم أول ما هند قفلت الباب شال سولاف بين ايديه
وهي شهقت بخضه ومسكت في رقبتة بعفوية

آدم : تابعه ماما الحجة معاكي ليه يا بت ؟

سولاف باحراج : ماليش نفس للأكل والله

آدم : وانتى راضيه عن نفسك كده يعني ؟ ده انتى
يادوب خمسين كيلو بوزنك ده ، ده لو كملتهم أصلا

سولاف : عيب تسأل ست على وزنها على فكرة

آدم ضحك : لا بجد قولي كلام غير ده ؟

سولاف : اه والله بجد

آدم : يعني مش هتاكلي برضه ؟

سولاف : مش جعانه

آدم بمكر : خلاص طلا ما مش هتاكلي يبقى نعمل
حاجة تانية احلى

سولاف : حاجة ايه ؟

آدم بمكر : احنا عملنا ايه من شوية يا قلبي ؟

سولاف بعدم استيعاب : قصدك كتب الكتاب يعني ؟

آدم شاور على اوضتها : ايوه ، والاوضة اللي قدامك
دي اوضة ايه ؟

سولاف : اوضة نوم ؟

سولاف فهمت قصده وضربته على كتافه : نزلني

آدم ضحك : مالك ، هو أنا عملتك حاجة ؟

سولاف بتوتر : آدم بجد أنا مش مستعده لده

آدم راح قعد على بار المطبخ وقعدھا على رجليه
وهمس بين شفايفھا : وأنا مش عايز منك ده دلوقتي
خالص ، ولا قدام ، لحد مانتى اللي تطلبي بنفسك لما
تكوني مستعده ، بس آسف مش هقدر امنع نفسي من
دول ، من يوم ورايح ده الأكل بتاعي ماتمنعنيش
منهم لو سمحتى

قرب اكثر وباسها بعمق بكل المشاعر اللي جواه ،
 الحب والشوق واللهفه والحرمان والجوع اللي هو
 فيه ، كل ده وصلها وحست بيه ، بعد شوية حطت
 ايديها على صدره وبعدهت عنها ببطئ

سولاف بهمس : آدم

آدم : شششش ، اهدي خالص ، أنا ماصدقت ده
 أخيرا يحصل ، أنتي مش متخيله بجد أنا اتمنيت
 اللحظة دي كام مره

سكت شويه وبصلها وهو بيبيعد الطرحه من على
 شعرها : قوليه تاني

سولاف : هو ايه ؟

آدم قرب من وشها وهو باصص على شفايفها :
 اسمي اللي بيجنني وهو طالع من بين شفايفك

سولاف همست برقة : آدم

آدم : عيوننه ، قلبه وروحه ، وكيانه

قرب منها تاني وباسها بس المرة دي بهدوء ملهوف
 وحنية عاشق ورقة مشتاق وكأنها إزاز ممكن يتكسر
 بين ايديه وهي ماقدرتش تقاومه أكثر من كده
 واتجاوبت معاه لوقت طويل

آدم كل ما يقرب منها أكثر شوقه ليها بيزيد ، مش
عارف يبعد عنها ، كل مايفكر يتحرك يلاقي نفسه
بيقرب منها أكثر وبيبوسها بلهفه أكبر وفكرة أنه يبعد
عن الشفايف دي اللي بقاله كتير بيتمناهم بقيت فكره
شبه مستحيله

عدت دقائق قد ايه ماحدثش عارف ولا حد مهتم
يعرف المهم كل حبيب يشبع من حبيبه ويطفى نار
شوقه ولهفته

آدم حس بسولاف نفسها بيضيق فبعد عنها شويه
عشان يسمحها تتنفس وهمس : او عدك مش هتشوفي
وجع أو خوف أو تعب تاني ، او عدك هفدي روحك
بروحي يا كُلي التاني

سولاف قلبها دق بعنف من كلامه إزاي قادر بكلمات
بسيطة يخلي قلبها طائر في السما كده ، بصت
لملامحه اللي وحشاها واتجرات شوية ورفعت ايديها
مسكت وشه وهو مستسلم ليها تماما : وحشتني أوي
، كده هونت عليك تبعد كل ده ست شهر بحالهم
بعيد ؟

آدم : قولتيلي إنك عايزة هدنه ، قولتيني إنك عايزة
ترتاحي وأنا أهم حاجة عندي راحتك ، بعدت عشان

تتنفسي ولما عرفت إنك بدأتى تشتغلي وتخرجي
 للحياة رجعت ، جيتلك وكلي رجاء تقبليني
 وماتبعدينيش تاني والحمد لله وافقتي

سولاف : أنا فعلا قولت كده بس أنا كنت بموت في
 بعدك يا آدم ، كنت بتخفق كل يوم وأنت مش مفارق
 بالي وصوتك بيرن في ودني وأنا مش لقياك حوليا
 ومش عارفه اوصلك

آدم باس ايديها اللي على وشه : حقك عليا يا كياني،
 حقك عليا ، أنا رجعت أهو ومش هبعد تاني ، انتى
 بقيتي مراتي خلاص وهتفضلي في حضني ومش
 هنبعد تاني

ضمها ليه وهي دفنت وشها في صدره وهمست :
 تعرف انى حبيتك من زمان واتمنيت اللحظة اللي
 تبقى ليا وابقى ليك ، أنت الحاجة الوحيدة اللي
 اتمنيتها من الدنيا دي يا آدم ، أنت معجزتي اللي ربنا
 بعتهالي عشان تنقذني من الجحيم اللي كنت عايشه
 فيه

استجمعت كل شجاعتها وقالت بصوت مبوح : انا
 بحبك ، بحبك أوي

آدم : حرام عليكى هموت منك كده ، اهدي عليا
شوية أنا مش قدك

سولاف رفعت وشها وبصتله كتير بصمت وهو
مستغرب : في ايه بتبصيلي كده ليه ؟

سولاف : غريبه ، رد فعلك غريب ماتوقعتوش
فخوفت أكون بحلم ، خايفة اصحى يا آدم والاقى كل
ده حلم وأنت مش موجود معايا

آدم : طيب اثبتلك إزاي أنى بجد مش حلم ؟
سولاف مدت ايدها : اقرصني كده ، لو حلم مش
هحس بحاجة ولو حقيقة هتوجع

آدم مسك ايدها وباسها برقه وفضل يبوس في
دراعها لحد ما وصل لكتفها وبصلها : ماقدرش
اوجعك بايدي ، اتمنى يكون ده اثبتلك أى حاجة

سولاف أبتسمت : أنت إزاي رقيق كده ؟

آدم : أنا مش رقيق خالص على فكرة بس مافيش حد
بيحب حد ويأذية ، دي الفكرة

سولاف قلبها بينبض بسرعه : بتحبنى يا آدم ؟

آدم : مش بحب حد قدك

سولاف : تسمحي أعمل حاجة ؟

آدم : أنا كلي ملكك اعلمي فيا ما بدالك

سولاف قربت منه وباست عينة الشمال برقه : كان
نفسى ابوسها من زمان ، كان نفسى اقولك حقك عليا
، كان نفسى اخفف وجعها ووجع ذكراها من ساعة
ما عرفت ، حقك على قلبي أنا

آدم أبتسم : أنتى إزاي رقيقة كده ؟

سولاف بابتسامه : اللي بيحب حد مستحيل يأذية

آدم : ممكن تبوسي عيني تاني ؟

سولاف قربت وباست عينة تاني وتالت ولحد ما قلبه
أرتاح وخط دماغه على صدرها واتنهد براحه :
ياريتنى عرفتك من زمان يا سولاف ، ياريتك كنتى
معايا من زمان

سولاف حضنت دماغه باحراج شديد : وأنا كنت
بتمنى أعرفك من زمان ماكنتش زمانى اتعذبت كل
ده ، بس لو حياتنا ماكانتش كده ولا اللي مرينا بيه ده
كله حصل كان يمكن ماقابلناش بعض أساسا ، ربنا
دايما بيبتلى الإنسان وبعدها يكافئة فى الآخر على
صبرة ، فلو أنت هو مقابل كل اللي مریت بيه فأنا
راضية

آدم بصلها وبیسأل نفسه هي بجد إزای كده ، هو بجد
 في حد ممكن يشوفه في يوم الجائزة على صبر
 وعذاب بالشكل ده ، كان مش مصدق نفسه وسولاف
 فهمته من عيونه فهمست : أنت مش بس جبر ليا أنت
 معجزة لقلبي كمان ، معجزتي

آدم : ارجوكي قوليلي ان أنا مش بحلم ، خايف
 اصحى والاقى كل ده حلم وأنتي مش موجود معايا
 سولاف : واثبتك إزای أني مش حلم ؟

آدم ضحك ومد ايده : اقرصيني
 سولاف ضحكت وقرصته فعلا وهو ضحك أكثر :
 أنتي قرصتي بجد وأنا اللي فكري هتعملي زيي
 وتبوسيني

سولاف : اه عشان انا عارفه نواياك
 آدم : وربي ظلماني ، ده أنا مش هتلاقي حد في
 براءتي دي
 سولاف : أنت هتقولي على البراءة ، شيفاها بتبكي
 في الزاوية هناك أهى
 آدم ضحك جامد وحضنها : ربنا يديمك ليا يا كياني
 سولاف : ويديمك ليا يا _____

سكتت بكسوف فآدم بصلها : يا ايه ؟

سولاف بخفوت : حبيبي

آدم أبتسم : أجمل حبيبي سمعتها وداني ، قولها تاني

سولاف : مش هبطل اقولهالك طول عمري لأنك

بجد حبيبي ومافيش غيرك حب

آدم مبسوط بكلامها : مش هتاكلي ولا أكمل أنا أكل

سولاف ضحكت : لا ده انا هاكل أهو

آدم ضحك : ايه ده فجأة كده ؟ أنا فتحت نفسك على

الآكل ولا ايه ؟

سولاف : لا على الحياة كلها

آدم : لا بجد كفاية كده النهاردة انتى عماله تقولي
كلام ومش بتحسبي حسابيه وأنا بحاول أمسك نفسي

بالعافية وبجد مابقتش قادر ، ارحميني شوية

سولاف اتوترت : هو أنا قولت ايه لكل ده ؟ هو أنا

كلامي دايقك ؟

آدم همس : بالعكس ، كلامك عاجبني وده اللي

مجنني

سولاف : مش فاهمه يا آدم ؟

آدم : سولاف بجد ماتتكميش كده ، أنا قولتاك هسيبك

على راحتك لحد ماتطلبي مني فساعديني ، أنا

بضعف قدام طريقتك دي

سولاف أخيرا استوعبت واتكسفت : ااااه هو ده

قصدك ، أسفة مش قصدي

آدم : ايوااا شطوره ، شايفه بقى طبق الأكل اللي

قدامك ده خلصيه لو سمحتي

سولاف : حاضر

آدم كشر جامد ونبرته اتغيرت : هي حاضر دي ايه

؟

سولاف : يعني ايه حاضر دي ايه ؟

آدم : حاضر دي معناها ايه يا سولاف ؟

سولاف بتوتر : معناها حاضر يا آدم ، هي حاضر

ليها معنى تاني أنا مش عارفاه ؟

آدم : ايوه ليها ، لما حضرتك تكوني زمان بتتجبري

تقولي حاضر غصب عنك لدرجة ان لما أي حد

يقولك حاجة تردي عليه بحاضر عشان خايفة

تضربي يبقى اه ليها

سولاف : بس ده ماكانش قصدي ، اناااا ، قصدي
حاضر عادي يعني مش عشان كده ، بس ، بس لو ،
لو أنت مش عايزني اقولها ، خلاص ، أنا بس ،
أناااا

آدم شاف التوتر والخوف في عينيها فقام وقف
ونزلها من على رجليه وبعد عنها كذا خطوة : انتي
خايفه مني ؟

سولاف عينيها لمعت بالدموع وهو بذهول : انتي
بجد خايفه مني يا سولاف ؟

سولاف دموعها نزلت وهي بتهز دماغها برفض
وآدم واقف مش فاهم هي خايفة ولا لأ بس لما لقاها
بتعيط قلبه رق ، ولسه بيخطي خطوة لقدام لقاها
رجعت خطوه لورا وبتلقائية رفعت ايديها قدام وشها
بدفاع فاتسمر مكانه من الصدمه ، دي بجد خايفه منه
، قلبه وجعه وخرج من البيت خالص ووقف مصدوم
ومخه مش مستوعب اللي حصل

آدم واقف بره البيت مصدوم من سولاف ورد فعلها ،
معقوله خايفه منه ؟ ده لسه واعدتها إنه عمره
ماهيأذيها ابدا ، للدرجة دي مش واثقه فيه ؟

فضل واقف كثير مخه عمال يودي ويجيب لحد ما
 الباب اتفتح وسولاف خرجت وشها كله أحمر من
 العياط وأسه هيكلما هي اترمت في حضنه وعيظت
 وهي بتشد في هدومه وبتمسح في صدره زي
 القلط

آدم اتهد ، هو فهم دلوقتي ايه اللي بيحصل ، هي
 فعلا خايفة بس خوفها مش منه هو كشخص خوفها
 من رد فعله كراجل بدليل إنها بتطلب الأمان من
 حضنه دلوقتي

طب طب علي ظهرها وهمس بحنان : شششش كفاية
 عياط يا حبيبتى

سولاف بصتله : حبيبتك ؟

آدم أبتسم : وما فيش غيرك حب

سولاف ابتسمت من بين دموعها وهو مسحهم :
 دموعك ماية نار بتنزل على قلبي فكفاية دموع
 عشان خاطري

سولاف مسحت دموعها بكف ايدها بسرعه : لا
 خلاص مش هعيط ، خلاص ، أنا مش هوجعك
 كده

ودموعها نزلت أكثر وهي بتتخيل إنها بتوجهه
 بالشكل البشع ده وهو ضحك : وربى انتى عيله هبله
 شالها ودخل جوارح المطبخ وقعدھا على الرخامه
 وغسلھا وشھا وسند بدراعاته حوليھا : سولي ،
 حبيبتى ، تعرفى أنى بحبك أوي ؟
 سولاف هزت دماغھا باه عارفه وهو كمل : واللى
 بيحب حد ايه ؟

سولاف ضحكت : مش بيأذيه

آدم شاور على السلسلة فى رقبتها : أنا عمري ماهمد
 ايدي عليكى ابدأ وخليكى واثقه من ده ، ده ميثاق
 سولاف : طيب أنت ليه ادايقت من حاضر ؟
 آدم : لأنى عايزها من قلبك مش من عقلك ، عايز
 حاضر عشان انتى حابه تعملي الحاجه دي مش
 عشان خايفه ، أنا مش قولتلك الكلام ده قبل كده ؟
 ومعايا أنا بالذات كلمه لأ مسمو حلك بيها ، مش
 عايزه حاجه مش حباها مش بلعاهها مش على هواكى
 انشالله عجباكى بس انتى مش عايزه تعمليها
 وخلص قوليلي لأ يا آدم مش عايزه و آدم يقولك
 يا عيون آدم اللي انتى تؤمري بيه أنا تحت أمرك

سولاف : يعني مش هتزل علي مني بجد ؟

آدم : عمري

سولاف بتجرب : طيب أنا مش عايزة أكل ينفع

آدم بمكر : اه ينفع أوي بس انا عايز أكل

سولاف حطت صوابها علي شفايفها بسرعة :

خلاص هاكل

آدم ضحك : يا هبلة

سولاف بصتلها بغيظ وهو ضحك تاني : بس انا

جعان بجد ، جعان أكل ، food يعني بحق وحقيقي

سولاف نزلت ايديها : بجد جعان طيب الأكل هناك

أهو روح كول ولا تحب اعملك حاجة تانية ؟

آدم خطف منها بوسه بسرعة وضحك : عليك واحد

سابها ومشى وهي نزلت من على الرخامة وراحت

وراه وفضلت تشد في ذراعاه : أنت بايخ أوي علي

فكره وبتضحك عليا

آدم : مانتى فعلا هبلة ويضحك عليكى

سولاف سكتت وبتبصلة بغيظ وهو راح قعد علي

البار : لا بجد يا سولي أنا جعان تعالي ناكل

سولاف : بجد بجد ؟

آدم : اه بجد بجد يلا

وفعلا قعدوا ياكلوا مع بعض وهو كل شوية يغلس
عليها ويبوسها بس هي كانت من جواها مبسوطة
ومرتاحه معاه ، ومش متخيله اللي هي بتعمله بس
آدم بيعرف بكل سهوله يخرج الأنثى اللطيفه اللي
جواها من غير ما هي تحس

بعد السهرة دي آدم دخل سولاف اوضتها ونيمها في
سريرها وغطاها كويس : نامي يلا سهرتي كثير
وأنتي كنتي تعبانة اصلا

سولاف بصت في عيونه وكانت حاسه إنها في حلم
جميل أوي وعشان كده قررت تستمتع بكل لحظة في
الحلم ده وبكرا لما تصحى كل ده هيختفى لوحده ،
مجرد الفكره قبضت قلبها فبتلقائية مدت ايدها
ومسكت ايده : هتسييني وتمشي ؟

آدم أبتسم : لا يا حبيبي أنا قاعد هنا

سولاف : ممكن تقرألي قرآن ، بحب صوتك في
القرآن ؟

آدم باستغراب : وانتى سمعته فين ده ؟

سولاف : في القصر ، كنت قاعد مرة في الجنية بليل
لوحدك وأنا شوفتك من بلكونة اوضتي ولما بصيت
عليك لقيتك مغمض عينيك وبتقرأ قرآن ، كان
صوتك جميل أوي وتلاوتك حلوة وقلبي أرتاح لما
سمعتك

آدم : اممم ده أنتى كنتى مركزة معايا بقى ؟

سولاف أبتسمت : اممم كنت مركزة أوي

آدم أبتسم وهي سألت : هتقرأ ؟

آدم : أكيد ، أنتى تطلبي وادم ينفذ

وفعلا آدم قعد جنبها واخذها في حضنه وفضل
يقرأها قرآن لحد ما نامت بهدوء كأنها عمرها
مانامت في حياتها قبل كده وهو فضل يبصلها وبيفكر
، سولاف مريضة ولازم تروح لدكتور نفسي
يعالجها

اتنهد وغمض عينيه : يارب ساعدني ارجعها أحسن
من الأول

آدم فونه رن برسالة كان جزار : أنا بره هتروح ولا
ايه نظامك ؟

رد : أنت لحتت تروح وترجع ، ايه راكب
صاروخ ؟

جسار : ههههه يار اجل ده أنا بقالي أكثر من أربع
ساعات صاروخ ايه ده ، ولا أنت استحليتها بقي ؟

آدم : @\$# من يومك ، خليك أنا طالع أهو

جسار : ماشي ياعم ومين قدك أنت ؟

آدم : قر بقي ، ده أنا طلعت روعي عشان اللحظة
دي ومش سايبني اتهدى بيها

جسار : ربنا يهنيك بيها وبغيرها وتفضل متهدى
طول عمرك ، بس حياة عيالك يا شيخ عايز اتهدى
أنا كمان ، شوفلي واحده تهنيني

آدم ضحك وخط ايده على بوءه يكتم صوته عشان
سولاف ماتصحاش وبعته : يخر بيتك على بيتها
المخفية دي اللي مجنناك في يوم واحد ، البت
هتصحى منى وماصدقت نامت ، وربى لو صحت
هخليك ملطوع بره لحد الصبح

جسار : هههه وأنا اللي بقول تلاقيك هايص جوا
اتريك بتنيم العيال وبعدين الشمس قدامها ساعة
وتطلع أنت معانا ولا معاهم ولا أنت ايه بالظبط ؟

آدم : ههههه قول والله ! ماخذتش بالي ، أنا طالع أهو

خلاص

آدم قفل فونه و حطه في جيبه وبص على سولاف :
أحلام سعيدة يا معجزتي

كان هيقرب بيوسها قبل مايمشي بس تراجع هو لو
قرب منها دلوقتي مش هيقدر يسيبها فسحب نفسه
بهدوء من جنبها وخرج من البيت من غير صوت

جسار : لا مالسه بدري يا راجل

آدم ضحك : خليك كده تموت بغيظك

جسار بصله بغيظ وهو ركب العربية : أهو بتكشيرة
أهلك دي مش هتلاقي واحده تتف في وشك حتى
وابقى قابلني

جسار ضحك : لا وأنت الصادق ، قابلتهم كثير أوي
دول

آدم ضحك جامد : يخرب عقلك يا جسار ، أركب
يابني ربنا يهديك ويبعثك بنت الحلال اللي تربيك

جسار : ايواااه هو أنا عايز اللي تربيني دي اتوصى
بقي في الدعاء ده

آدم : بس كده من عيني حاضر
جسار ركب جنبه وساق لحد البيت

على الناحية الثانية

لؤي بعد ما مشي من بيت هند راح القصر ودخل
قعد في اوضة لوجين اللي كانت نايمه بعمق ومش
حاسه بحاجة حوليها بعد ما اخدت الدوا بتاعها اللي
فيه نسبة منوم ، وهو فضل فترة يبص عليها
بغموض وقرب منها وهمس بحاجة جنب ودنها
وأبتسم وساب الأوضة وخرج

طلع فونه ورن على حد : حبييتي إزيك ؟ ___ لا
خلاص دي أنا ممشيها على عجيب ماتلخبطوش
___ مين ؟ انا كويس ماتلقيش ___ وهو أنا
أقدر أعيش من غيرك برضه ___ ههههه طيب
حتى سيبيني متعشم كده ___ لا يا حبييتي سلامتك
___ ماشي يلا سلام

مروان من وراه : أنت أكيد مش طبيعي بجد مش
طبيعي ابدأ ، كنت بتكلم مين ؟

لؤي بصله بهدوء : بيتهياي ده شئ ما يخصش
حضرتك في حاجة

مروان قرب منه بتحذير : لا يخصني ، لما آشوف
واحد غريب عايش معانا في البيت بدون اي سبب
مقنع وعمال يتمحك في اختي الصغيرة وشكله أصلا
بيتسلي يبقى لا يخصني

لؤي قرب هو كمان ومسك ياقة قميصه بيعدله :
طيب مانت بتعمل نفس الكلام ده ، عاملي فيها
فلانتيو وتلف على كل واحده شوية لحد ماتقع فيك
وبعدها ترميها في الزبالة ، مش كده ؟؟ ما فكرتش
للحظة ان البنات دي كلهم عندهم أهل و عندهم
أخوات شباب ما يحبوش برضه حد يبص لآخواتهم
بطريقة وحشة

مروان بنرفزة : أوعى تقارن دي بدي ، البنات اللي
أنا أعرفهم أصلا مش محترمين وهما اللي بيرموا
نفسهم عليا من غير ماجي جنبهم يبقى ما حدش
يلومني بقى

لؤي سكت شوية وبص على باب اوضة لوجين :
طيب اخت

ماكملش الجملة وكان مروان ضربه في وشه : أنت
مجنون يالا ؟

لؤي حاول يمسك أعصابه ومايتهورش بس مروان
هو اللي نزل فيه ضرب لحد ما لؤي مسكه وقعه
على الارض ولوى دراعه جامد ورا ظهره لدرجة
إنه كان هيكسره وسند بركبته عليه : اسمعنى يا بني
ادم أنت وماتخلينيش اتغابى على اللي خلفوك ،
مالكش دعوة بيا ولا باللي بعمله وخليك في كوزك
لما نعوزك عشان ماتتاذاش

سابه على الارض بيتوجع وقام بصله من فوق
بكبرياء : مش واحد زيك هو اللي هيقولي اعمل ايه
ومامعملش ايه

وسابه ومشى وهو قعد على الارض بوجع وهو
ماسك دراعه : ماشى يا حيوان أنت ، أنا لازم ابعد
عن لوجين بأي طريقه البني آدم ده

تاني يوم سولاف صحت بعد الظهر بفترة فتحت
عينها وافكرت بالليل ، بصت حولها لقت نفسها
لوحدها قامت مفزوعه واعصابها سابت وفكرت إنه

كان حلم بجد بس لقت جاكيت آدم فوقها ، اتنهدت
براحة إنها ماكانتش بتحلم ومسكت الجاكيت حضنته
وقامت ، لقت على الكومود ورده وورقة كان جواب
من آدم ، اخدته وبدأت تقرأ فيه

« عارف إني قولتلك هفضل جنبك بس مشيت معلش
ماكانش ينفع أفضل ، سيبتلك الجاكيت بتاعي عشان
عارف هتصحي مفزوعه وتفكري إنك كنتي بتحلمي
، بس أهو دليل إنك ماكنتيش في حلم ولا حاجة
وبلاش تقرصي نفسك ياهبله »

سولاف ضحكت لأنها فعلا كانت بتقرص نفسها ،
وكملت «واستتيني لما اجي هبقى اثبتلك عملي إنه
مش حلم، ههههه»

سولاف حطت صوابعا على شفايفها باحراج : قليل
الأدب أوي

وكملت «نسيت أقولك صباح الخير يا كياني ، مش
عارف هتصحي امتي بس بالله عليكى تفطري عشان
خاطر آدم حبيبك ، ومافيش شغل النهاردة وقبل ما
مخك الحلوه يروح بعيد ، اخدتك اجازة زمانك
نمتي طول اليوم أصلا وبكرا ان شاء الله هبقى
اوصلك الشغل بنفسي ونشوف الحوار ده بقي

هیرسی علی ایہ ، عموما اسمحیلي اقولك بحبك یا
معجزتي»

سولاف حضنت الرسالة جامد وفضلت تتنطط مكانها
: وأنا بحبك أوي

حطت الرسالة تاني علی الكومود وراحت بنشاط
اتوضت وصلت وراحت المطبخ لقت هند واقفه
بتعمل الغدا فحضنتها جامد من ظهرها

هند شهقت : حرام علیكي خضتيني یا دالیدا
سولاف باست كتفها : سلامتک من الخضة یا روح
دالیدا

هند استغربت وبصتلها : مالک ؟ متغيرة النهاردة
سولاف : أنا قولتلك إنك شبه ماما الله یرحمها قبل
کده ؟

هند أبتسمت : اه قولتي ، ده بقى حاجة حلوة ولا
وحشة ؟

سولاف بحب : أحلى حاجة حصلتلي ، أنا بحبك أوي
یا ماما بجد

هند عيونها دمعت وحضنتها : وأنا کمان بحبك یا
قلب ماما

بعدها عنها: بس ايه ده يا بت يا ديدا انتى جيتي على
الجواز ولا ايه ؟ ماكنتي تقوليلي كنت جوز تهولك من

بدي

سولاف اتكسفت وضحكت بخفوت

هند كانت مبسوطة بيها أوي : ربنا يسعد قلبك يابنتي
اكثر وأكثر

سولاف : آمين ، يلا يا هنوده أنا جعانه موت خليني
احضرك الغدا

هند مبسوطة أوي إنها رجعت تتصرف بطبيعتها : لا
يا قلبي خليني أنا أجهز

سولاف اخدتها من ايدها قعدتها على البار : هنوده
القمر هتقعد ترتاح هنا وأنا هعملك الغدا ماتتعبيش
نفسك انتى

دخلت المطبخ جري تجهز الأكل وهند بتراقبها
وبتدعيها من كل قلبها ، خلصت وقعدوا ياكلوا مع
بعض وفضلوا طول اليوم بيتكلموا ويهزروا
وسولاف بدأت تحس بطعم الحياة من جديد ، وبتسأل
نفسها إزاي آدم عرف في كام ساعه يغيرها كده ،
إزاي بلمسه رقيقه منه رجعلها روحها اللي كانت
ضايعه منها من سنين

حطت أطراف صوابها على شفايفها بتلقائية وهي
بتفتكر لمستة الحنينه وابتسمت غصب عنها وهي
سرحانه في عالم تانى وهدت مراقباها بصمت
بابتسامه سعادته وبتدعليها من قلبها هي و آدم ابنها
التانى

على الناحية الثانية في قصر هارون
الكل قاعد بياكل ودخل لؤي بعد ماستأذن ووقف
جنب دولت : دولت هانم في حاجة مهمه لازم
تعرفيها ، آدم بيـ
قاطعته مروان اللي قام وقف بنرفزة : هو فعلا في
حاجة مهمه لازم تعرفيها يا نانا عن التعبان اللي
واقف قدامك ده

بص للوجين : وأنتى كمان

دولت : في ايه يا مروان تعبنا ايه وحاجة ايه ؟
مروان اتحرك من مكانه وراح ناحية لؤي وبهجوم :
التعبان ده ، اللي فتحنا له بيتنا وهو ماصدق يغدر
ويضربنا في ظهرنا

كلهم بصوله باستغراب ومروان كمل : البيه اللي
دخل القصر على إنه بودي جارد ولف على البت
الصغيرة وبلفها بكلمتين ، وهو اصلا بيتسلى
بيها

فيري كشرت جامد ولوجين قامت وقفت : أنت بتقول
ايه لؤي مش كده ، لؤي بيحبني

مروان بغیظ : ايوه ما هو عشان انتى هبله كده هو
عرف يضحك عليكي ، البيه امبارح سمعته بنفسي
بيكلم حبيبته في الفون ولما واجهته قالي مانت بتعمل
زيي وبتتسلى وانك أنتى اللي رميتي نفسك عليه بيقى
ماحدثش ليه دعوة

دولت بصت للؤي بصدمة وفيري قامت بغضب
وراحت ناحيته : انت أكيد اتجننت ، أنت بتقول على
بنتي كده ؟؟ أنت فاكر نفسك مين ؟؟ طيب والله
لاندمك على كل ده ومش هخلي يطلع عليك صبح
تاني

لوجين صرخت مرة واحده : بااااااا بقى
راحت وقفت قدام لؤي : أنت قولت كده ؟
لؤي : لو قولتلك لا هتصدقني

لوجين : اه هصدق ، لؤي مش بيكذب على لوجين
ابدا

لؤي سكت ولوجين دموعها نزلت : قول إنك مش
قولت كده ، قول يلا إنك مش بتتسلى بيا ، أنا عارفه
ان كل ده كذب ، أنت بتحبني وانا مصدقك قولي ان
كل ده كذب

فيري راحت شدتها جامد بعيد عنه: أنتى غبيه عايزاه
يقولك ايه ايوه بتسلى يا هانم ؟
لوجين زعقت : ايوه يقول كده

نفضت دراعها من ايد مامتها وراحتله ومسكت
دراعه : لؤي ، قولي وأنا مصدقك أنت بتتسلى بيا
؟؟

كمال قام وقف : كفاية كده ، انا ساكت من ساعتها
على المهزلة دي بس كده كفاية أوي

راح وقف قدام لؤي : أنت تخفى حالا من هنا
وحسابك معايا عسير عشان انا بنتي مش سلعة
رخيصة هيجي اي كلب يتسلى بيها ولما يزهدق
يرميها

زعق : أتفضل غور

عاصم كان قاعد بيتفرج على كل ده وهو مبسوط
 بكل التشتت والشر اللي بينهم ولؤي فضل واقف
 بصمت ولوجين بتبصله برجاء وقالت بصوت
 مخنوق : أنا واثقه فيك ، لو الدنيا كلها كدبتك أنا
 واثقه فيك فارجوك قولي الحقيقه ، لؤي

لؤي بصلها وأبتسم : بحبك

لوجين عينيها لمعت وبصتلهم : أهو بيحبني ، أنا
 قولتلكم

فيري : انتى متخلفة يا بت ؟ هو عشان قالك بحبك
 يبقى بيحبك ؟ ايه الجنان ده !

قاطعهم الصوت المميز في القصر : ايوه طلا ما قال
 انه بيحبها يبقى بيحبها ، انتى فاكره كل الناس كدابين
 زيكم ولا ايه ؟

كلهم بصوا لصاحب الصوت اللي عارفينه كويس
 جدا وعارفين وقاحته ودولت قامت من مكانها : آدم
 حبيبي ، أنت رجعت ؟

آدم : ايوه يا جميل رجعت

راح باس ايديها وراسها : قوليلي يا دولي انتى
 بتحبيني ؟

دولت أبتسمت : ايوه بحبك

آدم : وأنا مصدقك

راح وقف قدام لؤي : قولي يالا أنت بتحب البت دي ؟

لؤي كشر : ماسمهاش بت واه بحبها

آدم ضربه في كتفه : ماترزررش عليا لتزل ، وأنا مصدقك

بصلهم : شايفين الدنيا سهله إزاي ؟

كمال : أنت بتستعبط ؟

آدم : لا بتكلم جد والله

قرب من كمال : عايز أتكلم معاك لوحدنا

بص لعاصم : وأنت كمان بيتهياي كلامي هيعجبك جدا

كمال بصله بشك وبعدها راح معاه هو وعاصم ودخلوا مكتب القصر وفضلوا يتكلموا كثير ولؤي واقف مع جسام بيتكلموا قدام باب المكتب

في اوضة السفارة لوجين قعدت على اقرب كرسي
جنبها ومروان راح قعد على ركبته على الارض
قدامها ومسك ايديها بحنان مش بيظهر غير معاها
هي وبس : لوجين حبييتي الولد ده مش كويس بجد ،
ده كداب وحيوان وكمان مش من مستواكي ابا ،

—

لوجين قاطعته : مش تتكلم عليه كده عشان مش
از علك أنا واثقه فيه ولو الدنيا كلها قالتلي إنه كداب
أنا برضه واثقه فيه وبحبه وهفضل احبه حتى لو هو
مش حبني

فيري: انتي هتجنيني يا بت، أنا عايزة أفهم ليه كل ده
عملك ايه عشان تحبيه كده ؟

لوجين صرخت مره واحده كأنها ماصدقت اخيرا
تعبر عن اللي حساه لأول مره في حياتها : عمل اللي
انتوا كلكم مش عملتوه ، فضل جنبي على طول
وانتوا لا ، كان بيقعد يسمعني أتكلم بالساعات من
غير مايزهق من طريقة كلامي البطيئة وانتوا لا ،
كان بيحب الحاجات اللي أنا بحبها حتى لو مش
عاجباه بس عشانني حبها وانتوا لا ، عمره ماعاملني
على أي متخلفة أو فيا حاجة غلط ، كذا مره شافني

لما باكل والاكل يقع مني غضب عني بس عمره ما
ضربي زي مانتوا بتعملوا كان على طول يجيب
مناديل ويمسحلي ايدي وهدومي ويبوس ايديا
وياكلني بنفسه ، هو احتواني وانتوا لا حسسني اني
بنت جميلة وطبيعية وليا حق أعيش زي مانا بتمنى ،
هو حبني وانتوا لا ، هو ده اللي عمله

كلهم سكتوا وماحدث قدر ينطق بحرف بعد ما
لوجين كشفت بشاعتهم قدامهم ووجعها من تعاملهم
معاها وماحدث قدر ينكر كلامها

دولت قامت بحزن وقعدت جنب لوجين وطببت
على شعرها : حبيبي

لوجين حضنتها جامد : أنا بحبه أوي يا نانا
دولت طببت على ظهرها بحزن وهي ز علانه على
عصفورتها الصغيره اللي كل حاجة في حياتها
صعبة عليها ومافيش حاجة بتكملها بشكل طبيعي

بعد شوية آدم رجع مع كمال وعاصم ولؤي

فيري : فهموني في ايه بالظبط ؟

عاصم : الولد فعلا مش بيكذب

فيري : وأنت عرفت منين ؟

عاصم : عرفت منين ما عرفت ما حدش ليه دعوه
وما حدش ليه دعوة بيه هو كمان وبالبت

آدم سقف بايده : وبالمناسبة الجميلة دي لؤي طلب
ايد لوجين واحنا وافقنا ، تادااا

كلهم اتصدموا وادم بص للوجين : موافقه ؟

لوجين بلهفة : موافقه موافقه موافقه طبعاً

فيري اتدخلت : وأنا مش موافقه وعمري ما هو افق
على المهزله دي ابدأ

كمال : بنتي وأنا وافقت يا فيري خلاص

فيري : لا دي بنتي أنا وما حدش ليه الحق فيها غيري
حتى أنت يا كمال

كمال كشر : يبقى تاخديهم الإثنين وتطلعي بره
القصر ده وبعدها تتصرفي فيهم زي مانتى عايزه

فيري اتصدمت منه : أنت بتطردني يا كمال ؟

كمال : لا مش بطردك بس بقولك إنكم طول مانتوا
هنا انتى مراتي وهما بناتي وليا فيهم اللي ليكي
وبصفتي ابوهم أنا وافقت وخلصنا

مشي خطوتين : أنا رايح الشركة ولما ارجع هنتكلم
أكثر

سابهم ومشى وفيري بتزعق : مش هيحصل الكلام
ده لو على جثتي

سابتهم وطلعت اوضتها بغضب ومروان قرب من
آدم بنرفزة : أنت اقنعتهم إزاي بسهولة كده ؟

آدم بسخرية : على اساس إنك ماتعرفش عمك وابوك
وايه اللي ممكن يخليهم يعملوا اي حاجة ؟

مروان : اشترتها يعني بفلوسك

آدم : لا ماشترتهاش اللي يعمل القذارة دي واحد زيك
أنت مش أنا بس ممكن تقول بيزنس، و business
is business ، أنت أكثر واحد عارف

آدم اخذ لوجين ودولت وطلع فوق وساب مروان
متعصب تحت

مروان بص لتماما اللي قاعده متابعه كل ده بصمت
كأنها مش موجوده : أنتى ساكتة كده ليه ؟

تمارا بصتله : وعائزني اقول آيه يعني ؟

مروان : قولي اى حاجة اعترضي ثوري اعلمي اى
حاجة

تمارا سكتت شويه : يابختها

مروان كشر : هو ايه اللي يابختها ؟

تمارا : ايوه يابختها عندها حد بيحبها كده لدرجة إنه
يطلب ايدها وهو عارف إنه هيتبهدل عشان يوصلها
ويابختها عندها حد رغم كل اللي حصل ده مصدقه
برضه انه بيحبها وليه اسبابه عشان واثقه فيه وفي
حبه ليها

قامت وقفت : رغم ان عقلها تعبان زي مايتقولوا الا
انها حافظت على نفسها واستحملت كل حاجة
بتحصل فيها لحد ما جه اللي يستحقها ، مش واحده
جبانه زيي في أول موقف صعب لجأت للمخدرات
عشان اهرب وماواجهش

بصتله : يبقى يابختها ولا لا ؟

مروان مسك ايدها : تمارا انااا

تمارا سحبت ايدها منه بصمت وطلعت على اوضتها
وهو قعد مكانه بيبيص عليها : بس انا _____

سكت شويه : أنت ايه ؟ حيوان وزباله وهي كلامها

صح

أخذ بعضه ومشى من القصر هو كمان بيهرب منها
أو يمكن من نفسه وحقيقته ، شخصيته المؤذية اللي
متعلقة بالمكان ده

دولت : أنت لازم تفهمني حالا عملت كده إزاي ؟

آدم : يعني مش هتيجي تحضنيني وتقوليلي وحشتني
يا آدم ؟ فينك يا هند كانت أول ما تشوفنى تشهق كده
كأنها شافت برص وتيجي تحضني على طول

دولت بحزم : آدم

آدم ضحك : خلاص يا حجة انتى هتتحولي ولا ايه ؟

بص لجسار وهو هز دماغه بفهم : لوجين ممكن
ثانية من وقتك يا قمر ؟

لوجين هزت دماغها بموافقة ونزلت معاه ، و آدم
راح قعد جنب دولت : شوفي بقى ياستي ، النفوس
المريضة هتفضل طول عمرها مريضة ، القصة
بدأت من زمان أوي ، من ساعة ما بعث لؤي أول

مره للقصر ، لوجين اتعلقت بيه جدا وهو كمان حبها
وأنتى عارفه الحب غبي ومش بيفكر ، حبها رغم
الفروق اللي بينهم والحالة اللي هي فيها وهي كمان
حبته

دولت قاطعته : أنت بتتكلم عن لؤي ولوجين ولا
عنك أنت وداليدا ؟

آدم ضحك : الإثنين بصراحه ، المهم خلىنا في لؤي
ولوجين دلوقتي ، أنا كنت خايف في الأول لتكون
مشاعرهم دي مش حب وقولت لازم أتأكد ، لما
سافرت عينت حد من الحرس يراقبهم وحركاتهم
كانت بتوصلي لحظة بلحظة ، لحد ماتأكدت ان لؤي
فعلا بيحبها

سكت شوية بيفتكر: تعرفي ان فيري من ثلاث شهور
كانت هتقتل لوجين وهو انقذها ؟

دولت خبطت على صدرها : يا خبر أسود يا آدم
البت ، أنت بتتكلم جد ؟

آدم بصلها : للأسف ، كانت معترضة على لؤي
وراحت رمت لوجين في البسين في عز الثلج وهي
عارفه إنها مش بتعرف تعوم كتهديد ليه ياما يسببها
ياما تموت

دولت : وهو ؟

آدم أبتسم : أول ما لمحها نظ وراها من غير تفكير
وانقذها ، ساعتها اتأكدت إنه فعلا بيحبها لاني لو
كنت مكانه كنت عملت زيه برضه

دولت : وهو ده كفاية ؟

آدم بصلها : اه ، ده يوميهار رفع سكينه على فيري ،
وهدها لو قربت من لوجين تاني هو اللي
هياذيه

دولت برقت بصدمة : أنت على طول كده ماتعرفش
غير البطجية ؟

آدم ضحك : والله ماذنبى ده جسار هو اللي معلمه
البطجة دي ، المهم لما رجعت مصر قعدت معاه
واتكلمنا كتير وقالى كل اللي جواه وطلب ايدها منى
وقالى إنه هيعمل أي حاجة عشانها قالى خد منى أي
ضمانات أنت عايزها انشالله لو التمن حياتى المهم
تبقى معاه ، بصراحه مش هنكر أنى كنت لسه متردد
بس باللي حصل تحت ده ترددي راح ، لما شوفت
نظرات لوجين ليه وكلامها ، دي مش لوجين اللي أنا
عارفها دي حد تاني مظهرش غير على ايديه هو ،

عشان كده كلمت عاصم وكمال وحاولت معاهم

عشان يوافقوا على الجوازه دي

دولت : واقنعتهم إزاي ؟

آدم بصلها بحزن : الفلوس يا نانا، هي دي الحاجة
الوحيدة اللي بتحركهم ، أنتى عارفه عاصم بيعبد
الفلوس عباده وكمال أغلب الوقت ماشي وراه
بصمت ، عطيتهم ورق صفقه ماكانوش يحلموا بيها
ابدا ولا يحلموا يشوفوا كمية الاصفار دي في صفقه
من اللي بيدخلوها ، عملت كده ، عارف إنه مش
حاجة كويسة ابدا بس هي دي الطريقة الوحيدة
عشان يسيبوهم في حالهم

دولت انتهدت بقلة حيلة : لا حول ولا قوة الا بالله ،
وبعدين هتعمل ايه ؟

آدم حرك كتافه : ولا حاجة ، تتكتب بس على اسمه
وهشيل ايدي أنا بقى وهو يكمل ، أنا دوري اوصلها
ليه إنما هو اللي هيشيل الليلة بقى

دولت : بس يا آدم أنت عارف أختك مش هتعرف
تفتح بيت وعائزة اللي يعملها كل حاجة هيعرف هو
يعيشها في مستوى زي اللي هي عايشه فيه ؟
هيعرف يتعامل معاها ومع عقلها ؟

ادم : ماتقلقيش من ناحية الفلوس هو أي نعم مش
عائش في قصر ولا معاه بدل العربية عشره بس
مستواه كويس ويقدر يعيشها مرتاحه ، انتى بيتهياك
ان البودي جارد بتوعي دول مش لاقين ياكلوا بس
في الحقيقة هما بيقبضوا أكثر من موظفين الشركات
الكبيرة أصلا أما بالنسبة لعقلها

سكت شوية وبصلها : اتمنى مواقف الحنينه معاها
واحترائة ليها اللي علقها بيه بالطريقه دي يشفعله ،
اعتقد هيعرف يتعامل معاها كويس

دولت هزت دماغها بفهم وادم نزل قعد تحت رجليها
وبصلها بحذر : أنا في حاجة عايز اقولك عليها بس
من غير ضرب

دولت لوت شفايفها : شكاك عامل مصيبه قول
ادم ضحك : يعني حاجة كده ، أنا أحم أنا يعني
امبارح___

سكت شويه وهي كشرت : ماتتطق ياولا نيلت ايه
؟؟

ادم غمض عينيه واتكلم بسرعه : اتجوزت
دولت سكتت شويه : عملت ايه معلى مافهمتش ؟

آدم رجع خطوة لورا بحذر : حبييتي يا دولي انتي
عارفه أنا بحبك قد ايه صح ؟ او عي تضربي بقي ،
هاه ؟

دولت مسكته من شعره : بقي يا جزمه انا بقالي
خمس سنين بتحايل عليك تتجوز ويوم ماتعملها يكون
من ورايا ؟

آدم بوجع : والله يا دولي هي جت كده بقي أعمل ايه
؟

دولت سابتة وبصتله بحزن : كده يا آدم ؟

آدم باس ايديها : والله غصب عني ، أنا ماكنتش
عارف إذا كانت هتوافق ولا لا ، خوفت أقولك ولو
رفضتني تزعلي

دولت كشرت : ترفض ! وترفض ليه ! هو أنت كان
فيك عيب لا سمح الله ؟

آدم همس بخفوت : سولاف

دولت سكتت عشان هي فاهمه ظروفها كويس
وفاهمه إنها ممكن فعلا ماتوافقش من خوفها

دولت : وبعدين ، وافقت إزاي ؟

آدم أبتسم بسعادة : الحمد لله يا نانابجد ، ده أنا قعدت
مع معاذ ده كتير جدا أحاول اقنعه وهو راسه ناشفه
أوي وفي الآخر قالي لو وافقت هي خلاص هو افق ،
وما صدقت قالتلي موافقه روجت في لحظتها وجبت
اقرب مأذون جنبنا وكتبت عليها قبل ما تغير رأيها
تاني

دولت أبتسمت من الفرحة اللي شيفاها في عينه
وصوته : ربنا يسعدكم يا بني

آدم : يارب ادعيلي بجد ، واه أنا عايز أعمل فرح
زي كل الناس ، هي مش أقل من أي بنت عشان
ما عملهاش فرح ، وانتى كمان من حقك تفرحي معايا
وأنا عريس ولا ايه ؟

دولت بسعادة : بجد يا آدم ؟

آدم : ايوه بجد يا قلب آدم ، عارف نفسك تشوفيني
عريس وأنا أدفع عمري قصاد سعادتك بس يا قمر
دولت حضنته : ربنا يحميك يا ابني ويحفظك
لحبايبك يا حبيبي

آدم حضنها هو كمان : ويديمك ليا يا قلبي ويطول
في عمرك وتفضلي جنبي طول حياتي

سكت شويه : واه ماحدث يعرف بكل ده في القصر ،
أنتى عارفه دول ناس مجانيين مش بعيد يعملوا فيها
حاجة وهي مش ناقصة أصلا

دولت : ماتقلقش ، من غير ماتقول أنا كنت هعمل
كده

آدم باس ايدها : حبيبتى اللي فهمانى على طول
دولت : بس يا آدم أنا نفسي أشوف البت دي ، من
ساعة ماتخطفت من القصر مادخلتهوش تانى خالص
ولا شوفتها مرة حتى

آدم : هتشوف فيها قريب أنا هجيبها لك ماتقلقيش ، بس
اخرجها للنور الأول عشان لو حد فكر بس يبصلها
مايلومش غير نفسك

دولت هزت دماغها بموافقة و آدم : على فكرة الواد
إياس رجع معايا

دولت : قول والله أو مال هو فين ؟

آدم : نايم ، الواد ده خم نوم اوي ونومه ثقيل بشكل ،
ايوووو متعب متعب

دولت ضحكت : أوعى تكون بتتغابى عليه يا آدم
؟؟

آدم ضحك : لا أنا بسببه لجسار هو اللي بيعرف
يتعامل معاه كويس ، كل يوم بيصحية بعلقه انما ايه
اورجانيك

دولت ضحكت والاتنين قعدوا يتكلموا شويه
وانضلمهم جسار ولؤي ولوجين اللي الفرحة مش
سيعاها بقرار خطوبتها لحبيبها

آخر اليوم كمال قعد مع فريال وقالها عن الصفقة
وماخدش أي وقت ولا عمل اي محاولة يقنعا بيها
لأنها بمجرد ما شافت ورق الصفقه وكمية الاصفار
اللي فيها وافقت من غير تفكير أصلا ونست ان
عندها بنت اساسا اسمها لوجين

أما مروان كان هيتجن إزاي عملوا كده دول حرفيا
باعوا بنتهم مقابل الفلوس ، وقف قدام نفسه ولوهله
حس ان في حاجة غلط بتحصل ، عقله بيعرض
قدامه مواقف كثير جدا على مر السنين كلها بتثبت
ان عاصم وفيري هما اللي بيعبوا الفلوس أكثر من
نفسهم وعندهم استعداد ياكلوا مال اليتيم ولا يفرق
معاهم ، مش زي ما هما فهموه ان آدم هو اللي واكل

عليهم حقهم ، قرر إنه هيفتح في الدفاتر القديمة
ولازم يعرف هو في ايه بالظبط اللي بيحصل حوله
، لازم يفوق ويشغل مخه ويمشي ورا تفكيره هو
مش كلام حد

تاني يوم سولاف و هند كانوا بيحضروا الفطار مع
بعض وقاطعهم حد بيطل على باب البيت
هند ضحكت : ده أكيد آدم ، مافيش غيره بيعمل
الحركات الهبله دي على الملاء
سولاف بصت لنفسها بالبيجامة : احبييه ، هو
هيشوفني كده ؟

طلعت تجري على اوضتها و هند بتضحك عليها
وراحت فتحت الباب : ايه يا ابني الفضايح دي على
الصبح ؟

آدم باسها في خدها : صباحو يا كنافه
هند : صباحك مانجه يا حبيبي ، عشان يبقى كنافه
بالمانجه

آدم ضحك : حلوه والله ، فين الشربات بتاعي بقي ؟

هند بضحك : طلعت تجري على جوا أول ما جيت ،
بتغير البيجامه

آدم دخل وراح عند اوضة سولاف وبيخبط : سولاف
يا سولي ، انتى يا بت ماتغيريش أنا بحب البيجامات
خليكي بيها

هند ضربته على ظهره وهو اتوجع : في ايه يا ست
ظهري ده

هند : عشان تتلم وتختشي شوية

آدم : اللي اختشوا ماتوا يا حبيبتى ، وبعدين دي بقت
مراتي خلاص اشوفها زي مانا عايز بالشكل اللي أنا
عايزه

سولاف كانت واقفه ورا الباب بعد ما غيرت وحاطه
ايديها على بوءها : احبيبيه ، الولد ده طلع قليل الأدب
اكثر مما تخيلت

فتحت الباب براحه وبتبص تشوفهم فين لقت آدم
شدها من ايدها بسرعه وقفها قدامه : طيب وربى
مزة في كل حالاتك

سولاف وشها أحمر جدا وهمست بصوت خافت :
آدم

آدم بتوهان : والله صوتك لوحدہ فتنہ أصلا ، افضلی
بقی اتکلمی معایا کده بصوتک ده وهتلاقینی بعمل
حاجات أكثر من کده کمان

سولاف سابتہ وراحت عند هند : یا ماما ، ابنک ده

هند : ماله مش متربی صح ؟ عارفه یاختی

آدم راح قعد معاهم : مظلوم یا سعادة البیه والله

کلهم ضحکوا و آدم طلع ورده حمرا من جیبہ

وعطاها لسولاف : الورد للورد

سولاف أبتسمت واخذت الوردہ : جميلة أوي

آدم : أكید مش اجمل منك

هند بتبص عليهم وهي لاوية شفايفها : یا سلام علی

الحنحة أنت عديت _____

آدم قال معاهما في نفس اللحظة : مهند التركي

وقعد يضحك : حفظت خلاص

قعدوا يضحکوا ويهزروا وهما بيفطروا مع بعض

وبعدھا آدم أخذ سولاف وراحوا المستشفى الصغيره

اللي شغاله فيها

في قصر هارون بعد الفطار دولت ولوجين كانوا
قاعدين في الجنينة ومعاهم هند اللي راحتهم بعد ما
آدم أخذ سولاف ومشي

لوجين بصت للوحة اللي كانت بترسمها بسعادة ولسه
بترفع عينيها عنها شافت لؤي بيقرّب منهم بتردد
وهو بيهرش في شعره بتوتر باين عليه

لوجين قامت بسرعة قربت منه ومسكت ايده تشده
ل عندهم : لؤي تعالا اقعد معايا

لؤي : ايه رأيك أنتي تيجي معايا ؟

لوجين بصتله بعدم فهم وهو شدد على ايدها وسحبها
وراه وراح وقف قدام دولت : صباح الخير يا هانم
دولت : صباح النور يا بنى ، خير آدم حصله حاجة
؟

لؤي : لا يا هانم بعد الشر عليه هو كويس أنا بس
كنت جاي عشان ، عشان يعني ، هو

هند قاطعته بنفاز صبر : ياخويا قول عشان لوجين
وخلصنا ايه شغل التشويق ده ؟

لؤي أبتسم بإحراج منها ودولت ضحكت : يوه يا هند
قدك ده عشان تعملي الفصل بتاعك فيه ؟

هند ضحكت : مافيش غيره الواد آدم حبيب قلبي اللي
بيعرف يجاريني في الكلام

دولت أبتسمت بحب من مجرد ذكر اسمه وبصت
للؤي : أقعد يا لؤي يابني واقف ليه ؟

لؤي حمم بإحراج : أنا يعني كنت عايز أخذ لوجين
لو مش هتمانعوا ، عايز افسحها شوية يعني بدل ما
هي طول عمرها محبوسة كده في القصر

لوجين عينيها لمعت بفرحة وبصت لدولت برجاء ،
نفسها تخرج بره تشوف الناس والدنيا اللي طول
عمرها محرومة منها

دولت ماقدرتش ترفض قصاد نظرات لوجين وبصت
للؤي : آدم يعرف ؟

لؤي حط ايده على شعره بإحراج : لو مافيهاش
إزعاج ممكن تكلمية؟ أصله من ساعة يوم المستشفى
وهو حاطتني في دماغه

هند ضحكت ودولت أبتسمت بقلة حيلة على حفيدها
وحر كاته وطلعت فونها عطته لهند : طلعي رقم آدم
كده ، نسيت نظارتي فوق

هند أخذت الفون وطلعت رقم آدم وكلموه الإثنين
واقنعوه يسببهم يخرجوا شوية مع بعض ده طبعا بعد
تهديدات من آدم للوئي إنه لو زعلها أو عمل حركة
تدايقها هيعلقه

آدم قفل فونه وهو بيحطه في جيبه : شكلي اتسرعت
لما وافقت على الواد ده ولا ايه ؟ هو هياخد البت
مننا كده بسرعة ؟

بص باستغراب قدامه للمستشفى اللي على وشك
السقوط وبص لسولاف : هنا ؟

سولاف : اه هنا

دخلوا و آدم بيبيص للمكان حوليه : المكان ده مش قد
كده يا سولاف انتي شغاله هنا إزاي ؟

سولاف : يعني ، شغاله أهو أي حاجة

آدم : وأنتى ايه اللي يشغلك أي حاجة أنتى ناسيه
انتى تبقى مين ؟

سولاف بصتله : أبقى مين ؟

آدم : حبيبتي ومراتي وكياني

سولاف أبتسمت بحب ولسه هترد عليه قاطعهم
صوت دكتور جاي عليهم بابتسامة آدم فهمها كويس
أوي : ميس سولاف ، إزيك عامله ايه ؟ غيبتي
امبارح ليه ؟ كلنا قلقنا عليكى أوي ، هو في حاجة
حصلت ؟

آدم : ايه يا عم !! راديو واشتغل ؟؟ ماتاخذ نفسك
شوية

سولاف أبتسمت باحراج من وقاحة آدم اللي للحقيقة
بتحبها : معلىش يا دكتور ياسر كان عندي شوية
حاجات في البيت ، ليه هو في حد كان محتاجني ولا
حاجة ؟

ياسر : لا هو بس قلقنا يعني ، انتى من ساعة
ماشتغلتي هنا ومش بتغيبي

آدم : لا حول ولا قوة الا بالله ، أنا ماسك اعصابي
من ساعتها بالعافية بس كده كثير بصراحه كثير أوي

ياسر بصله بضيق : وحضرتك مين أصلا بتدخل ليه ؟

آدم حاوط سولاف بدراعه بتملك وأبتسم باستفزاز :
جوزها

ياسر اتصدم وبص لسولاف : ده جوزك ؟ انتى
متجوزه ؟

سولاف : اه ده جوزي

بصت لآدم لفته ببص بشر لياسر اللي متجاهل
وجوده فابتسمت بمجامله : عن إذتك بقى يا دكتور
أنا ورايا شغل

مشت وآدم قرب أوي من ياسر ومسك ياقه البالطو
بتاعه وقال بتحذير : وحياة ربنا أنا لولا مش عايز
اهز ثقتها فيا لكنت غيرت ملامح اللي خلفوك دي ،
أسمع يا حيلتها أعرف بس إنك بصيت علي مراتي
مجرد بصره بعينيك دول ، بصره بس ، هعميك ، فاهم
؟

سولاف لاحظت ان آدم مش ماشي معاها فبصتله :
مش هتيجي ؟

آدم بابتسامة : جاي يا كياني أهو

زق الدكتور وراحلها ومشى معاها تحت نظرات
الرعب من ياسر ، قطع صمته جسار اللي وقف
جنبه وبصله من تحت نظارته السودا : هو مش قالك
بصه بس ؟ بتبص على ايه يالا ؟

ياسر بصله واطرعب من هيئته اللي كفيلة ترعب أي
حد ، ورجع خطوتين لورا : أنا ، أنا

مشي بسرعة وهو مرعوب وبيقسم جواه وقرر في
قرارة نفسه إنه مش هيقرب من سولاف دي مرة
تانية ابدأ

-

أما آدم كان بيبص حوله في كل مكان : يا ليلة سودا
يا سولاف ايه المكان ده ؟ أنا مستحيل اسبيك تشتغلي
هنا

سولاف وقفت وبصتله : ليه ؟

آدم : هو ايه اللي ليه أنتى مش شايفه المكان ولا
المقابر

مسك وشها بين ايديه بلطف : حبيبتى أنا ما عنديش
مانع تشتغلي لو أنتى حبه بس اشتغلي في مكان
كويس شوية ، بصراحة يعني أنا أخاف عليكى هنا

سولاف : بس المكان اللي مش عاجبك ده ملاذ
والأمل لناس كتير أوي ما عندهم مش الامكانيه إنهم
يروحوا أماكن نضيفه ومحتاجين رعاية برضه

آدم : بس _____

سكت وبص حوليه هي فعلا كلامها صح مش هينكر
بس هي برضه حبيبتة وبيخاف عليها من الهوا
الطاير ، ايه مش من حقه يخاف عليها ؟

سولاف باقتراح : طيب أنا عندي فكرة حلوة أوي

آدم بصلها : قولي

سولاف : بما إنك أكبر شيف فيكي يا مصر وصاحب
سلسلة عالمية من المطاعم ايه رأيك نستغل ده في
حاجة كويسه

آدم : اللي هي ؟

سولاف بابتسامة : ساعد الناس اللي هنا دي، حاجة
زي تبرع كده تساعد الناس اللي هنا

آدم : أنا عندي فكرة أحلى

سولاف : قول

آدم : اشترى المستشفى المعفنه دي وابنى مكانها
مستشفى تانية محترمة واجهزها من كل حاجة

سولاف كشرت : بس كده أنت مش هتساعدهم أنت
 كده هتصعب عليهم الدنيا أكثر ، يعني بدل ماكان في
 مكان يلجأوله أنت هتهده وتعمل مستشفى تانية واكيد
 هتبقى غاليه عليهم

آدم : وانتى بذكائك الفتاك يعني فكرتي في كل ده
 ومافكرتيش أنى هعمل للغلابه دول مستشفى محترمه
 ومصاريفها هتفضل زي ما هي

سولاف : بجد يا آدم ؟ بس أنت كده هتخسر
 آدم بحب : مافيش خسارة مع ربنا ، أنا هساعد الناس
 دي صدقه ، وحقي هاخده حسنات ، ده أنا كده
 الكسبان

سولاف حضنت دراعه جامد أوي : أنا بحبك أوي يا
 آدم

آدم أبتسم وهمس جنب ودنها : بحبك حاف كده ؟
 يعني مافيش بوسه كده ولا كده ؟

سولاف بصتله بكسوف : ما أنا حاضنه دراعك أهو

آدم : لا أنا عايز بوسه ماليش فيه بقى

سولاف بصت حوليها : هنا كده واحنا في نص
 المستشفى ؟

آدم : اه هنا كده بدل مابوسك أنا في نص الشارع
كمان

سولاف شهقت جامد : تعملها ؟

آدم : تحبي تجريبي ؟

سولاف هزت دماغها برفض ومسكت ايده باستها :
هاه ؟

آدم : هو ايه اللي هاه ؟ انتي شايفاني أمك ولا جدك ؟

هز راسه بيأس وسحبها دخلها اوضة فاضيه
وحاصر ها بين ايديه وقرب منها باسها برقة : أهو
كده هاه بقى ، ومن يوم ورايح مش هيبقى غير كده
فهمتي ؟

سولاف أبتسمت باحراج وهو ضحك : ايه الفراولاية
الحلوة دي ؟ دي عايزة تتاكل أكل بقى

سولاف زقته وطلعت بسرعه من الأوضة وآدم
ماشى وراها : انتي يابت رايحه فين ؟ استنى

وفعلا آدم راح يتكلم مع مدير المستشفى عن
الموضوع اللي هو عايزه ده وسولاف راحت تخلص
شغلها

في القصر دولت بعد ماقلت مع آدم بصت للوي
وقالتله يقدر يخرج وهو أخذ لوجين ومشى شوية
وقبل مايبعد عن القصر بص للوجين اللي متعلقة في
دراعه زي طفل خارج مع باباه أول يوم العيد ،
أبتسم بحب ولمح حاجة في ايدها فاستغرب : ايه ده
يا لوجينا ؟

لوجين رفعت ايدها بالرسم الصغيرة اللي لسه
مخلصاها : دي رسمتي ، رسمتها قبل ماتيجي ، ايه
رايك ؟

لوي بص للرسم اللي للحقيقة كانت لا تمت للرسم
بصله ، فبسبب ايد لوجين اللي بترتجف بسبب تعبها
الألوان كانت متلخبطة على بعض مخلي الرسم
مش واضحة شوية

لوي أبتسم وبصلها : جميلة جدا بس مش عشان هي
اللي جميلة ، عشان أنتي اللي رسماها

لوجين أبتسمت بحب وقلبها بيرقص من كتر الفرحة
وكلمات لوي اللطيفة

الإثنين ضحكوا ولؤي مسك ايدها ومشوا وهما
بيتكلموا وعلى بعد منهم مروان كان واقف بيراقيب
كل ده ، من أول ما شاف لؤي بيقرب منهم وهو
بيراقيه

ربع ايديه وهو بيشوف طيف لوجين بيبعد لحد
ماختفى من مجال بصره وهو غيران ، ايوه فعلا هو
كان غيران ، لوجين اللطيفة بعد ما كان هو اقرب
حد ليها من بعد آدم وجدته دولت دلوقتي هو بقى بلا
قيمة عندها ، هو اللي كان حريص يراقبها من بعيد
بيظمن إنها كويسه ، كان دايمًا يوصي الحرس
يجيبولها لوح وألوان كل فترة ، وكان عامل رعب
لمدبرات المنزل أنهم يكونوا حريصين كل الحرص
على علاجها وأكلها كله يكون صحي ومغذي ، كان
كل يوم يدخل اوضتها بعد ماتنام يتأكد إنها متغطية
كويس أو مش نايمة ز علانه ، وقلبه كان بيتفطر
عليها لما يلاقياها نايمة معيطه ودموعها على خدها
وهو مش عارف يتصرف إزاي ، لو آدم كان موجود
ماكنتش هتنام ز علانه كده أو على الأقل هو كان
هيعرف يتصرف ، وفي الآخر وبعد كل ده اتخلت
عنه بكل سهوله عادي وحببت لؤي وهو بقى مجرد
سراب في حياتها

اتنهد بعنف وهو بيحرك ايده في الهواء : ايه يا
 مروان ماعادي كل اللي حوليك بيسيبيوك ويمشوا
 دايمًا ، بداية من أمك وأنت ابن كام سنة مرور
 بجماليات و آدم ودولت واخيرا لوجين
 قبض ايديه بكل قوته : أنت قوي من غير كل دول ،
 أنت قوي لوحدك

دخل اوضته اللي كان واقف في بلكونتها وغير لبسه
 عشان يروح الشركة ، في طريقة قابل تمارا اللي
 كانت طالعة من تحت باين عليها الوهن والارهاق ،
 دخلت اوضتها وقفلت الباب بهدوء من غير أي كلمه
 ومروان بيبيص لاثرها باستغراب

مروان : مالها دي كمان ؟

نفض الأفكار من راسه وراح الشركة عشان شغله

آخر اليوم سولاف خلصت شغلها و آدم اخدها معاه
 يروحها ، ركبوا العربية وجسار ساق ، وقف في
 اشارة طويلة شوية واتنهد بملل

آدم : مالك يا جسار ؟

جسار من غير ما يبصله : مافيش

آدم كان مستغربه جدا ومش عارف هو ماله ،
الإشارة فتحت وجسار لسه هيدوس بنزين لقي الباب
اللي جنبه اتفتح مرة واحده ودخلت بنت وقفلت الباب
وراها

قعدت في دواسه العربية وبصت لجسار : اطلع
بسرعة

جسار بذهول : افندم ؟

البنت بصت من الشباك وصرخت وهي بتخبط
بايديها على رجل جسار : يالهوري يالهوري يالهوري
يالهوري ، اطلع بسرعة بالله عليك ، بسرعة ابوس
ايدك

جسار ماكنش فاهم حاجة بس داس بنزين واتحرك
بسرعة ، فضل يسوق بسرعة لفترة طويلة وهو
بيراقب المجنونه اللي قاعده جنبه في دواسه العربية
وكل شوية بتطلع تبص من الشباك وتنزل تانى ،
وبعد مدة انتهت براحة وبصت لجسار : يلا نزلنى
بقى

جسار : نعم يا حلوه ! انتى شيفانى سواق أهلك ولا
ايه ؟ شوية اطلع وشوية نزلنى ، وبعدين شكلك
وراكي مصيبه وهدبسيني فيها

البننت : بقولك ايه يا عم أنت مالکش دعوة بيا ، ولو
مانزلتنيش دلوقتى هصرخ وهقول خاطفنى وهلم
عليك الناس وهوديك في داهية

جسار اتعصب وركن العربية ومسكها من قفاها :
تودي مين يا بت؟ ده أنا اوديكي انتى واللى خليفوكي
كلهم في ستين داهية مش داهية واحده وماحدش
هيعرف يعمل حاجة

البننت : طيب ماتتكلمش معايا كده أنت ماتعرفش أنا
ابقى مين ولا ايه ؟

جسار : هتكوني مين يعني السفيره عزيزه مثلا ؟
البننت بشجاعة مزيفه : لا ، تعرف صاحب سلسله
مطاعم A&G أنا بقى أبقى اخته

جسار بص لآدم : لمواخذة ياباشا ، ادينى دقيقه بس

البننت اخدت بالها من آدم وسولاف اللي قاعدين
بيراقبوا في صمت وأبتسمت ببلايه : أهلا يا جماعة

جسار نزل وراح فتح الباب الثاني ومسك البنت من
 قفاها نزلها : بقولك ايه يا شاطره روى شوفي
 وراكي ايه أنا مش فاضي للكذب بتاعك ده ، روى
 دوري على حد غيري تطلعي جناك عليه ، ايه يا
 ربي ده

ركب العربية ونفخ بضيق و آدم : في ايه يا جسار
 أنت من امتي كنت غشيم كده مع واحده بنت ؟
 جسار وهو بيربط حزام الأمان : ماتاخدش في بالك
 يا آدم ، أنا عارف الأشكال دي كويس واعرف
 أتعامل معاهم البت اصلا شكلها مش تمام دي بتقولك
 إنها أختك ، هبلة دي ولا ايه ؟

ساق تاني لحد بيت هند ودخلوا كلهم عندها
 آدم بصوت عالي : هنووود

هند : خير يا آدم

آدم راح قعد جنبها ومسك ايدها : الا بقولك ايه يا
 هند أنتي عارفه أنا بحبك قد ايه صح ؟
 هند : لخص يا آدم عشان انا فاهمه الحركات بتاعتك
 دي كويس ، قول عايز ايه ؟
 آدم ضحك : حبيبة قلبي ، المهم أنا عايز أعمل الفرحة

هند : يعني إزاي ؟

آدم : هو ايه اللي يعني إزاي ! فرح يا هند ، زفه وتورته ومعايزيم وفتان وبدله وعريس وعروسه ايه غريبه دي ؟

هند : مانا عارفه ياخويا يعني ايه فرح ، قصدي يعني امتي وفين والتجهيزات إزاي والذي منه

آدم راح جاب سولاف قعدها جنبه : شوفوا بقي فين وازاي دي بتاعتكم انتوا ، عروستي الحلوة تقولي نفسها في فرح عامل إزاي وأنا تحت أمرها ، أما امتي دي فبتاعتي أنا ، أنتي عارفه الشقة اللي أنا شاريتها دي جايها بالعفش وأنا مستحيل ادخلها على عش مستعمل فهظبط الشقة كلها وطبعا على ذوق سولاف وبعدها نعمل الفرح ، ايه رأيكم ؟

هند : أنا ما عنديش مانع ، شوف رأي دايدا

آدم بصلها : ها يا سولي تؤمري بايه ؟

سولاف : امممم اللي تشوفه

آدم : والله جوزك اعمى مش بيشوف فشوفي انتي بقي

سولاف بحزن : ماتقولش كده ، أنا جوزي سيد
الرجالة كلهم

آدم أبتسم برضا وحب : حاضر مش هقول ، قوليلي
أنتى بقى عايزة الفرحة فين والشقة إزاي ؟

سولاف بتفكر وادم قال بحماس كأنه افكر حاجة :
عندي فكره اسمعي ، انتى تجهزي الشقة على ذوقك
وأنا أجهز الفرحة على ذوقي وكل واحد يفاجئ
التاني، ايه رأيك ؟

سولاف أبتسمت وهزت دماغها بموافقة وهو كمل :
ونخلي البوفيه بقى برعاية جيسار باشا

جيسار : اه يا جزمه

كلهم ضحكوا وقعدوا يتكلموا مع بعض في كل
التفاصيل وسولاف مبسوطة أوي وهي حاسة بشعور
أي بنت بتجهز لفرحتها كأنها أول مرة تتجوز

في مكان تاني أول مرة نروحه

دخلت بنت البيت بكل غضب : حيوان ومتخلف ،
إنسان براس بخاخه والتاني الغبي ده مسكني من قفايا
، ايه شايفني فار ؟

سما مامتها : في ايه يا بت انتى داخله تشتمي كده ليه
وتتخانقي مع دبان وشك ؟

فرح : بس يا ماما بالله عليكى ده أنا دمي محروق
على الآخر

سما : ومين ده اللي حارق دمك ياختى ده انتى
تحرقي دم بلد بحالها ؟

فرح : ماشي يا ماما شكرا مقبولة منك

سما : ماتقولي يا بت مالك ؟

فرح : شوفي يا ستى قال ايه وأنا ماشيه في أمان الله
ألقي ولد كده متسهوك جاي يعاكسني وعمال يقولى
أيتها الجميلة ولا كأنه طالع من فيلم كرتون

سما : وأنتى عملتى ايه ؟

فرح : هكون عملت ايه يعني يا ماما قومت ناولته
بالطوبه في دماغه

سما شهقت : يخرب بيتك أنتى مش هتبطلنى ام العادة
دي بقى ؟

فرح : عايزاني أعمل ايه يعني اسيبه يقل ادبه
واسكت ؟

سما : لا حول ولا قوة الا بالله العلي العظيم تقومي
فاتحاله دماغه ؟ أنتى ايه يا بت ؟ ولما نقع في مشكله
ولا نروح في مصيبه

فرح قامت بنرفزة : ولما حد يتحرش بيا ولا يعتدي
على شرفي كده مش هنروح في مصيبه ؟

سما بتراجع : مش قصدي _____

فرح قاطعتها : عموما مش هيفرق معايا ، أنا عندي
استعداد اروح في داهية وأنا بدافع عن شرفي ولا
أنى أسمح لأي واحد يبصلي حتى بصبه وحشه وعن
إذنك بقى أنا داخله أنام شوية على ما بابا وريم
يرجعوا

سابتها ودخلت اوضتها وسما راحت تكمل شغل
البيت وهي بتدعي ربنا يهدي بنتها ويحفظها

آدم رجع البيت بعد ما قعد طول اليوم مع سولاف
ولقى إياس قاعد لوحده في الضلمه ، استغرب جدا

وراح شغل النور : مالك يالا أنت ، قاعد كده ليه
؟؟

بصله وأول ما شاف منظره برق وراح ناحيته
بسرعة : أنت مالك مين عمل فيك كده ؟

إياس : امرأة مسعورة

آدم : مين دي

إياس رفع دماغه اللي متعورة ومغرقة قميصه دم
وهو حاطط عليها شاش : فتاة مجنونة ، رأيتها
ولفتت انتباهي بثيابها الرقيقة وهذا الشيء المسمى
حجاب انه لطيف للغاية ولكن عندما اقتربت لاتحدث
معها قامت بضربي بصخرة والهرب ، ااه رأسي
يؤلمني جدا

آدم ضحك بعلو صوته وضربه في كتفه : تستاهل ،
عشان تلم نفسك بقي وتبطل معاكسه في البنات طول
مانت ماشي ، عقبال جسار اما تطلع عليه واحده كده
تربية هو كمان

جسار : سامعك بس هعمل نفسي مش سامع ماشي ؟
آدم : لا ياخويا أسمع وهو أنا هخاف يعني مانا بقول
الحقيقة

زقه بعيد : وسع كده وسع كده أنا مش فاضيلكم
 كان رايح ناحية اوضته فجسار وقفه : ايه هتروح
 تكلمها في الفون ؟ مش كفاية كنت معاها من الصبح
 ؟

آدم بصله باستفزاز : لا مش كفاية ، خليك أنت اقعد
 مع الواد الباير ده هو كمان وسيبوني أنا أحب في
 مراللاتي براحتي ، عن إذنكم

دخل اوضته وقفل الباب وهو بيضحك عليهم وهما
 الاتنين بيبصوا عليه بغیظ

جسار : بقولك ايه أنت شكلك مخنوق ؟

إياس : جدا

جسار : خلصانه وأنا كمان تعالا بقى نخنق الواد
 التنح ده في عيشته هو كمان

إياس أبتسم بشر وقام معاه ودخلوا عند آدم وفضلوا
 يجلسوا عليه لحد ما عرفش يكمل كلام مع سولاف
 وقفل الفون وقام دور فيهم الضرب هما الاتنين وهما
 ببيضحكوا

لؤي اخيرا عرف يرتبط بلوجين ، يوم ما الشركة
 فازت بالصفقة اللي آدم ساعدهم فيها عملوا حفلة
 كبيرة راقية جدا للاحتفال بالنجاح ده وفيها اعلنوا
 عن علاقة لؤي بلوجين وكتبوا الكتاب ولبسوا دبل
 تحت استغراب كل الحضور وكل معارف العيلة من
 العلاقة الغربية دي بس طبعا ما حدش قدر يتكلم أو
 يقول أي حاجة أو بمعنى أصح هما اتكلموا وقالوا
 حاجات كتير ماتصحش بس من ورا ظهرهم

تاني يوم إياس راح القصر يشوف دولت ويقعد
 معاها شوية و آدم وسولاف كانوا في المطعم بتاعه
 عشان يتغدوا وجسار قاعد قصادهم لوحده وبيكلم
 الكرسي اللي قدامه : خلينا إحنا الاتنين كده قاعدين
 بوزنا في بوز بعض

وبص بغيط لآدم وهو عمال يضحك : يابني شيل
 عينك من علينا هنولع واحنا قاعدين

جسار : لا مش هشيها لحد مالاقي واحده اقعد
 اتمحس معاها كده زيك

آدم ضحك : ايه ده أنت عايز تلاقي واحده زي
مراتاتي ، مش هتلاقي طبعاً ، هي مراتي واحده
بس ماتكررش

جسار بغيط : كيااااد يا ربي أول مرة أشوف راجل
كياااا

آدم ضحك باستفزاز وقاطعهم صوت الجرسونه اللي
جاية تاخذ طلباتهم : اتفضلوا يا فندم طلبتكم ايه ؟

جسار بصلها : انتي تاني ؟

البنيت بصتلته : أنا اللي المفروض تقول كده ، أنت ايه
اللي جايبك هنا ؟

جسار : وانتي مالك يا رخمه انتي هو كان مطعم
ابوكي ، ولا صح نسيت انتي أخت صاحب المطعم ،
ايه اللي مشغلك جرسونه ؟

البنيت اتكسفت وبشجاعة مزيفة : وأنت مالك أشتغل
براحتي ؟ وبعدين هو إحنا كده بنحب نعتمد على
نفسنا

آدم قعد يضحك عليها وانتبه على صوته مدير
المطعم اللي راحله ووقف قدامه باحترام : آدم باشا
آدم بصله : مين دي ؟

المدير : دي الموظفة الجديدة حضرتك

آدم : اه اللي قولتلي عليها من يومين ؟

المدير : ايوه هي يا باشا

بصلها : فرح ، ده آدم باشا صاحب المطعم

فرح رفعت ايدها على قلبها وبصتله بخوف : باشا ،

والله باشا ، أنا قولت كده بس ماحدث صدقني

آدم ضحك : ماشي يا ستي الله يعزك بس انتي غلطي

ومرتين وأنا للأسف مابحش الغلط

فرح بانكسار مصطنع وتمثيل : حقا ، بس يعني

حضرتك يرضيك تعاقب بنت ضعيفة ومنكسرة زي

، وبعدين حضرتك كنت عايزني أعمل ايه لما الاقي

حد زي ده بيهددني ويزعزع سلامتي ؟ خوفت يا بيه

وقولت اي حاجة

جسار بيسقف : الله ، هایل يا فنانة ، براقو براقو

المشهد اللي بعده

.

فرح بصتله بغیظ وهو قام وقف فهي خافت بجد من

منظرة وآدم بص لسولاف : أیه رأيك أنتي نعمل ايه

في الموقف ده ؟

سولاف بصت على فرح اللي الخوف بان عليها
وأبتسمت : ولا حاجة ، أنا مش شايفه إنها عملت
حاجة تستاهل كل ده

فرح : ان شالله يخليهملك يا ست هانم

آدم : ايه ده يا بنتى أنتى هتشحتي ولا ايه ؟ المهم
عشان خاطرها هي بس أنا مش هعملك مشكله بس
مخصوص منك يومين على كدبك ده ولو عرفت ان
حاجة زي دي اتكررت تاني هرفدك لأنى أكثر حاجة
بكرها في حياتي هي الكذب فخودي بالك بقى
فرح بجديّة: أنا اسفه بجد أنا مش كدابه والله واو عدك
مش هتكرر تاني

آدم هز دماغه بفهم : يلا بقى مش هتأكلونا ولا نروح
نشتكيكم للمدير ؟

المدير أبتسم : لا يا باشا ودي تيجي برضة حضرتك
تحب تاكل ايه ؟

آدم : وريني المنيو بتاعت النهارده كده

المدير مد ايده بالمنيو و آدم ببص فيها بملل :
اسباجيتي بولونيز ، رافيولي ، اسكالوبيني ليمون ،
اممم ، فيليه ، الفيليه ده ؟

المدير : سمك يا فندم

آدم : يا خسارة

بص لسولاف : عايزة تاكلي ايه ؟

سولاف ميلت عليه وهمست بصدمه : أنا أصلا
مافهمتش أي حاجة من اللي أنت قولته دلوقتي ده

آدم ضحك وقام وقف : طيب قومي معايا

سولاف قامت : ايه رايعين فين ؟

آدم مسك ايدها وراح بيها ناحية المطبخ : هطبخلك
أنا على ذوقي ، وبالمره تشوفي الدنيا جوا عامله
إزاي

سولاف أبتسمت بحماس ، من ساعة آخر مره شافته
بيطبخ وكان نفسها تشوفه كده تاني كان شكله لطيف
أوي

دخلوا المطبخ وكل الشيف وقفوا باحترام لآدم : آدم
باشا

آدم أبتسم : ازيكم يا جماعة ؟

بص لسولاف وهو بيشاور عليهم : دول فنانيين
المطبخ بتوعي

سولاف رحبت بيهم وهما كمان و آدم فتح ايديه
 قدامهم : اتفضلوا يا شباب

كلهم رجعوا للي كانوا بيعملوه وسولاف بتتفرج
 عليهم وهما بيتحركوا بسرعة ومهارة بدون ولا
 غاطه وهي منبهره منهم

رئيس الطباخين وقف قدام آدم : حضرتك محتاج اي
 مساعده ؟

آدم : لا يا شيف تسلم أتفضل أنت وماحدش يشغل
 باله بيا خالص

الشيف رجع لشغله و آدم راح شاف هيعمل ايه ، لبس
 المريلة والجوانتيات وسولاف راحت وقفت جنبه :
 أنت ليه بتلبس الجوانتيات دي ؟

آدم وهو بيقطع خضار بسرعة واحتراف : عشان
 النظافة

سولاف بصتله : يعني لما اجي في يوم اطبخك
 هتقولي ألبسي جوانتيات عشان النظافة ؟

آدم ضحك وهمس جنب ودنها : ده أنا آكل طبخك
 وصوابك وراه

سولاف اتكسفت وهو كمل اللي بيعمله : أنا مش
بقرف منك أنتى بس مش بحب العك في الأكل ،
الأكل اللي أنا بعمله ممكن اي حد ياكله ولازم يبقى
نضيف جدا

سولاف هزت دماغها بفهم وهمست : بس انا برضه
مش بقرف منك

آدم أبتسم بحب وبص حوليه على اللي شغالين وكان
كل واحد مركز جدا في شغله فانتهاز الفرصه وباسها
بسرعة على خدها : قمر أوي يا سولاف

سولاف بتغير الموضوع من كسوفها : قولي بقى
أساعدك في حاجة ؟

آدم : اه محتاج مساعدتك

سولاف : هممم قول اعمل ايه ؟

آدم : قربي كده

سولاف قربت شويه : ها ؟

آدم : يا بت قربي أكثر انتى خايفه ولا ايه ؟

سولاف اتكسفت عشان الموجودون وكده بس قربت
شوية كمان : ايه ؟

آدم : ايوه حلو كده خليكى جنبى بقى ، وجودك جنبى
بيرىحنى

سولاف أبتسمت وقربت منه أكثر وفضلوا الاتنين
يتكلموا مع بعض بحب وسولاف بتساعده فى
الحاجات اللى تعرفها

بره جسار كان قاعد بياكل وبعد ما خلص قعد يشرب
قهوة وهو بيبيص على المكان حوله واخذ باله من
ست قاعده مع راجل عينه مانزلتش من على فرح
طول ما هي بتتحرك فى المكان والست قاعده قصاده
مدايقه منه ، بصت على فرح اللى شايلة صينية
وعليها كاسات كريستال فيها عصاير وحطت رجليها
قدامها كعبلتها

فرح اخدت بالها من رجل الست قدامها بس مالحقتش
تمسك نفسها وفقدت توازنها ووقعت على الارض
وكل الكاسات اتكسرت والعصاير اتدلقت على
الارض والترابيزة وهدوم الست كمان

الست زعقت جامد : أنتى يا حيوانه مش تاخدي
بالك، ايه الغباء ده ، ده أنا هطين عيشتك النهارده

فرح قامت بوجع : حضرتك مش أنا اللي غلطانه ،
أنتى اللي وقعتيني

الست بزعيق : أنتى كمان بتردي عليا ؟ فين مدير
الزفت ده ؟

الصوت علا والمدير خرج بسرعة على الصوت :
خير يا فندم ؟

الست : أنا عايزة أفهم مطعم شيك وراقى زي ده
إزاي يشغل اشكال زباله زي دي ؟

المدير : ممكن حضرتك يا فندم تفهميني بس ايه اللي
حصل

الست : البهيمه دي دلقت كل العصاير دي على
الجاكيت بتاعي

بصتلها : انتى عارفه أنا جايبه الجاكيت ده بكام أنتى
لو قعدتى تشتغلي طول عمرك مش هتجيبى نص
تمنه

فرح بصت للمدير : جمال باشا هي اللي وقعتني والله
ودلقت الحاجة مش أنا

قطعهم صوت آدم من وراهم : في ايه اللي بيحصل
؟

جمال : آدم بيه !

جسار قرب من آدم وهمس بحاجة جنب ودنه وجمال

بص للست : آدم بيه هارون صاحب المطعم

الست ارتبكت بس دارت ده بالزعيق وده اللي آدم

أخذ باله منه : الكائنة اللوكل دي بشعه، دلقت

العصاير على هدومي، ينفع كده يعني ؟

شاورت على الأكل اللي قدامها : وبعدين الأكل ده

مش حلو ابدا حضرتك أنت إزاي تشغل طباخين

جهله بالشكل ده ؟

آدم بص لفرح : إعتذاري

فرح : آدم باشا

آدم بصرامة : إعتذاري

الست أبتسمت بنصر و آدم بصلها : هو حضرتك

مش سمعاني ولا صوتك العالي أثر على سمعك

كمان ؟

الست : افندم ! أنت بتكلمني أنا ؟

.

آدم راح وقف قدام فرح وبص للست : ايوه بكلمك

أنتى ، حضرتك لما تعملي كل الهرج ده وتزعجي

زبايني بألفاظك السيئة وصوتك العالي يبقى لازم
تعتذري ، ولما ثقلي من حد من موظفيني بالشكل ده
فده معناه إنك مش محترمه المكان اللي انتى فيه ولا
صاحب المكان وأنا ماسمحش ابدا لأي مخلوق إنه
يقلل من الموظفين بتوعي ، حضرتك ده مطعم
محترم وواحد من سلسلة عالمية يعني كل الموظفين
من أكبر رأس لاصغرها بيتنقوا على الفرازه ،
وبعدين _____

أخد شوكة نظيفة من على ترابيزة جنبهم وقرب من
ترابيزة الست وداق الأكل اللي عليها وكالعادة
بطريقة مهندمه جدا كأنه واحد في لجنة تحكيم
وبصلها : حضرتك الأكل مضبوط جدا بس الظاهر
إنك أول مرة تدوقي أكل من النوعية والنضافة دي
لان الواضح قدامي جدا إنك متعودة على أكل
المطاعم الشعبية

مسك حرف الجاكيث بتاعها : زي بالظبط جاكيث
ديور التقليد ده

الست اخرجت جدا من آدم والموقف اللي هي حطت
نفسها فيه وهو كمل : أنا ممكن حاليا أبلغ البوليس
وهما يتعاملوا مع حضرتك بس أنا هتعامل معاكي

بأسلوب ارقى من أسلوبك وهكتفي منك بس باعتذار
للموظفه اللي اهنتيها

الست سكتت شوية وهي رافضه تعتذر بس نظرات
آدم المرعبة اجبرتها تعتذر وهو : تفضلا مني مش
هطلب منك تمن الأكل ده ولا تمن الحاجة اللي
اتكسرت واللي أنا متأكد إنك مش هتقدري تدفعيه ابدأ
لأنك لو قعدتي تشتغلي طول عمرك مش هتجيبني
نص تمنهم حتى

آدم كان متعمد يعيد عليها نفس الجملة بتاعتها وشاور
لواحد من الأمن على الباب : بس هكتفي بأنك
ماتشر فيناش في المطعم تاني

بص للأمن : خذ الأستاذة ووصلها للباب

الأمن أخذ الست والراجل اللي معاها ومشى وآدم
بص لكل الناس اللي قاعدين : بعذر جدا منكم يا
حضرات على الموقف السخيف ده وكتعويض مني
هنقدم لحضرتكم ديزيرتز هتكون على حساب
المطعم ، انجوي يا جماعه

الزباين ابتسموا برضا وآدم بص لجمال : نصف
المهزلة دي حالا

جمال هز دماغه بطاعه واتحرك بسرعة مع اللي
 معاه و آدم بص لفرح : ورايا على المكتب
 مشي بنرفزة وفرح راحت وراه بخوف وهو أول ما
 دخل بصلها بضيق : حضرتك ممكن أفهم ايه
 المسخرة اللي حصلت بره دي؟؟ أنا لولا جسار لمح
 اللي حصل وقالي عليه كان زمان الموضوع كبير
 أكثر

فرح دموعها نزلت و آدم مكمل : حضرتك مش
 متخيلة كمية الخسارة اللي أنا اتعرضتلها في أقل من
 نص ساعة بسببك ، مين اللي هيعوضني عن كل ده
 ؟

فرح : أنا أسفة جدا ل حضرتك بس أنا برضه مش
 غلطانه في حاجة ، ولو على الخسارة ممكن
 حضرتك تكتبلي وصل بقيمتهم وأنا هسددهم في
 اقرب وقت

مسحت دموعها : أنا كنت جاية أشتغل هنا على
 أساس المكان ده محترم وبيقدر البني آدمين زي ما
 سمعت

قلعت المريلة اللي على وسطها : بس انا اسفه اهانه
 بالشكل ده أنا مش هقدر استحملها

حطت المريلة على المكتب قدامه : الله الغني يا فندم
عن فلوسك لو هيكون تمنها كرامتي

آدم بغيظ : والله ؟

فرح : ايوه والله

سولاف اتدخلت باحراج في الكلام : أنا آسفة على
المقاطعة بس اسمحولي اتدخل، انسه فرح آدم مش
قصده اهانه ليكي خالص ، آدم عمره مايبهين حد ولا
بيغلط فيه غير لو هو اللي غلط الأول وانتي
ماغلطيش فهو مش قاصده خالص يغلط وبعدين هو
عارف إنك مش غلطانه بدليل إنه ردلك كرامتك
واخذلك حقاك قدام الكل

راحت مسكت ايد آدم برقة : آدم انسه فرح أكيد مش
قصدها كل اللي حصل ده ولو على الخسارة أكيد
أنت هتعرف تلاقي حل مش كده

آدم كالعادة ضعف قدام رقتها واتنهد بقلة حيلة : يعني
انتي شايفه كده ؟

سولاف : وهو أنت شايف غير كده ؟

آدم : أنتي عينيا اللي بشوف بيها وطلاما أنتي شايفه
كده يبقى أنا شايف كده

سولاف أبتسمت وبصت لفرح : وبس الموضوع
بسيط مش مستاهل كل ده

فرح كانت مكسوفه منهم بس بصت لسولاف وهزت
دماغها بفهم و آدم بصلها : اتفضلي ارجعي على
شغلك وبعد كده أتمنى ماترديش على الزباين حتى لو
هما غلطانين وحاولي تحلي الموضوع بدبلوماسية
أكثر أو تسيبي الموضوع لجمال دي وظيفته أصلا
يدير امور المكان في غيابي

فرح : أنا اسفه جدا لحضرتك وان شاء الله موقف
زي ده مش هيتكرر

آدم : أتمنى

فرح انسحبت من المكان و آدم قرب من سولاف :
وبعدين في الكارثة دي ؟

سولاف بقلق : ليه بس يا حبيبي كارثة هو الموضوع
كبير أوي كده ؟

آدم شدها من وسطها قربها منه أكثر وهمس بخفوت
: اه طبعا كبير أوي ، الأكل اللي كنت بعمله باظ وأنا
جعان جدا ، اتصرفي

سولاف : آدم اناااا

آدم ضمها لقلبه وسند راسه على كتفها : يااه يا
سولاف ، مين كان يتخيل أنى في يوم بعد ماكنت
بدخل المكتب ده نادرا ولوحدى أو مع حد من عمله
أدخله مع بنت زيك ؟

سولاف كانت مبتسمة في الأول بس كشرت لما
سمعت آخر كلامه : ايه بنت زيك دي ؟ مالي أنا
يعني ؟

آدم ضحك : زيك يا سولاف ايه مش فاهمة ؟
سولاف بعدت عن حضنه : قصدك أنى عشان كنت
مطلقة يعني وكسر زي مايقولوا ؟

آدم كشر : ايه كسر دي ؟ جتهم كسر رقابيهم ،
يتقطع لسان اللي يقول عليكى ست كسر ، ده أنتى
ست الستات كلهم

سولاف بحزن : طيب قصدك ايه بزىك دي ؟

آدم أبتسم : مزة زيك

سولاف أبتسمت بقلة حيلة منه وهو شدها لحضنه
تاني وهو بيطبطب على ظهرها برفق : أنتى كبيرة
أوي في نظري يا سولاف ، مهما قعدت أقولك
واشركك أنا شايفك إزاي مش هعرف اوصفك صح

، ولو على جوازك قبل كده فأنا مش معتبره جواز
 أساسا ولا فارق معايا ، أنا ماليش دعوة بسولاف
 القديمة أنا ليا بسولاف من أول ما قابلتها ، البنت
 الجميلة الهادية اللي حبتها ، واوعي اسمعك ثقلي من
 نفسك تاني لأنك غالية أوي يا سيدتي

سولاف بذهول : سيدتك !

آدم باس كتفها : سيدتي وتاج راسي كمان

سولاف بعدت عنه وهي بتبص لعيونه بحب وقلبها
 بيدق بالحياة من جديد وحاسه بكل شروخه بتترمم
 بكلمات ادم الرقيقة

سولاف : تعرف إنني زمان كنت واثقة أوي من
 نفسي لدرجة أن الناس في المنطقة كانوا بيقلوا عليا
 مغرورة وشايفة نفسي ؟ دلوقتي أصغر كلمة بتخليني
 عايزة اعيط وبحس كأن الناس بيشاوروا عليا
 ويرموني بكلام سيئ

آدم باس بطن ايدها : لا عاش ولا كان اللي يقول
 عليك كلام وحش ، أنتي مقامك عالي أوي يا
 سولاف لدرجة أني مستكترك عليا أصلا فاوعي
 تسمعي لكلام حد أو تهتمي بيه

سولاف مسكت وشه بين ايديها : أنا مش كثير عليك
ولا حاجة ، أنت مافيش حاجة تكثر عليك لأنك أنت
الكثير أوي على كل حاجة

أبتسمت بحب : يا سيدي وتاج راسي

آدم أبتسم وعضنها تاني يخفف عنها الحزن اللي
شيلاه في قلبها وهي غمضت عيونها تستمد منه
الراحة والأمان اللي بتحسهم في عضنه

بره مكتب آدم

جسار بص لفرح : مبسوطه دلوقتي ؟

فرح : هو أنت ليه حاططني في دماغك هاه ؟

جسار بضيق : عشان أنتي اللي بدأتني من أول ما
ركبتي عربية آدم لحد دلوقتي وانتى مش بتعملي
حاجة غير إنك تدايقيه وهو الصراحه مافيهوش حيل
ولا حمل أذى جديد وأنا مش هسمحلك ابدا تكوني
سبب جديد لوجعه

فرح : أنا مش فاهمه حاجة منك بصراحه وعموما
أنا اسفه لو كنت دايقته بحاجة مش هنتكرر اكيد تاني

جسار : يا ريت عشان ساعتها أنا مش هحذرك أنا
هفصك على طول تحت رجلي ولا هيهمني
فرح بصتله بضيق : متشكره يا محترم عن إيدك بقى
اخذت بعضها ومشت وهي بتبرطم وهو مراقبها
بضيق : هو إحنا كنا ناقصين يا ربي
راح ناحية مكتب آدم ولسه هيفتح الباب افكر ان آدم
مابقاش لوحده خلاص وبقى واحد متجوز وكمان
مراته معاه جوه ، جه يخبط على الباب بس تراجع
وراح وقف بعيد شوية يبص على البحر وقرر
يسيبهم براحتهم لحد ما يخرجوا بنفسهم

فرح بعد ما خلصت شغلها روت بيتها هتولع من
الغيظ وبمجرد ما دخلت اوضتها قعدت تعيط لحد ما
تعبت ، دخلت عليها أختها الكبيرة اللي راحت قعدت
جنبها واخذتها في حضنها وفضلت تطبطب عليها
بحنية : مافيش حاجة تستاهل دموعك دي
فرح : أنتى إزاي كده بجد ؟ كل مرة بتخفني عني
وانتى مستحمله كتير أوي أصلا

ريم طبطبت علي ظهرها : الابتلاء يعني اختبار يا
فرح من ربنا ، يا تسقطي فيه وتتعاقي يا تنجحي فيه
وتتكافئي ، وأنا صابرة لحد ما امتحاني يخلص وربنا
يكافاني على صبري ده

فرح حضنتها جامد : أنا بحبك أوي يا ريم

ريم أبتسمت بحب : وأنا كمان يا قلب ريم ، قوليلي
بقي مين اللي مزعل فرحتي كده ؟

فرح حكبتها على كل حاجة حصلت معاها وهي
قعدت تهديها وتنصحها وهي بتعالج الجروح اللي في
ايديها مكان الازاز اللي وقعت عليه

لوجين كانت نائمة على سريرها ومغمضة عينيها
وحاطه لزق خافض للحرارة على جبينها ولؤي
ماسك ايدها وايده الثانية بيمشيها براحه على بطنها
اللي وجعها كمان

لوجين : كنت عايزة اسألك على حاجة
لؤي : قلبي يا قلبي

لوجين : فاكر يوم الخناقة لما ابيه آدم رجع واقنع
بابي واونكل اننا نتجوز ؟

لؤي : اه فاكر

لوجين فتحت عينيها وبصتله : مين هي حبيبتك اللي
ابيه مروان قال عليها ؟

لؤي قرب منها بهدوء : دي حبيبة قلبي اللي ماقدش
أعيش من غيرها

لوجين عينيها لمعت بالدموع وقعدت : يعني في
واحد بجد ؟ يعني ابيه كان بيتكلم بجد ؟

لؤي : اه بجد في

لوجين دموعها نزلت وهو ضحك جامد وحضنها :
أنا آسف خلاص والله كنت بهزر معاكي ، دي كانت
أمي والله مش حد وكنا بنتكلم عن اختي الصغيرة
جنة ، يابت انتى مراتي ومافيش غيرك في
قلبي

لوجين قعدت تعيط أكثر وهو بيطبطب على ظهرها
ويصالحها لحد ما بطلت وبعدها عنها : أنت وحش
أوي على فكره

لؤي : وأنتى جميلة أوي على فكرة

لوجين : وأنت شرير أوي على فكرة

لؤي قرب منها أوي : أنتي__

وهمس جنب ودنها وهو بيتكى جامد على كل حرف
: جميلة أوي ، فاهمه ؟

لوجين اتكسفت وهو بص في عيونها : مالك ؟

لوجين انكشفت في نفسها وحطت ايديها على صدره
: عيب كده

لؤي بذهول : عيب هههههه لأ بجد ؟ وهو أنا عملت
حاجة أصلا ؟

لوجين : وهو أنت عايز تعمل حاجة ؟

لؤي : أنا عايز أعمل حاجات مش حاجة واحده بس

قرب من شفايفها بتردد وهي : بلاش

لؤي : ليه ؟

لوجين : أنت ناسي ان عندي برد ولا ايه ؟

لؤي أبتسم على محاولتها الطفولية للهرب : وماله يا

ستي أنا راضي وعايز يجيلي برد أنا كمان

مسك وشها بين ايديه : أنا جوزك تسمحيلى ؟

لوجين وشها أحمر جامد وهو قرب منها بهدوء
 عشان ماتخافش منه وباس شفايفها برقة وهي
 ماكانتش عارفه تعمل ايه وهو حس بيها :
 ماتخشيش كده وسيبيلي نفسك خالص وأنا هعلمك
 كل حاجة

لوجين خبت وشها في صدره من الكسوف وهو
 احترم احراجها لأنها أول مرة تتعرض لحاجة زي
 دي وقرر يصبر عليها شوية وواحد واحد هو
 هيعرف يخليها تلين بين ايديه

تاني يوم لؤي كان في بيته نايم في سريرة وعمال
 يكح جامد

دخلت أخته الصغيره عليه : معقوله لؤي باشا بذات
 نفسيته راقد الرقده دي ؟ يا سبحان الله بجد هي الدنيا
 جرى فيها ايه يا ناس ؟

لؤي بصوت رايح : جنة اطلعي بره أنا مش ناقص
 جنة نطت فوق رجله على السرير وهي بتتكلم زي
 المحققين : قولي بس ياسطا وماتتكشفش مني ده أنا
 أختك الصغيرة حتى ، عملت ايه عشان يجيلك برد
 بالشكل ده وده اللي ماحصلش من سنين ؟

لؤي زقها وقعها على الارض ونادي : ماما ، تعالي
خودي بنتك دي من هنا

الام دخلت وشدت جنه من ودنها: يا بت حرام عليك
اخوكي تعبان سيبيه يرتاح شوية

اخذتها وطلعت ولؤي انكمش على نفسه : كل ده من
بوسه يا لؤي

عطس ومسح دموعه اللي بتنزل غصب عنه : بس
انا اللي غلطان ، هي قالتلي بلاش وأنا اللي عملت
فيها سبع رجالة في بعض ، الله ياخذني بجد ، ااه يا
دماغي

على الناحية الثانية ، مروان كان قاعد في مكتبه
وبيشغل بتركيز جديد عليه وفجأة الباب اتفتح بعنف
ودخلت تمارا وهي بتزقق ووراها السكرتيرة : يا
فندم ماينفعلش تدخلني كده

تمارا راحت ناحية مروان : هو فين ؟ معاك صح ؟
هات واحده

مروان : هو ايه ؟

تمارا بزعيق : الزفت الهباب ، دماغي مش قادرة
 قعدت على الارض بوجع وفضلت تعيط ومروان
 نزل بسرعة قدامها ومسك كتافها : تمارا
 تمارا بصتله بدموع : دماغي يا مروان مش قادرة ،
 هات تذكرة من معاك دماغي هتفترتك
 مروان ضمها لصدره جامد : أنا آسف ، أنا آسف يا
 تمارا والله انا آسف كل ده بسببي أنا
 تمارا فضلت تضربه جامد على ظهره وتشد قميصه
 بوجع وهي بتعيط من كتر الصداع وهو بص
 للسكرتيرة : روجي نادي بابا بسرعة
 السكرتيرة راحت نادت عاصم اللي جه بسرعة : في
 ايه ؟

مروان : بابا ، تمارا

عاصم راح قعد جنبهم وطلع تمارا من حضن ابنه :
 تمارا مالك ؟

تمارا : اونكل ، دماغي وجعاني أوي مش قادره ،
 خلي مروان يديني تذكرة أرجوك

عاصم بص لمروان بصدمة : أنت خلتها تدمن ؟

مروان : مش قصـ ، انا ، أنا لا

عاصم أخذ تمارا وراح بيها على القصر ودخلها
اوضتها وبص لمروان : معاك زفت من اللي يتشربه

ده

مروان : أنت هتعمل ايه ؟

عاصم : هعمل ايه يعني ؟ هديهاها أكيد

مروان : لا بس ده غلط علـ

عاصم قاطعه : يعني ده غلط واللي أنت عملته ده هو
اللي ماكانش غلط عليها ؟

زعق : اتحرك

مروان راح جري على اوضته وفتح صندوق كان
في دولابه واخذ تذكره ورجع لتمارا وعطاهاها
وهي اخذتها وفضلت تهلوس لحد ما وقعت من
طولها ومروان بيصلها وقلبه بيتقطع عليها واللي
عمله فيها

عاصم : أنت عملت كده امتى ؟

مروان : من زمان من أكثر من ٨ شهور

عاصم : براقو عليك

مروان بصله بصدمة : براقو !!

عاصم : أكيد بتريق عليك ، دمرت بنت عمك براقو
عليك يا بيه

أخذ بعضه ومشى ومروان قلبه مش مرتاح نبرة ،
صوت باباه أول مرة قال فيها براقو كانت سعادة هو
متأكد انه سمع شبه ضحكه وشماته في صوته طيب
ليه ؟

قطع تفكيره صوت تمارا اللي بتئن وهي بتقلب في
نومها ، راح قعد على الارض جنبها وببص عليها ،
بص على التسريحة جنبه واخذ من عليها مناديل
ومسح وشها من الميكاب واتصدم من منظرها ، دي
مش تمارا ابدأ ، وشها شاحب وشفافها باهته وتحت
عينيها أسود ، نزل عينييه وبص لجسمها اللي نزل
النص تقريبا ومسك ايدها اللي كانت بارده جدا
وبتعرق وترتحف في نفس الوقت ، كان شكلها مدمنه
فعلا

دمعه من عينه نزلت غصب عنه : أنا آسف ، آسف
والله سامحيني ، أنا آسف

حط دماغه على ايده وببيكي وهو بيعترف قدام نفسه
إنه بيحبها فعلا ومش عارف يتصرف إزاي في اللي
هو عمله ده ، هو ليه عمل كده أصلا هي للدرجة دي

غيرته من آدم تخلية يعمل جريمة زي دي ؟ عشان
 كان عايز يبعد عنه كل اللي بيحبوه زي ما هو
 مافيش حد حوليه بيحبه دمر واحده في النص
 بينهم

تمارا بتتقلب بضيق وبتمتم باسم مروان وهي نايمه
 ومروان خلاص هيتجنن ومابقاش قادر يستحمل أكثر
 ، سابها وراح اوضته بص على الصندوق اللي فيه
 البودرة وراح مسكه بغل وهبده في الحيطه وفضل
 يمسك في الكياس الصغيرة ويقطع فيها ويرمي
 البودرة على الارض ويدوس عليها ويزعق : أنا
 السبب أنا السبب

قعد على الارض وفضل يخبط بإيديه جامد عليها
 وحط دماغه على الارض بين دراعاته : يارب أعمل
 ايه دلوقتي انا ؟ اتصرف إزاي ؟ يا رب أنا عارف
 أنى حد وحش جدا بس أرجوك ماتسبينيش ، أرجوك
 ساعدني

الليلة دي كانت أطول ليلة عدت على مروان ، قلبه
 مجروح وبينزف وعقله واقف مش عارف يفكر
 وضميرة بيجلد فيه وهيموت من تأنيبه ، اللي حصل

حرفيا كان قلم شديد اخذه فوقه من حاجات كثيره كان
غافل عنها وفضل يعيط بقهر على اللي عمله لحد
الصبح

عدت الشهور و آدم وسولاف خلصوا كل تجهيزات
فرحهم توافقا معاها سولاف خلصت جلسات العلاج
النفسي اللي كانت بتاخذها عشان تتخلص من
ماضيها المرعب وخوفها الزايد

آدم أعلن عن الفرح قدام الصحافة اللي اتفاجئوا
بالخبر ده وكمان عيلته اللي اتصدموا وماكانوش
متوقعين ده ابدا وكانوا هيتجننوا من آدم

آدم واقف في اوضته في الفندق اللي كان قاعد فيه
بقاله فترة بدل شقته اللي بتتعدل ، خلص لبس وواقف
قدام المرايا بيضبط اللمسات الأخيرة وجسار قاعد
وراه بيراقبه بصمت
آدم : هااا حلو كده ؟

جسار ساكت و آدم بصله : في ايه يا جسار مالك بجد
 أنت بقالك فترة غريب أوي ؟

جسار قام وراح يعدله الكرافت : حاسس بحاجة
 غريبه أوي

آدم : ايه هي ؟

جسار بجدية : أنت عارف طبعا إني يتيم ومن ساعة
 ما كان عندي ١٩ سنة وأنا ماعرفش حد غيرك لما
 اخدتنى من الشارع واعتبرتنى أخوك ، أنت عيلتي
 الوحيدة يا آدم ، طول عمرنا كنا مع بعض في كل
 حاجة ، ودلوقتي حاسس إنك هتبعد واوي كمان ،

ح

سكت شويه بينظم أنفاسه وصوته اللي بدأ يرتجف
 ودموعه بدأت تلمع في عينيه : حاسس أنى هفقد آخر
 فرد في عيلتي وهرجع يتيم من تاني

آدم : أنت بتقول ايه بس ؟ أنا وأنت أخوات وهنفضل
 طول الوقت كده مهما يجرى ، مش معنى ان كل
 واحد بقى عايش لوحده في بيت يبقى كده اخوتنا
 انتهت ، مالهاش علاقة خالص ، الاخوة روابط
 معنوية مش بيوت واوض يا جسار

جسار حظ ايدہ على رقبتہ باحراج وأبتسم : أعذرني
يا صاحبي أنا بس أول مره أعدى بوقف زي ده
ومش عارف اتصرف

آدم ضحك وفضنه : حبيبي يا جسار والله

جسار مسح دموعه بسرعه وأبتسم وطبطب على
ظهره : ربنا يسعدك ياخويا ، أنت شوفت كتير اوي
في حياتك وانا حقيقي بتمنالک السعادة وراحة البال
مع سولاف وتعوضك عن كل اللي فات

آدم : آمين ، وعقبالک يا حبيبي

جسار ضحك : ايوه طبعا عقبالي ، أنت فكرك عشان
الكلمتين اللي قولتهم بعمق من شوية دول هنسى
الموضوع ولا ايه ؟ لاااا ده أنا اطربق الدنيا فوق
دماغكم لو ماجوزتنيش أنا كمان

آدم ضحك واخذه تحت دراعه : أنت يالا ايه منشار
طالع واكل نازل واكل ؟

جسار بيخبط على ظهره : يالا هتخنقني يادي النيله
عليا

آدم سابه وراح يعدل بدلته تاني وهو راح وقف وراه
: يعني مش هتجوزني أنا كمان ؟

آدم بضحك : ربنا يهديك يا جسار ، دور أنت بس
على عروسه وهجوز هالك من بكره

الباب خبط ودخلت دولت : ابني ، ونور عيني ، بسم
الله الله أكبر عليك ، ايه الجمال ده كله ؟

آدم وقف قدامها كأنه عارض أزياء : جامد مش كده
؟ انتوا هتلاقوا زيي فين بس ؟

دولت راحت حضنته جامد : أكيد مش هنلاقي زيك
يا حبيبي ، ربنا يفرح قلبك يا بني ويجعل ايامك كلها
هنا وبهجه

آدم باس جبينها وضمها : حبيبتى يا دولى ربنا
بياركلى فيكى

دخلت لوجين هي كمان ومعاها لؤي : ابيه
آدم : حبيبة قلب ابيه من جوه

لوجين حضنته : ألف مبروك يا ابيه ربنا يسعدك

آدم : حبيبتى الله يبارك فيكى وعقبالك يا قمر لما
أشوفك كده فراشه بالافستان الأبيض

لؤي : قريب ان شاء الله ، كلها أيام وأخلص الشقه

آدم هز دماغه بفهم وراح سلم عليه هو كمان وهمس
: أنا هبقى مختفي الفترة الاخيرة دي معلش ، لوجين
أمانه في رقبتك مش هوصيك

لؤي : ماتقلش مش محتاج حد يوصيني عليها
آدم أبتسم وهز دماغه بفهم وبصلهم: الا العروسة فين
يا ولاد؟

دولت : في السويت بتاعها ، بس اتقل أنت شوية كده
آدم : اتقل ده ايه لالا أنا مش بتاع تقل خالص ،
ابغاها الحين

خرج من الاوضة رايحها وكلهم بيضحكوا عليه

على الناحية الثانية

سولاف واقفه قدام مرايتها وبتبص لنفسها بتقيم بعد
ماخلصت تجهيز ، فستانها كان رقيق ومنفوش حاجة
بسيطة - واللي تعمدت يكون كده عشان مايبقاش زي
فستانها الأول الكبير وكمان كان عاجب آدم جدا -
طرحتها البسيطة وفوقها طرحة الفستان الرقيقة ،
والهيلز الشيك

هند : البدر في ليلة تمامه ، الله أكبر عليكي

سولاف لفت حولين نفسها وفتحت دراعتها : بجد
حلو ؟

هند مسكت ايديها : ملكة ، أنتى بجد ملكة يا سولاف

سولاف حضنتها جامد : ربنا يديمك ليا يا ماما

هند دموعها نزلت : ويديمك ليا يا قلب ماما ، ربنا
يفرح قلبك يا حبيبتى وتعيشي الهنا مع آدم

سولاف : يارب

الباب خبط وكان آدم

سولاف وقفت مكانها و عطت ظهرها للباب بتوتر

وهي حاطه ايديها على قلبها وهو دخل : السلام

عليكم أهل الديار من المؤمنين

هند برقت جامد : في ايه يا ولا أنت داخل مقابر ؟

آدم ضحك : ردي السلام حتى يا ست

هند : و عليكم السلام ورحمة الله وبركاته

آدم : حلو كده وبعدين انتوا اتأخرتوا أوي قولت ماتوا

دول ولا ايه وجيت آشوف ، أين عروستي ؟

هند : قدامك أهى

آدم بص عليها بحب ، ومشى بوقار لحد عندها
ووقف قدامها : بصيلي واسمحيلي انهل من نورك يا
شمس حياتي

سولاف رفعت وشها وبصتله بحب وعيونها بتلمع
بسعادة ودموع

وهو ميل على ايدها برقي وباسها كأنها أميرة ومد
ايده بالورد وأبتسم ابتسامته الجميلة : الورد _____
للورد

سولاف أبتسمت واخذت الورده من ايده وهو حضنها
جامد ولف بيها كثير ونزلها وهمس جنب ودنها :
زي القمر ربنا يحفظك

سولاف باست كتفه : أنا بحبك يا آدم

آدم : وآدم مش بيحب غيرك

بعد السلامات والاحضان آدم أخذ عروسته وركب
عربيته اللي كانت متزينه بالورد وراحوا مكان
القاعة اللي سولاف ماتعرفش هي فين لحد دلوقتي ،
وصلوا وجسار وقف وهما نزلوا وآدم حاطت ايده
على عين سولاف

سولاف : هااا ؟

آدم شال ايده : يلا فتحي

سولاف فتحت وبصت للقاعة بانبهار وبصتله بحب :
كل ده عشاني ؟

آدم أبتسم : ولسه ، أنا مهما أعمل مش هوفيكى
مقامك

سولاف حضنت دراعه جامد بحب ورفعت ايده
باست بطنها : تسلملى ايدك يا حبيبي

آدم أبتسم والاتنين بصوا على القاعة قدامهم واللى
كانت على البحر ، آدم كان عارف ان سولاف بتحب
البحر فقرر يعمل الفرحة هناك على الرمل ، وكان
المكان متزين بالورد والستائر الشيفون البيضاء
والكراسى المحطوطة بنظام ومرتزينه بشياكة اوى
والأنوار اللى شغاله بتضيف جو لطيف للمكان مع
خلفية البحر وقت العصر والسما مائلة للون الأحمر
اللى بيتداخل مع زرقة البحر فى منظر بديع جدا

الصحافة وقفوا بنظام يصوروا الأحداث بهدوء و آدم
ماسك ايد حبيبته وماشي على السجادة البيضاء

المتزينه بالورد الأحمر عليها من أول عربيته لحد
الكوشة الفاخرة بتاعتهم ، وعلى طول السجادة من
الجانبين سلاسل من الورد المختلف

.

قعدوا وسولاف بتبص لكل حاجة حوليها ومنبهرة
بشياكة وفخامة المكان ورقة آدم وذوقه الرفيع في
التنظيم واختيار الديكورات ، بصت على المعازيم ،
كل صاحبها من طنطا وحبايها موجودين ، كانت
مبسوطة أوي والفرحة مش سيعاها وكل أما تشوف
حاجة تفرحها أكثر تحضن دراع آدم أكثر كأنها
بتشكرة أوي على كل حاجة

آدم : ها قوليلي عجبك ذوقي ؟

سولاف بتسرع : مش ذوقك بس أنت كلك على
بعضك عاجبني

آدم ضحك وهمس : أنا بقول نسيب المعازيم هنا
ياخدوا بالهم من الفرحة واحنا نروح نخطفلنا ساعتين
على السريع كده ونرجع تاني

سولاف : آدم بطل قلة أدب بقي

آدم ضحك : وهو انتى لسه شوفتى قلة أدب ؟ ده أنا
يابنتي واحد ماشافش بربع جنيه تربية أصلا وكل ده
هيطلع عليكى أنتى بس اتكى على الصبر شوية

سولاف باحراج : آدم بقى

آدم ضحك وباس ايديها : قلب آدم من جوا

سولاف : أنا ممكن أعمل حاجة وماتزعلش منى ؟

آدم : ايه ده عايزة تقومي ترقصي ولا ايه ؟ أكيد
طبعا هزعل

سولاف : لا مش هرقص وبعدين أنا مش برقص
قدام الناس

آدم بهمس : بس ترقصي قدامي عادي

سولاف بصتله بكسوف وهو بمشاغبه : ده حقي وأنا
ماتعودتش اسيب حقي ابدا

سولاف : يعني ايه ؟

آدم همس : يعني هترقصيلي يا حلوة ومافيهاش
جدال

سولاف اتكسفت وهو ضحك : قولي قولي عايزة
تعلمي ايه

سولاف رفعت ايدها بتردد على وشه وبتشيل النظارة
السودا من على عينيه بهدوء وبهمس : شيل دي
النهارده

آدم كشر ومسك النظارة : لا يا سولاف بعد إذنك ،
كله الا دي مش هقدر

سولاف بنفس الهمس بس بصوت انعم : أنا قررت
اواجه نفسي وماضيا يا آدم وروحت لدكتور نفسي
رغم رفضي عشان خاطرك ، اتعالجت نسبيا ولسه
بحاول اكثر عشان ماحرمكش من حقوقك كزوج
رغم خوفي وكل ده عشانك أنت ، أنت كمان لازم
تواجه ، أنت لا ناقص ولا معيوب عشان تخبي
نفسك كده ورا النظارة، حبيبي آدم الراجل الواثق من
نفسه مش الندبة دي هي اللي هتضعفه

آدم : وعيني ؟ عيني مش طبيعية يا سولاف ، باهته
وبطيئة ومش زي أختها

سولاف : بحبها زي ما هي واسمها فاتحه شوية مش
باهته عينيك الاتنين أجمل من بعض يا آدم واحده
بني والتانية عسلي رقيق هو في احلى من كده ؟
وبعدين حركتها مش متلاحظة على فكرة أنت بس
عشان بتبص لنفسك في المرايا من قريب فبتشوفها

صدقني أنا أول مره شوفت عينيك ماخذتش بالي ابدأ
منها وماعرفتش إن فيها حاجة أصلاً غير لما ماما
هند قالتلي على اللي فيها

كشرت بطفولة : وبعدين أنا بس اللي مسموحه
يبصلك من قريب أوي كده ويتغزل في عيونك

آدم أبتسملها بحب وهي رفعت ايدها تاني بتردد
وبتبصله باستفهام وهو ماقدرش يقاومها أكثر ،
هيقاومها إزاي وهي كل تفصييلة فيها بتهد اسوار
دفاعه وبتوقع حصون قلبه قدامها وبيقعد منهزم في
حربها الناعمة عليه

آدم غمض عينيه وهمس : شيليا

سولاف : أوعى تكون مجبر ، أنا مش بجبرك أنا
بدعمك يا آدم لازم تفهم ده

آدم : فاهم يا كياني شيليا ماتقلقيش

سولاف شالت النظارة من على عينيه بهدوء تحت
استغراب المعازيم اللي عمرهم ما شافوا عيون آدم
ابدأ والصحافة بتصور اللحظة التاريخية دي

آدم مغمض عينيه وسولاف بتبصله : مش مرتاح ؟
ارجعها تاني ؟

آدم ضغط على ايدها : لا بس خليكي قدامي ، خليكي
أول حد عيني تقع عليه لما افتح ، خليني أشوفك
عشان قلبي يهدى

سولاف ضغطت على ايده جامد بدعم : فتح يا حبيبي
وأنا هفضل طول الوقت قدام عينيك

آدم فتح عينيه بتردد لحد ماتسحب بجمال سولاف
وعيونها اللي خطفته من العالم خالص

سولاف أبتسمت : قمر مش كده ؟ عارفه والله أصل
بابا كان وسيم أوي وأنا واخده ملامحه كلها

آدم ضحك بصوت عالي لأنها بتردد كلامه ليها
زمان وباس ايديها : قمر واحلى من القمر كمان

رفع عينيه وبص حوليه بهدوء وبيبص لملامح الناس
وردت فعلهم المندهشة

سولاف : أنا بقول تلبس النضارة تاني يا آدم البنات
هياكلوك بعينيهم

آدم ضحك : غير انه يا قطه ؟

سولاف بغیظ : اه غیر انه ، أنت حبيبي أنا

آدم رفع طرحة الفستان ونزلها على وشها : وأنتي
حبيبي أنا وأنا بقي مش غيران لا أنا جوايا حريقة
وحرب في قلبي من الرجالة اللي عمالين يبصوك
دول وهقوم اشيلهم عيونهم دي من مكانها خالص
عشان يتلموا

سولاف ضحكت : أنا مايملاش عيني غيرك أنت

آدم : ولا أنا ، الوحيدة اللي تملأ عيني هي أنتي يا
أرق ورده في حياتي

قاطع كلامهم دولت اللي قربت من آدم وفي ايديها
علبة قطيفة كبيره وآدم بصلها وأبتسم : حبيبي اللي
واخذ باله مني

دولت : قولتك هتنساها

آدم : مش ناسي والله بس كنت مستنيكي

دولت عطته العلبة : وادينى جيت يا سيدي ، يلا لبس
عروستك شبكتها

سولاف بصتلهم باستفهام : شبكة ايه ؟

آدم بصلها بحب : شبكتك يا قمر ولا أنتي مفكره أنى
هتجوزك من غير شبكة يعني ؟

سولاف بإحراج : أنا بس اتفاجئت ، أنت ماجبتليش
سيرة عن الموضوع خالص
آدم وهو بيفتح العلبة : كنت عاملهاك مفاجأة

سولاف بصت للعلبة بذهول ، كان فيها طقم ألماس
رقيق جدا بس باين عليه الفخامة ، بصت لآدم
بصدمة : ليه كل ده ؟ كثير أوي

دولت هي اللي ردت بابتسامة : مافيش حاجة تكثر
عليكي يا ست البنات ، دي حاجة بسيطة تلبسيها
دلوقتي وباقي شبكتك في بيتك

سولاف بصت لدولت بذهول ورجعت بصت لآدم :
أنت جايب حاجة غير ده كمان ؟

آدم أبتسم بهدوء : ولو أطول اجيبك كنوز الأرض
تحت رجلكي مش هتردد

سولاف كانت بتبصله بمشاعر متلخبطه ، ذهول من
اللى بيعمله وكمية الحاجات اللي جايبها دي وحب
وسعاده إنه بيهتم بادق تفاصيلها ودايما بيختارلها
أجمل حاجة في الدنيا

هند دخلت معاهم في الحوار عشان تلتف الجو
شوية و آدم لبس سولاف شبكتها بلمسات حنينه عليها
تحت نظرات كل الضيوف اللي منهم بيبصلهم بحب
وسعادة ومنهم الحاقد والحاسد والغيران
بعدها آدم طلع من جيبه علبة تانية صغيرة بس شيك
أوي بطريقة تخطف العين وفتحها بحب : الدبل

سولاف بصت عليهم ومن أول نظرة حبتهم ، كانوا
شبه بعض بالظبط مع اختلاف المعدن ومنقوش
عليهم حروفهم S♡A

آدم مسك دبلة و عطهاها وهي مسكت ايده برقة
ولبسته الدبله بحب وهي بتضغط على ايده كأنها
بتقوله خلاص بقيت ملكي وده الدليل

وهو مسك دبلة ولبسها وهو بيستمع بلمس ايدها
الناعمه ورفع ايدها باسها بحب وهمس : بحبك

«طيب بيتهيا لي بقى كده السناجل جالهم حموضة
فكفاية علينا البارت ده ونكمل البارت الجاي باذن
الله»

اتختم الفرح مع الرقصة السلو تحت ضوء القمر
والنجوم اللي بيتخلله ضوء ضعيف جدا من الانوار
المتعلقة بيضيف للجو رُقِيّ وهدوء

آدم بهمس : عارفه حاجه

سولاف : اممم ؟

آدم : عارفه أنا بفكر في ايه دلوقتي ؟

سولاف : بتفكر في ايه ؟

آدم : بفكر ابوسك هنا ودلوقتي وفورا

سولاف دفنت وشها في كتفه : بوس يا قلبي وريني
هتبوس ايه بقى

آدم ضحك : شرسه أوي انتى وأنا أموت في الشرس
ده

سولاف خبطته على كتفه وهو ضحك : بس مش
مشكله ، كلها نص ساعة ونبقى لوحدنا وهبوس لحد
ماشبع يا حبييتي

سولاف أبتسمت بحب وسكتت وهي بتتحرك مع
خطوات آدم الهادية بتناغم مع نسمة هوا البحر
الرقيقة وبخطوات ناعمه على الرملة تحت رجليهم

بعد ما قرروا يسيبوا الاستيدج ويرقصوا بعيد عن
المعازيم على الرمل برجليهم حافيين

وفي آخر الرقصة آدم شال سولاف من وسطها ولف
بيها كثير بيعبر عن سعادته وكأنه طير فارد جناحاته
بحرية ويستقبل الحياة بنفس راضية ويقول للعالم
كله دي حبييتي ، دي كُلي التانى

وسولاف دراعتها حولين رقبتة متعلقه بحضنه جامد
كأنها في فضاء واسع وهو سندها الوحيد فيه ،
الكوكب اللي بتدور حولين منه وهي متأكده أنه
هيفضل ضاممها لحضته ومش هيسيبها تخرج بره
مداره ابدأ

خلص الفرح وسولاف سلمت على كل صحباتها اللي
كانوا وحشينها أوي ووقفت قدام سارة اللي واقفه
قدامها باحراج

سولاف مدت ايديها ليها : مش هتسلمي عليا ؟ مش
كفاية روحتي اتجوزتي أبو عيون خضرا من غير
مابقى معاكي

سارة بصتلها بدموع واطرمت في حضنها : حبييتي يا
سولاف حقاك عليا يا قلبي

سولاف حضنتها جامد أوي : بلاش نفتح في الدفاتر
القديمة يا سارة ، أنتى اختى مهما يحصل و عمري
ماز عل منك

سارة بعدت عنها وباستها في خدها : وانتى اختى
وحبيبتى اللي ماجابتهاش أمي

سولاف أبتسمت وحطت ايدها على بطن سارة
الكبيرة : حبيب خالتو ده

سارة بحب : ده سليم ، لقيت ده اقرب اسم ليكي
فحبيت اسمي بيه

سولاف أبتسمت بحب وهي يتمسد برقة على بطنها
عشان ماتوجعهاش : سولي حبيب خالتو ، ربنا
يهنيكم بيه ويجعله الذرية الصالحة ليكم

سارة : اللهم أمين وربنا يرزقك أنتى كمان ، يلا بقى
أحسن أعمل زي بطلات الروايات اللي بيجوا في
آخر الرواية ويولدوا في فرح صحباتهم

سولاف ضحكت : عرفاكي قادره وتعملها ، يلا مع
السلامة يا حبيبتى

سلمت على باقى صحباتها وكمان سلمت على معاذ
بس المرة دي آدم هو اللي كان بيهزر معاه وهي

واقفة بتبص عليهم وهي مبتسمة بسعادة على زوجها
اللطيف ده

وآدم سلم على كل قرأيه لوجين ولؤي وكارما اللي
نزلتله مخصوص واياس وهند طبعا ودولت وراح
وقف قدام ثلاثي الشر وأبتسم بسماجة : متشكر على
حضوركم اللطيف أتمنى تكونوا استمتعتموا في الفرح

سلم عليهم عشان الصحافة وهما نفسهم يقتلوه بس
سكتوا وجاروه غصب عنهم عشان الصحافة برضه

بعد ماخلصوا سلام على كل الموجودين جبار
أخذهم في العربية وساق ناحية البيت وهو بيخمس
بالعربية وبيزفهم ورجالته ماشين وراه وعاملين حفلة
بزمامير العربيات واللي قاعدين على الشبايبك
وبيلعبوا بالشماريخ ويصفروا والموتوسيكلات اللي
بتلف بتهور حوليهم

سولاف : مش غلط كده اللي هما بيعملوه ده ؟
آدم : اه طبعا غلط وماينفعلش بس نعمل ايه العيال
دول متخلفين أصلا

جسار : سامعك يا حلو أنت ، تحب اوريك التخلف
على اصوله

آدم ضحك : لا متشكر اوي ، أنا عايز أدخل دنيا الله
يخليك مش اخرج منها

جسار ضحك : ماشي يا عم

سولاف ضحكت وفضلوا كلهم يهزروا لحد ما
وصلوا البيت وطلعوا ، جسار واتنين كمان طلعا
وراهم لحد باب الشقة

جسار : لحد هنا دورنا خلص

آدم : تسلم يا حبيبي

جسار: أنا جبت شقة بعدك بعمار تين منين ماتعوزني
رن عليا هتلاقيني قدامك

آدم طبطب على كتفه : ماتحرمش منك ابدا ياخويا

جسار هز دماغه : الرجالة دول هيفضلوا هنا قدام
الأسانسير ، أنا يمكن رضيت أنى أمشي من هنا بس
مش هرضى ابدا أرفع الحراسة من عليك

آدم : ولا حتى النهارده ؟

جسار بحزن : للاسف ده هو النهارده أكثر يوم لازم
حراسة فيه إحنا مش ضامنين الظروف ولا النفوس

المريضة اللي ممكن تستغل أى فرصة عشان تكسر
فرحتكم

آدم هز دماغه بفهم وسلم عليه واخد سولاف ودخل
الشقة وقفل الباب وراه

جسار : عينيكم دي ماتغفلش لحظة ، حياتكم قصاد
حياتهم انتوا فاهمين ؟

الرجالة : فاهمين يا باشا

جسار أخذ بعضه ونزل بس ماقدرش يمشى وراح
قعد على الكورنيش قصاد عمارة آدم وهو سرحان
في السما والنجوم

.

على الناحية الثانية سولاف حاطه ايديها على عينين
آدم واخذته لحد اوضة النوم : يلا فتح

آدم فتح وبص على الأوضة بانبهار : دي الأوضة
اللي كانت بتاعتي قبل كده ؟

سولاف ضحكت : اه هي

آدم بصلها : عملتها إزاي يا اوزعه ؟

سولاف : وهو أنا أي حد ولا ايه ؟

آدم : الا أنتى مين صحيح ؟

سولاف ضحكت : حبيبتك ومراتك وكيانك

آدم ضحك وعضنها جامد : حبيبتي ومراتي وكياني

.

الأوضة كانت عبارة عن لوحة فنية فعلا ، الأثاث
المودرن الرقيق جدا بألوان هادية والسرير عليه
مفرش أبيض فخم ومرتزين بالورد على شكل قلبين
داخليين في حضان بعض مع الشموع الالكترونية
والعطرية اللي عاطية جو قمة في الرومانسيه
والهدوء

آدم وسولاف راحوا غيروا لبسهم واتوضوا وصلوا
ركعتين وبعدها آدم راح قعد قدام سولاف وحط ايده
على جبينها ودعالتها بالصلاح وبعد ما خلص أبتسم
ومسك ايديها : تسمحيلى أخذ هدنه من العالم كله في
حضانك هنا ؟ تسمحيلى أنسى نفسي معاكي ولو ليوم
واحد ؟ تسمحيلى أغرق في عشقك بعيد عن العالم
باللي فيه

سولاف أبتسمت وهزت دماغها بتوتر وخجل محبب
لقلبه وهو وقف وشالها وحطها على السرير بهدوء
وبدأوا ليلتهم المميزة وآدم بيسرد بافعالة أبيات

شعرية بتوصف حبة اللامتناهي ليها وبيقص عليها
 قصة العاشق اللي اخيرا حاسس أنه ملك الدنيا
 بحبييته اللي بين ايديه ، وبيسطر لسولاف معنى
 الزواج الحقيقي بحنيته وهدوءه

بعد مده سولاف كانت نايمه بعمق في حضن آدم اللي
 عمال يبصلها ويتأمل ملامح وشها كأنه عايز يحفر
 كل تفاصيلها جوا عقله وهو مش مصدق إنه اخيرا
 اتجوزها ، اخيرا بقت بين ايديه وحلاله

حرك صوابعه على خدها الناعم وباس كتفها بحب،
 اخدها في حضنه تانى ودفن نفسه هو في حضنها
 وغمض عينيه اخيرا بيسمح لنفسه ينام ، بعد تعب
 سنين كتيره اخيرا حس بالسكون في حضن حبييته

تمارا صحيت الصبح في نفس المكان اللي بقالها كذا
 شهر فيه ، اوضة بسيطة وهادية ، الباب خبط ودخل
 مروان بتردد : صاحية ؟

تمارا بصتله بصمت وهو دخل وقفل الباب وراح قعد
على الكرسي قصادها : لسه برضه مش عايزة
تتكلمي معايا ؟

تمارا مش بترد وهو : حقا ، أنا آسف أنا فعلا اللي
عملت فيكي كل ده وبدون سبب مقنع ، مش هزر عل
لو ماسامحتنيش بس ماتسكتنيش كده أنا بقالي شهر
كامل ماسمعتش صوتك

تمارا لسه ساكته وهو اتنهد بتعب وهو بيفتكر اللي
حصل ال ٣ شهور اللي عدوا

بعد اليوم اللي تمارا انهارت فيه البيت كله عرف عن
اللي حصل وقرروا يدخلوها مصحة للادمان وده
اللي حصل فعلا وبشكل سري جدا بعد اعتراضها
لدرجة إنهم استخدموا معاها القوة وودوها غصب
عنها

في بداية رحلة علاجها كانت في حالة من الثورة
والجنون والانفعال وكانت كل أما تشوف مروان
تنهار وتعيط وتضرب فيه وتصرخ بانته السبب ،
وهو مش بيقدر ينطق قصادها وبيقبل ثورتها عليه
وضربها ليه بقلب مكسور ، وبعد ما بدأت تتحسن

وتهدى بطلت تكلمه نهائي كأنها بتعاقبه بحرمانه من
صوتها

قطع سرحانه خبط الباب ودخل الدكتور المسؤول
عن حالة تمارا : إزيك يا انسه تمارا ؟

تمارا بصتله وأبتسمت وهو شاف التقرير بتاعها : لا
ده إحنا اتحسنا خالص ونقدر نمشي قريب

مروان فضل باصصلها على امل إنها ترد على
الدكتور بس هي حطمت أمله ده بسكوتها

مسعد بص لمروان : ممكن حضرتك تتفضل ،
الزيارة خلصت والأنسة لازم ترتاح

مروان كان عايز يثور ويغضب ويقوله وأنت مالك
بيها بس هو كمان مالهوش الحق في ده وبسكوتها
هي كمان بتلغي أي حق ليه

أخذ بعضه ومشى وقبل ما يطلع من الباب بصلها : أنا
هاجي تاني يا تمارا ، أتمنى تكوني بخير لحد الوقت

ده

خرج من الأوضة بجسمه بس وساب روحه وقلبه
معاها جوه وهي بمجرد ما قفل الباب قعدت تعيط

ومسعد قعد قصادها : لما أنتى بتحبيه كده بتعملي كل
ده ليه ؟

تمارا : عشان بحبه برضه ، بحبه وبعمل كده عشان
بحبه

مسعد : وهو كمان بيحبك

تمارا : ماحصلش ، مروان بيتسلى بيا زي زي كثير
بنات ، مروان ده بيغير في البنات كأنهم شرباته ولما
يقدم الشراب يرميه ويجيب غيره ، وأنا كنت واحده
من البنات دول وهو قالهالي في وشي

مسعد : بس اللي أنا شايفه غير كده ، أنا شايف شاب
اهلكته نار حب حبيته بس مش قادر يعترف بسبب
اللي عمله فيها

تمارا هزت دماغها برفض وهو : تحبي اثبتلك ؟

تمارا بصتله بأمل : إزاي ؟

مسعد أبتسم : انتي هتخرجي ان شاء الله الإسبوع
الجاي وأنا هبلغه يجي ياخدك والباقي هتشوفيه قدام
عينيك ، مابقاش أنا مسعد لو ماخلتهوش يعترفلك
قدام الخلق إنه بيحبك

تمارا عينيها لمعت بامل وهو : تعرفي ان سبوع
بنتي كمان يومين ؟

تمارا : بجد يا مسعد ؟

مسعد : بجد أوي ، سميتها تمارا

تمارا دموعها نزلت : أنا ماستحقش ده

مسعد : أكيد تستحقي ، أنتي ماكنتيش مجرد حالة
بعالجها أنتي كنتي زي اختي الصغيرة وليا الشرف
ان بنتي تكون على اسمك

تمارا : بس انا بجد حد وحش اوي

مسعد : أكبر دليل إنك من جواكي نضيف إنك
معترفه إنك وحشه ، شايفه غلطاتك ومعترفه بيها ،
أنتي مش وحشه يا تمارا أنتي بس متربه شوية من
اللي حوليكي ، محتاجة بس تشيلي التراب ده وهتبقى
زي الفل

عدى شوية وقت وهما بيتكلموا وبعدها مسعد راح
يكمل شغله وساب تمارا سرحانه في كلامه

على وقت الظهر سولاف صحيت من النوم وبتتقلب
براحه شافت آدم اللي نايم بهدوء جنبها ، أبتسمت
بحب وعدلت نومتها وفضلت تبصله وتتأمل ملامحه
اللى باين عليهم الراحة والسلام

مدت ايدها ومشتها بخفه على دقنه وبعدها مشت
اطراف صوابها على الندبه في عينه ، واتجرات
شوية وقربت منه باسته جنب شفايفه
وبتبع لفته ببصلها وهو مبتسم : ايه الرقة دي كلها
؟

سولاف بكسوف : أنا صحيتك ؟

آدم : للأمانة اه بس لو ده اللي هصحى عليه فاهلا
بالصحيان

سولاف أبتسمت بحب : صباح الخير يا حبيبي
آدم اخدها في حضنه وباس رقبتها : صباح النور يا
قلب حبيبك

أخذ نفس طويل من ريحتها اللي ادمنها وبيتكلم وهو
دافن وشه في كتفها ومغمض عينيه : الظهر أذن ؟

سولاف : اه لسه من شوية

آدم : ماشي

سكت شويه : قومي يلا

سولاف : طيب ماتقوم أنت الأول

آدم : لا مش هينفع

سولاف : ليه ؟

آدم : عشان لو اتحركت دلوقتي مش هقدر امنع نفسي عنك ، خرينا نصلي الأول وبعدها نعمل اللي إحنا عايزينه

سولاف لو هله افتكرت حسام وإن عمرها ما شافته بيصلي أو بيخاف على الصلاة ، أبتسمت برضا من زوجها : طيب سييني ، أنت مكتفني كده ليه ؟

آدم : خايف تضيعي من بين ايدي

سولاف حضنته جامد : ماتخافش أنا هفضل معاك ومش هضيع منك بإذن الله ، مهما يحصل خليك عارف أني دايمًا هتمسك بيك زي مانت ماتمسكت بيا وعمرى ما هسيب ايدك في يوم

آدم باس كتفها : بإذن الله يا حبي ، قومي يلا

سولاف قامت بهدوء وسابته ينام تاني ، اخدت هدومها ودخلت الحمام ، وقفت قدام المرايا وبصت لوشها وجسمها وكانت مش مصدقه نفسها ، وشها

اتردتله الحياة تاني مابقاش باهت ومرهق زي زمان
 ، وكانت مش قادرة تصدق إنها قامت من السرير
 وجسمها شكله طبيعي كده ومافيهوش كدمات
 وجروح وعلامات زرقا من الضرب

اتنهدت براحة واخذت شاور سريع وطلعت لقت آدم
 لسه نايم كأنه أول مره ينام في حياته ، كان مستكين
 ومطمئن ومرتاح

راحت قعدت جنبه وبدأت تصحية بهدوء : آدم ،
 حبيبي اصحى

آدم لف دراعه حولين وسطها وكمل نوم وهي بتلعب
 فى شعره : دومي ، الصلاة يا حبيبي

آدم بنوم : قايم أهو حاضر

فضل مكانه شوية لحد ماقام بتكاسل

سولاف : كل ده نوم ؟

آدم أبتسم : حضنك أمان أوي ودافي

سولاف أبتسمت : طيب قوم صلي وتعالا كمل نوم

آدم هز دماغه بموافقة وبصلها بإعجاب ولسه بيقرّب
 منها حطت ايديها على صدره العريان : مش قولت

هنصلي الأول !

آدم بتذمر : ولا حتى بوسه بريئة ؟

سولاف : ماينفعش أنا اتوضيت خلاص ماتبوظلش
الوضوء بقى

قامت وقفت : وبعدين أنت واحد أبعد ما يكون عن
البرائة أساسا ، قال بوسه بريئة

آدم ضحك : أنا قايلك من الأول على فكره أنى ___

قطعت كلامه بغیظ طفولي : قليل الأدب

آدم ضحك بكل صوته وهي بتتأمل فيه بحب وهو
غمز : أضعف أنا كده قدام النظرات دي

سولاف أبتسمت وراحت ناحية أوضة اللبس عشان
تلبس اسدالها وهو قام دخل الحمام ، بص لوشه في
المرايا : معقوله يا آدم ، معقوله دي مراتك بجد
؟؟

أبتسم بسعادة ورضا وراح ياخذ شاور سريع وهو
بيغني

"

ولا حد الدنيا جميلة في عنيه ايوه بجد زي تلاقيه

مش سايعه الدنيا يابخت عنيا وأنا ويايا زوجتى

خلاص

دي خلاص صفيالي الدنيا يا بيه
 مش عارف أنا مالي حصلي أنا ايه
 ده انا هنسى الدنيا دي دي الحنية اللي في عيونها وده
 الاحساس

وازای أنا اداري حبي يا ناس
 ماهي بير اسراري واغلى الناس
 دي نصيبي بجد وقلبي اتخض في يوم ما شاف
 عينيها وبص
 صار قلبي في ايدها ده أنا حسيت ده هو جمالها اللي
 اتمنيت
 قلبي أنا مخطوف راح ليها ملهوف مش عايز غيرها
 هي وبس

"

خلص وطلع صلى كانت سولاف خلصت صلا
 ورتبت السرير تاني ولمت الهدوم اللي في كل مكان
 وقعدت على التسريحة تنشف شعرها وهو راح
 حضنها من ظهرها : شمسي

سولاف أبتسمت : اقوم اعملك فطار ولا هتكمل نوم ؟

آدم : لا أنا فوقت خلاص تعالي ناكل

سولاف هزت دماغها بموافقة وحت تلم شعرها هو فك ايديها : سيبيه مفروود شكله حلو

سولاف بتذمر : لا مش بحبه مفكوك

آدم حط صوابعه في شعرها : مش ده كيرلي برضه ؟ أنا بحبه كده سيبيه

سولاف رفعت دماغها سندتها على صدره وبصتله : شعري اللي ان شاء الله هتقصوهولي عشان افرح بيه صح ؟

آدم ضحك وباسها : لسه فاكرة ؟

سولاف : أنا مش بنسى بسهولة وبعدين أنا افكر اي حاجة تخصك واحفرها في قلبي كمان مش ذاكرتي بس

آدم شالها : أنا بقول نأجل الأكل شوية ونشوف لسانك الجميل ده أنا سامعه بيقول كلام حلو وعاجبني «ونسيهم في حالهم بقى كفاية كده»

إياس زي عادته الفترة الأخيرة عمال يتنطط في
 إسكندرية في كل مكان ، عايز يشوف أكبر عدد
 ممكن من الأماكن وكان مبسوط أوي بالمكان وجوه
 ، وهو على البحر بيتمشي شاف فرح اللي كانت
 ماشيه بسرحة هي كمان فراح بسرعة وراها :
 اخيرا لقيتك تاني

فرح بصتله : تو ، أنت تاني ؟ ايه عايز تاخذ
 بالطوبة في دماغك تاني ؟

إياس: لا ما بيعوز ، بس عايز بفهم انتي ليه عملتي
 كده ؟ أنا ماقلتكيش حاجة وهشه

فرح : أنت يالا مش مريحني خالص ، ايه طريقة
 كلامك دي متسهوك كده ليه ؟

إياس : يعني ايه متهسك دي ؟

فرح ضحكت : متهسك !! ضحككتي والله وأنا ماليش
 نفس اضحك ، يعني مايع طري

إياس بصلها باستغراب وهي بتضحك على تعابير
 وشه : أنت بجد غريب أوي

سابته ومشت وهو راح وراها : استني ، يا جميلة

فرح كشرت ونزلت مسكت طوبه قدامها ورفعت
ايدها : لا أنت شكلك مش متربي بقى وأنا أعرف
اربي الاشكال دي كويس

إياس رفع ايديه باستسلام : اوووه لا ، توبه لا
فرح كانت مكشره بغيط بس ضحكت على كلامه
غصب عنها : انت بتتكلم جد ولا بتستعبط ، مش
عارفه حاساك بتستعبط بس شيفاك بتتكلم جد
إياس : أنا ما بيفهم على فكره ، أنتى اللي غريب
أوي

فرح : طيب فهمني ليه بتتكلم كده ؟
إياس : عشان انا مش من مصر وبيتعلم عربي
لوهدي

فرح هزت دماغها بفهم : ااه عشان كده ، وأنا اللي
كنت مستغربه ملامحك الأجنبية

إياس : ممكن بقى بيبعد التوبة ده

فرح : انشف شوية يالا اسمها طوبه بالطه

إياس : ته

فرح : لا أنت شكلك فاضي وأنا مش ناقصة
الصراحه

رمت الطوبه جنب رجليه ومشت وهو نط من مكانه :
اوووه مفترسه

فرح راحت المحل بتاع أختها تقعد معاها شوية وهي
بتفتكر طريقة كلام إياس المضحكة وبتضحك

جسار كان قاعد في بيته زهقان فبعد ما آدم اتجوز
بقي يومه فاضي وما عندهوش حد يغلس عليه ، فتح
فونه وقعد يلعب شوية لحد ما جاتله رسالة من آدم

«ممكن اطلب منك خدمه؟»

جسار : أنت يالا معفن وبتاع مصلحتك على فكرة

آدم : هههه عارف

جسار : عايز ايه ؟

آدم : ورد

جسار : يادي النيلة على الورد ، أنت ايه يالا بتاكلهم
؟ من ساعة ما عرفتك وأنت مش بتعمل حاجة غير

إنك بتشتري ورد

آدم : ههههه ، هزر شوية من نفسك ، يلا قوم

جسار : ماشي ياعم ربنا يسهلك ، الا صحيح عايز
ايه المره دي

آدم : امممم ، الأوركيد لو لقيت

جسار أبتسم : حاضر

وقام عشان يروح يجيب الورد ، رغم إنه مش بي فهم
فيه ولا متعلق بيه زي آدم بس بيحبه برضه

وصل عند أقرب محل ورد ودخل : السلام عليكم

بنت : و عليكم الـ أنت ! قولي بجد أنت بتراقبني ؟

جسار قلب عينيه بز هق : أستغفر الله العظيم وأتوب

إليه ، وهو أنا هراقبك بتاع ايه يا انسه كنتي مين

أنتي ؟

فرح : يا مصبر الوحش يا رب ، أومال عايز ايه

سعادتك ؟

جسار : محل ورد وواحد داخل تفتكري هكون عايز

ايه اتملى في جمالك يعني ؟

فرح : أولا المحل لسه مافتحش وبعدين بقى احنا

مش بنبيع للناس قليلة الذوق

جسار كشر جامد بضيق بس قاطعهم نبرة صارمه
لصوت رقيق : فرح ، ايه اللي أنتى بتقوليه ده ؟

فرح بصت لصاحبة الصوت : ريم هو _____

ريم وقفت قدامها وبصت لجسار : متأسفه أوي يا
فندم على التصرف ده ، حضرتك تؤمر بايه ؟

جسار أول ما سمع صوت ريم الرقيق وصلها
وياريتها ما وصلها ، كانت بنت رقيقة وعيونها واسعه
جدا وبلون البحر وهو غرق فيه من غير ما يحس
بنفسه

ريم باستغراب : يا فندم !!

جسار بتوهان : هاه

فرح : هاه !! أنت يا اخ روحت فين ؟

جسار نزل عينيه في الأرض بسرعة بيهرب من
عينين ريم : أحم سوري

ريم أبتسمت : ولا يهملك يا فندم ، أتفضل حضرتك
تطلب ايه ؟

جسار بيحاول يفتكر هو كان جاي ليه : كنت ، عايز
ورد

ريم : حضرتك عايز نوع معين ؟

جسار : اه ، أوركيد

ريم : تمام حضرتك محتاج حجم معين أو شكل معين
للغلاف

جسار هز دماغه برفض وهي راحت تعمل البوكيه
ليه وفرح عماله تبحلق لجسار وعايزة تفهم ايه اللي
شقلب حاله كده مره واحده : أنت ياااا ، يا مدرعه
انت

جسار ماردش عليها وهي اضايقت وبعد دقائق ريم
جت : تحب احطلك كارت في البوكيه يا فندم ؟

جسار بصلها : اه أحب قوي

أدرك كلامه واحرج فحمحم : قصدي يعني مافيش
مانع

ريم جابت كارت وقلم ومدت ايدها بيهم : أتفضل
أكتب اللي أنت عايزة

جسار : لا مش ، بصي حطيه فاضي كده وأنا هكتب
فيه بعدين

ريم خلصت البوكية اللي عملته بطريقة شيك جدا
ومدت ايديها بيه : أتفضل يا فندم طلبك

جسار أخذ البوكيه من ايدها وبصلها وهو مش
 عارف يرفع عينيه من على عيونها رغم أن فرح
 عيونها نفس اللون ويمكن أجمل كمان وعيونها
 مرسومه بطريقة تسحر بجد ، إلا ان دي عيونها
 بتشده ليها بطريقة مش طبيعیه ، كمان هي نفسها
 فيها حاجة غريبه ليها حضور لطيف بس مسيطر ،
 إزاي هو حاسس كده ؟ المفروض هو الطرف
 الأقوى إزاي حاسس إنها أقوى منه بالشكل ده ؟

ريم باستغراب : يافندم !!

جسار : ايوه معاكي

ريم : الحساب _____

جسار دفع الحساب وهي بصتلته بابتسامه : نورتنا يا
 فندم

جسار هز دماغه ومشي بصمت

فرح بصت لاختها : أنتي عملتي فيه ايه هاه ؟

ريم : عملت ايه ؟

فرح : يا بنتي ده الواد الرخم اللي حكيتلك عنه قبل
 كده ، الواد ده لسانه مترين وكل أما يشوف خلقتي

يرز عني كلام دبش بس أول ما وقف قدامك قلب قط
سيامي

ريم وهي بترتب الورد في مكانه : حبيبي في قاعده
كده الناس البني آدمين الطبيعيين اللي هما مش انتي
بيتعاملوا بيها

فرح : اللي هي ايه يا فيلسوفة زمانك ؟

ريم أبتسمت بغلاسه : الذوق ، الذوق يا حبيبي اللي
ماتعرفيش عنه حاجة ، الناس بيعاملوا بعضهم بذوق
ولما اللي قدامهم يقل ذوقه معاهم هيردوا عليه بنفس
الطريقة فهمتي ؟

فرح كشرت : على فكرة انتي بتهزأيني لو مش
واخده بالك

ريم : لا واخده بالي كويس ، ويلا قومي هاتي الورد
اللي جوه ده وساعديني انظمه مكانه عشان أفتح
المحل

فرح قامت بغیظ : ساعدي نفسك ، أنا ورايا شغل
والشفت بتاعي كمان نص ساعة يعني يادوب أوصل
المطعم عشان الإنسان الذوووق ده مايبلغش المدير
بتاعي واطرد ، خلي ذوقك ينفعك بقى ، هاه

أخذت شنطتها ومشت وهي بتدبب برجلها زي
الاطفال وريم بتضحك : طفلة أوي

بصت للمحل حوليها واتنهدت بعنف : بسم الله ابدأ
يارب قويني

وبدأت شغلها بنشاط وحب زي عاداتها

جسار لما اخذ الورد ومشى وقف قدام عمارة آدم :
مالك يا جسار ؟ هو ايه اللي حصل من شويه ده ؟
البت دي عامله كده ليه بجد ؟

هز دماغه بعنف وطلع فوق ، خبط بخفة على الباب
بصبغه و آدم فتح بهدوء وهو رافعه ايده باعتذار :
سوري والله

جسار وهو بيديله الورد : ما هو مافيش حاجة ببلاش
يا حلو وخدمه قصاص خدمه

آدم أبتسم : ماشي حاضر هبقى اردهالك بس مش
دلوقتي يلا طير بقى أنا مش فاضيلك

جسار بذهول : اه يا واطي كده بتبيع أخوك في لحظه
؟

آدم ضحك وهي بيهشه بايدہ : اه ده أنا ابيع الدنيا
 كلها مش اخويا بس يلا هتش بقى
 جسار بصله بغيط وبعدها أبتسم : ربنا يهنيك
 آدم أبتسم وطبطب على كتفه كأنه بيقوله عقبالك
 وقفل وجسار رجع بيته وهو بيفكر في المخيفة اللي
 لخبطت كيانه بنظرة لطيفة منها

عدى اسبوع حصل فيه احداث كثير
 جسار عمال يفكر في ريم وخياله بيسرح معاها كثير
 غصب عنه

إياس بيقابل فرح كثير بالصدفة لحد ما بقت الصدفة
 دي متعمدة لما بقى بيروح يلف في الأماكن اللي
 غالبا بتبقى فيها عشان يشوفها بس وهي أول ماتلمحه
 تحذفه بالطوب

آدم وسولاف بقى في عالم موازي إحنا مالناش دعوة
 بيهم

أما مروان عمال يتشقلب لثمارا عشان تعبره بس هي
مستمرة في تجاهلها ليه

مروان : أنتى من امتى كنتى ثقيلة كده ؟ يا شيخة
بقى أنا بجد تعبت

ثمارا عماله تلم في حاجاتها وتحطهم في الشنطه
بصمت ومروان مراقبها بغيظ

خلصت وسابت الشنطه وطلعت من الاوضة وهو :
يا برودك يا بارده حتى ماكلفتيش نفسك تطلبى منى
اشيل الشنطه

راح مسك الشنطه وعمال يتخانق معاها بغيظ ،
شالها وطلع بسرعه لبره لقى ثمارا واقفه مع مسعد
وبيتكلموا وبيضحكوا أوي

اتعصب جدا وراح عندهم : فى ايه ماتضحكونى
معاكم

مسعد بصله : والله أختك دي دمها خفيف أوي كل
أما أتكلم معاها مش بعرف اسيطر على نفسى
مروان بغيظ : اختى ؟ ودمها خفيف ؟ وده من امتى
؟

مسعد : اه هي قالتلي إنك اخوها الكبير وبما إنك
اخوها فكنت حابب اطلب منك طلب

تمارا بصت لمسعد باستغراب ومروان خلاص على
تكة

مسعد أتشاهد على روحه في سره وبص لمروان :
كنت عايز اطلب منك ايد الانسه تم

مالحقش يكمل الكلمة وكان مروان ضاربه في وشه
وتمارا شهقت جامد وهو عمال يضرب فيه : تطلب
مين يالا أنت اتجننت ؟

قام وهو بينهج ومسك ايد تمارا وبعلو صوته : تمارا
دي حبيبتى أنا واللي يفكر بس يبصلها هشيله عينيه
من مكانهم أنت فاهم يا حيلتها ؟

اخذ الشنطه وشد تمارا وراه ومشى ومسعد قاعد
علي الأرض بيمسح الدم اللي في وشه : يابن
المجانين ، الله يرحمني بجد ، معلش يا تمارا يا بنتي
هتتيتمي بدري بسبب تور هايج

واحد زميله : يخربيت أفكارك النيره

مسعد : أسكت يا هادي الله يرضى عليك أنا مش
قادر

هادي : أنت كويس ؟

مسعد بصله بوجع : غالبا كده فكي اتخلع

هادي قعد جنبه بسرعه وبيشوف وشه : يا خبر أسود
يا مسعد ده اتحرك بجد من مكانه ، تعالا قوم خليني
اشوفهولك

مسعد قام معاه بوجع وهو اخده يكشف عليه يشوف
ايه اللي حصله

بره المستشفى مروان ماشي بيولع ، ركب تمارا
عربيته وركب وحذف شنطتها ورا باهمال وعصبية
وبصلها وهي كانت هتموت من الخوف منه
مروان : ممكن أفهم ايه المهزلة اللي حصلت جوا
دي ؟

تمارا : مهزلة ايه مش فاهمه ؟

مروان بغیظ أكبر : المهزلة اللي حصلت يا هانم ،
الأستاذ ده

تمارا بشجاعة مزيفه : أولا هو مش أستاذ هو دكتور
ثانيا بقى فيها ايه واحد اعجب بواحد وطلب ايديها

من اخوها [اتكت جامد أوي على الكلمه] فين المشكلة
مش فاهمه ؟

مروان مسك دراعتها بغضب : تمارا ماتعصبينيش
أنا مش اخوكي هقولها لك كام مرة ؟

تمارا بلهفة بتحاول تداريها : او مال أنت ايه ؟

مروان سكت شويه : ابن عمك

تمارا اتنهدت بخيبة امل : وابن العم زي الاخ هي
هياها

مروان : لا يا تمارا مش زي الاخ ، ولو هتمشيها
كده يبقى الأحسن تقولي ابن عمك أولى بيكي من
الغريب

تمارا اتضايقت منه لانه مش عايز يعترف وكمان
بيخليها سلعة مين أولى بيها : ماتنساش إنك مش ابن
عمي بجد ، ولو حسبناها كده يبقى خالد أو عزيز
عيال عمي طاهر أولى بيا

مروان اتجنن منها وفضل يزعق : لا يا تمارا مش
أولى بيكي وماحدثش ليه الحق فيكي غيري

تمارا زعقت قصاده هي كمان : ليه ان شاء الله كل
ده ؟

مروان بز عيق : عشان بحبك يا غبية ، بحبك ودمي
 بيتحرق لما بشوف حد بس ببيصلك ، ارتحتي بقي ؟
 فضل ينهج وهي بتبصله و عيونها بتلمع بالدموع :
 أنت

مروان مسك ايدها بر جاء : بحبك والله ، ما عرفش
 امتي وازاي بس ده اللي حصل ، لقيت نفسي فجأة
 غرقان في هواكي ومش عارف لا اطلع ولا أعوم
 فيه ، غرقت مرة واحده

تمارا مش قادرة تستوعب ان كل الكلام ده ليها هي
 وهو بصلها : عارف أنى إنسان زبالة وحيوان وكل
 حاجة ، عارف أنى اذيتك كثير بسبب غبائي وطيشي
 بس أنا بجد اتغيرت وطالب منك فرصه واحده ،
 اختبريني وشوفي بنفسك بس بلاش ترميني كده من
 غير فرصة حتى

مسك ايديها الاتنين : أنا حبيتك وتعبت أوي من نار
 حبك يا تمارا ورفعت الرايا البيضاء فحسي بيا شوية
 وارحمى قلبي من عذابه

تمارا عيطت وفضلت تضربه جامد على كتافه
 وصدرة : أنت غبي يا مروان

مروان : عارف

تمارا : وحيوان وقدر وفيك كل الصفات الزبالة اللي
في الدنيا كلها

مروان باستسلام : عارف

تمارا : وبحبك

مروان برق جامد : أنتي قولتي ايه ؟ انتي ايه ؟

تمارا سكتت وهي بتمسح دموعها بعنف وهو مسك
ايديها : بالله عليكى قولها تاني ، قولها وخليني
اصدق اللي سمعته ده

تمارا : من زمان وأنا متعلقة بيك أوي ، كنت بحب
أروح كل الأماكن اللي بتروحها بس عشان ابقى
معاك ، كنت بعمل كل الحاجات اللي بتعملها عشان
أبقى زيك ، حتى المخدرات ، أنا مش بلومك عشان
انا كنت عارفه ده ايه واخدتته بارادتي بس عشان
أنت اللي عطتهولي ، كنت بوهم نفسي طول الوقت
أنى بحب آدم وأنا ماكنتش بحبه زي ما هو قال أو
يمكن بحبه كاخ ، انا كل اللي حوليا كانوا سايبيني
اخبط في حياتي لوحدي لا اب موجود ولا ام مهتمه
، كنت عايزاه سند وظهر كنت عايزة اتحامى فيه
زي ما لوجين بتعمل بس عملت كده بطريقة غلط ،
والحقيقة المدفونة ورا كل ده أنى كل يوم كنت بقع

فيك انت بس كنت خايفه أعترف عشان ماتجر حش ،
 أنت كل شوية ترتبط ببنت شكل وخوفت يبقى
 مصيري زيهم بس في كل لحظة كنت بشوفك فيها
 كنت بقع في شباكك اكثر

بصتله من بين دموعها وبخفوت : أنا ماحببتش آدم أنا
 حبيتك أنت

مروان شدها عليه ودفنها في حضنه : أنا آسف ، أنا
 آسف سامحيني ، حقك عليا أنا

تمارا بتتكلم في صدره بصوت مكتوم : أنت حقير
 أوي يا مروان

مروان : عارف أنا آسف والله بس عشان خاطري
 اديني فرصة اخيره اثبتلك أني اتغيرت

تمارا : وأنا كمان يا مروان ، أنا هنا مش بس
 اتعالجت من الإدمان أنا كمان واجهت نفسي وعرفت
 بشاعتي وبدأت اغيرني ودكتور مسعد ساعدني كتير
 أوي عشان اتغير

مروان طلعتها من حضنه بغیظ : دكتور مسعد !

تمارا ضحكت : عارف ان دكتور مسعد ده متجوز
 وعنده ٣ عيال اساسا اكبرهم في خمسہ ابتدائي

مروان برق : بتهزري ! ده لسه صغير جدا
 تمارا : خالص هو بس اللي شكله صغير كده أنما هو
 قرب على الاربعين أصلا

مروان هز دماغه بفهم وبعدها بصلها تاني بغيظ :
 حتى ولو ولو ولو ، ماتنطقيش اسمه خالص

تمارا : ليه ؟

مروان قرب منها : عشان بتقوليه بطريقه حلوة أوي
 بتدايقني

تمارا أبتسمت وهو : ان كان ولا بد تقولي اسم راجل
 قولي اسمى أنا ، مروان قولي كده

تمارا همست بدلع : مارو

مروان : أنا بقول نروح نتجوز دلوقتي عشان في
 حاجات كده مش تمام بتلعب في دماغي

تمارا ضربته جامد على كتفه واتعدلت في قعدتها
 واخذت مناديل وبتمسح وشها اللي باظ من الميكاب
 والدموع

مسحت وشها كله ولسه هتخط ميكاب تاني مروان
 مسك ايدها : ماتحطيش

تمارا بصتله : ليه ؟

مروان : شكلك من غيره احلى انا بحبك كده أكثر

تمارا : بجد ؟

مروان أبتسم : اه بجد

تمارا بصت لوشها في المرايا : تفتكر كده أحلى ؟

مروان : أحلى بس ده انتى تتاكلي آكل كده

تمارا حدفت علبة المناديل في وشه : على فكرة أنت

ولد قليل الأدب والاحترام وأنا هشتكيك لابييه آدم

عشان يلمك

مروان كشر : ابيه اه

تمارا : هو أنت ليه بتكرهه كده ؟

مروان اتعدل في كرسيه وبص قدامه : أنا مش

بكرهه وعمري ما كرهته ابدا ، بس ، بس بغير منه

، من واحنا صغيرين وكل ما عمل حاجة بابا يقولي

آدم عمل وآدم خلى وآدم سوى ، انجح في امتحان او

مسابقة يقولي آدم قبلك نجح بدرجة أعلى نجح بمركز

أعلى ، ولما كبرت واتخرجت من الكلية بمجموع

امتياز ورتبت التانى على الدفعه برضه آدم عمل آدم

بقى انجح شيف في العالم آدم بقى صاحب سلسلة

ألماس آدم آدم آدم لحد ماكرهت نفسي وكرهت

آدم وبقی نفسي اخلص من شبحة اللي بيطاردني في
كل مكان ، تعبت منه ومن ابويا ومن الدنيا كلها ،
تعبت أوي يا تمارا بجد

تمارا طبطبت علي كتفه : بس آدم مالهوش ذنب في
كل ده هو مش قاصده يبقى انجح عشان يضايك ،
وبعدين انت كمان ذكي وناجح مش معنى ان هو
نجح في مجال يبقى لازم أنت كمان تنجح فيه ، أنت
كمان هتلاقي نفسك ناجح في مجال وهو مايفهمش
فيه أساسا وعادي ، الدنيا كده لازم نكمل بعض مش
نتخانق مع بعض ونعيش في صراع على
المراكز

مروان بصلها : انتي اللي بتقولي الكلام العميق ده ،
من امتي ؟

تمارا ضحكت : لا ده مش كلامي ده دكتور مسعد
هو اللي قاله وأنا حفظته زي ما هو كده ومش فاهمه
معناه اصلا

مروان ضحك على قطته الهبة وبصلها : انا قولتلك
أني بحبك قبل كده ؟

تمارا اتكسفت : ايوه ، قولت

مروان : وهفضل اقولها تاني ، بحبك يا تمارا

تمارا : يلا روحنى بقى

مروان ضحك وبيربط حزام الأمان : ماشي يا ستي
اهربي براحتك ، لينا بيت يلما
سكت شوية وبدأ يسوق : الا صحيح ، تعرفي ان آدم
اتجوز

تمارا بصتله بصدمة : اتجوز ! امتى ؟

مروان : يعني قيمة اسبوعين عشر أيام كده
تمارا : وأنا ماعرفش ؟

مروان : كنتي في المستشفى

تمارا طلعت فونها ودورت على الخبر لحد ما لفته
وشافت آدم وسولاف مع بعض في الكوشه : داليدا
!!

مروان : اه داليدا ، ماحدث توقعها بصراحه

تمارا : ليه ؟ ما هي ماما قالت إنها لفت عليه

مروان : مع إحترامي يعني بس أمك دي مجنونه ،
أنا ماعرفش هي بتعمل كده ليه بس الاكيد إنها عايزة
توقع الناس في بعض وخلص

تمارا : أمى دي اللي أنت بتتكلم عنها خد بالك

مروان : هتتكري ان كلامي صح ؟

تمارا سكتت لأنها اكثر واحده تعرف مامتها وشرها ، بصت في الفون وقلبت في الصور لحد ما وصلت لصورتهم وهما بيرقصوا سلو على الرمل حافيين ، بصت لملاح سولاف وشافت فيهم هدوء وطيبه غريبه أوي ، هي ماعداش عليها حد ملامحه فيها كل الحنية دي ، وبصت لملاح آدم وشافت نظراته ليها ، حب ، أي حد هيشوف الصورة هيعرف انه غرقان في عشقها ، وشافت الراحة اللي على وشه وعمرها ماشافتها قبل كده

بعدت الفون شويه عن وشها وبصلتهم من بعيد بتقييم : لايقين على بعض

مروان بصلها : أنتى بتتكلمي جد ؟

تمارا : اه شكلهم حلو أوي سوى ؟

مروان مستغرب : أنتى مش غيرانه منها ؟

تمارا بتبص على سولاف بتركيز : واغير منها ليه ؟؟

مروان : عشان يعني عرفت تعمل اللي انتى ماعرفتيش تعمليه

تمارا : لا مش غيرانه ، أنا اه ماعرفتش اوقع آدم في
حبي بس هو كمان ماعرفش يوقعني في حبه في
حين انت عرفت وبسهوله أوي

مروان أبتسم برضا أول مره حد يقوله إنه عمل
حاجة آدم ماعرفش يعملها : معاكي حق الحب
مافيهوش حسابات ولا تخطيط هو بيحي كده
لوحده

تمارا : مش بيحي لوحده، اوله بيبقى الاهتمام
والاحتواء ، لو حد اهتم بحد بجد من قلبه واحتواه
الطرف الثاني هيقع فيه بكل سلاسة وخاصا البنات ،
الإهتمام أهم من الحب

مروان : كلامك صح

وصلوا القصر وتمارا سلمت على الكل وطلعت
اوضتها اللي وحشتها عشان ترتاح شويه ، أخذت
شاور طوييل أوي ولبست بيجامه واسعه وناعمه
ومريحه وربطت شعرها كحكه لفوق ودخلت في
السريير الطري : وحشتني أوي

اخذت فونها وفتحت على صور آدم وسولاف وقعدت
تبص لنظرات الحب اللي بيبصوها لبعض : يا ترى
أنا ومروان هنبقى كده ولا دي مجرد نزوه وبس ؟

قفلت الفون وحطته مكانه وحطت دماغها على
المخذه الريش وغمضت عينيها وخلال دقائق كانت
نائمه

لؤي اخيرا خلص شقته واتكلم كثير مع عاصم
وكمال وفيري عشان يعملوا الفرحة وهما كل شوية
يأجلوا ويتوهوا في الموضوع لحد ما خنقوه في
عيشته وفين وفين لما اخيرا وافقوا بعد ما روحه
طلعت معاهم

في نص الفرحة آدم وصل ماسك سولاف في دراعه
بتملك بيوصل رسالة صريحة انها خط أحمر واللي
هيحاول يقرب منها يبقى جنى على نفسه

فيري بتبصلهم بكل غل وبتبرطم : والله وبقيتي
عامله فيها هانم

تمارا : في ايه يا ماما مين دي اللي بتتكلمي عنها
؟؟

فيري بتشاور على سولاف : الهانم دي

تمارا بصت وراها وفيري بتقول بغیظ : شايفه
ملبسها ايه ، فيرزاتشي وديور الله یرحم أما كانت
بتلبس من سوق الجمعة

تمارا : طيب ما يلبسها يا ماما ، مراته وفلوسه وهو
حر فيهم

فيري بصتلها بعصبية : بت أنتی غوري من وشي
أنا مش ناقصاكي انتی كمان
تمارا هزت كتافها بز هق وقامت

على الناحية الثانية آدم راح سلم على لوجين ولؤي :
مبروك يا شباب

لؤي بابتسامة : الله يبارك في حضرتك يا باشا
آدم خبط كتفه في كتفه : باشا ايه بقى ده أنت بقيت
من العيلة يالا

لؤي ضحك : الله يعزك

آدم بص للوجين : كبرتي وبقيتي عروسة يا بت
لوجين كشرت بطفولة : أبیه أنا مش بت ، أنا بقيت
متجوزة دلوقتی وكبيرة خالص

آدم ضحك بصوت عالي : أنت علمتها التمرد يالا ؟
لؤي رفع ايديه باستسلام : ماحصلش يا باشا أنا بس
صحيت النمر اللي جواها

لوجين ضربتهم هما الاتنين : بطلوا بقي

كلهم ضحكوا شوية ، وبعدها آدم أخذ سولاف وراح
ناحية الترابيزة اللي عليها دولت و هند وهو رافع
ايديه باستسلام وبيشاور على سولاف : هي
السبب

دولت : انتوا الاتنين جزم بقالكم قد ايه متجوزين
ومافكرتوش حتى ترفعوا السماعة وتكلمونا
آدم : ما أنا بقولك أهو البت دي هي السبب

سولاف بصتله بصدمة وهو ضحك : مالك بتبصيلي
كده ليه هو أنا قولت حاجة غلط ؟

قرب منها وهمس جنب و دنها بكلام كسفها وخلي
وشها أحمر جدا وقامت ضرباه على كتفه وراحت
قعدت جنب هند وسابته ببيضحك بصوت عالي وراح
قعد جنبها : منورين يا جماعة

هند ضيقت عينيها بشك : قلبي مش مرتاحك ياولا
أنت

آدم ضحك : ايوه خليكي كده قلبك صح أوي
سولاف مخبيه وشها بين ايديها باحراج منه وهو
مش قادر يبطل ضحك

قاطعهم صوت تمارا : أبيه ، ايه مش هتسلم عليا زي
كل مره ؟

آدم بصلها وأبتسم وقام ولأول مرة في حياته اخدها
في حضنه تحت نظرات الغيرة من سولاف :
وحشتيني يا بت والله

تمارا اتعلقت جامد في حضنه و عيطت : كده يا أبيه
تسيبني كده ولا تفكر حتى تسأل عني ؟

آدم بعدها عنه ومسح دموعها : مين قالك كده ؟ أنتي
اخبارك كانت بتوصلي بالساعة ، أنتي ناسية مسعد
ولا ايه ؟

تمارا بصتله باستغراب : أنت تعرف مسعد ؟

آدم : أكيد أعرفه أنا اللي موصيه عليكي أصلا وكل
اخبارك كان بيوصلهالي

تمارا : أنا بدأت أخاف منك أوي على فكره ، أنت
إزاي ليك معارف في كل حته كده ؟

آدم ضحك : لا دي وصفة مستر سلطع السرية بقى
ماينفعش اقولك إزاي

مروان جه وقف بين تمارا و آدم و بيوصله بغيظ : في
ايه ؟ نازل أحضان في كل حته ما تلم اطرافك دي
شوية ؟ لو عايز تحضن روح عندك مراتك أهى
وسيب الناس في حالهم

آدم ضحك على غيرته : وأنت بتحشر نفسك ليه ؟
دول أخواتي احضنهم براحتى أخرج منها أنت بقى
مالكش مكان بينا

مروان كشر جامد ومسك ايد تمارا : أنت مستفز
أوي على فكره ، ابو شكلك كل مره بتعكرلي
مزاجي

مشي بغيظ وهو بيشد تمارا وراه وهي بتشاور لآدم
اللي واقف يضحك

قعد وهو بيحرك دماغه بقلة حيلة : عيال والله عيال
بص لسولاف اللي نظراتها شوية هتولع في المكان
باللي فيه

آدم : مالك ؟

سولاف بقمصه : مافيش

آدم أبتسم على محاولاتها إنها تخبي غيرتها الشديدة
وقرب منها وهمس : لما نروح البيت أبقى فكريني
أعرفك مين هي حبييتي اللي مافيش غيرها في قلبي

سولاف : وهو أنا محتاجة افكرك يعني ؟

آدم : لا أنا على طول فاكرك وفي بالي

سولاف أبتسمت برضا ودولت بصت لآدم : انتوا
اتصالحتوا امتي ؟

آدم : قصدك مين ؟

دولت : تمارا ومروان

آدم : تمارا أهو لسه دلوقتي زي ماشفتي ، اما
مروان ده حكاية لوحده كل دقيقة بحال

دولت بمغزى : تمارا بنت فريال ؟

آدم بهدوء : تمارا اتغيرت أوي يا نانا ، بجد بقت حد
مختلف واتمنى انتي كمان تتقبلها ، ابعتها عن فريال
وشرها وخودي بالك منها

دولت اتنهدت بقلة حيلة : حاضر يا آدم اللي أنت
عايزة

آدم بعثها بوسه في الهوا وبص لهند وسولاف اللي
عمالين يتوشوشوا : في ايه يا هند ؟ اكلتي ودن البت
من كتر الرغي

هند : وانت مالك أنت بنتى وأنا حرة فيها أكل ودنها
أكل عينيها ايه ده يا ربي ؟

آدم برق : في ايه ياما براحه عليا ، وبعدين أحب
أعرف بتقوليلها ايه ؟

هند : مالكش فيه ده كلام ستات

آدم : وأنا كمان بفهم في كلام الستات قولي قولي
ماتتكسفيش

سولاف شهقت وحطت دماغها على الترابيزة من
الكسوف و هند : الله يكسفك يا شيخ ، ايه ياولا ده ؟

آدم : الله يسامحك ، يرضيكي كده يا دولي اللي
بتعمله فيا ؟

دولت ضحكت : اه يرضيني عشان تتأدب شوية

آدم : ماشي يا ستي الله يسامحك كلكم ، أنا هشتكيكم
لحبيبتى وهي هتاخدلى حقي منكم مش كده يا سولي
يا حبيبتى ؟

سولاف : أسكت يا آدم الله يرضا عليك

آدم : حتى أنتى ، انتوا ناس مش لذيذة خالص على
فكرة ، الله يرحم ايامك يا جسار ده انتوا لو تعرفوا
إحنا كنا بنقول ايه هتقيموا علينا الحد مش تشتموا
بس

وخلص اليوم بين السعادة والكره ، الحب والشر ،
الغل والخير وبداية لحياة مختلفة ونهاية سطور قصة
قديمة ، ومع اشراقه شمس يوم جديد على أبطالنا
بيتبدل فيه الحال وبتغرق القلوب لأسباب مختلفه منها
الحلو ومنها المر والأمر

في قصر هارون

الكل قاعد يفطر في صمت قطعه مروان : بابا عمي
كنت عايز اقولكم حاجة

عاصم : قول

مروان بهدوء : أنا عايز اتجوز

فيري بسخرية : أيه ده أنت غيرت منهم ولا ايه ؟

مروان أبتسم بسماجة : حتى لو غيرت يعني فيها ايه

عاصم : ومين دي اللي عايزها ؟ اسمها ايه ؟ بنت
مين ؟ واهلها مين ؟

مروان بقلق : تمارااا بنت عمي

عاصم بصله : مين ؟

كلهم بصوا لتمارا اللي بتقول جوه نفسها يا أرض
اتشقي وابلعيني

فيري قامت بغضب : لا كده كثير ، كده كثير أوي
بصراحه

عاصم بص لابنه بغضب فهو كان عايزة يتجوز
واحد من بنات رجال الاعمال الكبار عشان ثروتهم
تكبر أكثر

مروان تجاهل نظرات أبوه وبص لكمال : ايه رأيك
يا عمي ؟

كمال بصلهم بتوهان وبص لتمارا : أنتى ايه رأيك ،
موافقه ؟

تمارا هزت دماغها موافقة باحراج ، وكمال هز
دماغه بفهم وبص لمروان : طلا ما هي موافقه
خلاص أنا موافق

فيري : والله ؟

كمال : اه والله ، العيال عايزين بعض نقف في
طريقهم ليه مش فاهم يعني ؟

بص قدامه كأنه بيكلم حد أو شايف حد ماحدثش شايفه
: ليه نقف قصاد الحب وندمره مش عارف ، سيبوا
الحب يعيش بقى ويستمر ، زيها

أخذ بعضه ومشى ودولت قامت هي كمان واخذت
مروان وتمارا معاها عشان تفهم منهم هما عايزين
ايه بالظبط

عاصم بص لفيري : أنتي عملتي ايه في كمال ، هو
عامل كده ليه ؟

فيري بصت في الفراغ : ماعملتش

عاصم : لا عملتي يا فريال وأنا متأكد ، زي ما
عملتي زمان وكنتي بتحطيله دوا في القهوة يلغيله
مخه

فيري : ايوه يا عاصم بحطله زفت تاني وأنت عارف
ليه ، كمال بيحن لجماليات الله يجحمها وبشكله ده
هيبوظ كل خططنا ولازم يبقى تحت ايدينا ، أنا مش
هستنى لما يروح يقول لآدم عن كل حاجة ولو آدم

عرف هيدور و هيوصل للحقيقة وساعتها هيهد المعبد
على اللي فيه

عاصم : وانتى مش خايفه أقوله أنا ؟

فيري : لا مش خايفه ، أنت أصلا ماتقدرش لأنك
معايا في نفس المركب ، ولو حاولت تغرقني هتغرق
معايا

سابتة ومشت وهو بيراقبها بشر : شكل نهايتك قربت
أنتى كمان يا فريال الكلب

آدم كان قاعد في صالون بيته وبينادي بصوت عالي
: يا بت خلصي بقى

سولاف جوا في اوضة النوم : آدم بقى ماتوترنيش ،
قولتك صحيني بدري وأنت برضه اللي اخرتني
آدم راحها ووقف قدامها : صعبتى عليا الصراحه ،
انتى ماكملتيش ساعتين نوم على بعض وصعبتى
عليا اصحيكى

سولاف : ومش صعبانه عليك دلوقتى وأنت
مسربعني كده ومخليني متوتره ؟

آدم باس جبينها : خلاص يا ستي مش هوترك البسي
براحتك

سولاف أبتسمت : طيب قولي ألبس انهو طقم ؟
آدم بببص على هدومها : امممم النببتي بببقي حلو
أوي عليكي ماتلبسيهوش
سولاف تتحتله شوية كأنها بتستوعب لحد ما فهمت
وضحكت جامد واترمت في حضنه : أنت بتغير عليا
يا دومي ؟

آدم ضمها وباس رقبتها وهمس : وهو في حد عاقل
يتجوز مزة زيك ومايغيرش عليها ؟

سولاف : يخربيت أفاظك

آدم ضحك واتكلم بنبرة غزل خافته :

وَلِي فَيْكِ مَا لَمْ يَقُلْ قَائِلٌ

وَمَا لَمْ يَسِرْ قَمَرٌ حَيْثُ سَارَا

فَلَوْ خُلِقَ النَّاسُ مِنْ دَهْرِهِمْ

لَكَانُوا الظَّلَامَ وَكُنْتَ النَّهَارَا ♡

سولاف بتسمعه وعيونها متعلقه بعيونه اللي بتبصلها
نظرة حب جميلة

رفعت دماغها وباست تفاحة آدم اللي في رقبتة :
بحبك

آدم أبتسم : أنا بحبك أكثر

سولاف : يلا نلبس ؟

آدم : أنا بقول يولع المطعم على دماغ صاحبه
ونشوف إحنا كنا بنقول ايه

سولاف كشرت وشدته جامد من ياقة التيشيرت عليها
وبتحذير : ماتقولش على نفسك كده يا آدم ، ربنا
يحفظك ليا

آدم مبسوط من شرستها اللي اكتشفها مؤخرا ، كشر
بوجع مصطنع : اه اه قلبي

سولاف بخوف عليه : مالك يا حبيبي في ايه ؟

آدم بصلها وابتسم : قلبي مبسوط إنك جنبه

سولاف كشرت وضربته على كتفه : يا بايخ وقعت
قلبي

آدم ضحك بصوت عالي : سلامة قلبك من الوقعة ،
يلا يلا عشان مانتأخرش

لبسوا وراحوا مطعم آدم اللي كان بيحتفل بمرور سنة
على افتتاحه و آدم أعلن إنه قريب هيطور المطعم

بحيث يخليه هو الفرع الرئيسي نظرا لانه هيسقرر
في مصر ومش هيسافر ايطاليا غير كل فترة والتانية

فرح واقفه في المطعم على جنب بتتكلم مع أختها :
خلصتى كده ؟

ريم : اه خلاص زينت المطعم كله ، همشي بقي

فرح : تمام ماشي مع السلامة يا حبيبي

ريم أخذت حاجتها وطلعت من الباب الخلفي للمطعم
وراحت تحط حاجاتها في عربيتها الصغيرة وكل ده
وهي مش حاسة بالعيون اللي محاطاها بنظراتها
من كل مكان

.

جسار كان واقف جنب آدم لحد ما خلص خطابه
وقعد مع سولاف وهمس جنب ودنه بحاجة وهو هز
دماغه بموافقة ، أخذ بعضه ومشى بسرعة وطلع
ورا ريم يشوفها مشت ولا لسه

طلع من المطعم ولقاها واقفه عند عربيتها وبتحاول
تحط حاجاتها وهي محتاسه وبتشيل الحاجات الثقيلة

بالعافية وشكلها يصعب على الواحد أوي ، راح
بهدوء وبايد واحده شال سبت الورد الكبير من ايديها
وهي اتخضت

جسار : احطه فين ده ؟

ريم استجمعت نفسها بسرعه وشاورت : في العربية
هنا

جسار حط السبت مكان ماشاورت وشال باقي
الحاجات كلها وحطهاها في العربية

ريم : متأسفه أوي تعبتك معايا

جسار : ولا تعب ولا حاجة ، مش تقال خالص أنا
ممکن اشيل العربية دي كلها باللي فيها أصلا

ريم برقت : للدرجه ؟

جسار بص على نفسه وعضلات دراعه : ايه ده مش
باين عليا ولا ايه ؟

ريم ضحكت بخفوت وهو سأل : جاية لوحدك ليه ؟
يعني ، قصدي معكيش حد يساعذك

ريم : أنا بشتغل لوحدني وغالبا بيبقى شغلي في
المحل

بصت على المطعم : انتوا من الناس النادره اللي
روحتلهم مخصوص بطلب

جسار : امممم ، وليه ماخلتيش حد من اهلك
يساعدك ؟ اخوكي مثلا باباكي ، أحم جوزك أو
خطيبك

ريم أبتسمت على محاولات جسار اللطيفة إنه يعرف
عنها اكثر وبصتله : أنا مش متجوزة ولا مخطوبة
جسار لسه هيبتسم ريم كملت : ولا ناوية ارتبط
نهائي

الابتسامة اتمسحت من على وش جسار وهي فتحت
باب عربيتها : عن إذلك أنا لازم أمشي ، ومتشكرة
تاني على مساعدتك

أخذت ورده من السبت قدامها وعطتهاله كشكر
ومشت وهو بيراقبها لحد ماخفتت من قدامه

اتنهد بضيق : مالك ؟ مدايق ليه دلوقتي ؟ وهو أنت
كنت عايز ترتبط بيها ولا ايه ؟ لا مش عايز ، ايه ده
أومال هنتسلي ؟ لا ، اووف عليا بقى هو جواز آدم
أثر على مخي ولا ايه ؟

أخذ نفس طويل أوي عشان يهدى واخذ بعضه ودخل
تاني بس لقي فرح في وشه وبتبصله بضيق

جسار : أستغفر الله العظيم

فرح : أبعد عن ريم لو سمحت

جسار : وهو أنتى شوفتيني جيت جنبها ؟

فرح : ايوه شوفت وسمعت كل حاجة قولتها
وبقولك أبعد عنها هي مش حمل وجع تاني

جسار بصلها بانتباه : وهو كان في وجع اولاني ؟
فرح سكتت كتير ومشت وسابته حيران ومش فاهم
حاجة

فرح راحت تشوف شغلها لحد ما وصلت الترابيزة
اللي عليها آدم : طلباتكم يا فندم ؟

آدم : لا شغلك عال العال أهو

فرح بصتله بابتسامة عملية : متشكرة لحضرتك
قاطعهم صوت إياس اللي جاي : آدم أنا جيت ،
اتأكرت ؟

آدم : جدا ، ايه كل ده كنت فين ؟

إياس : دولي

بص جنبه للي بتحاول تداري وشها منه : أنتى !!
التوبة

فرح في سرها : يخربيتك على بيت التوبة بتعتك في
يوم واحد

آدم : أنت تعرفها ؟

إياس : اه ، انت بيفتكر البنت اللي كبت دماغي
بالتوبة هي ده

آدم ضحك وبص لفرح : أنتى ماسكه شباب العيلة
كلهم واحد واحد ونازلة فيهم غسيل ومكواه ولا ايه ؟

فرح اتعدلت في وقفته : ياباشا أنا حقيقي اسفه في
اللي هقوله بس الشعر الاصفر اللي واقف جنبك ده
مش محترم ابدأ وكل أما يشوفني يعاكس وانا أكيد
مش هسكتله يعني

آدم بص على شعر إياس الأشقر : معاكي حق والله
هو مش متربي أصلا

إياس بصله بغیظ وفرح أخذت طلباتهم وراحت تكمل
شغل وجسار راح قعد جنب آدم في صمت وكل

تفكيره مع صاحبة الورد اللي اسرته وهو مش
حاسس وكان سرحان لدرجة إنه ماردش على آدم لما
كلمه وهو سابه شوية في حالة وقرر يكلمه بعدين
ويفهم هو ماله

بتعدي الأيام والعلاقة بين فرح واياس اتغيرت كثير
بعد ما عرف إنها بتشتغل في مطعم آدم وبقي بينطلها
هناك كل شوية وهي غصب عنها قلبها اتحرك ليه ،
عجباها كل حاجة فيه شكله المميز لا هو اجنبي
صريح ولا مصري صريح ، طريقة كلامه اللطيفة ،
هزاره ودمه الخفيف واكيد اهتمامه وشغفه إنه يعرف
كل حاجة هي بتحبها ويعمل زيها كأنه طفل بيقلد
مامته في كل حاجة

أما هو فكان معجب جدا بيها ، شكلها الجميل
وحجابها ولبسها اللي بيعجبه بطريقة هو مش فاهمها
، وشخصيتها الثقيلة زي ماسماها - كل البنات اللي
كان يعرفهم بره كانوا خفاف أوي والبصة بتجيبهم
أما دي لا - الكلام الحلو بيدايقها والرومانسية

بترفضها وای تجاوز بتصدده بكل قوة ، وکمان كانت
بتفهمه يعني ايه غلط ويعني ايه حرام ولو هله ندم إنه
ماكانش بيسمع كلام مامته لما كانت بتكلمه عن
الحرام والحلال

أما جسار بيراقب ريم بصمت من بعيد وحبها غصب
عنه بغض النظر عن عيونها اللي بتشقلب حالة
شخصيتها كانت عاجباه أوي ، هادية ورقيقة وعاقله
، بتعامل الناس بذوق أوي وفي نفس الوقت بتضحك
وتهز مع أهلها وصحباتها كانت ميكس لطيف من
الرققة والانوثة مع الهزار والشقاوة ، بس هي حاطه
بينهم أسوار وأسوار عالية أوي كمان ومش سمحاله
بأي محاولة للقرب ابدا

لوجين في بيتها لؤي معيشها ملكة حرفيا ، كل
أوامرها مجابه وكل أحلامها بتتحقق وهو ومش
بيعدي اي فرصة يفرحها بيها

الصبح بدري صحيت لوجين من نومها بكل هدوء
زي عاداتها ، قعدت على السرير ورفعت ايديها لفوق

بكسل ، نزلت ايديها وبصت على لؤي اللي لسه نايم
وأبتسمت بحماس من الفكرة اللي جت في بالها ،
رفعت البطانية من على رجليها ونزلت من على
السريير بهدوء وخرجت بسرعه من الأوضة ، دخلت
الحمام وغسلت وشها ورتبت شعرها القصير
وراحت المطبخ ناوية تحضر الفطار لأول مرة في
حياتها ، فمن ساعة جوازها من لؤي وهو اللي
بيعمل كل حاجة او مامته اللي ساكنه في الشقة اللي
تحتهم

فتحت التلاجه وحضرت الجبن والمرببة وكل حاجة
مش محتاجة تسخين ، وطلعت العيش وحطته في
الميكروويف وشغلته زي ما لؤي حفظها بالظبط ،
وآخر خطوة كانت البيض ودي كانت أصعب خطوة
بالنسبالها ، حطت البيض في الطاسة ووقفت قدام
البوتاجاز بخوف ، مدت ايدها اللي بترتجف وشغلت
النار وحطت الطاسه ووقفت تراقبها بتوتر

على الناحية الثانية لؤي صحى من النوم على ريحة
حاجة بتتحرق ، قام مفزوع وطلع جري على المطبخ
ولقى لوجين قاعده على الأرض بتعيط والبوتاجاز

بيولع فطفاه بسرعه وقعد جنب لوجين على الأرض
: لوجين حبييتي ايه اللي حصل ؟

لوجين بصتله بخوف ودموع : كنت عايزة اعملك
فطار بس البيض ولع

لؤي : وأنتى بتعيطي ليه بس ؟

لوجين : عشان مش عرفت اطبخ

لؤي ضحك بصوت عالي : وهو البيض بقى اسمه
طبخ

لوجين بزعل : كنت عايزة اعملك فطار زي مانت
بتعمل

خلصت كلامها وقعدت تعيط أكثر ولؤي قرب منها
بضحك ومسح دموعها : بطلي عياط يا حبييتي
خلاص حصل خير

بص حوليه وقام فتح شباك المطبخ ووقفها : قومي يا
حبييتي تعالى نطلع بره عشان الدخان ده بدل
مانتخنق

لوجين قامت معاه بحزن وخرجوا عند السفارة ولؤي
شاف الفطار اللي هي محضراه وابتسم : أنتى اللي
عملتي كل ده ؟

لوجين هزت راسها بتأكيد وهو مسك ايديها وباسهم :
ايه الجمال ده كله ، ده النهارده عيد

لوجين : بس البيض _____

لؤي قطع كلامها: شششش ماتشغليش بالك بأي حاجة
، بكره تتعودي وتتعلمي كل حاجة

لوجين بأمل : بجد يا لؤي ، ممكن أعرف اطبخ في
يوم ؟

لؤي : أكيد يا حبيبي ، أنا في الأول كنت بحرق
البيض زيك كده بس ماما علمتني وجنة كمان لسه
بتحرق البيض لحد دلوقتي فمش عايزك تشيلي هم
أي حاجة

باس ايديها تاني وأبتسم : أنتى النهاردة عملتي فطار
كثير تسلم ايدك لحد كده ، تعالي ناكل يلا عشان
جعان

لوجين أبتسمت بحب وراحوا يفطروا وهما بيهزروا
ويضحكوا وبعدها قاموا غيروا لبسهم وخرجوا شوية
يتفسحوا

جسار زي عاداته كان واقف جنب العربية بتاعته قدام
محل الورد بتاع ريم وفي شعور جواه محسسه
بالمسؤولية ناحيتها ، عايز يفضل يحميها ويحرسها
كده حتى لو هترفضه

قطع سرحانه صوتها الصارم : حضرتك هتفضل
واقف كده طول الوقت ؟

جسار : وهو أنا كنت واقف فوق دماغك أنا واقف
في شارع عام

ريم بصتله بغیظ : ايوه حضرتك واقف في شارع
عام بس بتدايقني وبتوتر الزباين بتوعي بهيئتك دي
وده بياثر على شغلي

جسار بص حوليه : مش شايف حد متوتر يعني
والناس ماشية طبيعي أهو

ريم ضيقت عينيها بزهدق : أنت عايز توصل لايه
بالظبط من كل ده ؟

جسار سكت شوية وشاور على قلبها : يمكن ده ،
عايز أوصل لده زي مانتى وصلتي لقلبي كده

ريم : وده مش هيحصل ، أنا ماعرفش أنت حبيتني
امتى واحنا ماتقابلناش غير مرتين أو ثلاثه اصلا

بس اي ان يكن قلبي ده بتاعي أنا لو حدي وأنا مش
مستعده اشاركه مع أي حد ، فاتفضل بقى من هنا
وبطل تخوفني بوجودك

جسار بصلها بوجع : أنا بخوفك ؟

ريم بصت في الارض : ايوه لو سمحت بقى أتفضل
من هنا

جسار بصلها شوية واتهد : أنا همشي بس من تحت
عينيكى بس ، يعني انتى هتفضلتي تحت عيني عشان
ماتقوليش بخدعك أو بطاردك ، أنا بس خايف عليكى
، عن إذنك ،

ركب العربية وساق بسرعة واختفى من قدامها وهي
بتراقبه بصمت : أنا أسفة بجد ليك بس أنا مش حمل
جروح تاني كفاية قلبي هل كان من اللي فيه

اتنهدت بعنف ودخلت محلها وكملت شغل لحد بالليل،
قفلت المحل وراحت ناحية عربيتها وركبت ، حاولت
تشغل العربية بس مش بتدور: اوف بقى عليكى انتى
كل شوية هتبوظي أنا بجد تعبت منك

خبطت بغیظ على الدرکسیون ونزلت ورزعت الباب
: مستفزة

أخذت بعضها وقررت تتمشى شويه على البحر لحد
 ماتتعب وبعدها تركب اي مواصله عامه للبيت ،
 مشيت شوية وبعدها قعدت على الكورنيش وهي
 بتبص للبحر وسرحانه في جسار ، غريب أوي ، من
 بره شكله مخيف وصلب أوي بس قلبه بسيط وحنين،
 شكله إنسان دو غري ومش بتاع تسليه ولف ودوران
 طيب ليه ماتديهوش فرصه ؟

هزت دماغها برفض هي ما عندهاش أستعداد تتوجع
 تاني أكيد لو عرف عن ماضيها هيوجعها زي كل
 الناس وهي مش هتستحمل كلام قاسي تاني ، لا هي
 مش هتستحمل كلام منه هو ، طيب ليه هو ؟ هي
 لحقت تتعلق بيه كده امتي وإزاي أساسا ؟

حطت ايدها على قلبها : اهدى شوية

الدنيا بدأت تشتي عليها وهي كانت هتقوم بسرعة
 تستخبي من المطر زي باقي الناس بس تراجع
 وفضلت قاعده مكانها بهدوء قطعه صوت نقط الماية
 على شمسية فوقها ، كان نفسها في اللحظة دي
 يكون ده جسار بس مش هو ، هي متاكده ، قلبها مش
 بيدق زي كل مرة ، الريحه المميزة اللي بتشمها دايمًا
 وهو حولها مش موجوده

بصت جنبها لقت شاب بيوصلها ويبتسم بسماجة :
مين اللي مزعل قمر اية زيك كده ؟

ريم قلبت عينيها بز هق وقامت من مكانها وسابته
ومشيت بس هو مشي وراها : استنى شوية بس يا
عروسة

ريم بصتله بضيق : لو سمحت ابعده عني

الشاب : ايه الرقة دي كلها اتكلمي كده تاني

ريم سابته بنرفزة ومشت بس هو راح وراها تاني
وحاول يمسك ايدها : يا __ تعالي بس

ريم نفضت ايدها منه بعنف : اووووف ، ابعده بقي يا
كائن أنت ايه القرف ده ؟

الشاب مسك ذراعها وشدها عليه وقرب أوي من
وشها : لا يا حلوة أنا اللي اقوله يتنفذ ، تعالي واوعدك
هتتبسطي جامد أوي

الشاب لقي بوكس في وشه وقعته على الارض وبوءه
بدأ ينزف جامد : أنت اتجننت ؟

جسار قرب منه وشده من هدومه رفعه من على
الأرض بايد واحده : لا يا روح أمك أنا مولود
مجنون أصلا ، كنت بتقولها ايه بقي يا شبح ،

هتتبسط جامد صح ؟ ده أنا اللي هبسطك دلوقتي لحد
ماتقول توبت

جسار نزل في الشاب ضرب غبي لحد ما وقع علي
الأرض مش قادر يتحرك وريم مش عارفه تعمل ايه
، حاولت تقرب منهم بس خبطت في جسار ورجعت
لورا جامد لدرجة أنها وقعت على الارض

جسار سمع صوت ريم لما صرخت ولقاها واقعه
على الأرض وبتتوجع فساب الشاب من ايده وراح
بسرعة قعد قدامها : انتي كويسه ؟

ريم سكتت من الخوف والتوتر والاحراج وجسار
بصلها بتفحص لحد ما عينيه جت في عينيها ، قد ايه
عينيها جميلة جدا كأن البحر كله اتصب فيهم

جسار قرب منها أكثر وهو مغيب لحد ما هي اتكلمت
بصوت خافت بس بحزم وهي بتزقه في كتفه :
جسار باشا أبعد لو سمحت

جسار فاق لنفسه وبصلها وهي بتبص في الأرض :
ارفعي راسك لو سمحتي وماتعمليش كده فيا

ريم بصتلته : أعمل ايه ؟

جسار : تحرميني اغرق في عيونك

ريم وشها أحمر جامد ودموعها اتجمعت في عينيها
من التوتر والكسوف

جسار بحنية : ماتعيطيش ، طول مانا معاكي أوعى
تعيطي ، أنا موجود هنا لسعادتك وبس

الشاب اللي كان جسار ضربه قام وشاف جسار قاعد
على الارض قصاد ريم فطلع مطوة صغيرة من
هدومه وغرسها في جنب جسار اللي اتأوه جامد
وريم صرخت برعب

جسار بص جنبه لقي الشاب ده بيبتسم بشر : تستاهل
، عشان تمد إيدك عليا تاني

جسار قام من مكانه وقرب منه بهدوء مرعب :
وأنت فاكر ان اللعبة دي هتأثر فيا ؟ أنت عارف أنا
اخذت كام واحده من دي من وأنا ١٥ سنة ؟

طلع المطوة من جنبه ومسكه من هدمومه : أنا متعود
على الإصابات دي بس شكل القمور بقي مش متعود
عليها

وقام معوره بالمطوة على طول وشه كله فوق على
الارض وقعد يصرخ جامد

جسار بصوت زي الصخر : في ايه يالا ماتتشف كده
الله ، هو أنا لسه عملت حاجة ؟

ريم قربت من جسار ومسكت دراعه بخوف : لو
سمحت كفاية كده أرجوك

جسار فك تكشيرته وبصلها ببراءة كأنه ماعملش اي
حاجة : أنتى بس تؤمري

رمى المطوة جنب الشاب ونادى على واحد من
رجالته اللي كان قاعد معاه ولما راح لريم فضل
واقف بعيد : باشا

جسار : الكلب ده وقف نزيف وشه مش عايزه يموت
الراجل : تمام يا باشا

جسار راح شد ريم وراه ومشى وهي بخوف : أنت
متصاب

جسار : ماتشغليش بالك بيا

وصل عند عربيته وركبها وركب جنبها وبدأ يسوق
، شوية وحس بإيدين ريم على جسمه فبصلها : في
ايه ؟

ريم بدموع : أنت بتنزف جامد أنت مش حاسس ؟

جسار : انتى خايفه عليا ؟

ريم سكتت وبتعيط وبس وهو وقف العربية وقرب
من وشها وكرر : خايفه عليا ؟

ريم هزت دماغها باه خايفه وهو أبتسم : ليه ؟ افرق
معاكي في ايه عشان تخافي عليا ؟ مش أنا مزعج
وبخوفك وبقطع رزقك كمان

ريم بارتباك : هوا ، هوا انااااا ، أنت يعنيبي

جسار بيبيص على شفايفها وهي بتتكلم ومش عارف
يسيطر على نفسه فقرب منها أكثر وهمس : أنا
بحبك

ريم وشها أحمر وقلبها بيدق جامد وجسار كرر :
بقولك بحبك

ريم جات ترجع لورا عشان تبعد عنه بس هو كان
اسرع وحاصرها بدراعه وقربها منه

ريم بضيق : جسار باشا لو سمحت كده غلط

جسار : ليه غلط ؟ أنا عايز وانتى عايزه ليه غلط ؟

ريم بتوتر : حتى ولو كده غلط برضه وحرام

جسار قرب منها أكثر : يعني انتى كمان عايزانى
ابوسك؟؟ مشكلتك انه غلط بس ، مش انك رافضه
؟؟

ريم اتكسفت وحطت وشها في الارض وبصوت
خافت : لو سمحت يا جسار باشا ماينفعش كده والله
جسار : وأنا قولتلك هينفع

شغل العربية تاني وبدأ يسوق وحط ايده الثانية على
جنبه يمنع النزيف وريم قاعده في صمت ومش
متخيلة الموقف اللي هي فيه ده

وصل عند بيتها ووقف : سوري كان نفسي اوصلك
لفوق بس مش هقدر أنزل

ريم بصتله بخوف : طيب تعالا نروح المستشفى
الأول

جسار : اطلعي أنتى بس وأنا هروح

ريم : بس ، لا ، أنت بتنزف جامد ماينفعش اسيبك
كده ، افرض حصلك حاجة ؟ لالالا أنا مش هسيبك
كده

فضلت تتلفت حولين نفسها وهي بتدور على أي
حاجة توقف بيها النزيف : يا ربي ، أنت ليه تعمل

كده أصلا ، أنت متهور أوي ، أنت بجد مش طبيعي
ابدا

قلعت الكارديجان الطويل اللي كانت لبساه فوق
هدومها وحطته على جنبه بتحاول توقف النزيف بيه
وهي بتنهج وبتعيط ، وهو بيراقبها بصمت ، وبعدها
قرب منها أوي وهمس بتعب : تتجوزيني يا ريم
؟؟

ريم بصتله بصدمة: ده إزاي ؟ ايه اللي أنت بتقوله ده
؟ انت شايف ان ده وقته يعني ؟

جسار وهو بينهج من الوجع : ليه ؟ ايه المشكله ؟ أنا
بحبك وانتى _ انتى بتحبيني ؟

ريم عضت على شفايفها وهو كرر : بتحبيني ولا
لأ ؟

ريم : أنا ، أنا ، ممم ، احنا لازم نروح المستشفى
الأول

جسار كشر : أنتى بتهربي مني ليه ، فين المشكله
فهميني ؟

ريم فضلت تضربه على كتافه : أنت ايه يا بني ادم
أنت مش بتحس ؟ أنت بتتصفي قدامي وبتقولي فين

المشكلة ، عايزني أعمل ايه يعني اخذك في حضني
واقولك طبعاً موافقه ، ايه الجنان ده ؟

جسار أبتسم ومد ايده بتعب بيمسح نقط الماية اللي
على وشها من المطر بلطف : ياريت والله تعلمي
كده

طلع فونه وعطا هولها وهو بيتكلم بالعافية : شوفي
بقي ، رني على واحد هنا اسمه آدم ، أنا مش قادر
خلاص

الفون وقع من ايده واغمى عليه وهي بتعيط وبتحاول
تفوقه بس مش عارفه وهو مش بيتحرك ، سابته
ونزلت من العربية وطلعت جري على بيتها وخبطت
كثير لحد ما مامتها فتحت وأول ما شافتها شهقت
جامد : مالك يا ريم ايه الدم ده ؟

ريم : ب ، بابا فين ؟

وبتنادي : بابا الحقني يا بابا ، بابا

باباها طلع من اوضته برعب : في ايه يا ريم ؟

ريم راحت مسكت في ذراعاته وهي بترتجف : بابا
، الحقة تحت ، بابا

عبد الواحد : ريم أنا مش فاهم حاجة في ايه ؟

فرح طلعت من اوضتها على الصوت وريم بصتلها
بدموع : فرح ، جसार ، تحت ، روعي مع بابا

فرح ماكانتش فاهمه حاجه بس نزلت مع باباها وسما
قربت من ريم اللي قعدت تعيط على الارض : في
ايه يا ريم يا حبيبيتي ؟

ريم : انا السبب يا ماما ، أنا السبب

حطت ايديها اللي غرقانه بدم جसार على وشها
وفضلت تعيط جامد ومهما مامتها تسألها مش عارفه
ترد عليها من شهقاتها وصوتها المخنوق من كتر
العياط

فرح نزلت مع باباها وأول ما طلعت من العمارة
شافت عربية غريبه واقفه وبابها مفتوح ، قربت منها
بحذر وشافت جसार سايح في دمه جواها فصرخت
بخوف : بابا بابا بابا

عبد الواحد قرب بسرعة وأول ما شافه لقله وفتح
الباب ناحيته وحاول يفوقه بس ما عرفش فغير مكانه
بسرعه وركب العربية وساق على اقرب مستشفى ،
وفرح طلعت البيت تاني

دخلت وسندت علي الباب وهي مبرقه جامد وحاطه
ايدوها على قلبها وسما قربت منها : في ايه يا فرح ؟

فرح بصت لريم : هو ايه اللي حصل يا ريم ؟

ريم فضلت ساكته شويه بتحاول تاخذ نفسها وبعدها
حكتهم اللي حصل من بين شهقاتها وسما راحت
قومتها : طيب روي غيري لبسك ده واغسلي وشك
ونشوف عبده هيعمل ايه ؟

ريم قامت بصمت وسما بصت لفرح : مين جسر ده
يا بت أنتي ؟

فرح : ده اخو آدم بيه صاحب المطعم اللي أنا شغاله
فيه

سما : وده أختك عرفته منين ؟

فرح : عرفته ، ماما دي قصه طويلة هقولك بعدين
خليني دلوقتي أبلغ آدم بيه باللي حصل

سما : وأنتي تعرفي رقمه ؟

فرح وقفت وبصتلها بغباء : لا

سما : أومال هتبلغيه إزاي يا ذكية ؟

فرح سكتت وريم طلعت بعد ما غيرت وكانت رايحه
ناحية الباب بس سما وقفتها : رايحه فين تاني ؟

ريم : ماما لو سمحتي خليني اروحله ، أنا السبب في
كل ده خليني اشوف حصله ايه

سما : وأنتي مالك انتي ؟ مش ابوكي راح معاه
هتروحي أنتي تعمليله ايه بقي ؟

ريم : أعمل اللي اعمله بقي يا ماما سيبيني

مشت خطوتين بس مامتها شدتها جامد : لا مش
هسيبك يا ريم فهميني ليه كل ده أصلا وانتي مش
على بعضك كده ليه ؟ أوعي تكوني حبيته يابت أنتي
؟

ريم زعقت : ايوه يا ماما حبيته ، حبيته وهموت من
الخوف عليه ارتحتي ؟

سما: أنتي اكيد اتجنيتي، يعني أنتي سيبيتي كل رجالة
الدنيا وماحبتيش غير ده ؟

ريم : وماله ده بقي ؟

سما : ده من دنيا تانية ، أختك بتقول ده يبقى اخو
صاحب المطعم اللي شغاله فيه ، فكرك أنا ماعرفش
الناس دول ؟ من حكاوي أختك مطعمه لوحدده زي
القصر مبالك بعيشته بقي

ريم : مش هتفرق يا ماما ، أنا بحـ

سما قاطعتها بصوت عالي : فهمت إنك بتترفتي
تحبيه طيب وهو ؟

ريم : وهو كمان بيحبني ، هو قالي

سما : وانتى زي الهبله صدقتيه مش كده ؟

راحت مسكت دراعتها : يا بنتى الناس اللي زي دول
بيمشوا يدوسوا على خلق الله مش بعيد يكون بيتسلى
ولا بيقضي يومين وخلص ، لو كان شاريكي بجد
كان زمانه أتقدم لابوكي ودخل البيت من بابيه مش
يلف حوليكي ويتلصص من الشبايبك زي الحراميه ،
وبعدين أنتى إزاي تتكلمي معاه كده وتقعدي معاه
لوحدك ايه مش خايفه على نفسك ؟ إذا كان ربنا
سترها معاكي المرة الأولى الله أعلم ايه اللي ممكن
يحصل تاني

ريم دموعها نزلت بصدمة : قصدك ايه بقى ؟ انتى
بتعايريني يا ماما باللي حصل معايا زمان ؟ بتذاليني
؟

سما قلبها انتفض : لا والله مش بعابيرك أنا بس خايفه
عليكي يا بنتى

ريم بقهره : لا أنا فعلا بنت تجيب العار زي ما بيتقال
عليا ، متشكره أوي بجد

أخذت بعضها ودخلت اوضتها وفضلت تعيط من كل
 قلبها على نفسها وكانت هتموت من الخوف على
 جسار وهي مش عارفة حصله ايه

وبره سما قعدت تعيط على ريم وفرح واقفه مكانها
 بتعيط هي كمان ومش عارفة تتصرف إزاي

عبد الواحد أخذ جسار لحد المستشفى والمسعفين
 اخدوه منه بسرعة وعالجوه وعلقوله دم بدل اللي
 نرفته

دكتور : حضرتك والده ؟

عبد الواحد : لا ، أنا ما عرفهوش أصلا

الدكتور هز دماغه بفهم : طيب هو الحمد لله كويس ،
 زي مانت شايف كده جسمه عامل إزاي وده اللي
 ساعده ، كل العضلات دي حفظت الأعضاء من جوا
 وماحصلهوش أي ضرر جامد هو بس الجرح
 وخبيطناه وشوية وهي فوق بإذن الله بس حاول توصل
 لأهله لو تعرف

عبد الواحد : تمام يا دكتور متشكر

الدكتور مشي و عبد الواحد راح قعد جنب جسر لحد
ما فاق ، فتح عينيه بتعب وبص حوليه وادرك إنه
في المستشفى فقام بوجع وهو ماسك جنبه

عده : أنت كويس يا بني ؟

جسر بصله بعيون بتلمع : ابنك ؟

عده : اه في ايه أنا قولت حاجة غلط ولا ايه ؟

جسر : لا حضرتك ماتاخدش في بالك

سكت شويه وبعدها الاتنين قالوا في نفس الوقت : هو
ايه اللي حصل ؟

بصوا لبعض و عده أبتسم : مافيش يا سيدي الدكتور
قال جرح صغير

جسر : عارف إنه جرح صغير المطوة كانت
صغيره أصلا عايز أعرف بس أنا جيت هنا إزاي ؟
عده : أنا جبتيك ، ريم بنتي قالتلي عنك وأنا نزلت
وجبتيك هنا

جسر هز دماغه بفهم وهو بيوصله بشك : ممكن بقى
أنت تفهمني كنت مع ريم إزاي ؟

جسار بصله وشاف نظرات الشك في عيونه ، بس
حقه بنته وخايف عليها : أنا آسف حقيقي على
الموقف ده ، وماكانش نفسي أول مقابله بيننا تكون
بالصورة دي

عدل قعدته وهو بيئن من الوجع : بص حضرتك
ملخص القصة أنى مرة كنت بشتري ورد لاخويا
كان عايز يهديه لمراته وشوفت بنت حضرتك يومها
، آسف أعذرني على اللي هقوله بس أنا حبيت بنتك،
قبل ما تفهمني غلط أنا ماتكلمتش معاها غير مرتين
تلاته بس النهارده ومرة تانية كانت في المطعم اللي
فرح شغاله فيه وكانت جاية لشغل ، أنا بجد مش
عارف حبتها إزاي بس ده اللي حصل وكنت عايز
اطلبها من حضرتك بس

سكت شويه بوجع : بس هي ، مش عارف رافضه ،
قالتلي أبعد عن حياتها وإنها مش مستعدة تشارك
قلبها مع أي حد وأنا مش عارف أعمل ايه ؟
خلص كلامه وغمض عينيه بالم وهو بيضغط على
الجرح

عبده : طيب أرتاح دلوقتي شكل الجرح شادد عليك
جامد أرتاح

جسار نام وبصله : أنا آسف بجد على المنظر اللي
أنا فيه ده

عبده : ولا يهملك فهمني بقى عشان انا لسه مافهمتش
وأنت ماجاوبتش عليا ، بنتي كانت بتعمل معاك ايه ؟
ليه هدمها عندك في العربية وليه ايديها كانت
غرقانه بدمك كده ؟

جسار حكاه اللي حصل : أنا ماكانش قصدي حاجة
وحشه والله بس ده اللي حصل

عبده سكت شويه وهو بيوصله بتفحص بيحاول
يعرف هو صادق ولا لا

عبده : طيب دلوقتي أنت لازم تكلم حد من أهلك
عشان يجيلك

جسار بتردد : انا ، حضرتك أنا ماليش أهل

عبده : إزاي بقى مش قولت عندك اخ ؟

جسار : اه ، أنا بعتبره اخويا إنما هو صاحبي يعني
أو ممكن تقول الشخص اللي شغال عنده ، أنا مش
عارف أنت واخذ عني فكرة ايه بس أنا يتيم يعني و
، و

عبده : وايه ؟ مالك بتتكلم على ان اليتيم عيبه ولا
فضيحة كده ؟

جسار : مش قصدي هو بس يعني _____

سكت وماعرفش يقول ايه وعبده اتتهد : المهم كلم
أخوك ده ولا صاحبك وخليه يجي

جسار كلم آدم تحت مراقبة عبد الواحد اللي بيتابع
كل نفس بيطلع من جسار بتفحص وبطبيعة شغله
كدكتور نفسي قعد يحلل في شخصيته

شوية وادم جه جري برعب وأول ما شاف جسار
قرب منه بسرعة : جسار في ايه مالك ؟

بص على هدومه اللي غرقانه دم ورفعها وشاف
الشاش وبصله بصدمة : أنت قولت اتعورت ايه كل
ده ؟

جسار بص على جنبه : ماهي تعويره أهي هو أنا
كدبت يعني

آدم ضربه في كتفه : أنت بهيم يالا ايه ؟ دي خياطه
وشاش ودم ايه كل ده ؟

جسار بصله بضحك : محسني إنها أول مره يعني
، وبعدين دي حاجة بسيطة خالص

ادم كشر : بسيطة !! فين الدكتور اسأله ؟

قام يشوف الدكتور بس جسار شده جامد : يا بني
اتهد بقى قولتك مافيش حاجة والله

شده عليه أكثر وهمس : هتفضحني قدام الراجل الله
ياخذك

آدم بص على عبده اللي أخذ باله من وجوده : انا
أسف أوي يا حج ماخذتش بالي من حضرتك

عبده : لا ولا يهكم ، أنت اخوه ؟

آدم أبتسم : اه

عبده شاف ابتسامه آدم الصادقه وحس إنه مبسوط
بالاخوة دي : طيب هسيبه معاك بقى واتوكل أنا على
الله

آدم : حضرتك ساعدته و___

عبده قاطعه : ومش عايز حاجة في المقابل

آدم أبتسم : حضرتك فهمتني غلط أنا كنت عايز
أشكرك بس ، أصل نادر مابتلاقي حد بيساعد واحد
مايعرفهوش كده

عبده بصله : لا في كثير ولاد بلد وجدعان أوي بس
أنت اللي ماقابلتهمش

آدم أبتسم : لا قابلتهم ، حضرتك

عبده أبتسم : الله يعزك يا بني يلا عن إذنكم بقى أنا
همشي

جسار وقفه بسرعه : حضرتك هتفكر في اللي قلتلك
عليه ؟

عبده : أنا هشوف بنتي واللي هي عايزاه هو اللي
هيحصل

جسار هز دماغه بفهم وعبده استأذن ومشي

آدم بص لجسار : هو ايه ده اللي قولتله عليه وهو
مين ده اصلا وبنته مين واياه اللي حصل عمل فيك
كده هاه ؟

جسار نام على السرير وبصله : براحه على نفسك
يا عم ايه بلاعة واتفتحت ؟

آدم قعد جنبه : أنت بارد يالا على فكره وبعدين أنت
بقالك مده مش متظبط خالص وبقيت بتخبي عليا

كمان حاجات ، ممكن تفهمني بقى في ايه وإلا هفهم
 بطريقتي وحقيقي هز عل منك
 جسار أبتسم : لا ماتز علش أنا هحكيلك كل حاجة

وبدا فعلا يحكيه اللي حصل من ساعة ما شاف ريم
 أول مره لحد اللحظة دي و آدم طبعا ماتوصاش وفتح
 ماسورة الشتايم عليه لأنه خبي عنه كل ده

آدم : بس ايه بقى يالا ، طلبتها ونولتها

جسار بصله باستغراب : هي ايه ؟

آدم حط ايده على الجرح في جنبه : كنت بتقول
 يارب او عدني بواحد اتشلفط عشانها ، طلبتها
 ونولتها

جسار ضحك بعلو صوته : تصدق فعلا

اتأوه جامد و آدم طبطب على كتفه : اهدى ياعم مش
 عايزين الجرح يفتح تاني ، أرتاح شوية بقى

جسار هز دماغه بموافقه و غمض عينيه وسرح في
 ريم

على الناحية الثانية عبد الواحد روح البيت وأول ما
دخل الشقه لقي سما قاعده مستنياه : عبده اخيرا جيت
، قولي ايه اللي حصل ؟

عبده : يا ست اخد نفسي الأول في ايه ؟

راح قعد على الكنبه وهي قعدت جنبه : أنت مالك
غرقان دم كده ليه أنت كمان هو الواد مات ولا ايه ؟

عبده : انتى عايزاه يموت ؟

سما : مش كده بس ___

سككتت وهو : بس ايه يا سما ماتخبيش عليا حاجة

سما مسكت ايده : ريم يا عبده

عبده كشر : مالها حصلها حاجة ولا ايه ؟

سما هزت دماغها برفض و عيونها دمعت : ريم

بتحب الولد ده

عبده باندهاش : بتحبه ! عرفتي منين ؟

سما : هي قالتلي قولي هنتصرف إزاي في المصيبه

دي ؟

عبده باستغراب : فين المصيبه مش فاهم يعني ؟

سما : هو ايه اللي فين المصيبه ؟ حبها ليه لوحده
مصيبه ؟ شوف الناس دول فين واحنا فين
عبده سكت شويه : تعرفي ان الولد ده طلب ايد ريم
مني من شوية

سما برقت جامد : أنت بتهزر ، طلبها إزاي ؟
عبده : زي الناس يا سما هيكون إزاي ؟
سما : وأنت قولتله ايه ؟
عبده : ولا حاجة هشوف رأيها هي الأول واللى هي
عايزاه هو اللي هيكون

قاطعهم صوت ريم اللي خارجه من الاوضة وشها
أحمر من كتر العياط وبصوت مبحوح : وانا مش
موافقه

سما بغيط : يا بت أنتي هتجنيني ، منين بحبه وخايفه
عليه ومنين مش موافقه اتجوزه ، هو ايه عيني فيه
وأقول اخيه ؟

عبده : تعالي يا ريما يابنتي اقعدتي جنبتي هنا
ريم راحت قعدت جنبه وهو مسك ايديها : قوليلي
رافضه ليه ؟ انتي شوفتي منه حاجة وحشه ؟

ريم هزت دماغها برفض : لا ماشفتش حاجة هو
إنسان محترم وابن ناس وألف مين تتمناه وكل حاجة
بس أنا مش عايزاه

عبده : مش عايزاه ولا عايزاه بس الماضي هو اللي
بيمنعك ؟

ريم بصت لباباها بدموع لانه الوحيد اللي بي فهمها
دايما من غير ما تتكلم

عبده طبطب على شعرها بحنان : يا ريم يا حبيبتى
أنا مش هجبرك على حاجة ، أنتى عارفه أنى عمري
ما فرضت حاجة عليكى أنتى أو أختك ، يوم ما قولتيلي
يا بابا عايزة أفتح محل ورد فتحتهولك عشان حسيتك
هترتاحي بين الورد ، واختك لما جات قالتلي يا بابا
عايزة اشتغل في المطعم الفلاني سيبتها رغم ان
دراستها في الترجمة مالهاش أي علاقة بشغلها بس
سيبتها تجرب ، انا دايما سايبكم براحتكم تتصرفوا
وتشوفوا عواقب قرار تكم ، بس برضه من واجبي
أكلمكم لو شوفتكم بدأتوا تقعوا وانتوا مش حاسين ،
أنتى بنتي يا ريم اللي مربيتها على الحلال والحرام
ومعلمها الخوف من ربنا قبل الخوف من الناس
وعارف وواثق ومتأكد إنك مستحيل تعملي حاجة

غلط ابدا ، فكل اللي حصل من خمس سنين ده
 بالنسبالي ولا شئ، نكرة مالهوش قيمه هو وصاحبه،
 انتى مش معيوبه ولا غلطانه عشان تخلي كلام
 الناس يعمل فيكي كده ويحرمك من الحياة ، انتى
 دلوقتى بقى عندك ٢٩ سنه ولسه حزينه ووحيدته
 وبرضه أنا مش بقلل منك أنتى ست البنات كلهم ،
 بس مش نفسك زي أي بنت في زوج وبيت واسره
 صغيرة تعيشي معاها ؟

ريم بعياط : نفسي يا بابا ، ونفسي أوي وبموت كل
 يوم وأنا بشوف قدامي المخطوبة والمتجوزه
 والأطفال الصغيرين ، نفسي ابقى زيهم ، زوجه وام
 بس أعمل ايه مش بايدي ، كله بيحصل قدامك ، أي
 حد بيدخل البيت ده ويسأل عليا بيتقال ايه وهو يعمل
 ايه ، أنا تعبت أوي يا بابا وقلبي بيتعصر من الألم ،
 وده بالذات مش هقدر استحمل أسمع منه كلمه
 وحشه

رفعت وشها : انت عارف الكلمة الوحشة بتوجع
 أكثر من الشخص اللي بتحبه ، هو لو سأل عليا
 وسمع اللي بيتقال عني هيعمل زي اللي قبله وساعتها
 قلبي هيموت خالص ، مش هقدر والله استحمل

سما عيظت على بنتها وراحت اخذتها في حضنها
 وفضلت تطبظب علي ظهرها وعده اتهد بعنف :
 خلاص يا ريم اللي أنتي عايزاه أنا هعمله
 ريم هزت دماغها وفضلت مكلبشه في حضن مامتها
 وبتعيظ بصمت

بعد يومين جسر تعب فيهم من الانتظار اخيرا عبده
 رن عليه وقاله كل شيء قسمة ونصيب وماقالش
 حاجة أكثر مهما يسأل ، جسر قفل معاه وقعد مكانه
 عقله مش عايز يستوعب اللي سمعه ده

في يوم سولاف كانت قاعده مستنية آدم يرجع من
 شغله ، أول ما جه استقبلته زي عاداتها بحضن طويل
 أوي بتشبع منه على كل الساعات اللي بيغيبها عنها
 وهو كمان ضمها جامد كأنه عايز يدخل جوا حضنها
 ومايطلعش منه تاني

سولاف : حمد لله على سلامتك يا حبيبي

آدم : وحشتيني أوي يا قلب حبيبيك

سولاف : انت أكثر يا روجي

آدم بتنهيده : ياااه يا سولاف ، كلمة روجي اللي
بتطلع من بين شفايفك دي بتسحب روجي معاها
والله

سولاف مشت ايدها على ظهره بهدوء وحب : ألف
بعد الشر عليك

آدم : سولي أنا جعان

سولاف : تعالا كول أنا مجهزة الغدا

آدم بعد عنها : مالك يا سولاف حاسك مش طبيعية
مالك يا قلبي ؟

سولاف : آدم أنا عايزة اطلب منك حاجة بس خايفه
آدم مسك خدودها : معقوله خايفه مني ؟

سولاف هزت دماغها برفض : لا مش منك ، خايفه
من اللي أنا عايزاه

آدم مش فاهم حاجة فاخذها من ايدها ودخل اوضة
النوم وهو بيقلع الجاكيث بتاعه وحطه على السرير
وقعدا جنبه وقعد هو على الارض قصادها :
فهميني بقى عشان انا مش فاهم حاجة ، ايه اللي انتي
عايزاه وخايفه منه ده ؟

سولاف بتردد وهي بتفرك في صوابها : عايزة
 أزور ماما يا آدم ، عدى أكثر من سنتين من ساعة ما
 سبيت هناك ومازورتهاش ولا مرة

آدم : ماشي يا حبيبي نروح نزورها فين المشكله ؟

سولاف : خايفه

آدم : خايفه من ايه ؟

سولاف : خايفة من عيلة حسام وخايفه من الناس في
 المنطقة خايفه من المكان كله ، خايفه من كل حاجة
 يا آدم

آدم مسك وشها بين ايديه بحنيه : ماتخافيش يا
 حبيبي طول مانا معاكي ، واللي أنتي عايزاه كله
 هيتنفذ وماحدثش يقدر يعملك ولا يقولك اي
 حاجة

سولاف دموعها نزلت : بجد يا آدم ؟

آدم قرب من وشها وباس دموعها برفق : بجد يا قلب
 آدم

سولاف نزلت على الارض بين رجليه وحضنته
 جامد عشان تقوى بيه : هتخليك معايا

آدم ضمها أكثر لصدره : هخليني معاكي

اليوم عدى وتاني يوم آدم أخذ سولاف وراحوا طنطا ،
 وصلوا عند قبر حنان الأول وسولاف قعدت قدامه
 بهدوء وحطت ايدها عليه بشوق ودموعها غلبتها
 ونزلت وبصتله بحب : حبيبي عامله ايه ، يا رب
 تكوني في نعيم ، وحشتيني أوي يا أمي ، اعذريني
 عدى أكثر من سنتين ومازورتكيش ولا مرة ،
 غصب عني والله بس كنتي دايمًا في بالي يا اغلى
 الناس

آدم قعد جنبها على الارض وحط دراعه على كتفها
 وهي بصتله بحب ورجعت بصت للقبر : ماما احب
 أعرفك ، آدم جوزي وحبيبي وكل حاجة في حياتي ،
 كان نفسي حقيقي تكوني موجوده وتشوفيه كنتي
 هتحبيه اوي

آدم بيجاريها في اللي بتعمله : ازيك يا ست الكل ،
 كان نفسي أقابلك بس نتقابل في الجنة بإذن الله ربنا
 يرزقنا بيها ، عايز اطمنك بنتك معايا في أمان
 وهحافظ عليها لحد آخر نفس فيا

سولاف حضنت دراعه جامد بتطمن قلبها بوجوده
 وهو طبطب على ايدها وفضلوا قاعدين عند حنان

كثير بيقر أولها قرآن لحد ما سولاف تعبت من كتر
العياط والقاعده فادم اخدها ومشى

في العربية سولاف بصت لآدم : إحنا رايعين فين
دلوقتي كده ؟

آدم : مش عايزه تروحي بيتك القديم ؟

سولاف اتعلقت في دراعه : بجد يا آدم ؟

آدم : بجد يا حبيبي إحنا في طريقنا لهنالك

بعد أقل من نص ساعة وصلت عربية آدم تحت بيتها
القديم وكل الناس واقفين بيتفرجوا على الاغراب
اللي دخلوا المنطقة ، ف دي أول مرة يشوفوا فيها
عربية رولزرويس أو منظر عربيات الحرس ده

الحرس نزلوا من العربيات بهيئتهم المخيفة ووقفوا
حولين عربية آدم وهو نزل وبص على المكان حوليه
وعينه وقعت على معاذ اللي بيشاورله من بعيد
فابتسم وراح سلم عليه وزى عادته لما يبسلم على
صديق حضنه ، والناس مستغربين مين ده ومعاذ
يعرف ناس زي دول منين ؟

بعد شوية كلام آدم رجع عند عربيته تاني وفتح الباب
لسولاف ومدلها ايده وهي مسكتها جامد بتوتر
ونزلت بهدوء

الناس كلهم اندهشوا بسولاف اللي نزلت من العربية
ومش متخيلين ان دي هي أصلا ، فبعد اللي عرفوه
عن حسام واعدامه وهما ماتخيلوش إنها ممكن ترجع
هنا تاني

معاذ سلم على سولاف ووقف يتكلم معاهم شوية
وبعدا سابهم يطلعوا البيت ومشى هو على أشغاله

سولاف أول ما فتحت الشقة جسمها بدأ يرتجف
وكلبشت جامد في دراع آدم وهو ضمها لصدره
جامد بيشجعها ، خطت خطوة جوا الشقة وبصت
حولها وبدأت كل ذكرياتها تهاجمها ، دوشه كتير
احداث كتير ورا بعض مواقف وكلام وصور ،
عيونها بدأت تلمع بالدموع وحست بدوخه ، آدم حس
بيها فحضنها من ظهرها وحط دقنه على راسها :
حبيبي لو عايزة تمشي يلا

سولاف سندات عليه بظهرها وهزت دماغها برفض
: لا خيلينا ندخل

دخلوا ولفوا شوية في المكان لحد ما سولاف قعدت
مكانها وفضلت تعيط وتخرج كل اللي جواها لحد ما
نامت في حضن آدم وهو بيطبطب عليها بحنية

تاني يوم الصبح سولاف صحيت، فتحت عينيها وهي
حاسه إن في حاجة ثقيله مقيداها ، حركت راسها
بهدهوء لقت آدم محاوط صدرها بدراعه وضاممها
كالعادة وهي برضه كالعادة فضلت تبصله وتبص
لتفاصيل وشه اللي بتعشقها ، قربت منه اكرت وخبث
وشها في صدره وبتاخذ نفس طويل ورا الثاني بتشم
في ريحته اللي ادمنتها وفضلت كده لحد ما صحى
هو

آدم بص عليها وهي مستخبيه في حضنه وطبببت
علي كتفها براحه : صباح النور يا شمسي

سولاف : صباح الأمان يا سكاني

آدم أبتسم وشدد على حضنها : بقيتي أحسن دلوقتي
؟؟

سولاف : اممم أحسن كثير

آدم : خرجتي كل الكبت اللي جواكي ؟

سولاف هزت دماغها بايوه وهو طبطب براحه على
شعرها : طيب الحمد لله كده أحسن ارتاحي بقى
وريشي دماغك وقلبك شوية
سولاف دفنت نفسها في حضنه أكثر : خليك معايا
كده شوية

آدم : أنا معاكي يا حبيبي أهو ماتقلقيش
فضل واخدها في حضنه زي الأطفال لحد ما قدرت
تستجمع نفسها وتقوم من تاني ، وقاموا الاتنين
ينفضوا الشقة من التراب وهي كل شوية تشده من
دراعه توريه حاجة ليها ذكرى حلوة في قلبها
وتحكيه قصتها وهو كان مستمع جيد لأبعد حد ،
وشاركها ذكرياتها الجميلة عشان يرسخها في عقلها
أكثر ويمحي أي أثر للذكريات السيئة أو المؤلمة

العلاقة بين إياس وفرح اتوترت جدا بعد رفض ريم
لجسار وهي كمان بتحاول على قد ماتقدر ماتردش
على إياس كل أما يكلمها لحد ما جالها في يوم
المطعم زي العادة ووقف معاها في الممر اللي بين
المطبخ والمطعم بره

إياس : تاني ما بيرد عليا ؟

فرح : يا فندم _____

إياس بنرفزة : بتلي فندم دي بيدايقني أنا مش فندم أنا
إياس

فرح سكتت وهو قرب منها خطوة : أنا اجازتي
كلصت ، وبيسافر اتاليا بكرة

فرح بصتله بصدمة وحزن وبعدها اخدت نفس طويل
وبصت جنبها : وأنا مالي ، ماتسافر براحتك دي
حياتك وأنت حر فيها

إياس بضيق : وأنتى عادي كده ببسافر انا وابعد عنك
؟

فرح بكذب : اه عادي ولا فارق معايا كمان

إياس بصلها كتير وهو عارف كويس إنها بتكذب :
بتكدبي ليه يا فره ؟ مش أنتى بتقول الكذب هرام
بتكدبي ليه ؟

فرح بلخبطه : أنا ، أنا ، مش ، انا ما _____

إياس رفع ايديه باعتراض : كلاص مش بيكذب أكثر
كفاية عموما أنا كنت جاي بيقول أنا ببسافر ومش
بيعرف أنا بيرجع امتى أو برجع أصلا تاني ولا لا ،

ودي كانت آكر مهاولة مني أني بيقرّب منك وارتبت
بيكي بس انتى اللي مصمم برضه على الرفض
عطاها ظهره وردد جملة كان بيسمعها منها كثير :
ذنبى فى رقبتك يا فره

أخذ بعضه ومشي وهي قعدت على الارض تعيط
وبتضرب على قلبها جامد من الوجع اللي حاسه بيه
: أنا اسفه بس مش هقدر ، مش هقدر أعيش حياتي
وأنا شايفه اختى بتتعذب كده قدامي

آخر اليوم فرح راحت لريم زي عاداتها : ريمو
ريم بصتلها : حبيبتى تعالى ، أنا خلصت شغل أهو
وبقفل

فرح : ايه ده هتقفلى بدري أوي كده ؟
ريم اتنهدت تنهيدته طويلة بوجع : ايوه يا فرح هقفل
بدري كده عشان اللي واقف بعيد ده وتاعبلي
اعصابي

فرح لسه هتبص بره ريم مسكت وشها : ماتبصيش
مش عايزاه يعرف أني شيفاه

فرح انتهت : ولما أنتى بتحبيه كده بتعذبيه وتعذبي
نفسك معاه ليه ؟

ريم : أنتى عارفه ليه كويس

فرح سكتت وريم وقفت قدامها وبصت في وشها :
انتى كنتى بتعيطي ؟

فرح بتخبي وشها : مين دي اللي بتعيط أنا ، وهو في
حد يقدر يخليني اعيط أصلا

ريم : اه في ، اللي معيطك كده ومخلي وشك بالمنظر
ده ، قوليلي هو حد عمك حاجة ؟ ولا مايكونش
جسار زعلك تاني ؟

فرح هزت دماغها برفض وحضنت اختها وفضلت
تعيط : إياس هيسافر ايطاليا يا ريم

ريم : ده اللي هو قريب آدم بيه ؟

فرح هزت دماغها بتأكيد : هيسافر ويسيبني وبيقولي
مش عارف هيرجع امتى أو هيرجع أصلا تاني ولا
لا

ريم : طيب وانتى قولتيله ايه ؟

فرح : قولتله إنه مش فارق معايا أصلا يسافر ولا لا

ريم : ليه بس كده يابنتي مش ده إياس اللي بتحبيه
ليه تبعديه بالشكل ده ؟ هو في حد يلاقي الحب
ويرميه بعيد ؟

فرح بعدت عنها : طيب مانتى لاقيه الحب أهو
بتحديه على طول دراعك كمان

ريم بحزن : أنا ليا اسبابي يا فرح

فرح ربت ايديها بعند : وأنا كمان ليا اسبابي ،
مالكيش فيه بقى

ريم : واسبابك دي اللي هي أنا صح ، عشان انا
رافضه الارتباط أنتى كمان بتعاندي مع نفسك
وبترفضي ؟

فرح وددت وشها الناحية الثانية وسكتت وريم مسكت
كتافها : ليه كده بس يا فرح حرام عليكى نفسك ،
انتى لسه صغيرة وفي بداية حياتك ليه تحرمي نفسك
كده ؟

فرح : محسساني إنك يعني اللي كبيرة أوي أو
عنستي مثلا

ريم : ماتقارنيش ٢٢ ب ٢٩ الفرق كبير أوي أنا
خلاص كلها كام شهر واقفل ال ٣٠ وماحدث

هيطلبني اصلا على حسب العادات المتخلفة اللي
 إحنا عايشين فيها أما أنتي مختلفة لسه صغيره
 والحياة قدامك طويله

قاطعهم صوت جسار اللي دخل من باب المحل : أنا
 قولت نفس الكلام كده عنك بس ماحدثش عايز
 يسمعني والله ، أنتي لسه صغيره والحياة قدامك
 طويله

ريم بصتله واتهدت بضيق : حضرتك عايز حاجة ؟
 جسار وقف قدامها : اه ، عايزك

ريم أبتسمت ببرود: سوري يافندم طلبك مش موجود
 عندنا ممكن تدور عليه في مكان تاني

جسار : وقلبك هيطاوعك أروح ادور على حضن
 واحده تانية ؟

فرح رجعت خطوتين لورا وهي حاطه ايديها على
 بوءها مصدومه من وقاحة جسار على حسب وصفها
 ، وريم كشرت : اه هيطاوعني ، أنا مش فاهمه
 أصلا أنت جبتها منين أني بحبك دي ، مش فاهمه انا
 ؟؟

جسار قرب منها أكثر : اه بتحبيني ، شايف الحب في
عينيكى وحسيت بيه يوم ماتصبت وقعدتي تعيطي
جنبي ، حب ده ولا مش حب ؟

ريم : لا مش حب ده خوف مش اكثر

جسار بصلها كتير بغيض وبعدها بص لفرح : طيب
قوليلي أنتى هي رافضه ليه ؟ انتى أكيد عارفه صح
؟ هل انا وحش أوي كده ولا عشان مش قد المقام
يعني ؟

فرح بتسرع : لا مش حكا _____

ريم قاطعتها بصرامة : فرح

فرح بلعت الكلام وسكتت وجسار : قولى يا فرح
ماتخافيش ، فهميني في ايه ؟

فرح بصت لاختها اللي هتقتلها بنظراتها وجسار : يا
بنتي ماتخافيش قولى بس في ايه ؟

ريم بصتله بنرفزة : عايز تعرف في ايه اقولك أنا ،
وأنا هقولك عشان أنت كده كده هتعرف لو سألت اى
حد من جيراننا ، كل الفكرة انى بيتقال عليا خاط*ة
حلو كده ارتحت ؟

جسار برق جامد : ده اللي هو إزاي يعني مش فاهم؟

ريم : زي ما سمعت ، كنت مخطوبة لواحد من
خمس سنين وكانت الدنيا ماشيه تمام جدا وهو كان
بيمثل الاحترام باحترافية كبيرة لحد ما في
يوم_____

قعدت على الكرسي اللي جنبها ودموعها نزلت
وبتحكي بعياط : في يوم كنت لوحدي في البيت وهو
كان عارف ، قالي إنه عايزني في حاجة وأنا قولتله
مش هينفع انا لوحدي ولما ماما ترجع من السوق
يبقى يجي لو عايز ، قالي إنه بس هيديني حاجة
مهمه ويمشي مش هيقد

خبطت على قلبها بعنف : وأنا زي الغبية صدقته ،
ولما جه فتحته الباب على أساس اخذ منه الحاجة
وادخل على طول بس مالحقتش اخذ نفسي ولقيته
بيزقني جوا الشقه وحاول يتهجم عليا

بصتله : كنت مرعوبة ، ماعرفتش أعمل ايه غير
أنى أصرخ يمكن حد يلحقني ، ولما الجيران اتجمعوا
وهو لقي نفسه في ورطه قالهم أنى قولتله يجي البيت
بسرعة في مصيبه ولما جه حاولت اغويه وهو
رفضني وعشان كده صرخت عشان مافضحش
نفسي والبسه هو التهمه

حطت وشها بين ايديها وانهارت من العياط : والناس
 صدقوه ، صدقوا كلب مسعور رغم اننا جيرانهم من
 سنين وعمرهم ماشافوا العيبه مننا، صدقوا اللي اتقال
 وخاضوا في عرضي وعرض اختي وأمي وابويا ،
 اتقال علينا كلام كتير أوي عمري في يوم ماتخيلت
 اسمعه ، ومن يومها ماسلمتش من كلام الناس
 ونظراتهم في الرايحه والجاية ، وكل لما حد يجي
 يتقدم يسمع اللي اتقال عني ويزود من عنده اهانه
 وكلام مايتقالش ، حتى بعد ما عزلنا برضه ، فهمت
 ليه بقى مش عايزه ارتبط بيك ؟ لأنك لو سألت عني
 هتعرف كل ده وهتعلم زي اللي قبلك وأنا مش حمل
 اي وجع جديد

سكتت وهي بتاخذ نفسها وجسار بصلها شوية
 بصمت : خلصتي ؟

ريم رفعت وشها وبصتله : اه خلصت

جسار : ماشي قوليلي بقى أنا ايه علاقتي بكل ده ؟
 بتحكي لي ده ليه دلوقتي أنا مالي ؟

ريم باستغراب : هو أنت مش بتفهم يعني ؟ ما هو ده
 سبب رفضي ليك

جسار : لا فاهم بس بصراحه يعني أنا مش شايف
في كل كلامك ده اي مبرر لرفضني

ريم : بقولك _____

جسار قاطعها بنرفزة : عارف إنك قولتي وفهمت كل
حاجة ، كنتي متنيلة مخطوبة زمان وخطيبك طلع
واحد ابن ستين @\$@ وقال عنك كلام زي وشه أنا
مال امي بقى بكل ده ؟

ريم : أنت مش فارق معاك اللي بيتقال عني ؟

جسار : لا أكيد يفرق معايا

ريم بعياط : أهو شوفت

جسار اتتهد : أكيد هيفرق معايا يا ريم ، يعني لما حد
يتكلم عن حبيبتني كده اكيد هدايق وهزعل

راح قعد تحت رجليها : بما إنك ماتعرفينيش كويس
أحب أعرفك بنفسي ، أنا جسار وجسار مش اي حد
ابدا ، مش عارف هو والدك بلغك ولا لا بس أنا يتيم
، طول عمري عايش في الشوراع ولو كنت رميت
ودني لكل من هب ودب كنت هضيع وسطهم ، أنا
مش بصدق غير اللي بشوفه بعيني واللي أنا شوفته
منك بيقولي إنك بنت محترمة ومتربية وماتعمليش

كده ابدا ، وان كان هو قال الكلام ده فعشان
هو @\$# والناس اللي رددوا وراه @\$# منه
والناس طول الوقت بتتكلم سواء عملتي حاجة ولا لا
، يعني مثلا عندك أنا بيتقال عليا ابن حرام ولا
عمري اهتميت

ريم شهقت جامد : أوعى تقول على نفسك كده مش
كل الايتام بيكونوا ولاد حرام

جسار : ماشي يا ستي مش هقول

سكت شويه وبعدها قال بتردد : ريم إحنا لو فتحنا في
القديم وحكنا بيه فانتى مش بس هترفضيني أنتى
هتفي على خلقتي ومش بيعد تضربيني باللي في
رجلك كمان ، أنا ماضيا أبشع مما تتخيلي بس أنا
عمري ماتكسفت منه ولا خبيته لأنه كان سبب من
الأسباب اللي كونت جسار اللي قدامك دلوقتي ، كنت
بشع اه بس دلوقتي لا ، انتى كمان المفروض تبقي
كده ، زمان عدى خلاص بحلوه ومره بالعكس انتى
ماعملتيش حاجة تتكسفي منها وأنا واثق من ده
فارمي الماضي ورى ظهرك

وكمل بشر : والكلب اللي قال عنك الكلام ده اما
جبته تحت رجليكي مابقاش جسار

ريم : أنا مش عايزة حاجة منه خليه يروح مكان
مايروح مش عايزة أشوف وشه تاني
جسار : طيب ماشي كده بقى العقدة اتحلت ونقدر
نقول مبروك ولا ايه ؟

ريم بصت في الارض وسكتت وجسار بترجي : يا
شيخة بقى يا شيخة بالله عليكى أنا تعبت حسي بيا
شوية

بص حوليه واخذ وردة حطها على رجليها : التوليب
الأحمر معناها قوة الحب ، بصي أنا مابفهمش في
الورد بس عشانك اتعلمت

قاطعتهم فرح : والله ما هارين عليا اقطع اللحظة
الجميلة دي بس بصراحه عقلي مش قادر يستوعب ،
المنظر مش لايق على الكلام خالص
جسار : ده أنا ؟

فرح هزت دماغها بتأكيد وهو بصلها بضيق وريم
ضحكت عليهم

جسار بصلها : ضحكت يعني قلبها مال
فرح كملت : وخالص الفرق ما بيننا اتشال
ريم : انتوا هتغنوا ؟

جسار : أنا هعمل اي حاجة عشان خاطر عيون
البحر دي

ريم اتكسفت وهو قال بحب الدنيا كله : او عدك
ريم هزت دماغها بموافقة وجسار بص لفرح :
زغردي يا سعاد

الإثنين ضحكوا وهو بص لريم وعينيه بتلمع جامد
من السعادة : هاین علیا أقوم احضنك دلوقتی بس
عارف أنى هضرب

ريم ضحكت : ايوه كده أتعلم

جسار بجدية : أنا بجد محتاج أتعلم حاجات كثير يا
ريم مش بهزر ، هتعلميني ؟

ريم هزت دماغها بموافقة وهو أبتسم بسعادة وحب
وفرح واقفه بنتفرج عليهم وماسكه دموعها بالعافية
وهي بتفتكر إياس ، حبيب قلبها اللي سابها لو حدها
وسافر

جسار : هطلبك من والدك تاني هتوافقي ؟

ريم بصت في الارض بكسوف وسكتت وجسار :
السكوت علامة الرضا

آدم وسولاف فضلوا في طنطا كذا يوم وآدم وداها
 لكل صحباتها اللي كانت عايزة تشوفهم وزميلاتها
 في المستشفى اللي كانت شغالة فيها زمان وسارة
 ومامتها وكل الناس ، وكان بيحاول على قد ما يقدر
 يبعدها عن أسرة حسام عشان ما حدش يقولها حاجة
 تزعلها وطبعاً بوجود الحرس حوليهم مافيش حد كان
 بيتجراً يقرب منهم غير بإذنهم

وفي اليوم اللي المفروض يروحوا فيه اسكندرية آدم
 صحى بدري قبل سولاف وراح غير لبسه ووقف
 جنبها وبيبص عليها وهي نايمه

سولاف كانت نايمه بهدوء وبتحرك ايديها على
 السرير لفته فاضي ، لسه هتقوم آدم مسك ايدها
 وقرب من وشها : ايه يا روجي في ايه ؟
 سولاف وهي لسه نص نايمه : أنت قومت ليه من
 جنبي ؟ قرب هنا
 آدم أبتسم بمكر : متأكد إنك عايزانى أقرب ؟

سولاف فتحت عينيها باستيعاب ولاحظت لبسه
فقامت : أنت رايح فين ؟

آدم : هروح أجيب فطار عشان يا دوب نفطر
ونمشي

سولاف : هي الساعة كام ؟

آدم وهو بينيمها تاني : لسه بدري ، نامي شوية كمان
سولاف بصت في عيونه : إزاي بتطلب منى أنام
وأنت حضنك بعيد عني ؟

آدم قرب منها : لا ده أنتي مصممه بقى

سولاف أبتسمت وهو باس خدها بحب : نامي شوية
لحد ماجي

سولاف هزت راسها ومسكت ايده حطها تحت خدها
ونامت وهو مراقبها بصمت لحد ما حس بنفسها انتظم
سحب ايده بهدوء ومشى

نزل من البيت وراح قابل معاذ اللي سلم عليه

معاذ : أنت متأكد من اللي هتعمله ده ؟

آدم بيبيص لبيت حسام اللي واقفين قدامه : اممم
متأكد

معاذ حظ ايده على كتفه : ما بلاش صدقنى ده هياثر
على علاقتك بسولاف حتى لو حاولت تمنع نفسك
بس مش هتقدر

آدم : مافيش حاجة في الدنيا تقدر تأثر على علاقتي
بسولاف ، عارف إن مش دي الطريقة الصح بس
حظ ايده على قلبه : عايز أريح ده ، فكرة إن حاجة
تخص مراتي في بيت راجل تانى بتولع في قلبي
ومش قادر اسيطر علي غيرتي

معاذ : بس ده مات خلاص ماعدش ليه وجود

آدم : ولو

معاذ سكت بتفكير : طيب بص أنا عندي فكره

آدم بصله وهو كمل : ساره اختي ، تيجي هي تملك
كل حاجة سولاف في شنته وأنت اتصرف فيها
بمعرفتك

آدم لسه هيعترض بس معاذ مسك كتافه : صدقتي
كده أحسن بلاش أنت تطلع فوق مش هتقدر تستحمل
وعقلك مش هيرحمك من اللي هتتخيله بعد ماتشوف
البيت ، أنا راجل زيي زيك و عارف أنا بقولك ايه أنا
لو مكانك وشوفت شقه جوز مراتي السابق ممكن

أموت نفسي ، اسمع الكلام وخلي سارة هي اللي
تطلع

آدم فكر شوية ومعاذ طبطب على كتفه : كده أحسن
طلع فونه ورن على سارة اللي خلال وقت قصير
كانت عنده

سارة بضيق : في ايه يا معاذ قلقتني ، حد يرن على
حد بدري كده ؟

معاذ : معلىش يا سوسو بس محتاجك في مهمه
سارة : مهمة ايه ؟

قعدوا كلهم في كافيه قريب ومعاذ بدأ يشرح : آدم
عايز يطلع شقة حسام ياخذ منها حاجة سولاف

سارة بصت لآدم باستغراب ورجعت بصت لآخوها
: يعني ايه حاجة سولاف مش فاهمه ؟

معاذ : حاجاتها الشخصية يا سارة مالك أكيد مش
حلل وصوانى يعني

سارة هزت دماغها بفهم : وأنا جايه ليه ؟

معاذ : عشان أنتى اللي هتطلعي تلمي حاجتها في
شنته كده وتنزلي ، ماينفعش آدم يطلع بأي شكل

سارة بخوف : لالا يا معاذ ، أنت عايزني اطلع عند
الست المسعورة اللي فوق دي لا مش هيحصل
معاذ بحزم : سارة احترمي نفسك، ويلا عشان هطلع
أنا وأنتي خلينا نخلص آدم مش فاضي
سارة بصتله بتردد و آدم قام وقف : قولتلك بلاش من
الأول هطلع أنا ، مراتي وأنا الـ
معاذ قاطعه بحزم : أنا قولت كلمتي خلاص أنت
هتقعد هنا وأنا وساره هنروح نجيب الحاجة ونيجي
اهدى بقى

بص لاخته بصرامة : قومي

ساره قامت بتردد : خلاص حاضر ماتز عقليش كده

آدم قعد بتردد ومعاذ أخذ أخته وراح لبيت حسام ،
قابل محمد الأول وبعد كلام فهمه الوضع ومحمد بعد
تردد راح معاهم الشقه وفتح لهم

معاذ فضل واقف بره وساره هي اللي دخلت لمت
كل حاجة سولاف من الشقه هدوم ومستلزمات
شخصية وكريمات وميكاب وكل حاجة حرفيا حتى
صورها اللي حسام كان طابعهم ومعلقهم على

الحيطة ، وحطتهم في شنطة سفر كبيره وخرجت
لمعاذ وهو دخل تاني يشيك على كل حاجة لحد ما
لاحظ كاميرات المراقبة واستغرب جدا وكان
مصدوم

بص لمحمد : انتوا مركبين كاميرات مراقبة في
البيت ؟

محمد دخل عنده وبص مكان مايشاور وخبط كف
على كف : لا حول ولا قوة إلا بالله العلي العظيم ،
هي وصلت لكده ؟

معاذ : أنا آسف يا عمي بس مش هينفع اسيبها هنا
محمد بكسره : حقكم يابني ، شوف هتشيلها إزاي أنا
مابفهمش في الاجهزة الحديثة دي

معاذ حرك راسه بفهم وجاب سلم وبص على
الكاميرات لقاها سهل يفكها هو من غير متخصص
فشالهم كلهم ولف في الشقة تاني يتأكد إن مافيش
كاميرات تانية لحد ماوقف قدام الحمام وقال بسخرية
: أكيد يعني مش هيحط في الحمام

مشي خطوة ورجع تاني بص بصره يريح ضميرة
بس اتصدم لما لقي كاميرا جوه : ده مختل اف
أستغفر الله العظيم

دخل وشال الكاميرا بضيق وطلع ، وطلب من محمد
 يستخدم فون حسام وأي جهاز كمبيوتر وفعلا محمد
 سمحله وهو مسك كل الاجهزة عملها سوفت وير
 عشان يمسح اي حاجة كانت في الكاميرا ومتوصله
 بالاجهزة واخذ الكاميرات حطهم في كيسه سودا
 وعطاهم لسارة : حطيمهم في الشنطة مع باقي
 الحاجة

سارة حطت الكاميرات في الشنطة وهي مذهوله هي
 كمان ، ومعاذ أخذ الشنطه منها ونزلوا بهدوء زي
 ماطلعوا عشان مايتقابلوش مع سهير ولو عن طريق
 الصدفة

جسار كلم عبد الواحد تاني عشان يطلب ريم منه
 عبد الواحد : أنت يابني مش بتزهق دي خامس مره
 تكلمني ؟

جسار : والله أنا ادفع عمري عشان خاطر اسمع
 كلمه ابني دي منك اللي بتحرك قلبي ، وعموما لا
 مش بزهدق وهفضل كده لحد ما توافقوا

عبد الواحد صعب عليه جبار أوي اللي نفسه يحس
 إنه مش يتيم وعنده اسره زي باقي الناس واتنهد بقلة
 حيلة على عناده في موضوع بنته : ماشي يا جبار
 أنا هسألها تاني بس دي آخر مرة وبعدها خلاص أنا
 بنتي مش لاقيتها في كيس بنبوني عشان ازهقها كل
 شوية

جبار قال بينه وبين نفسه : لا هي من ناحية البنبوني
 فهي بنبوناية فعلا ، حته سكراية يا ربي من
 جمالها

اتنحج ورد على عبد الواحد : متشكر أوي بجد ،
 وان شاء الله المرة دي خير

عده قفل معاه وقعد بصمت مش عارف يقول لبنته
 إزاي ، هو زي أي اب خايف على بنته وعائز يطمئن
 عليها في بيت راجل يحبها ويحافظ عليها من بعده
 بس في نفس الوقت مش عائز يوجع قلبها كل شوية

آدم كان قاعد على أعصابه لحد ما معاذ رجع وخط
 الشنطه قدامه : اتفضل يا سيدي ادي الحاجة

آدم : متأكد ده كل حاجة تخصها ؟

معاذ بص لسارة وكرر السؤال : اخدتي كل حاجة ؟

سارة : ايوه أنا لفيت الشقة كلها عشر مرات واخذت
أي حاجة نسائية في البيت ومتأكده إن مافيش دبوس
طرحه حتى خرج من تحت ايدي ماتقلقوش

آدم اتنهذ براحه وبصلهم : متشكر اوي على وقفتم
معايا

معاذ طبطب على كتفه : ماتقولش كده إحنا أخوات

ساره مدت ايدها بفون مكسور : ده بتاع سولاف أنا
عارفاه بس مش عارفه ايه اللي كسره كده ؟

مدت ايدها بمذكرة بتردد : وديي مذكراتها

آدم اخدهم وحطهم في جيبه وشكرهم تاني واخذ
الشنطة ومشى ومعاذ اخذ اخته ومشى هو كمان

.

آدم بيبيص لواحد من رجالته : عايز أروح مكان
فاضي مافيهوش حد

الحارس باستغراب : مكان فاضي !!

آدم بتأكيد : اه ، شوفلي مكان صحرا مافيهوش روح

الحارس حرك راسه بفهم واخذ آدم لمكان بعيد عن
العمار وهو نزل من عربيته واخذ الشنطه اللي فيها
حاجه سولاف وحطها على الأرض ووقف بصمت
قدمها لفته وبيفكر ، يفتحها؟ يشوف فيها ايه؟ مد ايده
بتردد يفتح الشنطه بس تراجع في آخر لحظه وبص
للراجل اللي واقف جنبه : معاك ولاعه ؟

الحارس : اه يا باشا معايا

آدم مد ايده وعينه على الشنطه : طيب هاتها
الحارس خرج الولاعه من جيبه باستغراب وعطاهه
: عايز سيجاره ؟

آدم بصله : أعمل بيها ايه ؟

الحارس بيشاور على الولاعه : تشربها
آدم : أنا مش بشرب سجائر ، معلىش روح استنى في
العربية لحد ماجي

الحارس هز راسه ومشى وآدم بص للشنطه ومسك
الولاعه شغلها وولع في الشنطه باللى فيها وفضل
واقف لوقت طويل جدا قدامها وفي ايده المذكرة اللي
سولاف كاتبه أيامها فيها ذكريات كثير ومواقف أكثر

، وصل لحد فتره جوازها من حسام وبيقراً بغيره
بس مالقاش غير شكوى وبس ، من مامته ، منه ، بدأ
الكلام يتحول من شكوى لرعب واضح خوف منه
ومن تصرفاته ، و آدم بيقراً وقلبه بيوجعه على خوف
حبيته اللي حسه من كلماتها ، طيب ياترى هي كان
ايه احساسها ساعتها ؟ بيحرك صوابه على الورق
المكرمش مكان الدموع اللي نشفت عليه، اتنهذ بعنف
وولع في المذكرة هي كمان وحدها فوق الشنطة
وبيبص عليهم بيتحرقوا لحد مابقوا رماد وماتبقاش
منهم حاجة نهائي ، ومشى ركب عربيته في صمت
والحارس ساق لحد البيت ومد ايده بكييس : باشا ده
فطار

آدم بص للكييس اللي كان ناسيه واخده وطلع الشقه ،
دخل لقي سولاف صاحيه وبصتله بلهفه أول ما دخل
: آدم اتأخرت أوي كده ليه ؟؟ كل ده بتجيب فطار
؟؟

آدم حط كيس الفطار على الترابيزة وشدها عليه
دفنها في حضنه : سوري يا حبيبي
سولاف بادلته الحزن بدفى أكبر وهو رفع وشها ليه
وبيبصلها بتركيز هي مستغرباه

سولاف : مالك ؟ ايه اللي غيرك كده في الكام ساعه
دول ؟

آدم هز دماغه يمين وشمال : ولا حاجة أنتى بس
وحشانى

قرب منها واخدها في حضنه وراحوا لعالم تانى
خاص بيهم وكأنه عايز يثبت لنفسه إنها مراته هو
وبين ايديه هو وحضنها ليه هو وبس

.

وبعد وقت طويل آدم عاشة مع حبيبته في محاوله
منه يطفى نار غيرته عليها اخدها ورجعوا تانى
اسكندرية

عبد الواحد قاعد سرحان بيفكر في مستقبل بنته
وطلب جزار للجواز منها
سما قطعت تفكيره : مالك يابو ريم ، قاعد كده ليه
؟؟

عبد بصليها : الولد اللي اسمه جزار ده

سما : ماله ؟

عده اتهد : طلب ايد ريم تاني ومصمم ومهما ا قوله
برضه منشف دماغه على الآخر

سما : وانت هتتصرف إزاي ؟

عده : أنا قولتله دي آخر مرة ، هسألها وبعدها
خلاص

سما بتوجس : بس هو أنت ضامن الولد ده أصلا
يابو ريم ؟ يعني الولد يتيم_____

عده قاطعها : وفيها ايه يا سما لما يكون يتيم ، هو
اليتيم عيب ولا حرام ؟

سما : مش قصدي كده عارفه إنه لا عيب ولا حرام
بس يعني الولد مالوش كبير وماشي كده يلطش في
الدنيا ولا حد فارقله ، أنت نسيت موضوع ماتخائق
واتضرب بالمطوة ؟

عده : لا مش ناسي يا سما ومش ناسي برضه ان
كل ده كان بسبب بنتك ، الولد كان هيموت فيها
عشان بس ماحدثش يدايقها بكلمه ، وكان ممكن يروح
مستشفى على طول بس إختار يوصل بنتك الأول
بيتها ويظمن ان ماحدثش هيقربلها تاني وبعدها يفكر
في نفسه

سما سكتت وعبده كمل : عموما أنا سألت عليه ناس
 كثير والشهادة لله كلهم قالوا عنه كلام كويس غير إنه
 غشيم شوية بس ، واتفكمت معاه كذا مره وبرضه
 ماشفتش منه حاجة وحشه ، يمكن اه اخلاقه شوية
 عايزة تتقوم بس هو من جواه نضيف وبيقبل الكلام
 وبيحاول يصلح من نفسه أنا كمان قعدت مره اتكلمت
 مع الولد اللي اسمه آدم ده وحكالي قصة حياته كلها
 وبصراحة بغض النظر عن الغلطات اللي عملها
 وهو صغير الا إنه راجل بجد وأنا لو كان عندي ولد
 زيه كنت هبقى مبسوط بيه جدا

سما بقمصه : خلاص يا عبده طلا ما أنت شايف
 كده

عبده ضحك وباس ايديها: طيب وانتى لاوية بوز ليه
 دلوقتي هو أنا قولت حاجة تزعل ؟

سما بدموع : لا ماقولتش بس أنا خايفه على بنتي يا
 عبده إزاي عايزني ارميها كده لواحد لا نعرفله أصل
 ولا فصل عادي ؟

عبده : وعملنا ايه يا سما باللي عرفنا اصله وفصله ؟
 طلع إنسان حسبى الله ونعم الوكيل فيه ودمر البت
 بكلامه وافعاله

سما دموعها نزلت : وأنت تعرف منين إنه لو سمع
 عن اللي حصل مايعملش زيه واسوء منه كمان ؟
 عبده مسحلها دموعها بحنيه : ماتعيطيش يا حبيبتى
 مافيش حاجة تستاهل دموعك الغالية دي وبعدين إحنا
 لسه مانعرفش ، أنا هقعد معاه الأول وهفهمه كل
 حاجة ولو ماصدقش الكلام كان بها صدق يبقى
 يروح لحال سبيله من بره بره ولا يجي جنب البت
 ولا يوجعها

قاطعهم صوت ريم : هو عارف كل حاجة
 عبده بصلها : تانى يا ريم بتتنصتى علينا ؟
 ريم باحراج : مش قصدي والله يا بابا أنا بس سمعت
 كده كلام وانا معديه
 سما بصتلها : أنتى قولتى يعرف ، عرف منين ؟
 ريم : أنا قولتله

عبده كشر : وانتى قابلتية فين ؟
 ريم اتنهدت بتعب وراحت قعدت تحت رجليه : بابا
 جسار بيفضل واقف جنب المحل بتاعي طول اليوم
 بحجة إنه خايف اللي حصل قبل كده يحصل تانى

وكل أما اقوله يمشي يقولي وهو أنا كنت واقف فوق
دماغك أنا واقف في شارع عام

سما بضيق : عيل قليل الذوق ايه ده ؟

عبده : وبعدين عرف إزاي ؟

ريم : مرة كنت قاعده مع فرح بنتكلم وهو دخل في
الحوار وفضل يسأل فرح أنا رافضه ليه ولح كثير
لحد مانا انفجرت فيه وقولت كل حاجة غصب عني

سما بلهفة : وهو قال ايه ؟

ريم ضحكت : قالي وأنا مال امي بكل ده

سما كشرت وبصت لزوجها : مش بقولك الولد ده
مش متربي يا عبده شايف الألفاظ

عبده عمال يبص لريم وشايف الحب والسعادة في
عيونها : وانتى عارفه انه كلمني من شوية صح ؟

ريم بصت في الارض وسكتت وهو : يعني عارفه ،
ها قوليلي بقى عايزة ايه ودي آخر مره خلاص يا
ريم عشان نقفل الموضوع ده ؟

ريم بكسوف وصوت خافت : موافقه يا بابا

أخذت بعضها ودخلت جري على اوضتها وسما
بصت بسعادة لعبده : وافقت يا عبده

عده أبتسم : ربنا يهنيها ويعوضها عن كل اللي
شافته

عدت الأيام وجسار اتجوز ريم وكان مبسوط جدا إنه
اخيرا بقى في حضن حبيبته

في يوم الفرح اللي جسار أصر يعمله عند بيتهم
القديم عشان يخرس السنة الناس اللي بيتكلموا عنها
جاب الشاب اللي افترى عليها واللي حياته اتقلب
فوق دماغه بسبب خوضه في شرفها وكان عايش في
جحيم بسبب عقاب ربنا ليه

أعترف قدام كل الناس إنه هو الغلطان وريم بنت
محترمة وما عملتش اي حاجة وقعد يعتذر لها كتير
لدرجة إنه كان هينزل بيوس رجليها عشان تسامحه
ويرتاح من العذاب اللي هو عايش فيه

جسار بعد مارجع كرامة ريم المهدورة الناس كلهم
اعتذرونها ولأسرتها بس هينفع بايه الاعتذار بعد
الكسره والوجع ؟

الفرح خالص وجسار أخذ عروسته وروح بيته ، بيته
 اللى هو لحد دلوقتي مش قادر يصدق إن بقى عنده
 بيت خاص بيه هو عماده ، وعنده زوجه مسؤوله
 منه ومسؤول منها ، دخل الشقه وبص حوليه كل
 حاجة متغيره ، كل حاجة حوليه فيها لمسه أنثوية
 غريبة ولطيفه أوي ، دخلته للبيت المره دي مختلفه ،
 حاسس البيت جديد عليه دافي وهادي

قطع سرحانه صوت ريم الهادي : جسار في ايه ؟
 جسار بصلها وهي بتبصله باستفهام فابتسم : مافيش ،
 أنا بس مش مصدق أنى أخيرا اتجوزتك

ريم أبتسمت بكسوف ومسكت ذراعه بتردد : لا
 صدق أنا وأنت اتجوزنا بجد

جسار أبتسم بحب وبعدها بصلها بمكر كأنه افكر
 حاجة وبيقرب منها بهدوء وهي بترجع مع خطوته
 لورا : هو في ايه ؟ بتقرب كده ليه ؟

جسار قرب منها لحد ما حاصرهما بين صدره
 والحيطة وراها : كنتى بتقوليلي قبل كده جسار باشا
 ماينفعش كده ، كده غلط

ريم قلبها دق بسرعه وتوتر وهي فاهمه تلميحاته
وحاولت تنسحب بس هو كتف ايديها في ايديه :
ماتهر بيش

ريم بتوتر : انا ، اناا هو اا يعنبيي—

جسار ماسمحلهاش تكمل كلامها وكان قرب منها
بهدوء وباس شفايفها بلطف وهو بيحاول يهدي قلبه
الملهوف عليها

بعد مده ريم حطت ايديها على صدره بخجل بتبعده
وهو بصلها وبيهمس : ماتبعدنيش كده ، أنا مش
بعمل حاجة غلط دلوقتي

ريم أبتسمت بتأكيد : مش غلط لأ بس بدري أوي
جسار بعدم فهم : يعني ايه ؟

ريم مسكت دراعه : ندخل نصلي الأول

جسار : نصلي !!

ريم بهدوء : المغرب راح علينا والعشاء أذن ،
ماينفمش كده

بصت لعيونه : لو عايز تاخذ حقه من السعادة بجد
لازم تدي الدين حقه ، الصلاة أهم حاجة في الدنيا يا
جسار وماينفمش تضيع لأي سبب ابدا مهما كانت

الظروف ، واللى إحنا عملناه ده أننا فوتنا المغرب
 كان غلط كبير اوي ومالناش عذر فخلينا نصلح
 غلطنا الأول ، نقضي المغرب ونصلي العشاء
 وبعدها نعمل كل اللي نفسنا فيه عشان ربنا يباركلنا
 في حياتنا

جسار هز راسه بفهم وهي أبتسمت بحب وسحبته
 وراها لجوه ، غيروا واتوضوا وصلوا جماعه وبعد
 ما خلصوا جسار بصلها : امبارح آدم حفظني دعاء
 المفروض اقوله بعد ما نخلص صلاة

حط ايده على جبينها وهي أبتسمت وهو دعائها
 وأبتسم بهدوء وفضل يبصلها بصمت لفتره طويله
 وهي مترقبه هيعمل ايه بعد كده لحد ما قالت بخفوت
 : جسار !!

جسار : أنا عايز منك حاجة واحده بس دلوقتي

ريم : ايه هي ؟

جسار : عايزك تخديني في حضنك ، حاسس أني
 تعبنا اوي طول عمري بجري بدون ماقف وعايز
 أرتاح شويه ، عايز أحس بالسكن والراحه ولو مره
 واحده

ريم : من يوم ورايح هتחס دايمًا بالسكن بإذن الله ،
 أنا هفضل طول الوقت موجوده عشان ترتاح
 فردت دراعتها ليه وقالت بهدوء ممزوج بخجل
 محبب لقلبه : تعالاً

جسار قرب منها بهدوء ودفن نفسه في حضنها كأنه
 طفل صغير مستخبي من الدنيا كلها في حضن مامته
 وهي بتمشي أيدها على ظهره برقة والاتنين دقات
 قلوبهم العالية بتمتزج مع بعضها وماحسوش بنفسهم
 وحضنهم بيتحول من احتياج لرغبة وحب ومشاعر
 كثير جديده عليهم هما الاتنين وراحوا لعالم تانى
 خاص بيهم

على الناحية الثانية ادم وسولاف راحوا بيتهم متأخر
 بعد فرح جسار

آدم دخل حذف نفسه على الكنبه : ياااه يا جده ، ألا
 موضوع صاحب العريس ده طلع مرهق بشكل
 سولاف أبتسمت وهي بتقلع الكعب اللي كانت لابساه
 وحطته بنظام جنب حذاء آدم : مرهق بس جميل ،

إنك تكون الشخص الأقرب للعريس أو العروسة
وتساعده في تفاصيل أكثر يوم مميز في حياته ،
حاجة جميلة أوي

آدم بصلها وسند ذراعاه على ظهر الكنبه وسند راسه
عليه : ماتيجي أقولك حاجة سر

سولاف ضحكت بصوت عالي ودخلت اوضتها :
خليهاك يا عمري أنا رايحه أغير

آدم قام وراها : استنى بس ، مش قصدي اللي فهمتية
دخل الأوضة وراها كانت فكت الطرحه وهو زي
عادته شال التوكة من شعرها فرده : كده أحلى

سولاف : تعبتني بموضوع شعري ده

آدم : شكلك قمر وأنتى فرداه

سولاف حاوطت رقبتاه بدراعها : أنت غريب أوي ،
أنا أسمع إن معظم الرجاله بيحبوا الشعر المفرد ،
أموت وأعرف أنت عاجبك شعري في ايه ؟

آدم : أولا بعد الشر عليكى من الموت ، ثانيا اديكى
قولتى اهو معظم مش كل ، مش هنكر إن الشعر
المفرد حلو بس أنا بحب الكيرلي اكثر ، وبعدين

حتى لو مش بحبه هحبه مخصوص عشانك ، عشان
أنا بحب كل تفاصيلك يا سولاف

سولاف أبتسمت برضا وهو نعكشها شعرها أكثر
وظبطلها القصة الصغيره اللي أصر عليها تقصها
من فترة قريبة : تعالي نعمل فشار وعصير ونسمع
فيلم

سولاف بسرعه : رعب لأ ، أنت بتجيب أفلام
تخوف أوي

آدم بمكر : وهو ده المطلوب عشان تفضلي طول
الليل حضناني

سولاف : على فكرة أنا ممكن أفضل حضناك طول
الليل من غير ماتنشف دمي عادي يعني

آدم ضحك : طيب تعالي وهنختار على ذوقك بس
بلاش أفلام الكرتون اللي بتجيبها

سولاف بصتله بمكر وهي بتحرك راسها بموافقه
وراسه ابتسامه كبيرة على شفايفها ، وفعلا راحوا
صلوا و عملوا فشار وعصير وقعدوا يتفرجوا على
رابونزل بعد ما سولاف مشت كلامها على آدم زي
كل مرة ، عادي جدا

عدت الأيام وجسار بيعامل ريم بكل حب وحنية
ورقة ماحدث قادر يصدق إنها تخرج من واحد زيه
، وهي كمان عوضته عن كل سنين التشتت اللي
عاشها وغرقتة في حبها وبدأت تصلح معاه اخطاءه
براحه كأنه طفل صغير لسه بيتعلم وهو كان
بيستجيب ليها بسرعة

كمان عبد الواحد اللي كان مبسوط بيه جدا واعتبره
زي ابنه وبيعامله على اساس كده وهو قلبه مش
سايح كل السعادة اللي بقى فيها كده فجأة

سما كمان بعد ماتعاملت معاه وشافته إزاي بيعامل
بنتها حبه وبتعامله كأنها أمه بالظبط

أما فرح ف دي على الله حكايتها ، هما الاتنين مش
مبطلين شتيمة وتهزيئ في بعض

في مطعم جميل على البحر قاعده لوجين بتاكل بتوتر
ولؤي قاعد قصادها بيتفرج عليها لحد ماتكلم بزهدق :
كفاية

لوجين بصتله بحزن وسابت الشوكة من ايدها :
خلاص خلصت

لؤي اتهد بعنف : بقول كفاية توتر مش آكل ، كفاية
تعملي حساب للناس على حساب نفسك ، كولي
بالطريقة اللي تريحك وبالشكل اللي يعجبك وطز في
كلام الناس ورأيهم

لوجين بصتله بعيونها الواسعه اللي بتلمع بالدموع
وهو وابتسم وسند دراعه على الترابيزة وبايده الثانية
طبطب على خدها : اوعي تزعلي نفسك عشان حد
يا لوجينا ، اللي مش عاجبه ماييخش علينا ، زي
ماحنا مش بنتدخل في حياة حد ماحدش ليه الحق
يتدخل في حياتنا

مسك الطبق اللي كان قدامه وحطه قدامها : أنتي
بتحبي المولتن كيك ، كوليها

لوجين : بس يا لؤي دي بتبهدل الدنيا أوي وأنت
عارف أنا بوقع على نفسي و_____

لؤي قطع كلامها بعطف : وماله ، بهدلي زي مانتي
عايزه وأنا هصلح وراكي ، اعلمي اللي تعمليه
براحتك ماحدثش ليه حاجة عندك

قطع حته من الكيك بالشوكة وقربها منها : يلا افتحي
بوءك

لوجين اتكسفت وبصت للناس حوليها وлли كانوا
للحقيقة مركزين معاهم جدا

لؤي : لوجينا بصيلي أنا ممكن ؟ مالكيش دعوة بحد
، ركزي معايا أنا

قرب منها الشوكة أكثر وهي اكلت الكيك بكسوف
ممزوج بسعادة ماليه قلبها إنه دايمًا مهتم بيها
وبتفاصيلها وعمره ماتكسف منها في يوم

سمعوا بنت قاعده على ترايبزة قصادهم ومعها شاب
واضح إنه زوجها من الدبل اللي لابسينها في ايدهم
الشمال بس كان بياكل وهو بيلعب في فونه ومش
مهتم بيها ، البنت بصوت خافت بس وصل للؤي
ولوجي : يخربيت المحن على المسا ، وهي يعني
كانت اتشلت في ايدها عشان تأكلها قدام الناس ؟

لؤي بصلها : يخربيت الحشرية على المسا ، وهو
إحنا كنا قولنالک تحشري مناخيرک في حياتنا وتبصي
علينا ؟

البننت اضايقت وبصت لزوجها عشان يدافع عنها أو
يقول أي حاجة بس هو زي ماهو ماسك الفون ومش
مهتم ، بصت للأكل قدامها وفضلت تسب وتلعن فيه
وفي نفسها لما سمعت كلام مامتها وخالتها واتجوزت
جارهم ده اللي كان شغال في الخليج ولسه راجع من
فترة ، قالولها هيهنيكي ويغرقك في فلوسه وهي
سمعت كلامهم ووافقت تتجوزه

بصت عليه بضيق وهي بتكلم نفسها : تعالوا شوفوا
الهنا اللي أنا فيه

بصت بطرف عينيها على لؤي اللي بيأكل لوجي بكل
حنيه وبيضحكوا مع بعض بخفوت وحست إنها
هتعيط فقامت تدخل الحمام

دخلت غسلت وشها وظيفت الميكاب بتاعها ولسه
هتخرج لقت لوجين داخله تغسل ايديها ، بصتلها
بحسد وحسره على نفسها بس لوجين أبتسمت بلطافه
ووقفت قدامها : ممكن مش تزعلي من لؤي ، هو
بس مش بيحب حد يزعلي بالكلام

البننت فضلت ساكته ولوجين كملت : عارفه إنه مش
سبب عشان يقولك كلام شرير عشان كده أنا بتأسف
ليكي

البننت لاحظت طريقة كلام لوجين اللي مش لاقيه
على سنها ولمحت أطراف صوابعها اللي بترتجف
فصعبت عليها : ماحصلش حاجة ، أنا اللي قولتلكم
كلام يدايق الأول

لوجين حركت ايدها قدام وشها : لا إحنا مش زعلنا
مش تقلقي خالص

البننت حركت راسها بموافقه ، والاتنين سمعوا
صوت لؤي بره بينادي على لوجين فهي بصت
للبننت بابتسامة جميلة زيها : لؤي بينادي همشي أنا
بقي

البننت شاورتلها وهي مشت ببطئ لبره والبننت
مراقباها : فعلا ، الواحد مش بياخد كل حاجة في
حياته

لوجين خرجت للؤي ومسكت دراعه : أنا جيت
لؤي : نورتي قلبي

لوجين أبتسمت والبنت خرجت من الحمام هي كمان
فلؤي كشر وخاف تكون عملت حاجة للوجين بس
هي عدت من قدامهم بهدوء وهمست جنب لؤي : أنا
أسفه

مشت ولؤي بص عليها باستغراب بس ماهتمش
واخذ لوجين وروحوا

وصلوا بيت مامت لؤي الأول عشان يسلموا عليها
وأول مادخلوا لقوا جنة قاعده في الصالون وحاطه
كتب وورق على التراييزة الازاز الصغيرة قدامها
وقاعده على الأرض وهي بتشد في شعرها من كتر
المذاكره

رفعت راسها وبصتلهم : ايوه بقى يا عم ومين قدكم ،
انتوا تروحوا تتفسحوا وأنا هنا مسحوله من كتر
المذاكره

لؤي : فقريه هانم شيلي فقرك من علينا إحنا مش
ناقصين

سوسن طلعت من المطبخ بابتسامه : حمد لله على
السلامة يا حبايبي

فتحت دراعتها فلوجين اترمت في حضنها عشان
سوسن تطبطب عليها وتبوس راسها بحب : اتبسطي
يا حبيبيتي النهاردة ؟

لوجين : أوي أوي يا ماما ، لؤي فسحني على البحر
وروحنا اكلنا اكلنا

بصت للؤي بعيون القطط عشان ينقذها فهو ابتسم :
مولتن كيك

لوجين أبتسمت: ايوه دي، وجابلي عصير ومصاصة
كمان

جنة بهزار : يابختك

لؤي : أعوذ بالله من شر كل حاقد وحاسد

جنة ضحكت وسوسن طبطبت علي شعر لوجين :
الحمد لله إنك اتبسطي ، قوليلي نفسك في حاجة تانية
النهاردة ؟

لوجين حركت راسها بإيجاب : خلونا نقعد كلنا مع
بعض وتحكينا حدوتات

سوسن : ماشي يا حبيبيتي

جنة : وأنا كمان عايزة اقعد معاكم

لمت كتبها وحطهم بعيد تحت نظرات لوجين اللي
مركزة على الكتب

لؤي : مالك يا لوجينا ؟

لوجين بصتلته بكسوف : مش في حاجة

لؤي قرب منها بهدوء : نفسك في كتب زي دي ؟

لوجين : بس مش ينفع ، قبل كده كنت في مدرسة
والمدير قال لماما أني مش ينفع أفضل في المدرسة
دموعها نزلت : وأني يعني أغبي من أني أفهم اللي
بيقوله

جنة وسوسن بصولها بحزن على كسرة نفسها ولؤي
مسحلها دموعها : نفسك تدرسي انتي كمان ؟

لوجين بصتلته : نفسي أوي

لؤي : نفسك تدرسي ايه ؟

لوجين : الرسم ، نفسي اذاكر الرسم وابقى رسامة
كبيرة أوي

لؤي : من عيوني حاضر

لوجين بحزن : بس مش ينفع ، أنا غبية أوي ومش
ينفع أروح المدرسة

لؤي : أنتى مش غبية أنتى أجمل بنت فى الدنيا كلها
 ، ولو على المدرسة أنتى دلوقتى كبيرة إنك تروحي
 المدرسة بس فى حاجة اسمها ورشة رسم ، ده بيبقى
 مكان كده بتتعلمي فيه الرسم من الألف للياء وتقدرى
 ترسمي فيه زي ماتحبي

لوجين عينها لمعت جامد بشغف : بجد أقدر أروح
 الورشة دي واتعلم الرسم ؟

لؤي باس رأسها : ايوه يا حبيبتى تقدرى

لوجين حضنته جامد : أنا بحبك أوي يا لؤي

لؤي لسه هيقولها وأنا كمان لقي جنة بتتط فوق ظهره
 وهي بتقول : وأنا كمان بحبك أوي يا لؤي

لؤي : انزلي يا قردة ، انزلي يا بت

جنة نزلت من على ظهره وشدت لوجين من ايدها
 بلطف : تعالي يا لولو نتفرج على باقى فيلم عروسة
 البحر

لوجين اتحمست أوي وراحت معاها وسوسن خلصت
 المواعين و عملت فشار للعيال وانضمت ليهم ولؤي
 اتنهد بقلة حيلة وراح قعد جنبهم بعد ما عطي لجنة
 كيس المصاصات والشوكولاته اللى كان جايبهالها

وفضلوا الأربعة سهرانين مع بعض لحد ما لوجين
وجنة ناموا على كتف بعض ، لوى شال جنبه دخلها
اوضتها وراح شال لوجين وجه يطلع شفته اللي فوق
شقة مامته

سوسن وقفته : لوي

لوي بصلها وهي بصتله بفخر : أنا فخورة أن عندي
ابن زيك

لوي أبتسم وباس راسها : ماكنتش هبقى كده لولا
تربيتك يا أمي

سوسن طبطبت علي كتفه وهو اخذ لوجين وطلع بيته

«ايه يا جماعة شيفاكم فرحانين ومبسوطين يعني !!
عشان كده قولت أما انكد عليكم شوية وافكركم
بعقارب الرواية ونروح سوى بقى لقصر
الهارون»

دولت بقت بتقعد كتير مع تمارا اللي بتحاول تتغير
واحدة واحدة أما مروان عمال يحاول مع باباه إنه
يتجوز تمارا بس هو رافض وهو مش عارف يعمل
زي آدم ويحطهم قدام الأمر الواقع ولا ايه ؟ بس هو
مايقدرش يعمل كده ، آدم قلبه أجمد منه ومش بيخاف
من حد بس هو لا مش كده

آدم في يوم بعد ما طلع من المطعم بتاعه راح لدولت
يظمن عليها في سكتة وهو مروح عشان بقاله مده
ماراحلهاش ، وبعد ما قعد معاها شوية قالها إنه
هيروح بقي عشان سولاف لوحدها

دولت نزلت معاه هي و هند يوصلوه لحد باب القصر
، نزل السلالم ولسه رايح ناحية الباب لقي كمال
قدامه وبيصله بطريقة غريبة

كمال بتوهان : أنت ليه عملت فيا كده ؟

آدم باستغراب : عملت ايه مش فاهم ؟

كمال : حرمتي من حبيبتي

آدم : فريال ؟ وهو أنا كنت جيت جنبها ؟ ماهي واقفه
وراك أهي

كمال بص على فيري اللي واقفه وراه هي عاصم ،
ومروان وتمارا قربوا منهم هما كمان عشان يعرفوا
في ايه

كمال بص لأدم : لا مش دي ، دي مش حبيبتى أنا
بتكلم عن جمالات

أدم كشر جامد : جمالات مش حبيبتك ، جمالات
حبيبتى أنا وتخصنى أنا وأنت مالکش اي دعوة
بيها

كمال مسكة من هدومه بعنف : لا يا أدم ، جمالات
دي حبيبتى أنا ، مراتى وحبيبتى وكل حاجة كانت ليا
وبسببك أنت كل ده راح ، حياتنا اتقلبت وفي الآخر
ادمرت خالص

أدم مستغرب هو بيقول ايه ودولت وقفت بينهم
وزقت كمال بعيد : سيب الولد في حالة يا كمال
وبطل تلوم فيه على كل حاجة ، أنت اللي غلطت
وأنت اللي تستحمل نتيجة غلطك

كمال : أنا ماغلطتش في حاجة ، وبطلت بقى تدافعي
عنه لأنك عارفه إنه سبب كل اللي إحنا فيه

فيري قربت منه بتوتر ومسكت دراعه : كمال حبيبي
 أنت شكلك تعبان أوي ومش مركز ، تعالا أطلع
 اوضتك ارتاح شوية

كمال زقها بعيد عنه جامد لدرجة إنها كانت هتقع
 على الارض وزعق: ماتلمسنيش وماتقوليليش حبيبي
 دي ، أنا حبيب جمالات وبس

عاصم : لا بجد كده كتير أنت سكران ولا ايه ؟

كمال : لا مش سكران

راح وقف تاني قدام آدم وشال النظارة من على وشه
 : بتلومني على ده وأنت السبب فيه اصلا ، أنت اللي
 وصلتنا كلنا لده

دولت زعقت : كفاية بقي

آدم : لا يا نانا مش كفاية خلية يقول اللي عنده ،
 فهمني بقي أنا عملت ايه بالظبط عشان اتعاقب
 بالمنظر ده

كلهم حاولوا يوقفوا كمال عشان آدم مايعرفش حاجة
 بس كمال زعق : باللاس بقي ، خلوه يعرف ، خلوه
 يبعد عن حياتي بقي يمكن تتعدل تاني

راح شده بعنف من هدمه لدرجة إنها كانت هتقطع
 في ايديه : انت السبب في كل العذاب ده لأنك شبهها
 كده ، هي كانت خاينه وأنت كنت نتيجة خيانتها دي ،
 لو أنت ماكنتش موجود ماكنتش عرفت اي حاجة
 وكنت فضلت عايش بهدوء

آدم برق جامد : مين دي اللي خاينه ، جمالات ؟

كمال : ايوه زفته

آدم بعد ايديه بعنف : ايه اللي أنت بتقوله ده! جمالات
 مين اللي خاينه ؟

كمال : ايوه جمالات كانت خاينه، كانت تعرف واحد
 ثاني غيري وكانت على علاقة معاه وهي مراتي
 وأنت كنت نتيجة الخيانة دي

آدم بيهز دماغه جامد برفض : لأ ، لأ ، لأ ، لأ ، لا
 كلامك أكيد غلط ، جمالات مستحيل تعمل القرف
 ده

كمال ضربه جامد في كتفه : لا عملت وأنت أهو
 النتيجة

آدم كشر : بطل بقى ، أنا متأكد ان جمالات مستحيل
 تعمل كده ، ولو عايز تتأكد نروح نعمل DNA

كمال بسخرية : وأنت فكرك ماعملتش ، لا يا بابا أنا
عملته من ساعة ماكتشفت الموضوع، برضه فضلت
أنكر زيك واقول جمالات مستحيل تعمل كده، وقولت
هتبت ده لكل بس اثبت لنفسي إنها فعلا خاينه وأنت
ماطلعتش ابني ، جمالات مثلت علينا كلنا العفة
والشرف وهى فى الحقيقـ

ماكملش كلامه من القلم اللي نزل على وشه من
دولت اللي زعقت : اخرس قطع لسانك يا حيوان ،
جمالات دي أشرف من الشرف وعمرها ماعملت
حاجة حرام ابدا

آدم واقف مصدوم من كل حاجة وكمال زعق قصاد
مامته : لا عملت وكله كان على يدك ، انتى أول حد
شاف التحاليل اللي بتقول أني عقيم وال دي ان ايه
اللي بيثبت إنه مش ابني

دولت زعقت : شوفت اه ورقتين مضروبين من
دكتور ماعندهوش لا ذمه ولا ضمير ، تقدر أنت
تثبتلي صحة الورق ده ؟ أنا قولتك ميت مره مراتك
العقربة واخوك هما اللي ورا كل ده وأنت برضه
بهيم ومش عايز تفهم

آدم بصدمه : نانا ايه اللي انتى بتقوليه ده ؟

دولت بصتله : بقول الحقيقة ، الحرباية القذرة اللي
 جمالات كانت بتعتبرها زي اختها وبطبيتها الغبية
 كانت بتحكيها عن كل حياتها بصفوانية وهي
 استغلت ده ضدها ووقعت بينها وبين جوزها ، ولفت
 عليه زي الحية لحد ما سمت دماغه بشرها واللي
 ساعدها توصل للي هي عايزاه هو اخوه البيه
 المحترم

عاصم بصلها بصدمة ودولت : ايه كنت فاكر إنك
 عرفت تتيمني على وداني ووصلت للي أنت عايزة ،
 بس انا كنت عارفه كل حاجه ، عارفه إنك شيطان
 رجيم عايش وسطينا استغليت غياب أخوك اللي ماشي
 وراك زي الحمار ووسوست في دماغه واقنعتة ان
 جمالات بتخونه وزورت كل الأوراق الحقيقيه عشان
 تسبك الدور ، ومن الناحية الثانية الشيطانه دي لفت
 عليه وعرفت تقنعه ان جمالات بتمثل الشرف وهي
 ماية من تحت تبن لحد ما بلقت عقلة وملكتة في ايدها
 ، مش كده ؟

كمال : لا ما حصلش ، أنا اتجوزت تاني مخصوص
 عشان كده ، اتجوزت فيري اه عشان اقهر جمالات
 على خيانتها بس كان في سبب تاني

شاور على تمارا اللي واقفه بصدمة جنب مروان :
 تمارا واختها ، فريال كانت متجوزه قبلي وخلفت
 اتنين وده معناه ان مافيهاش عيب في الخلفة ،
 اتجوزتها عشان اثبت اني فعلا عقيم وحصل ، كل
 شهر كنت بتابع مع دكتور وماكانش في حمل
 بيحصل ولا حاجة

دولت : اااااااه ، دكتور خميس اللي كانوا بيدوله كل
 شهر قد كده فلوس على قلبه عشان يثبتاك خطتهم ،
 ولا دكتور خميس اللي اجهض مراتك و عملها عملية
 شالت فيها الرحم وانت نايم في العسل ؟

فيري برقت جامد بصدمة وكمال : نعم ، ايه ؟؟

دولت : مش بقولك انك بهيم ، مراتك كانت بتستغفلك
 يا كبد أمك ، حملت منك مره وسقطت ولما تعبت
 شالت الرحم عشان الموضوع مايتكررش تانى وانت
 غبي برضه ، مهما أحاول افهمك أنت برضه غبي
 وبتدافع عنهم وتقولي فين دليلك ومصمم تسمع
 لاخوك والحرباية دي

كمال بصلهم : ساكتين ليه ؟

دولت : عايزهم يقولوا ايه ؟ عايزهم يقولوا إنهم فعلا
 عملوا كل القذارة دي ونيموك أنت ؟

كمال بص لعاصم : أنت حلفت قبل كده إنك مالکش
اي دخل في حياتي قول تاني ، قول واثبتلهم إنهم
غلط

عاصم سكت شويه : لا ليا يا كمال ، أنا اللي ورا كل
ده فعلا

كمال بصدمة: أنت عملت كل ده؟ يعني كل دي كانت
كدبه منك ؟ يعني جمالات مش خاينه و آدم بيبقى ابني
فعلا ؟ طيب ليه ؟

عاصم زعق : عشان انت أخذت مني حاجة مش من
حقك فكان لازم أخذ منك كل حاجة تملكها

كمال باصصله بعدم فهم وهو كمل بغضب وكره
وغل الدنيا كله : جمالات ، اخدت مني جمالات ،
جمالات اللي حبتها من ساعة ماشفتها أول مره مع
ابوها في الحفلة ، حبتها وحكيتك ساعتها ان في بنت
بحبها وعازب اتجوزها بس أنت خطفتها مني ، روحت
اتجوزتها لا وكمان عشت معانا في نفس البيت
عشان تحرق قلبي عليها كل دقيقة

كمال : أنا فاكر إنك قولتلي فعلا إنك بتحب بنت بس
ماقلتليش إنها جمالات ، ماكنتش اعرف

عاصم : لا كنت تعرف يا كمال ، كنت عارف
وعشان كده اخدتها مني ، طول عمر ك كنت كده
تحب تاخذ اللي في ايدي من وأنت صغير وعشان أنا
الكبير لازم اديك اللي معايا واسكت

بص لدولت : وكله على يدك ، طول عمر ك ظلماني
ودايما بتحرميني من كل اللي بتمناه وتديه لعيالك
كمال وكار ما صح كده ؟ مش دول برضه عيالك وأنا
لا ؟ ابن جوزك مش كده ؟

دولت اتصدمت وهو : اه كنت عارف ، ابنه من مراته
الأولى اللي ماتت بالكانسير وانتي اللي اخدتي من
بعدها

دولت : ايوه ابنها صحيح بس أنا عمري ما فرقت
بينك وبينهم ، أنت كنت ابني البكري اللي ماخلفتهوش
، عطيتك كل اللي بتمناه من حب ومادة بس أنت
اللي نفسك مريضة وناقص ودايما عينك فارغه
وباصص على اللي في ايد غيرك ومش شايف اللي
معاك

عاصم بص بعيد وكمال سأل : طيب حتى ولو أنا
اديتك ليه تاذي جمالات وأدم ؟

عاصم : عشان هي رفضتني ، بعد ماتجوزتها أنت
 أنا حاولت اقنعها تتطلق واتجوزها بس هي رفضت
 لااا وكمان حملت منك وجابت آدم ، سافرت ساعتها
 عشان ماقدرتش استحمل كل ده ولما رجعت
 اتجوزت عشان أحاول أنساها بس ماقدرتش ،
 ماقدرتش اشوفها مبسوفة كده فكان لازم اكسرها
 واذلها ، ولسه ابنها كمان اللي شبهها ده همحيه من
 على وش الأرض عشان اقطع كل حاجة ليها علاقة
 بيها

كمال : أنت ايه يا بنى آدم ايه كل الغل والشر ده ؟

بص لفريال : وانتى معاه في كل العك ده ؟

فيري: ايوه معاه مش مشكلتي بقى إنك غبي وصدقت
 التمثلية العبيطه دي

كمال : وهي كانت عملتك ايه لكل ده ؟

فيري بحقد : عملت كتير ، كانت دايمًا احسن مني ،
 أجمل مني اطيب مني اذكى مني وانضف مني ،
 بتلبس الحرير والألماس وأنا بكمل باقي عشايا نوم ،
 اللي بتشاور عليه بيجيلها تحت رجليها وأنا تتفضل
 عليا وتشحتني فلوس أو لبس ، وفي الآخر حتى
 الراجل اللي حبيته اخدته مني

كمال شاور على نفسه وهي : لا مش أنت يا كمال ،
عاصم ، اه انا حبيت عاصم وهو ماكانش شايف غير
جماليات وانا نكرة بالنسبالة ومهما حاولت معاه هو
مش حاسس بيا فكان لازم اسرق منها حبيبها زي ما
سرقت قلب حبيبي مني ، لفيت عليك وأنت كنت
غبي مش زي عاصم ووقعت بسهولة

كمال : عاصم برضه ! عاصم ؟ وانتى بتقولها في
وشي كده ؟

فيري زعقت : ايوه يا كمال هقولها في وشك وفي
وش اي حد ، أنا حبيته ولسه بحبه لحد دلوقتي وكل
مرة بتنام معايا فيها بتخيله هو اللي معايا

كمال برق جامد وهي : زي مانت بتعمل وتقع
تنادي باسم جمالات وأنت معايا

آدم بصوت اشبه بالعياط : كفاية ، كفاية كفاية
كفاية ، كفاية

زعق بكل صوته هز القصر كله : كفاية بقى ، كفاية
قذارة وانحطاط بقى ، كفاية كده كفاية

بص لعمه : أنا طول عمري عارف إنك إنسان جشع
وبتموت في الفلوس بس عمري ماكنت اتخيل إنك
بالقذارة دي كلها

بص لفيري : اما انتى فكنت عارف إنك قذرة بس
ماتوقعتش كل ده ، انتى بجد اقدر مخلوقة على وش
الارض

بص لكمال : وأنت ، أنت

دموعه نزلت وبصوت مكتوم ومهزور : أنت ، أنا
مش مسمحك ابدأ ، عذبت امي بدون بينه لحد ماماتت
رغم إنك كان ممكن تتأكد بشوية فلوس ، أنت معاك
فلوس تحرك مصر كلها وكان ممكن توصل للحقيقة
بكل سهولة بس أنت اللي غمضت عينيك وقفلت
ودنك وكنت مبسوط باللي بيحصل ده ، عذبت فيا أنا
كمان ومارحمتش ضعفي وأنا صغير ولا وجعي وأنا
كبير ، دايمًا بتقولى مايشرفنيش ببقى عندي ابن زيك
وأنا النهارده بقولها لك ، أنا مايشرفنيش ببقى ليا اب
زيك ، أنا من النهارده يتيم ، أنا ابويا مات خلاص

دولت مسكت دراعه : آدم لأ

آدم شد دراعه منها بعنف لأول مرة : ماتلمسنيش ،
انتى كمان خدعتني ، كنتى بتاخدينى في حضنك
وتطبطبي عليا وانتى عارفه بكل اللي بيحصل من
ورا ظهري ومخبية ، انتى كمان كدبتى عليا

دولت دموعها نزلت : كنت عايزني اقولك ايه ؟
القدارة دي ؟

آدم : ايوه كنتي تقولي القذارة دي ، كنتي تفهميني
ايه اللي بيحصل بدل مانا عمال ألوم نفسي وانحر في
قلبي بذنب مش ذنبي

زعق جامد : كنتي تقولي ماكنتش دوست على
كرامتي وقلبي وغصبت نفسي أنى استحمل كلامهم
وتصرفاتهم السامة معايا ، بس انتى كدبتى عليا
بص لهند : وانتى ؟

هند حركت دماغها برفض وهي بتعيط ودولت : هند
ماتعرفش اي حاجة من ده

آدم بص لمروان : وأنت ؟

مروان هز دماغه بسرعه : ماعرفش حاجة والله
ماعرف

آدم : حتى لو كنت تعرف ، مش هيفرق انت قدر
زيهم بالظبط وكنت مابتصدق تلاقي حاجة وتلوى
دراعي بيها ، استغلّيت حبي ليك وانك مهما بتعمل
بقول معلش اخويا ولسه صغير وكننت بتسوء فيها
أكثر

رجع خطوتين لورا وبصلهم كلهم : أنا بكرهكم كلكم
، ومش مسامحك ابدأ

بص لهند : ما عادي انتي

سابهم ومشي بسرعة كأنه بيهرب من الجحيم وركب
عربيته وساق زي الصاروخ لبنيته

دولت بصت لعيالها : مبسوطين صح ؟ خربتوها
وقعدتوا على تلها ، يا رب تشبعوا باللي انتوا
عملتوه

بصت لمروان اللي بيعيط هو كمان : عشان كده
قولتلك فكر قبل ماتتصرف ، أبوك شيطان وعمك
حمار وانت كنت اسوء منهم

بصت لهند : عارفه أني غلطانه بس أكيد انتي
هتفهميني

سابتهم وطلعت اوضتها وهند دخلت المطبخ وفضلت
تعيط بانهييار بكل وجع

مروان بص لباباه : أنا ماتخيلتش ابدأ إنك تطلع كده ،
ابدا

سابه وطلع على اوضته وتمارا اللي قلبها كان هيقف
من كتر الوجع والعياط بصت لمامتها : انتى يا ماما
يطلع منك كل ده ! وكنتي عايزانى ابقى زيك صح ؟
بس انسى من النهارده ان ليكي بنت اسمها تمارا ، أنا
كان لازم أفهم من ساعة ماشفتك بتفتري على لوجين
رغم إنها أكثر حد كان محتاجك ، كان لازم أفهم إنك
لا يمكن تكوني ام ابا

سابتها هي كمان وطلعت ورا مروان اوضته ،
خبطت ودخلت شافته قاعد على الأرض وبيبيكي زي
الأطفال ، أول مره تشوفه كده

راحت بسرعة قعدت جنبه ورفعت وشه : مروان
!!

مروان بعياط : اعمل ايه دلوقتي يا تمارا اعمل ايه ؟
أنا اذيت آدم اوي ، أنا إنسان بشع لا أنا شيطان ، أنا
إزاي عملت فيه كل ده؟ أنا كان لازم اكون أول واحد
في ظهره إزاي عملت كده ؟

تمارا حضنته جامد وقعدت تعيط معاه ، هي كمان
كانت حلقة من سلسلة الألم اللي آدم اتعذب بيها فتره
، هي كمان كانت حمل وسواد محاوطه

آدم وصل لبيته وطلع يجري على فوق، عايز يوصل
لسولاف بأي طريقه ، وصل ودخل الشقة ولقى
سولاف قاعده ومستنياه زي كل يوم

سولاف : حبيبي جيت ، اتأخرت أوي يا آدم
آدم رمى مفاتيحه على الأرض ودخل بالحذاء بتاعه
لجوا واترمى في حزن سولاف وحضنها جامد
لدرجة إنها اتوجعت من حزنه : مالك يا حبيبي فيك
ايه ؟

سولاف سمعت شهقاته اللي بدأت تعلا واحده واحده
فقلقت : مالك يا آدم بجد احكي لي أنت كويس ؟
آدم بعد عنها وبص في عيونها : أنا تعبان ، حاسس
ان روعي هتطلع مني

سولاف برعب ودموع : مالك يا آدم بالله عليك
ماتخوفني كده ؟

آدم قعد معاها في اوضتهم وحكالها كل حاجة
حصلت وهي مصدومه من اللي بتسمعه ومش قادرة
تستوعب

آدم بعياط : احضنيني يا سولاف احضنيني جامد
ونسيني اللي أنا فيه ده ، أنا بموت مش قادر قلبي
هيقف والله

سولاف اخدته في حضنها جامد أوي وهي بتعيط
على عياطه وبتتوجع على وجعه ، طبطبت بحنية
على شعره : بعد الشر عليك من الموت

آدم حضنها هو كمان وفضل يبكي في حضنها : هي
كان ايه ذنبها بس يتعمل فيها كده ؟ كل ده عشان هي
مش خبيثه وقذرة زيهم ؟ إزاي استحملت كل ده
أصلا ؟

سولاف : هي دلوقتي في مكان أحسن صدقني ، عند
رب رحيم ، دي ارتاحت من الوجع والههم اللي كانت
فيه ، أنا متأكد ان ربنا هيجازيها خير على كل اللي
عملته ، حافظت عليك وعلى شرفها بكل قوتها لحد
آخر لحظة

آدم بغل وشر : وأنا اللي هنتقم ليها ، ومش هسيب
حقها ، وبعده أيام وجعها أنا هدوقهم من العذاب
ألوان

سولاف : هتاخذ حق مامتك من باباك !! ده اللي هو
إزاي؟؟

آدم بعد عنها وزعق : ده مش ابويا ، أنا مايشرفنيش
 يبقى واحد زيه ابويا، واه هنتقم منه، هنتقم منهم كلهم
 وهرجع حق جمالات وكرامتها المهدوره
 سولاف خافت عليه من تهوره وحاولت تقرب منه
 بحذر : وبعد ما تنتقم ، هترتاح يعني هتبقى مبسوط
 ؟

آدم بعند : ايوه يا سولاف هرتاح ، وهعيش حياتي
 بالطول والعرض وهعمل كل حاجة تبسطي في الدنيا
 وهقعد اتفرج عليهم بيتعذبوا وأنا حاطط رجل على
 رجل ومستمتع كمان

وقف ياخذ نفسه بعد ما قال كلامه كله في نفس واحد
 وهي بتبصله بصمت ، هي عارفه إنه مش كده
 عارفه إنه بس موجوع وعائز يطلع كل اللي جواه
 وينفجر وبس

سولاف : وهي جمالات هتكون مرتاحه كده ؟
 آدم : ايوه يا سولاف هتكون مرتاحه مالكيش فيه
 سولاف : اد _____

آدم زعق : كفاية بقي ، انتي أنانية كده ليه هاه ؟
 يعني انتي لما الكلب حسام اذاكي أول فرصه جاتلك

عشان تنتقمي استغليتيها ورجعتي حقا وأنا معترضه
عليها

كامل بوجع : طيب والنار اللي في صدري دي مين
يطفيها ، مين يخفف وجعها اللي بياكل في قلبي ده ،
سولاف أنا حاسس أني هموت والله من القهر عليها
وانتي مش حاسه بيا خالص

سولاف قربت منه بهدوء ومسكت وشه بين ايديها :
أنا حاسه بيك والله، آدم أنا دايمًا جنبك، أنا على طول
فهماك وحاسه بيك فمهما يجرى خليك عارف أني
موجوده ، موجوده عشانك أنت وبس ، عشان ترتاح
وتفضفض وتشتكي وتبكي ، أنا حضني دايمًا موجود
عشانك يا حبيبي

حطت ايدها على قلبه : أما ده استغفر ربنا وهو اللي
هيهدي النار اللي فيه

ضمته بخوف ودموع : بس أرجوك يا آدم ، عشان
خاطري ماتعملش كده فيا وفي نفسك ، أرجوك ،
انت بتقولي حسام ومش عارفه ايه ، حسام قتل عمد
والادلة كانت معانا وكل اللي أنا عملته عطيتها للنيابة
وهما اللي اتصرفوا اما أنت داخل بصدرك مفتوح
عليهم عايز تاخذ حقاك بدراعك ومش فارق معاك

نفسك ولا أنا ، آدم أنا خايفه والله خايفه عليك مش
عليهم ، خايفه يعملوا فيك حاجة ، بالله عليك أنا
ماليش غيرك في الدنيا

آدم قلبه رق لما حس بخوفها وضمها : خلاص يا
سولاف ماتعيطيش

سولاف بعدت عن حضنه : طيب او عدني إنك مش
هتنتقم ، خلينا نعيش سوى بعيد عنهم وعن شرهم ،
او عدني يا آدم

آدم سكت كثير : مش هقدر ، آسف

سولاف بدموع : ليه بس كده حرام عليك والله
آدم : آسف بجد ، آسف

سولاف باست فوق قلبه وحطت دماغها عليه : يارب
اهديه يارب أنا ماليش غيره
آدم ضمها جامد : حقك عليا

سولاف بعدته عنها بعنف وكشرت : لا ، لا يا آدم ،
مش الكلمتين دول اللي هيخلوني أسكت واسيبك
تعمل اللي أنت عايزة وتضيع نفسك وخليك عارف
إنك لو عملت اللي في دماغك ده مش هسامحك ،
فاهم يا آدم مش مسمحاك

سأبته وطلعت من الأوضة بغضب وراحت قعدت
 في الصالون و آدم قعد على السرير يفكر في كلامها
 ، سولاف بتضغط عليه وبتستغل مكانها في قلبه
 عشان يبعد عن اللي عايز يعمله

عدى دقايق و آدم قام من مكانه راح لسولاف بره ،
 دخل الصالون لقاها قاعده على الفوتيه وباصه في
 الأرض بتوهان ودموعها على خدها ، قرب منها
 وقعد تحت رجليها وهمس : سولي

سولاف بصت في عيونه ودموعها مش بتقف وهو
 بيمسحهم : أنا آسف

سولاف بتهز دماغها برفض : أنت مش فاهم حاجة
 يا آدم

آدم : طيب فهميني ، في ايه بس ؟

سولاف : في إنك كل حاجة في حياتي ، ماليش غيرك
 في الدنيا دي ولو جراك حاجة أنا ممكن أموت فيها
 ، أنت مش عارف بيبقى شعوري ايه يوم ماتسيبني
 وتنزل لوحدك ، بفضل طول الوقت حاطه ايدي على
 قلبي وبدعي ربنا يحفظك ويبعد شر عيلتك عنك

وترجعلي بالسلامة ، تقوم أنت كمان فاتح دايرة
الإنتقام بينكم ، ليه بس كده حرام عليك

آدم صعبت عليه جدا هو فعلا كان ناسي إنه كل
حاجة بالنسبالها إزاي نسي ؟ اخدها في حضنه
وطبطب عليها يطمئنها وهي استخبت في حضنه :
عشان خاطري أبعد عنهم الناس دول
آدم فكر شوية واتهد : حاضر ، حاضر يا سولاف
اللي أنتي عايزاه هيحصل

سولاف بصتله بأمل : بجد يا آدم بجد ؟

آدم أبتسم: امممم بجد، كفايا علينا وجع لحد كده خلىنا
نعيش الباقي من حياتنا في هدوء

سولاف : ربنا يباركلي فيك يا حبيبي ، هتوعدني ؟
آدم بنظرات غريبه : اوعدك

واتكلم جوا نفسه : اوعدك مش هسيب حق جمالات
ابدا وهرجعه يعني هرجعه ومنتقم من كل واحد اذاها
في يوم ولو بكلمه واحده ، أنا آسف يا سولاف

آدم : ماتز عيش مني

سولاف : مش زعلانه ، أنا عارفه إنك مش قصدك
كل ده

قامت وشدت ايدہ : أنت بس عايز ترتاح شويه ،
تعالا غير هدومك عشان تنام وبكرا لما تصحى
تكون هديت وتعرف تفكر كويس

آدم قام معاها بصمت وهي غيرتله هدومه واخذته
وقعدت في السرير واخذتها في حضنها : نام يا
حبيبي ، ارتاح وما تفكرش في اي حاجة

آدم دفن وشه في حضنها وهو بي فكر ، حاسس انه
متلخبط وتايه ، دماغه وجعته من التفكير ولازم
يخرج من الدوامة دي ، حاول يلاقي أي حاجة تانية
يفكر فيها وتلهيه لحد ما أخذ باله من نبضات قلب
سولاف ، ركز في صوته وسرح معاه لحد ما قلبه
هدى وعقله بطل يفكر

سولاف كانت بتراقب آدم في صمت وبتطبطب على
ظهره وشعره برقة وهي خايفه عليه ، خايفه من
أفكاره تخليه ياخذ قرار غلط ويأذي نفسه بيه ،
غمضت عينيها ودعت من كل قلبها ربنا يطمئن
قلوبهم ويساعدهم يخرجوا من المحنة اللي هما فيها
دي ونامت

آدم اللى كان بيمثل النوم اول ما حس بنفس سولاف
انتظم فتح عينيه وبصلها : حقاك عليا يا كياني

باس كتفاها وسحب نفسه من حضنها بهدوء واخذ
فونه وطلع الفرندا ورن على حد واتكلم معاه فترة
وقفل ، قعد على الكرسي ورفع دماغه للسما بيتأمل
النجوم بصمت وهو بيفتكر جمالات وحنيتها وحبها
ليه ، كل ذكرياته معاه اتعادت قدام عينه اللى
دموعها خانته ونزلت

آدم : أنتى سمعاني ؟ وحشتيني يا حبيبتى وفراقك
واجع قلبي ، ياريتك كنتي معايا ، نفسي في ضمه
بس أو كلمه منك ، اشم ريحتك واترمي في حضنك
واشكيلك حالي ، ربنا يرحمك يا غاليه

غمض عينيه وسمح لعقله يغرق في دوامة ذكرياته
لحد مانام مكانه

سولاف بعد شوية وقت قلقت في نومها وقامت
مالقتش آدم جنبها فقامت تدور عليه لفته نايم على
الكرسي في الفرندا فراحت لبست اسدال الصلاة
بتاعها وطلعتله بره

قربت منه عشان تصحية لفته بيعرق جامد وبيهمهم :
لا ، ابعدوا عنها ، لا ، ماتلمسوهاش

سولاف هزته بهدوء : آدم ، حبيبي فوق ، أنت بتحلم
، آدم ،

آدم انتفض من مكانه ووقف ينهج وبص لسولاف
اللي كانت بتبصله بخوف وقلق : حبيبي مالك ؟

آدم اتنهذ بعنف كأنه استوعب إنه كان بيحلم وصحي
وراح شد سولاف اخدها في حضنه وبيتكلم وهو
بينهج ومش عارف ياخذ نفسه : أوعي تسيبيني يا
سولاف ، اوعي تعملي زيها وتسيبيني وتمشي ،

أوعي ، أنا هموت لو ده حصل ، أوعي يا سولاف
أوعي

سولاف حضنته جامد عشان تطمنه : ادم اهدى أنا
معاك أهو وان شاء الله مش هبعد عنك ابدًا ،
ماتخافش

مسكت ازازة المياه اللي جنبها وبعده شويه : أشرب
مايه يا حبيبي وخذ نفسك

آدم شرب وقعد مكانه وهو بيوصلها بخوف كأنها ه
منه وهي مسكت ايديه : أحسن دلوقتي ؟

آدم هز دماغه بايوه وهي : ايه اللي نيمك في الفرندا
كده ؟

آدم قام وسحبها وراه : تعالي جوا ، لا لا تعالي
نمشي من هنا ، أنا مش متظمن

سولاف وقفته : آدم أهدى شوية مافيش حاجة
صدقني

آدم بصلها : أنا مش مرتاح ، قلبي مش مطمئن يا
سولاف حاسس ان في حاجة هتحصل

سولاف حطت ايديها على خده : ماتقلقش مافيش
حاجة هتحصل ان شاء الله

آدم مسك فونه ورن على جسار : طيب خرينا نكلم
جسار ، خليه يجي على الأقل ، خليه معايا

رن مرة لحد ما الفون فصل فرن تاني وجسار رد
عليه بنوم وقلق من مكالمته في الوقت المتأخر ده :
باشا في ايه ؟

آدم : أنت فين ؟ تعالا ثواني وتبقى قدامي

جسار أتوتر من طريقة كلامه وهو بينهج كده : خير
يا آدم في حاجة حصلت ولا ايه ؟

آدم : لا مافيش بس تعالا ، أنا مش مرتاح وحاسس
ان في حاجة وحشه هتحصل ، تعالا بالله عليك

جسار قام من سريره بسرعه : ماتقلقش أنا جاي أهو

آدم قفل وبص حولين منه في المكان بتفحص لحد ما
عينه وقعت على باب الشقة وشاف اللي فتحه ودخل
بييتسم بشر : أنتوا إزاي دخلتوا هنا ؟

سولاف بصت على الباب وبصت لآدم بصدمة وهو
سحبها وراه : لو فاكرين إنكم هتقدورا تاخدوها مني
زي جمالات يبقى بتعلموا ، انتوا فاهمين ، أنا هقتلكم
قبلها

يتبع _____

بقلم/مريم محمد عبد القادر

وها نحن على قاب قوسين من النهاية

لو البارت عجبكم ماتنسوش الفوت (النجمة) ورأيكم
في كومت لطيف

دتمم في حفظ الرحمن ورعايته ♡ ♡

اللهم صل وسلم وبارك على سيدنا محمد
بقلم/مريم محمد

سولاف بصت على الباب وبصت لآدم بصدمة وهو
سحبها وراه : لو فاكرين إنكم هتقدورا تاخدوها مني
زي جمالات يبقى بتحلموا ، انتوا فاهمين ، أنا هقتلكم
قبلها

سولاف شدت آدم جامد لفته ليها : حبيبي في ايه
مالك ؟ أنت بتكلم مين ؟

آدم شاور على الباب : دول ، كمال وعاصم ، أهم
هنا ، بصي بيضحكوا بشر إزاي ؟ عايزين ياخدوكي
مني

سولاف دموعها نزلت ومسكت وشه بين ايديها : آدم
مافيش حد هنا ، أنا وأنت لوحدنا في الشقه

آدم بلع ريقه بصعوبة وبص على الباب وبصلها : و
، والله أهم هناك ، انتي ليه مش مصدقاني ؟

اتحرك من مكانه : أنا لازم اخلص منهم قبل
مايعملوا فيكي حاجة

سولاف واقفه مش عارفه تتصرف ومصدومه من
 آدم واللي بيعمله ، سمعت الباب بيخبط وصوت
 جسار فجريت وفتحت الباب

جسار أول ما شافها استغرب وشها المخطوف وهي
 قعدت برعب على الارض واتكلمت بصوت مهزوز
 : جسار ، آدم ، آدم

جسار قلق ودخل الشقه بسرعه ولقى آدم واقف
 وماسك في ايده سكينه وشكله مش طبيعي ابدأ فرجع
 ايديه قدامه بيحاول يهديه : آدم اهدى ايه اللي أنت
 بتعمله ده ؟

آدم : جسار أنت جيت ، بص هناك ، كمال وعاصم
 عايزين ياخدوا سولاف مني زي ماخدوا أمي ، بس
 لا أنا مش هسمحهم ابدأ

جسار بص حوليه ومالقاش حد في الشقه فقرب من
 آدم بحذر : ماتخافش ، أنا هخلصك منهم ، هات
 السكينه دي بس خليني أعرف اتصرف

آدم مد ايده بالسكينه وجسار مسك دراعه شده عليه
 وخبطه في رقبته جامد افقده الوعي ووقع على
 الارض

جسار اتنهذ : هو في ايه ماله ده ؟

سولاف بعياط : مش عارفه

جسار شال آدم دخله سريره ورن على دكتور وطلب
 منه يجي بسرعه وقفل معاه : الدكتور جاي كمان
 شوية

راح وقف قدام باب الشقه وسولاف دخلت غيرت
 اسدال الصلاة وقعدت جنب آدم

شوية والدكتور وصل وكشف على آدم : كل حاجة
طبيعيه

جسار : إزاي ؟ ده كان ماسك سكينه في ايده من
شوية وبيقولي في ناس عايزين يخطفوا مراته
وماكانش في حد معنا ساعتها اصلا

الدكتور بص لسولاف : ايه اللي حصل بالظبط يا
مدام ؟

سولاف حكته اللي حصل من ساعة ما لقت آدم نايم
في الفرندا وبيحلم بكابوس لحد ما جسار وصل

الدكتور : اممم ، دي هلوسات نوميه ، هو جوزك
بيشرب مخدرات أو كحول أو عنده صرع أو انفصام
؟

سولاف هزت دماغها برفض : لأ خالص مافيش
حاجة من دي

الدكتور : يبقى كده الظاهر إنه اتعرض لصدمة
كبيرة قبل ماينام أو هو محطوط تحت قلق وأرق
مأثر على عقله وده خلا عقله مشوش ودخل الخيال
في الواقع ، إحنا المفروض نراقبه لحد ما يصحى
ونتأكد انه فايق وعقله شغال كويس ، ولازم تعرفوا
ايه المشكلة اللي عملت فيه كده وتحاولوا تحلوها
وغالبا ممكن يحتاج لدكتور نفسي يتكلم معاه عشان
تعملوا حسابكم

جسار : تمام يا دكتور ، متشكر أتفضل حضرتك
واحنا هنتابعه ولو حصل اي حاجة هنبليغك

الدكتور مشي وسولاف بصت لجسار : وبعدين ؟

جسار : ولا قبلين ، هنفضل قاعدين جنبه لحد
مايصحى ، لو عايزة تنامي ممكن تروحي أي اوضه

تانية وتقلي عليكي الباب وأنا هفضل هنا جنبه
ماتقلقيش

سولاف : لا طبعا انا مستحيل اسيبه في الحالة دي

جسار : بس انا خايف يقوم يعمل فيكي حاجة وهو
مش في وعيه

سولاف بصت على آدم بحب : آدم مستحيل يا ذينى
ابدا ، أنا متأكدة

جسار اتتهد : خلاص براحتك ، أنا هقعد في الفرندا
بره لو حصل أي حاجة نادي عليا ، وماتقلقيش
هسيب باب الشقة مفتوح

سولاف بصتله : أنا مش قلقانه ، أنت آدم استأمنك
قبل كده على روحه وأنت كنت قد الامانه دي فأنا
مش قلقانه منك ، بس ، بس قلقانه منهم

جسار : مين ؟

سولاف : مرات ابوه وعمه ، الناس دي شرانيه وأنا
خايفه على آدم منهم

جسار : ماتلقيش طول مانا معاه ماحدث يقدر يقرب
منه ابدأ ، ثقي فيا

سولاف هزت دماغها بفهم وجسار طلع بره الاوضة
وهو على الباب وقف تاني : أنا فعلا متشكر لتقتك
فيا بس حلقة حطيتها في ودنك ، ماتأمنيش لراجل ابدأ
غير جوزك

بصلها : حتى لو أنا ، هسيب باب الشقة مفتوح ولو
عايزة تقفلي باب الاوضة عليكى براحتك

سابها وراح فتح الباب وقعد في الفرندا طول الليل
 يفكر ايه اللي حصل بالظبط مع آدم وهو
 مايعرفهوش

على الناحية الثانية عند لوجين ولؤي

لوجين صحت فجأة من النوم وهي بتشهىق وعلى
 شهقتها صحى لؤي مفزوع : في ايه يا لوجين ؟

لوجين بتتنفس بسرعه كأنها كانت بتجري : في ، ف

لؤي مسك وشها بين ايديه يطمئنها : ايه يا حبيبتى
 مالك اهدى بس براحه

جاب مياه من جنبه وشربها براحة ومسك ايديها : في
 ايه يا حبيبتى ؟

لوجين : حلمت حلم وحش اوي يا لؤي ، ابيه آدم
كان فيه ، كان مروع ومش كويس خالص ، حلم
وحش

دموعها نزلت غصب عنها فهو ضمها لحضنه :
باااا يا حبيبي ماتخافيش ده حلم مش أكثر ،
مافيش حاجة من ده ، ماتخافيش

لوجين اتعلقت في حضنه جامد : حاسه إن ابيه فيه
حاجه يا لؤي ، كلمه طيب طمني عليه

لؤي بعد عنها بذهول : اكلمه دلوقتي يا لوجين !
إزاي ؟ أنتي مش شايفه الساعة كام ؟ إحنا ٣ الفجر
يا بابا زمانه نايم

لوجين : مش ليا فيه

لؤي بغیظ : افزعه يعني من النوم ولا أعمل ايه يا
لوجين ؟ ده كلام برضه

لوجين حطت ايدها على قلبها بخوف : قلبي
بيوجعني يا لؤي والله حاسه إن ابيه فيه حاجة

لؤي اتهد وقرب منها بهدوء باس فوق قلبها : سلامة
قلبك من الوجع يا حبيبي ، إن شاء الله خير
ماتقلقيش واوعدك أول ما الصبح يطلع هكلمهولك
على طول بس مش هينفع خالص دلوقتي صدقيني ،
استنى بس لحد الصبح ماشي ؟

لوجين بصتله شويه بصمت بس جواها قلق مش
عارفه تفهمه ، وهو لعب في شعرها القصير الناعم :
ماتزعلش بقي ، تعالي نامي دلوقتي وبكرا الصبح
إن شاء الله نكلمه ، ماشي ؟

لوجين هزت راسها بموافقة ونامت على ظهرها بس
قامت تاني وبصتله

لؤي : ايه تاني ؟

لوجين : هات الفون

لؤي بتعب منها : يا لوجين والله ماينفعلش نكلمه
خالص دلوقتي كده هنقلقه

لوجين حركت راسها : مش هكلمه بس عايزه
صورتها ، خليها معايا لحد الصبح

لؤي اتنهذ وقام جاب فونها وعطهولها وهي فتحت
على صورة آدم وبصتله شوية وبعدها ضمت
الصورة لقلبها ونامت على ظهرها ، شوية وبصت
للؤي اللي بيراقبها بصمت وغيره مش عارف
يداريها

لوجين : ممكن لوجين تطلب من لؤي حاجة ؟

لؤي : ممكن لوجين تشاور بس ولؤي ينفذ

لوجين قربت منه ودخلت في حضنه بهدوء استخبت
 كلها في صدره العريض : احضني يا لؤي ، أنا
 حاسه أنى خايفه ومش مطمئنه ، بس هنا بظمن
 وبحس إن كل حاجة هتبقى كويسه ، عايزه بس أسمع
 صوت قلبك اللي بيريحني وأنام

لؤي قلبه بينبض بعنف من حبيبته الصغيره اللي
 كلامها اللطيف بيشقاب كيانه كله وهو اللي بيبقى
 زي الطفل قدامها

رفع وشها ليه وهمس : ولؤي لو يطول يخبيكي جوا
 قلبه وماتطلعيش منه تانى هيعمل كده ، لؤي مش
 عايز حاجة من الدنيا كلها غير حضن حبيبته
 الصغونه الجميلة دي وبس

قرب منها وباس خدها وهمس : ادخلي حضني يا
 لوجينا وماتخر جيش تانى

لوجين دفنت نفسها في حضنه وهو ضمها بيطنها
 وفضل يطبب على شعرها لحد ما نامت تانى ،
 بعدها هو اخذ فونها حطه بعيد وبيكلم صورة آدم :
 آسف يا باشا بقى بس بغير عليها

رجع تانى لحضن لوجين وقدر يغمض عينيه ويرجع
 لنومه من تانى

الصبح آدم صحى لقي سولاف قاعده على ركبها
 جنبه وسانده دماغها على كتفه ونايمه وشكلها كانت
 سهرانه جنبه طول الليل ، واستغرب جدا قعدتها
 ولبس الخروج اللي لبسها

بعدها عنه براحه عشان ماتصحاش وغطاها وطلع
 من الاوضة يدور على برشام للصداع ، مشي شوية
 ولقى باب الشقة مفتوح فاستغرب أكثر إزاي ناموا
 وباب الشقة مفتوح ؟ قفله ولسه بيبيص جنبه لقي حد

واقف في الفرندا وساند على السور ، كشر جامد
ومشى بحذر بس أول ما قرب منه عرفه

آدم باستغراب : جسار !!

جسار لقله بسرعه ومسكه من كتافه بلهفة : أنت
صحيث ؟ أنت كويس ؟ قولي حاسس بايه ؟

آدم : في أيه ؟ وأنت إزاي تدخل الشقة كده وأنا نايم
؟ ايه اللي جابك هنا أصلا ؟

جسار سابه ورجع خطوة لورا : أنت اللي اتصلت بيا
بالليل ، أنت مش فاكر ولا ايه ؟

آدم هز دماغه برفض : حتى ولو أنا اتصلت بيك
إزاي تقعد في الشقه ومراتي معايا وأنا نايم ؟

جسار كشر : أنت بتشك فيا ؟

آدم نفخ بضيق : جسام ما تضايقنيش أنت عارف أني
مستحيل أشك فيك بس أنا مش فاهم حاجة

جسام اخده ودخلوا قعدوا في الصالون وحكاله كل
حاجة حصلت و آدم مصدوم من اللي بيسمعه
وحاسس إنه بيحلم

آدم : أنا رفعت سكينه على مراتي ؟

جسام اتحنح : مش عليها هي حرفيا

آدم قام وقف : أنت بتستعبط ولا بتستعبط ؟ أنا رفعت
سكينه في وشها وكان ممكن تتأذي ، طيب إزاي ده
حصل ؟ أنا مش فاكِر

جسام : الدكتور قال هلاوس وانك هتفوق تاني

آدم برعب : هو أنا اذيت سولاف بالله عليك قول
الحقيقة ؟

جسار مسك كتافه : لا ماعملتش حاجة أنا ضربتك
قبل ما تعمل اي حاجة ، ولو مش مصدقني روح
اتأكد بنفسك

آدم سابه فعلا ودخل اوضته وقعد جنب سولاف
ومشى ايداه على خدها بهدوء : سولاف ، سولي
حبيبي اصحي

سولاف صحيت وأول ما عينيها وقعت عليه اتنفضت
وقربت منه : أنت كويس ؟ حبيبي قولي حاسس بايه
؟

آدم ضمها جامد : أنا آسف ، آسف والله ماعارف أنا
عملت كده إزاي

سولاف بعدته عنها ومسكت وشه بين ايديها : آسف
 على ايه يا ادم ؟ قولي بس أنت كويس ؟ بالله عليك
 طمني عليك أنا قلبي هيقف من امبارح من خوفا
 عليك

آدم باس ايديها : حقاك عليا والله ماكان قصدي قوليلي
 بس أنتى كويسه ؟ أنا عملتك حاجة ؟ طمني أنا
 عملت ايه وأنا مش حاسس

سولاف : يا آدم والله ما عملت حاجة ، سيبيك مني
 دلوقتي وخلينا فيك

آدم قام وقفل الباب ومسك ايدها : قومي ، قومي
 اقلعي فستانك ده وريني فيكي ايه الأول

سولاف : يا آد__

آدم قاطعها بخوف : سولاف عشان خاطري ، ريحي
 قلبي واسمعي الكلام

سولاف قامت وقلعت فستانها وهو فضل يبصلها
بتفحص بيدور على اي جرح أو خدش أو كدمه اي
حاجة بس مالقاش وهي بصتله : خلاص اطمنت ؟

آدم ضمها : آسف ، أكيد خوفتي

سولاف : ايوه جدا

آدم : آسف

سولاف : عليك يا آدم ، خوفت عليك مش على نفسي
، خوفت تعمل حاجة في نفسك أو فيا وبعد ماتفوق
تعذب نفسك على كده ، فهمنى بس ايه اللي وصلك
للحالة دي ؟ أنت كنت قبلها في حضني وكنت كويس
ايه اللي حصلك بس ؟

آدم : مش عارف ، أنا مش فاكر أي حاجة أصلا
والله ما عارف ايه اللي حصل

بص حوليه ونزل جاب فستانها من على الارض :
خدي ألبسي ، أنتى لازم تيجي معايا حالا ، ألبسي
بسرعه

سولاف وهي بتلبس : هنروح فين ؟

آدم : عند هند ، انتى مش هتقعدى هنا ساعة تانيه

سولاف اتصدمت ومسكت ايده : يعني ايه يا آدم ؟

آدم : يعني اللي فهمتية يا سولاف يعني هترجعي
تعيشي مع هند ، أنا مستحيل اسيبك في مكان واحد
معايا

سولاف : ليه ؟

آدم بز عيق : هو ايه اللي ليه ؟ كل ده وبتسألني ليه ؟
 مستتنيه يحصل ايه تاني لما اقتلك يعني وأنا مش
 حاسس بنفسني ؟ أنا الظاهر واحد مجنون ومش بعيد
 أعملها

سولاف : وأنا مش هروح في حته يا آدم

آدم بحزم : سولاف

سولاف راحت قعدت على الارض تحت رجليه : أنا
 مكاني هنا معاك انشالله تقتلني هموت معاك برضه
 إنما تبعدني عنك وكمان في الحالة اللي انت فيها دي
 فلا يا آدم ، لأ وألف لأ

آدم شدها من دراعها جامد وقفها : انتي مش بتفهمي
 بقولك أنا واحد مجنون

سولاف بز عيق هي كمان : ان كنت أنت مجنون يا
 آدم فأنا اجن منك ، وصدقني كلمة واحده زياده عن
 موضوع أنى امشي ده هروح اقتلك نفسي بنفسي
 عشان ترتاح خالص

الاتنين سكتوا وبيبصوا لبعض نظرات تحدي وكل
 واحد مصر على قراره

آدم بضعف : ولو حصل واذيتك ؟

سولاف : مش هيحصل صدقنى ، امبارح كنت
 عارفني صحيح إنك تخيلت والدك وعمك بس كنت
 عارفني ، شدتني وقفنتي ورا ظهرك عشان تحميني
 ، آدم انت قلبك هو اللي بيداك عليا فحتى لو عقلك
 مش في وعيه قلبك عارفني وبيحميني وده مافيش حد
 يقدر يسيطر عليه ، هتفضل طول عمرك تحميني
 حتى لو فقدت عقلك كله فأنا مش خايفه منك ومتاكده
 إنك مستحيل في يوم تاذيني ، أرجوك ثق فيا

آدم كان خايف ياخذ قرار ، خايف يخليها فياذيها وفي
نفس الوقت خايف تسيبه وتمشي هو بجد محتاجها
جنبه محتاج حضنها يتحامي فيه ويسكن جواه

قعد على الارض وغمض عينيه بيفكر وهي قعدت
قصاده وهمست بتحاول تظمنه : صدقني يا حبيبي كل
حاجة هتبقى كويسه ان شاء الله

آدم حط دماغه على كتفها وبضعف : ماتسيبينيش

سولاف ابتسمت وضمته جامد : عمري ما عملها

آدم فضل شوية قاعد مكانه بصمت لحد ماتكلم :
قوليلي كنت عامل إزاي ؟ قولتك ايه قبل ما جسر
يجي ؟

سولاف : ولا حاجة ، بس مسكت ايدي وقولتي
تعالني نمشي من هنا ورنيت على جسر وبس

آدم : إزاي ماخوفتيش مني ؟

سولاف ضحكت : واحده زيي شافت كتير أكيد مش
هتخض يعني لو شوفتك ماسك سكينه

آدم رفع دماغه وبصلها : انتي بتضحكي ! لا بجد ؟

سولاف ضحكت أكثر : اه بضحك عادي

سكتت شويه وبعدين حطت ايدها على راسه من ورا
ونزلت دماغه تاني على كتفها : كان في حاجة عايزة
اقولك عليها

آدم : اممم ؟

سولاف همست جنب ودنه : انا حامل

آدم فضل على نفس وضعيته من غير ما يتحرك
وبعدها بعد عنها ببطئ : أنتى قولتي حاجة دلوقتي
صح ؟ اتھیالی سمعت حاجة

سولاف أبتسمت بحب واخذت ايده حطتها على بطنها
: في حته صغيرة أوي منك بتكبر جوايا

آدم جسمه كله أرتجف و عيونه بتلمع بالدموع : أنتى
بتتكلمي جد صح ؟ انتى حامل يا سولاف ؟

سولاف هزت دماغها بتأكيد وهو حضاها جامد : أنا
مش مصدق ، يعني كلها وقت وابقى اب

سكت فجأة وبعد عنها بخوف كأنه افكر حاجة وهي
بصت لملامحه اللي اتغيرت : في ايه ؟

آدم : أنا هبقى اب

سولاف فهمت خوفه فمسكت وشه بين ايديها : هتبقى
أحن واعظم اب في الدنيا ، لا هتبقى شبه حد ولا حد
في يوم هيشبهك

آدم : أنا خايف ، خايف أكون أب سئ

سولاف : أوعى تخاف طول ما احنا معانا ربنا وطول
ما احنا مع بعض ، كل يوم احنا الإثنين هندعم بعض
وهنقوي بعض ، لو حد فينا وقع في يوم الثاني
هيسنده ، مش أنت اللي قولت الحياة مشاركة احنا
الإثنين هنشارك بعض في المر قبل الحلو ، لو في
يوم حد بعد عن الطريق الصبح الثاني هيرجعه
بسرعة فماتخافش يا نور عيوني

آدم قلبه اطمئن : تعرفي ان قلبي دايم بيرتاح بكلامك
، وساعات بحس أنى عايز افضل نايم في حضنك
طول الوقت مش بعمل اي حاجة غير أنى في
حضنك وخلاص ، وبقى مرتاح أوي لما بفكر في
كده مش عارف ليه ؟ بس مجرد وجودك جنبي
بيرحني

سولاف شدته عليها وحضنته بدفي : وأنا هفضل
 جنبك على طول ، وكل أما تحب تيجي تقعد في
 حضني قولي لأنني أنا كمان زيك نفسي افضل في
 حضنك وماملش حاجة

آدم : ربنا يديمك نعمة وشمس في حياتي

سولاف : ويديمك ليا يابو فلفل

آدم ضحك : فلفل ده مين ؟

سولاف : ابنك يا حبيبي

آدم : هتسمي الواد فلفل ؟

سولاف : اه ولو بنت هتبقى بتتجانه

آدم ضحك أكثر : لا أنتى كده جعانه يا قلبي

قام وقومها من على الارض : قومي قومي أما اكلك

الاتنين ضحكوا وبعدها خرجوا من الاوضة لجسار
اللي قاعد بره ، أول ما شافهم أبتسم : ياخواتي
تقولوش عصفورين كناري

آدم : بس يالا

جسار بص لعيون آدم اللي بتلمع جامد : عينيك دي
ولا لينسيز

آدم ضحك : انت مشكله والله يا جسار

جسار : عارف ، المهم انتوا كويسين دلوقتي صح ؟

آدم هز دماغه بابتسامه وجسار : طيب الحمد لله
امشي أنا بقى ، هموت وانام يا عالم

آدم : ماتخليك افطر معانا

جسار : لا ياخويا متشكر ، أنا عندي اللي يفطرنى
كويس وسبتها وجيت عشانكم من غير ماصحياها
اقولها أساسا أنى نازل وزمانها بتخطط دلوقتى بعد
ما تقتلنى هتعملنى كباب ولا كفته

آدم ضحك : الكباب أحلى

جسار زقه : امشي يالا يخرّب بيت تناحتك

جسار مشى خطوتين و آدم وقفه : جسار

جسار بصله وهو بابتسامه : أنت هتبقى عم بعد كام
شهر باذن الله

جسار أبتسم : بتهزر ! قول والله

آدم ضحك : والله

جسار راح حضنه جامد : ألف مبروك يا حبيبي

آدم : الله يبارك فيك و عقبالك يا كوتش

جسار : يارب

بص لسولاف : ألف مبروك ان شاء الله يكون
العووض

سولاف هزت دماغها بابتسامة : يارب

جسار بعد ما باركلهم سلم عليهم ومشى

آدم بص لسولاف : يلا نأكل فلفل

سولاف ضحكت : ماشي يلا

آدم شالها : تعالي ، من يوم ورايح مافيش شغل في البيت تاني أنا عايز فلفل سليم كده ومصصح

سولاف ضحكت : آدم

آدم : ولا اقولك أنا عايز فلافيل كتير أوي ، عايزك تمليلي البيت كله عيال ، يعني تحملي كده كام مرة قليلين عشان صحتك برضه بس اتوصي بقى بالتوأم في كل مرة يعني مرة اتنين ومره تلاته اربعة كده يعني

سولاف : ليه يا حبيبي مافتحلك حضانه أحسن ؟

آدم ضحك وراح قعدها على بار المطبخ وقعد على
الكرسي قصادها وحط دماغه على رجليها : يا ريت
بجد ، أنا تعبت من الوحده يا سولاف ونفسي في
اسرة كبيرة بس يكون بينهم الحب والدفى اللي
اتحرمت منهم

سولاف بتلعب في شعره : ربنا يعوضك يا حبيبي
على كل ده وأنا اوعدك الحب والدفى عمره
ماهيسيب بيتنا ابدأ باذن الله

آدم بصلها : قوليلي بقى عايزة تاكلي ايه اعملهوك ؟

سولاف بتفكير : امممم اي حاجة مالحة بس تكون
حاجة غريبه

آدم ضحك : ابتدينا شغل المجانيين أهو

سولاف كشرت : قصدك أنى مجنونة يا آدم ؟

آدم : لا يا قلبي قصدي إحنا الاتنين مجانين

سولاف ضحكت هي كمان و آدم قام يحضر الأكل
وسولاف قاعده على البار بتحرك رجليها زي
الأطفال وبتضحك معاه وبتدلع عليه وهو بيأكلها بايده
، شوية وفون آدم رن وكان لؤي اللي بيظمن عليه
ولوجين قعدت تكلمه كتير بتظمن إنه كويس وهو
ظمنها وهزر معاه شوية وبعدها قفل وراح يقعد ما
حبييته ويتظمن هو بوجودها

على الناحية الثانية جسر أول ما دخل بيته لقي ريم
قاعده قصاد الباب وحاطه رجل على رجل وماسكه
معلقة خشب كبيرة في ايدها اللي مربعاها وتعابير
وشها تُدرّس حرفيا

جسر : استر يا ستير

ريم : كنت فين كل ده ، هو إحنا فينا بيات بره البيت
كمان ؟

جسار رفع ايديه باستسلام : لا مافيناش بس كانت
حالة طارئة غصب عني

ريم قامت وقفت : مين طارئة دي أنت بتخوني يا
جسار ؟

جسار بصوت واطي : ايه البت المجنونه دي ؟

ريم كشرت أكثر : سمعتك على فكرة وأنا هوريك
الجنان على اصوله دلوقتي

فضلت تجري وراه بالمعلقة وهو بيضحك عليها لحد
ما وقعها على الركنة وقعد فوقها وكتف ايديها فوق
دماغها بايديه وهو بيتنفس بسرعه : يا مجنونة
تعبتيني معاكي

ريم : وسع أنا ز علانه منك

جسار : وأنا مايهونش عليا از عل القمر ده

ريم : نتكلم جد شوية بقى ، طمني في حاجة حصلت
مع أخوك ؟

جسار : عرفتي منين إنه اخويا ؟

ريم : مش محتاجة ذكاء ، أنت مستحيل تسييني
وتمشي بالشكل ده من غير مايكون هو

جسار أبتسم : هو فعلا ، كان في مشكله بس الحمد
لله عدت على خير

ريم : طيب الحمد لله

جسار : بس في مشكلة تانية كبيرة أوي

ريم بقلق : مشكلة ايه خير ؟

جسار قرب وشه منها وهمس : آدم مراته حامل ،
وأنا بقى من النوع اللي بيغير بسرعة وعايز طفل أنا
كمان

ريم اتكسفت وبصت بعيد : بس بقى

جسار ابتسم وكتف ايديها بايد واحده وحرك التانية
رجع بيها وشها ليه : لسه بتتكسفى مني ؟

ريم وشها أحمر جامد : ايوه ، فكني بقى

جسار ضحك وفكها وقام بس ماسمحلهاش تاخذ
نفسها وكان شايلها بدراع واحد : أنا مايرضنيش

حبيبي تتكسف مني كده ، فخليني بقى أعلمك الجرأة
على اصولها

ريم خبت وشها في كتفه وهو ضحك

« ونسيب بقى الناس دول مع بعض إحنا مالناش
دعوة بحد »

يتبع _____

بقلم/مريم محمد عبد القادر

لو البارت عجبكم ماتنسوش الفوت (النجمة) ورأيكم
في كومننت لطيف

دمتم في حفظ الرحمن ورعايته ♡ ♡

اللهم صل وسلم وبارك على سيدنا محمد

بقلم/مريم محمد

مروان من ساعة ما عرف حقيقة أهله وهو قاعد مع
نفسه في اوضته ولا بياكل ولا بيشرّب وقافل على
نفسه ومش عايز لا يكلم ولا يشوف حد

دولت خبطت على باب اوضته ودخلت عنده ، بصت
عليه كان قاعد على سريره وحاضن رجله وشكله
باين عليه التعب

راحت قعدت جنبه وحطت ايدها على كتفه : مروان
يابني مش حرام عليك اللي أنت بتعمله في نفسك ده
؟ أنت بقالك يومين ما حطتش حاجة في معدتك

مروان : احسن يارب أموت حتى وارتاح وأريح

دولت : لا حول ولا قوة الا بالله ، يابني ربنا يهديك
ولما تموت أنت كده استفدت ايه ؟ عايز تضيع
اخرتك عشان ايه بس ؟

مروان سكت شويه : أنا طول عمري كنت بتقارن
 بادم لحد ماكرهته و عملي عقدة وهو رغم كل الاذى
 اللي شافه مني عمره ما وجعني أوي زي ما كنت
 بعمل ، حتى يوم مابعت ناس يكسروله مطعمه
 وضريته جامد وكان ممكن يتأذى جامد الا إنه عمل
 ايه ؟

أبتسم بسخرية : غرقلي اليخت اللي كنت جايبه
 عشان أكمل فيه المسخرة اللي كنت عايش فيها ،
 الظاهر بيان إنه اذانى بس في الحقيقة هو كان
 بينقذني من نفسي ، وأنا في المقابل كنت بخطط
 إزاي اكسره

حط ايده على وشه : هو قلبه أبيض وكل اللي كان
 عايزة مني نبقي اخوات وأصحاب زي زمان بس أنا
 كنت بتفنن كل مرة اجرحه إزاي ، أنا إنسان بشع
 بجد يا نانا

دولت اخدته في حضنها وطبببت على ظهره : كفاية
 يا حبيبي كفاية ، أنت فعلا غلطت جامد بس أنت

إنسان والإنسان بيغلط والمهم إنك عرفت غلطك ده
وتحاول تصلحه

مروان حضنها جامد : آدم مش هيسامحني يا نانا آدم
قال انه بيكرهنا ومش هيسامحنا ابدا ، أنا خلاص
كده ضيعت كل الفرص اللي قدمهالي ومافيش فرص
تانية

دولت وهي بتمسح على شعره براحه : ده بيتهيالك ،
آدم مش قاسي أوي كده يمكن يكون اه موجوع
ومصدوم بس صدقني هياخد وقته بس يفوق
وهتلاقيه راجع تاني ، ده حفيدي وأنا عارفاه ، أنت
تعرف كام مرة قالي أنا هسافر ايطاليا ومش راجع
تاني ابدا لو على جثتي وفي الآخر الاقية راجع بعد
شهرين بس ويدخل في حضني ويقول أنا ماقدرش
ابعد كده ، حبيب قلبي بجد قلبه ده زي البفته البيضاء
لو اتكلمت معاه بس واعتذرت عن غلطك هياخذك
في حضنه وهينسى كل حاجة حصلت زمان

مروان : نانا كلامك ده بيوجع قلبي أكثر حرام
عليكي

دولت : حقك عليا يا حبيبي ، قوم يالا يابني وبطل
تحبس نفسك كده

مروان هز دماغه برفض وهي : طيب مش عايز
تيجي معانا عند آدم ؟

مروان خرج من حضنها : انتوا هتروحوله ؟

دولت : أكيد هروح أنا مايهنش عليا اسيبه زعلان
كده ، و هند بقالها يومين من ساعة اللي حصل وهي
هتتجن و عايزة تروحله بأي شكل ، و عمته كارما
نزلت هي كمان من ايطاليا وزمانها على وصول

مروان قام بسرعة وهو رايح ناحية دولابه : وأنا
كمان هاجي ، هغير واجي معاكم او عوا تمشوا من
غيري

دولت أبتسمت : ماشي يابني أنا في اوضتي لما
تخلص ابقى تعالا عشان ننزل كلنا مع بعض

دولت خرجت من عنده وهو دخل الحمام بسرعه
يجهز وهو بيجري حولين نفسه كأنه متاخر على
امتحان ولا حاجة وخلال عشر دقائق كان جاهز
وراح لدولت ، دخل عندها كانت كارما وصلت
وقاعده معاها وهند ماسكه الاوضة رايح جاي رايح
جاي بتوتر

مروان : نانا أنا جاهز يلا

سمع صوت من وراه : وأنا كمان جاهزة

مروان بص كانت تمارا اللي لبست هي كمان ونزلوا
كلهم راحوا لآدم

في بيت آدم سولاف كانت قاعده في الصالون و آدم
 نايم على رجليها وهي بتلعب في شعره وبيتكلموا مع
 بعض بصوت هادي

سولاف : دومي

آدم مغمض عينيه : قلب دومك

سولاف : من يومين لما كنت تعبان شويه _____

قطعت كلامها لما آدم بصلها بتوتر : أنا اذيتك يومها
 وأنتي خبيتي عليا صح ؟ قولي يا سولاف بأمانه

سولاف أبتسمت وهزت دماغها برفض وفضلت
 تلعب في شعره تاني : لا خالص مش كده ، أنت
 قولت قبل كده إن أكثر حاجة بتكرها هي الكذب وأنا

لا يمكن اكدب عليك ابدا ، فلما قولتلك إنك ماءذتنيش
يبقى مش بكذب عليك

آدم اتنهد براحه : طيب في ايه ؟

سولاف : يومها طلبنا دكتور عشان نطمئن عليك
وقالنا إنك بتتعرض لضغط وتوتر كثير ويعني ،
ممکن تحتاج لدكتور نفسي وكده

آدم اتنهد واتعدل في قعدته : أنا دكتور نفسي هنا
، روحك وقلبك وعقلك كلك على بعضك دوا ليا ، أنا
مش محتاج لحاجة أو حد اكثر من احتياجي ليكي
أنتى ، ماتبعتنيش لدكاتره نفسيين وضمينى وبس ،
خودينى جوا حضنك وهدينى فيه وأنا هبقى كويس ،
مش محتاج لحد غيرك انتى ، فهمتيني يا سولاف ؟
أنتى وبس

سولاف دقات قلبها بتزيد من وقع كلامه وضمته
لقلبها تلبي رغبته وهو أبتسم وهو يستمتع بتأثير
كلامه على دقات قلبها ، قاطعهم صوت الباب بيخبط

سولاف : أنت مستني حد ؟

آدم : لا

سولاف : تفكر جसार ؟

آدم سكت شويه : لا مش هو ، دي دولت و هند

سولاف : عرفت منين ؟

آدم رفع دماغه وبصلها : أكيد هما ، عارفهم مش
هيراتاحوا غير لما يجوا

قام وقف : ادخلي أنتي غيري هدومك دي وأنا هفتح

سولاف دخلت تغير وهو راح فتح الباب وزى ما
توقع كانت دولت واللي معاها

آدم نقل نظراته بينهم كلهم بصمت قطعته دولت : ايه
يابن جمالات هتسيبنا واقفين على الباب كده ؟

آدم وسع من قدامهم : لا طبعا إزاي اتفضلوا

دخلوا كلهم وقعدوا بصمت في الصالون و آدم دخل
المطبخ ، شوية وسولاف راحتله : بتعمل ايه لوحدك
؟

آدم : جهزيلهم حاجة يشربوها أنا داخل اوضتي

مشي خطوتين بس هي مسكت دراعه : وهتسيبهم
كده ؟

آدم : اه

سحب دراعه منها ودخل اوضته وهي اتتهدت بعنف
وعملت عصير وطلعت ، حطته على الترابيزة
الصغيرة وقامت سلمت على دولت وباست ايدها
وسلمت على هند وحضنتها وراحت قعدت : أحم
منورين يا جماعة ، وحشتوني أوي

هند : وانتى يا حبيبتى وحشتيني أوي ، قوليلي عامله
ايه مرتاحه مع آدم ؟

سولاف ابتسمت بحب : الحمد لله يا ماما

هند طبطبت علي ايدها : ربنا يسعدكم يا حبيبتى

دولت : فين جوزك يا سولاف ؟

سولاف بصت في الارض باحراج : أحم هو دخل
الأوضة تلاقيه هيغير ولا حاجة وشوية وجاي

دولت : بقى كده يا سولاف بتكدي عليا شيفاني عيلة
صغيرة ؟

سولاف بسرعة : والله ابدا حضرتك أنا بس ،
ماعرفش بصراحه هو دخل يعمل ايه ؟

دولت : قولي مش عايز يقعد معانا وخلص إحنا
عارفين

سولاف سكتت وبصت في الأرض و هند قامت وقفت
: وريني فين الاوضة دي يا بنتي خليني اكلمه شوية
، ده بعد إذنك طبعاً يا أمي

دولت : روعي يا بنتي هو مش هيسمع غير ليكي

سولاف اخدت هند وراحت عند الاوضة وقبل
ماتدخل مسكت ايديها : ماما أنا خايفة يقولك حاجة
تزرعل

هند : خليه يقول اللي يقوله ، أنا اهون عليا أسمع
كلامه القاسي ولا اشوفه ساكت كده

سولاف اتنهدت بقلة حيلة وخبطت على الباب بتوتر
وفتحته ، دخلت كان ادم قاعد علي السرير وباصص
في الأرض بشرود وباين عليه الهم

راحت قعدت تحت رجليه : آدم حبيبي

آدم بصلها بصمت وهي : مش هتطلع تقعد معانا
شوية ؟

آدم : مش عايز

هند : ولا حتى عايز تقعد معايا أنا ؟ كده اهون عليك
 ؟ مش كنت دايمًا بتقولى أنتى فى مقام أمى بس
 الظاهر كل ده كان كذب

آدم ماقدرش على زعلها وقبل ما تخرج من الأوضة
 كان قام وحضنها جامد : حقك عليا أنا آسف

هند لفتله واخدته فى حضنها وبدموع : حقك عليا
 أنت يا ضنايا حقك عليا ، أنا آسفالك والله على كل
 اللي حصل عارفه إن الأسف مش هيقدم ولا هياخر
 بس خلينى اعتذرلك عن كل القرف ده

آدم : ماتعتذريش أنتى ما عملتيش حاجة غلط

هند : طيب تعالا يلا اقعد معانا شوية ، دي عمك
 نزلت مصر مخصوص عشانك ومروان يا حبة
 عيني من ساعة مامشيت وهو مموت نفسه من
 العياط وضميرة هيموته وماحطش لقمه فى بوءه من
 ساعتها ، ودولت حبيبتى بتحاول تجمد عشان العيال

دول بس أنا عارفه إنها تعبانه ومش هتقدر تستحمل
أكثر من كده ، حرام عليك ممكن يجرالها حاجة وأنا
خايفه عليها

آدم بعد عنها : حاضر ، حاضر يا هند جاي ، اطلعي
أنتى وأنا هحصلك

هند طبطبت علي كتفه وطلعت وهو بص لسولاف
اللي مسكت وشه بين ايديها : حبيبي أنا معاك

هي دي بس الجملة اللي آدم كان محتاج يسمعها في
اللحظة دي ، حضنها جامد بيلمم شتات نفسه واخذها
في ايده وخرجلهم

كلهم أول ما شافوه قاموا وقفوا بتلقائية وهو راح
ناحية دولت وباس ايديها وجبينها : أوعي تزعلي
مني يا نور عيني

دولت ضمته : حبيبي أنا عمري مابز عل منك يارب
أنت بس اللي ماتبقاش زعلان مني

آدم بص في الارض : لا مش زعلان

دولت حست إنه لسه زعلان بس ماحبتش تضغط
عليه اكثر وهو راح سلم على كارما : كرملي

كارما بدموع : أنا اسفه يا آدم ، اسفه أوي

آدم : حبيبي ماتتاسفيش أنتي مالكيش دخل باللي
بيحصل

كارما هزت دماغها برفض : لا ليا، أنا كمان كنت
عارفه اللي بيحصل وسكت

آدم بعدم تصديق : كنتي عارفه ؟

كارما : حقك عليا ، بس عاصم هددني لو نطقت
هيقتل يعقوب واياس ، خوفت

آدم أخذ نفس طويل وطلعه بعنف : خلاص يا عمتي
ماحصلش حاجة

كارما بدموع : عمتي ! دي أول مرة تقولهالي يا آدم

آدم باس ايديها : خلاص ماتعيطيش يا كرمه أنا
مايهونش عليا ز علك

كارما حضنته جامد : ولا أنت يهون عليا ز علك يا
حبيبي

آدم مسح على ظهرها وبص لاياس اللي شاورله
بحواجبه وهو ابتسمه

راح وقف عند تمارا : انتى يا بت لازقة في الولد
كده ليه ؟ ايه مافيش كسوف ولا إحترام ليا ؟

تمارا قامت : انا اسفه يا ابيه ، اسفه على كل حاجة

دموعها بدأت تنزل : اسفه على كل حاجة حصلت ،
أنا عملت كتير حاجات مقرفه وماما كمان انا اسفه
أوي

أدم حضنها براحه : بس يا تيمو خلاص يا حبيبتى
ماحصلش حاجة

بعد عنها ومسح دموعها : أنتى من امتى كنتى
عيوطه كده ؟

تمارا : من ساعة ماسبتنى ومشيت يا ابيه ، من
ساعة ماتخليت عني وأنا حسيت أنى ضعيفة ومش
بعرف اتصرف

آدم أبتسم : أبيه عمره مايتخلى عنك ابدا او عى
تخافي أو تحسي بالضعف أنا دائما في ضهرك

تمارا أبتسمت بدموع وهو راح قعد جنب مروان
وزق رجله : وسع كده مش بيت ابوك هو عشان
تاخذ راحتك

مروان لم رجليه باحراج وهو ساكت وباصص في
الأرض وادم بص لدولت : والله شعور جميل أوي يا
دولي أنى اقعد كده واتشرط على خلق الله يعملوا ايه
ومايعملوش ايه في بيتي

دولت رفعت حواجبها بتحذير : آدم !

آدم أبتسم : حبيبي هو والله بس هو مخه تخين حبتين
كده

مروان بصله لقاءه بيبتسم : وحشتني ، أنا مستنيك من
١٦ سنه ، غبت أوي

مروان جز جامد على اسنانه بيمنع دموعه لدرجة
إنهم كانوا سامعين صوت اسنانه

آدم : براحة على سنانك هتتكسر وهتركب طقم سنان
في سن صغير يا عيني

مروان حضنه جامد : أنا آسف

آدم : اسفك مش مقبول ، هو أنت فكرك عشان قولت
آسف أنا هعديها كده بسهولة

مروان بعد عنه وهو كشر بطريقة مضحكة : ده اللي
أنت اكلته بط بط هطلعه على جنتك وز وز يا حبيب
والديك

مروان بصله بصمت وهو ضحك : وربى قمر
خالص وأنت متوتر كده

حضنه تاني : تعالا تعالا خش في حضن أخوك يا
فواز

مروان أبتسم وبادله الحزن

الباب خبط فادم زق مروان جامد لدرجة إنه وقع
على الارض وشهق بدراما : يالهوي يا ولاد ، اكيد
شرطة الاداب

دولت ضحكت : آداب ايه ياولا أنت ؟

آدم وهو رايح ناحية الباب : يوه مش انتوا اللي
نازلين أحضان وبوس من ساعة ما جيتوا

فتح الباب كان جسار ومراته : انت يالا مش كنت
هنا امبارح وأول هو كل يوم ؟

جسار : تصدق إنك عيل لطح ؟

آدم : اه عادي اصدق

بص لريم : اتفضلي يا هانم

وزق جسار : أنت بقى ماتفضلش

جسار : ايه يالا التناحة دي ؟

هند من وراهم : في ايه ياولا أنت وهو ، هتفرجوا
الناس علينا

جسار : ايه ده هنود هنا ؟ وحشاني أوي

دخل سلم عليها ودولت بصتله : ايه ماوحشتكش أنا
كمان ؟

جسار : معقوله ودي تيجي برضة

راح سلم عليها هي كمان : العائلة كلها هنا ، او عوا
تكونوا بتاكلوا من غيري

آدم : معفن وربى معفن

جسار بصله وبغيظ وبعد كده لاحظ مروان اللي قاعد
بصمت فكشر : هو ده ايه اللي جابه هنا ؟

آدم : اعصابك يا شبح

جسار : ماتر خمش الواد ده _____

آدم بجدية : الواد ده ايه يا جسار ؟ يمشي ؟ عايزني
اطرده من بيتي ؟

جسار : خليه يغور

آدم اتهد بقلة حيلة : يا رب صبرني ، اقعد هادي يا
جسار وبلاش مشاكل الله يرضى عليك أنا قولتلك قبل
كده مروان كويس بس هو مغيب شوية واديه فاق ،
خلاص بقى

جسار لسه مكشر و آدم شده من دراعه : يا عم فك
بقى

راحوا قعدوا مع الكل وجسار قعد جنب مروان اللي
حاسس إنه متحاصر من كل مكان أو تحت تهديد وده
بسبب نظرات جسار ليه

دولت : آدم

آدم بصلها : عايزاك في كلمتين لوحدنا

آدم قلق بس قام معاها طلعا القرندا وهي : اللى
حصل زمان

آدم : بلاش نفتح في دفاتر قديمه مش هنطول منها
غير الوجع

دولت : قولتلي انى كذبت عليك، أنت اتهمتني بـ

آدم قطع كلامها بسرعه وهو بيملك ايدها : انشالله
أموت قبل ماتهمك بحاجة زي دي ، أنا عمري ابدأ
ماقصد كده

دولت : بعد الشر عليك يا آدم ماتوجعش قلبي
بكلامك ده حرام عليك

آدم : حقك عليا خلاص مش هتتكرر

دولت هزت راسها وكملت : أنا بس كنت عايزه
اوضحلك موقفي ، افهمك اللي حصل بس

آدم بتفهم : حاضر يا دولت قولي

قعد وهي قعدت قصاده وبدأت تحكي : زمان أوي
من أكثر من خمسين سنة لما اتجوزت مهاب الله
يرحمه واجهتنا مشاكل كتير بسببها ما عرفش يعمل
فرح زي باقي البنات وكمان اتجوزته وهو عنده ولد
لسه ماكملش السننتين ومحتاج رعاية ، حصلتنا
مشاكل كتير في بداية جوازنا ومشاكل الأهل وغيره
، بعد سنين مهاب حب يعوضني عن كل المشاكل
والتوتر اللي حصل معانا فكتبلي كل أملاكه باسمي ،
أنا قولتله كل ده مايفرقش معايا مش عايزه منه
فلوس ولا أملاك بس يفضل جنبي ، مش عايزه

حاجة في الدنيا غيره بس هو أصر ووالي عشان قلبه
يرتاح فسيبته يعمل اللي عايزه

عدت السنين وكل حاجة كانت مستقره لحد اليوم اللي
حصل فيه اللي حصل معاك ، أنا في الأول والله
ماكنتش أعرف أي حاجة زيكم ماكنتش فاهمه ليه
كمال عمل كده في جمالات ولا ليه اتجوز العقربه
التانية ، بعد مانت سافرت أول مره كمال قالي
جمالات يعنيبي

سكنت شويه وكملت : الكلام الخايب اللي قاله ده
ووراني ورق الذي إن ايه ، أنا ماصدقتش برضه
كنت عارفه إن مستحيل جمالات تعمل كده ، ده أنا
أكثر واحده كنت بقعد معاها وحفظاها زي بنتي
ومستحيل حاجة زي دي تطلع منها وكنت متأكده إن
في حاجة غلط بس ماعرفتش أوصل للحقيقة مهما
ادور عليها

اتنهدت بحسره : لحد ما في يوم سمعت العقربه اللي
منها لله بتتكلم مع حد في الموبايل في اللي حصل

وإنها هي السبب في كل ده هي والثاني عاصم ، أنا
 اتصدمت ، كنت عايزه اجيبها من شعرها وافضحها
 ، روجت لكمال وحكيتله وهو فضل يقولى أكيد
 فهمتى غلط ومستحيل اخويا يعمل فيا كده وفين دليلك
 وكلام كثير تانى ، أنا قولتله هجيب الدليل وهيشوف
 وسيبته ، دورت كثير على دليل بس هما كانوا
 حسبينها صح وماخلوش أي دليل عليهم نهائي

بصتله : ماعرفتش أعمل أي حاجة ، ماعرفتش
 ابرئ جمالات ولا اجيب حقك

آدم كمل : فقررتي تحرميهم من حقهم

دولت هزت راسها بتأكيد : فعلا ، لما أنت رجعت
 أول مره من إيطاليا واستلمت وراث أمك منى قررت
 ساعتها اكتبلك كل أملاك مهاب معادا نصيب كارما
 هي مالهاش ذنب ، سلمتك كل حاجة عقابا ليهم على
 اللى عملوه

حطت ايدها على خده وهي بتمشي صوابها على
 عينه المصابه برفق : ومن يومها قررت طلا ما مش
 هعرف اثبت اللي عملوه ولا هعرف اجيب دليل
 عليهم فمش هخلي جنس مخلوق يقرب منك أو يأذيك
 تانى أبدا لو التمن حياتي

آدم ببصلها بحزن على حالهم : وأحنا عملنا ايه
 عشان يحصل فينا كل ده يا نانا ؟

دولت قامت قعدت جنبه واخذته في حضنها : إحنا
 ما عملناش حاجة بس في نفوس بتتولد مريضه بتأذي
 كل اللي حوليها بدون سبب ولا وجه حق

آدم رفع ايده وضم دولت ليه وهي بعد صمت طويل
 قالت بتردد : أبوك يا آدم

آدم قاطعها وهو ببعد عنها : أنا ماليش اب ، قصروا

دولت مسكت دراعه : آدم ماتقولش كده ، ان كان هو
وحش خليك أنت احسن منه

آدم بص بعيد وسكت وهي : كمال دخل المستشفى

آدم بصلها بصدمة : ليه ؟

دولت : ماستحملش اللي حصل يومها ووقع

آدم : وحصله ايه ؟

دولت بصت في الارض : جلطه

آدم برق جامد : جلطه !!

دولت : فريال ربنا ينتقم منها كانت بتديلة دوا زي
السم كان بيأثر على مخه والصدمة كانت جامدة عليه
وحصلتله جلطه في مخه ودخل غيبوبه

آدم يببصلها بجمود ودموعة متحجرة في عينه : سم
!!

دولت هزت دماغها ببطئ : الدكتور اكتشف ده
و عرفنا إنها هي والبوليس اخدها واتحبست اربع أيام
على ذمة التحقيق

بصتله : الدنيا مقلوبه في القصر يا آدم

آدم حط ايده على وشه واتنهد بعنف : هو في أنهي
مستشفى ؟

دولت : مستشفى _____ الدولي

آدم هز دماغه بفهم وجه يدخل جوا دولت مسكت
دراعه : رايح فين ؟

آدم : داخل اغير ، هروح اشوفه

دولت : ماشي يا آدم على راحتك

آدم دخل وراح على اوضته بصمت و غير وخرج

سولاف بصتله : أنت رايح في حته ؟

آدم مسك خدودها : ورايا مشوار صغير كده وراجع
تاني ، هحاول ماتأخرش وريم هتقعد معاكي لحد
ماراجع

جسار : أراك تقرر من دماغك

آدم بابتسامة سمجه : اصلك جاي معايا أنت كمان

جسار أبتسم بنفس الطريقة : حلو أوي ده

آدم بص لمروان : وأنت كمان ، بيتهياي في كلام
كتيبير أوي محتاجين نقوله

مروان هز دماغه بموافقة وجسار قلب عينيه بضيق
وآدم أبتسم : شوية عيال

راح باس جبين سولاف ومشى وجسار ومروان
ماشيين وراه وهما عمالين يبصوا لبعض بشر

ريم بصت لسولاف بإحراج : سوري على الإزعاج

سولاف : إزعاج ده ايه، يا بنتي ده انتى واحده من
العيله

شدتها من ايدها : تعالي تعالي نقعد

قعدوا الإيتين وتمارا راحت قعدت جنب سولاف
 بخجل وحممت فسولاف بصتلها : أنا ، أنا كنت
 عايزه اعتذر ليكي على كل الاذى اللي سببتھولك
 زمان

رفعت وشها وبصتلها بندم : أنا اذيتك كتير وبسببي
 كان ممكن تموتي على ايد اللي اسمه حسام ده ، أنا
 آسفه أوي

سولاف ابتسمت بود ومسكت ايدها : ماتتأسفیش أنا
 مش زعلانہ ، كل ده كان ماضي وراح لحاله
 خلاص

تمارا : أنتی بجد عسوله اوي مش عارفه أنا كنت
 بكرهك إزای زمان أنتی ما شاء الله بتدخلي القلب
 بسرعه

أبتسمت : ليه حق الصراحه آدم يحبك كده

سولاف أبتسمت بكسوف : أنتى اللى جميله عشان
كده بتشوفي اللى حوليكي جميل

الإثنين حضنوا بعض وبعدها بصوا لبعض وضحكوا
والباقيين انضموا لهم في الحوار ، واياس أخذ بعضه
وطلع الفرندا وهو عمال يبص على ريم ، عايز
يروح يسألها عن فرح بس خايف يبقى شكله وحش
قدامهم

آدم راح المستشفى اللي كمال فيها وراح وقف قدام
الازاز بتاع اوضة الانعاش اللي نايم فيها ، رفع ايده
حطها على الازاز قصاد وش كمال كأنه بيطبطب
على راسه بصمت

جسار : آدم أنت كويس ؟

آدم ماردش وفضلت عينيه متعلقة بكمال ، وبعد
شوية لف و عطاله ظهره : يلا نمشي

أخذ بعضه ومشى ومروان بص لجسار : هو__

جسار قاطعه : ياريت مالکش فيه

مشى وسابه مدايق من المعاملة المستفزة دي : عيل
رخم ، اوووف

حصلهم بسرعة وراحوا قعدوا في مكان على البحر
وآدم ومروان قعدوا يتكلموا كثير ويتعاتبوا أكثر لحد
ماتصافوا

فرح كانت في المطعم شغالة بز هق وبعد ما خلصت
غيرت اليونيفورم وراحت للمدير : إزيك يا فندم ؟

جمال : اتفضلي يا فرح

فرح دخلت : كنت عايزة اقدم على اجازة يومين لو
سمحت

جمال باستغراب : ليه خير ؟ في حاجة ولا ايه ؟

فرح : لا حضرتك مافيش بس انا محتاجة أريح
يومين مش أكثر

جمال بصلها شوية : ماشي يا فرح إجازاتك السنوية
وأنتى حرة فيهم

فرح : متشكرة أوي يا فندم

مشت وهي حاسة إنها فعلا مرهقة ، مش جسديا لا
فكريا ، تعبت من كتر التفكير في إياس ونار الشوق
بتاكل في قلبها وهي مش في ايدها حاجة تعملها

كانت ماشية سرحانه ومش واخده بالها من الطريق
وفجأة لقت دماغها خبطت في ايد حد واقف جنبها ،
بصت قدامها لقت عامود نور كانت هتخبط فيه لولا
اللي حط ايده قدام راسها

دموعها بدأت تنزل بصمت وهي عارفه صاحب
الايدي ، هو ، ده حضوره وبرفانه ، رفعت وشها
وبصتله كان بيصلها بكل شوق وحب : وهشتيني

يتبع _____

بقلم/مريم محمد عبد القادر

لو البارت عجبكم ماتنسوش الفوت (النجمة) ورأيكم
في كومننت لطيف

دمتم في حفظ الرحمن ورعايته

اللهم صل وسلم وبارك على سيدنا محمد
بقلم/مريم محمد

اياس : وهشتيني

فرح بصنتله شوية واخذت بعضها ومشت من غير
ماترد عليه

اياس مشي وراها بسرعة : استني بس ، فره بالله

فرح بصنتله بغيظ : مالکش دعوة بيا لو سمحت يا
أستاذ وبطل تمشي ورايا عشان ماتر علس مني بجد

اياس وطى أخذ طوبة من على الأرض وحطها في
ايدها : لو دي بيهدي النار اللي جواكي أنا مستعد

فرح بصتله شوية بشر و رمت الطوبة تحت رجليها
ومشت و اياس مشي وراها تاني : فره بقى ، بالله
عليكي اسمعيني ، ما تعلمي فيا كده

فرح وقفت بغيط وبصتله : واشمعنى أنت تعمل فيا
كده يعني ولا هو حلو ليك ووحش ليا ؟

بدأت تضربة جامد على كتافه : اشمعنى أنت تسيبيني
وتمشي كده و تعيش حياتك و تسيبيني أنا حياتي
تتشقلب فوق دماغي

رفعت صباعها في وشه بتحذير وقوة مزيفة :
اسمعنى بقى يا بني ادم أنت ، أنا لو بس لمحتك
حوليا تاني مش هيصالك طيب بجد هعمل فيك
محضر بعدم التعرض وهاذيك جامد

سابته تاني ومشت وهي بتمسح دموعها بعنف و هو
قال بصوت عالي فرج كل الشارع عليه : فره أنا
بهبك

فرح بصوت واطي : الله ياخذك هتفضحني

سرعت خطوتها وهو راح وراها وبرضه بصوت
عالي : يا فره والله بهبك

الناس بصوا عليهم وهو : تتجوزيني يا فره ؟

فرح حطت ايديها على قلبها ووقفت مكانها وهو راح
قدامها ونزل على ركبته في مشهد رومانسي سخيف
محروق في كل الأفلام الأجنبية : تتجوزيني ؟

البنات اللي في الشارع سقفوا والشباب صفروا
بتشجيع والناس اتلمت حوليهم وفرح واقفه مكانها
مش عارفه تخرج من الموقف ده إزاي

إياس : والله بهبك وما بيقدر أعيش من غيرك
وعشان كده جيتلك في أقرب وقت ، تتجوزيني يا
فرهتي ؟

فرح : ماينفعلش اللي أنت بتعمله ده يا إياس لو
سمحت

إياس قام وقف : تيب انتى بيقول عايزانى أعمل أياه
وأنا بيعمله ؟

فرح : تكلم بابا وردي هيوصلك من خلاله سواء
بالموافقة أو الرفض ، عن إذنك

مشيت وهو بيتابعها بنظراته وواحد من الواقفين راح
حط ايده على كتف إياس : لو بتحبها بجد روح
اتقدملها قدام أهلها في النور وشرفها بالمقام اللي
تستحقه وربنا يوفقك

إياس هز دماغه بفهم وبص على فرح اللي اختفت
من قدامه وهو بيخطط للي هيعمله عشانها

ريم كانت في بيتها قاعده على الركنه وجسار نايم
على رجليها وماسك فونه بيشات مع حد تبع شغله
في شركة الحراسة بتاعته وريم مركزة في ملامحه :
ماقلتلش بقى يا جيسو

جسار : اممم ؟

ريم : أنت تعرف اللي اسمه آدم ده منين وايه اللي
وداك ايطاليا اصلا ؟

جسار : ياااه يا ريم دي قصة طويلة أوي

ريم : احكي هو إحنا ورانا حاجة ؟

جسار حط فونه جنبه ومسك شعرها الطويل بيلعب
 بيه بين صوابه : شوفي يا ستي القصة بدأت من
 ساعة ما وعيت على وش الدنيا ولقيت نفسي في
 ملجأ وكل ذنبي في الحياة أنى يتيم ، أنا شوفت سنين
 عذاب أوي في الملجأ ده يا ريم وأنا لسه عيل مش
 فاهم حاجة ، مش فاكر كنا فين بالظبط في مصر بس
 أنا متأكد أننا كنا فيها يعني ، عشت في الملجأ سنة
 ورا سنه وكل الأيام شبه بعض ، اصحى الصبح
 بدري افطر وابدأ شغل في الملجأ مع كل العيال
 وآخر اليوم نتعشى وننام ولا بنتعلم حاجة ولا بنعمل
 حاجة مفيدة في حياتنا

بصلها : كثير عدى عليا ناس عايزين يتبنوا أطفال
 بس دايمًا كانوا يختاروا حد غيري وكان مكتوب
 على دماغي ما حدش يقرب مني ، وكل سنه بكبر
 فيها فرصة خروجي مع ناس تتبناني بتقل ، حسيت
 أنى منبوذ أوي

ريم حطت ايدها على خده بحب توصله فكره أنه
 مش منبوذ ولا حاجة بالعكس وهو كمل : وأنا صغير

كنت ضعيف وجبان أوي اى حاجة تخوفني واي
حاجة بعيط بسببها وعشان كده كنت بتعاقب كثير ،
الناس فاكرين ان الملاجئ دي درع حماية للاطفال
اليتامى بس الحقيقة إنه عنبر للاطفال عشان الناس
المريضة نفسيا تستمتع بتعذيب الأطفال الغلابة اللي
مالهمش حد

ريم : أكيد مش كل الملاجئ كده

جسار : أكيد بس اللي أنا شفته كان كده للأسف ،
المهم لما كملت ١٢ سنة تقريبا حصل حاجة غريبة
أوي معايا المديرة استدعتني لمكتبها وقالتلي ان في
حد غني أوي هيتبناني أنا وولدين غيري ، بصراحه
فرحت وبعقل طفل ركزت أنى هخرج من العذاب
اللي أنا فيه وبس وماخدتش بالي من باقي الكلام ،
عدت الأيام وجه الراجل اللي هياخدنا بصراحة أنا
خوفت أول ما شوفته قلبي اتقبض كده ، روحنا معاه
وهنا بدأت أحس ان في حاجة غلط بتحصل أنا
والولدين كنا مالناش حد نهائي ، اللي هو لقونا رضع
ومانعرفش ان كان لينا أهل ولا لا ، المهم الراجل ده

اخذنا وراح بينا لبيت مهجور كده في حته مقطوعة
وسابنا هناك مع عدد كبير من الأطفال ، في الأول
ما فهمتش هو ايه اللي بيحصل بس بعد كده عرفت ،
إحنا كنا بضاعة ، الراجل كان تبع المافيا وكان
واخذنا تجارة اعضاء

ريم شهقت جامد وهو طبطب على خدها : سافرنا
ايطاليا بالبحر وسبحان من نجانا منه بعد كل اللي
شفناه فيه ، وبعدها قعدنا في مكان زي مخزن أو
حاجة شبه كده لحد ما جه الراجل الإيطالي اللي
هيسئلنا

بصلها بحزن : في الوقت ده أنا حقيقي مش فاكرو ولا
فاهم ايه اللي حصل ، مش عارف حصل اشتباك بين
الطرفين ولا الشرطة هجمت عليهم المهم كان في
خناق وضرب نار ودوشة كثير ، خوفت أوي بس
كان كل تفكيري أهرب من المكان ده وللأسف سيبت
كل اللي كانوا معايا وهربت لوحدي

ريم حضنته جامد : كفايا يا جسار كده مش عايزة
أعرف زيادة

جسار سكت وفضل يطبطب على شعرها : كانت أيام
وعدت يا ريم

ريم : أيام صعبه أوي يا جسار

جسار : لسه في أصعب من كده

ريم بعدت عن حضنه : طيب كمل

جسار : انتى أكيد يا عندك شيزوفرينيا يا ملبوسة إنما
مستحيل تكوني طبيعية منين كفاية ومنين كمل ؟

ريم ضربته على كتفه بخفه : كمل بس وبطل بواخه

جسار : حاضر يا ستي ، اممم اه هربت من المكان
 ده باعجوبة حرفيا يعني لو سألتيني عرفت تطلع
 إزاي هقولك مش عارف الأكيد ان ربنا هو اللي
 خرجني من هناك ، المهم كل الناس كانوا مشغولين
 بالحرب دي وأنا طلعت اجري عايز أوصل لأبعد
 مكان ممكن ، جريت كثير كثير أوي لحد ماغمى
 عليا في الشارع ونمت وأنا مش عارف إنها مش
 آخر مره هنام في الشارع ومن اليوم ده بدأت حياة
 البلطجة والقرف اللي كنت عايش فيه ، اتبهدلت كثير
 بين الناس ولا لاقى مكان اقعد فيه ولا لاقى شغل
 أكل منه ولا فاهم لغة الناس أصلا وماشي اخبط في
 كل حاجة

ودى وشه بعيد باحراج : للأسف بدأت اسرق ،
 ماكانش قدامي حل غير ده عشان أعيش ، كنت عيل
 وجعان ومش عارف الاقي أكل فبدأت اسرق الأكل
 اى حاجة تعيشني

ريم نزلت دماغه على كتفها بهدوء وهو كمل :
 عشت كده لفترة لحد ماوقعت مع بلطجية الشوارع ،

دول شوية عيال صيع من أماكن مختلفة عاملين
عصابة وبيبلطجوا على الناس ، انضمت ليهم لقيت
عندهم مكان أنام فيه والاكل وكمان بدأت أتعلم اللغة
على ايدهم ، بس عشت كده لفترة معاها لحد ما في
مرة اتمسكنا من الشرطة بس طبعا كنت لسه عيل
وما عملتش جريمة فعلية فسابوني امشي بس بعد
ماتروقت في التخشبية يومين كانوا بكل حياتي اللي
عدت

سرح شوية كأنه بيفتكر : من بعدها بقيت مجرم
حرفيا ، كان جوايا غل وكره و غضب من الدنيا كلها
، بدأت أنا ألم الشباب اليتيم من الشوارع ونتعلم
الضرب والبلطجة وغيره، كونت عصابة بنفسى
كنت أنا القائد بتاعها وللأسف ماكانش حد قادر عليا
، عملت كل اللي ممكن تتخيلية ، سرقة وترويع ناس
واقترى وضرب كنا بنكسر محلات الناس ، كنت
بجد بشع

اتنهد : عشت كده لسنين طويلة أوي وأنا الغضب
اللي جوايا بيكبر أكثر مش بيقل واذايا كان بيكبر
معاه والعيال اللي كانوا معايا بقى بدأوا يشربوا

حط ايده على رقبته باحراج : بصراحة شربت
معاهم ، كل حاجة تتوقعيها وماتتوقعيهاش ، كل
أنواع الخمور والكحوليات مخدرات وسجاير مافيش
حاجة عدت عليا وماجربتهاش بس بصراحة
ماقدرتش أكمل في أي حاجة من دي ، كان جوايا
حاجة دايمًا تقولي اللي أنت بتعمله ده غلط ، بطل ،
الشباب منهم اللي كمل لحد الإدمان وفي اللي مات
بجرعة زيادة وفي اللي كمل في سكة تانية شمال
وبنات وحاجات فظيعة ، بس انا ربنا كان ساترها
عليا وماعملتش اى حاجة من اللي كانوا بيعملوها ،
بطلت شرب اه بس كنت لسه مستمر في اللي بعمله
أنا ومجموعة صغيرة من اللي ما عجبتمش حياة
الخمير والبنات دي زي

بصلها بتحفز من رد فعلها وهو خايف بس هي
بصتلها من غير ملامح : بتبصلي كده ليه ؟

جسار بتردد : مش هتقولي حاجة عن اللي عملته ده ؟

ريم اتنهدت : صحيح أنى مصدومه ومش متخيلة بس أنت برضة معذور ، كنت لسه صغير وعشت حياة مشوّهه في بلد كفر وماكانش عندك حد يعرفك الصح من الغلط بس ده ماضي خلاص

جسار : مش هتقولي أنى كدبت عليكى ؟

ريم : أنت ماكدبتش عليا ، أنت من قبل مانتهجوز قولتلي حياتي زمان وأنا كانوا بشعين جدا وهعيد عليك كلامك ، أرمي الماضي ورا ظهرك

مسكت وشه بين ايديها : وبعدين أنا كنت فاهمه سلوكك من قبل ماتتقدم ليا ، يوم ماتصبت زمان وقربت مني أوي وحاولت تبوسني مش كده ؟ فهمتك من البداية ومع ذلك كملت معاك لانى شيفاك نظيف

من جوا ولو حاولت معاك هتتغير بسهولة واهو كل
يوم بشوفك احسن من اليوم اللي قبله وكل يوم بكون
فخورة بيك أكثر

جسار أبتسم بسعادة انها مالا متهوش ولا شيفاه حد
وحش وعضنها بهدوء : أنا آسف

ريم : المفروض تعتذر لنفسك مش ليا ، أعتذر
لنفسك على كل الاذى اللي كنت فيه وكنت بتعمله
وأنت جاهل بالصح من الغلط

طبببت علي ظهره : وماتنساش رفع القلم عن ثلاث
منهم الصغير حتى يبلغ وأنت كل ده كنت حته عيل
مش فاهم هو بيعمل ايه ، غلطت اه فعلا بس
اعترفت بعدين بغلطك وبتحاول دلوقتي إنك تصلحه
على قد ما تقدر وانك تعمل حسنات تكبر بيها زادك
يوم القيامة

بعدت عنه ومسكت وشه بين ايديها تاني : أنا بحبك
يا جسار

جسار قلبه دق بعنف وأبتسم زي طفل صغير : وأنا
بحبك ، بحبك أكثر من نفسي يا ريم

ريم أبتسمت وهو كمل : بعد كده حياتي بقت أحسن
من ساعة ما قابلت آدم

ريم : طيب كمل

جسار : أول مره قابلت آدم فيها كان عندي زي ١٨
١٩ سنه كده مش فاكر أوي ، كان في الشارع
وماشي لوحده بين الناس شارد وحزين ، بصراحه
أنا أول حاجة لفتتني هي لبسه ، لابس اغلى
الماركات وبابن عليه العز بعقليتي زمان قررت ان
هو ده ضحيتي الجديده وزى ماكنت بعمل سرقتة
بس كان رد فعله غريب جدا

ريم : عمل ايه ؟

جسار : ماعملش ، مشكلته انه ماعملش اى رد فعل
 رغم أنى متأكد إنه حس بيا وكان حاطط ايداه على
 جيبه مكان المحفظة اللي اخذتها ، بصراحة أنا مش
 عارف ايه اللي خلاني ابص ورايا يومها واشوف
 هو بيعمل ايه ؟ في العادي كنت باخد الحاجة واجري
 بس ده كان مختلف ، بصيت ورايا وشوفته واقف
 ببص على الطريق اللي مشيت فيه ، أنا في الأول
 ماكنتش عارف هو ضرير ولا شايفني بسبب
 النضارة اللي كان لابسها ، لو هلة حسيت أنى ندل
 أوي أنى اسرق واحد ضرير فرجعت تاني ووقفت
 قدامه ، قعدت ابصله كتير وأنا مش عارف هو
 ببصلي من تحت نضارته السوداء ولا هو مش شايف
 اصلا

قعدت اشاور قدام عينية لحد ما هو اتكلم وقال [بس
 خايلتني] سألته ان كان بيشفو فقالي اه وسابني
 وراح قعد على كرسي على جنب ، أنتى لو عايزة
 الامانه هو عصبني ببروده ده ، بجد ادايقت أوي

مش عارف ليه بس هو عصبني ، روحته وسألته
 طلا ما هو بيشوف وحس بيا وأنا بسرقة ليه ما
 حاولش يوقفني ، رد عليا برخامة عصبني أكثر قال
 [انا مش فارق معايا شوية الملايم اللي أنت سرقتهم
 انا معايا بحر منهم واكيد مش هتعب نفسي واجري
 وراك وأنا مش محتاجهم] بصراحة كان بارد وأنا
 اتعصبت وقومت ضربه في وشه واحنا الاتنين
 مسكنا في بعض ونزلنا ضرب في بعض لحد
 ماتشلفطنا

أبتسم على الذكريات الهبلة دي : بس بصراحة
 حسيته غريب أوي ، زي مايكون جواه بركان يقدر
 يحرق كل اللي حولية بس هو كابته ومخبية وراقناع
 البرود ده وماصدق يلاقي حد يفرغ غضبه فيه

بصلها : آدم كان ضعيف أوي ساعتها وحقيقي
 ضرباته كانت زي لعب العيال بالنسبالي بس مش
 عارف ليه في لحظة سييته يضربني وماقاومتهاوش ،
 زي ماكون كنت حاسس بالنار اللي جواه وسييته

يظفيها بس طبعاً ماقدرتش اسكتله كثير ومسكته
عجنته في ايدي

ريم بذهول : احبيه يا جسار

جسار ضحك : مش قولتلك كنت مجرم ، المهم من
حظنا المنيل كان في عربية دورية شرطه معدية من
قدامنا ومسكونا إحنا الإثنين و اخدوننا على القسم
واحنا مش مبطلين شتيمة وقلة قيمة في بعض
والغريب ان كل واحد مش فاهم هو بيشتتم ليه أصلاً
، وطبعاً بسبب اسم آدم ومكانته طلع منها زي
الشعره من العجين وأنا اللي لبست الليلة كلها ، بس
هو طلعتني قال للظابط إني صاحبة وحصل بس
خلاف بسيط بينا وخلاص يعني اتحل وكده

طلعت بس ماكنتش طايق نفسي ولا طايقة ،
بصراحة كنت ناوية أضربه تاني بس هو وقفني برده
البارد زي العادة وقالني [إحنا لسه قدام المخفر
وحركة كمان هسيبهم يروقوك ولا هتعب نفسي اسأل
عناك أصلاً] حقيقي كنت مدايق بس سيبتته ومشيت

عشان ماتجننش عليه ، مشيت خطوتين يادوب كان
هو موقفني وطلب مني طلب غريب أوي

فلاش باك

آدم : ما رأيك ان اعطيك كل ما تتمنى مقابل خدمه
صغيرة منك ؟

جسار بصله : وما هذه الخدمه ؟ على الرغم من ان
مظهرك يوحي بانك لا تحتاج شئ من احد

آدم قرب منه : ليس بالمظهر يا فلان ، قد يبدووا على
مظهري العز ولكن الله هو العالم بحال القلوب

جسار : الله ! أنت مسلم ؟

آدم : أجل ، وأنت ؟

جسار بص بعيد بيهرب من عينيه ، أصل هيقوله ايه
 ، اه مسلم وبعمل كل حاجة حرام في الدنيا و آدم
 ماحبش يضغط عليه : اذا ماذا قلت في طلبي ؟

جسار : ماذا تريد ؟

آدم : نصبح اخوه

جسار بصله بقرف : بالتأكيد أنت هارب من مشفى
 الأمراض العقلية

أتكلم مع نفسه بالعربي : هو أنا اسيب المجانين
 بتوعي هناك يطلعي ده كمان ، ابو شكلك
 عيل@#\$

آدم بصله شوية بصمت وبعدها رد عليه بالعربي هو
 كمان : أبو شكلك أنت يا@#\$ أنت يالا فاكر أنى
 عشان لابس نظيف وشكلي محترم هسيبك تشتمني

كده ، لا يابا أنا أصلا واحد مش متربي ولساني
اطول منك أنت شخصيا

جسار برق : أنت مصري ؟

آدم : ايوه يا روح أمك مصري

جسار كشر : طيب لم لسانك بقى يا حيلتها بدل ما
اعملها معاك

آدم مسك ياقة التيشيرت بتاعه : تعملها مع مين يالا
أنت ناسي نفسك ولا ايه ؟

جسار زقة بعيد : بقولك ايه يا ض أنا مش ناقص
وجع دماغ ، ابو دي اشكال بتتحدف علينا

سابه ومشى وهو راح وراه : طيب اسمع بس ياعم
ماتبقاش قفوش كده

جسار طنشه وكمل طريقة للمكان اللي عايش فيه
وماحسش بادم اللي ماشي وراه بصمت لحد مادخلوا
الخرابة بتاعة جسار ولقى آدم بيتكلم من وراه : الله ،
أول مرة اشوف خرابة بجد

جسار التفتله بخضة : أنت يابن ال#@ \$ بتعمل ايه
هنا ؟

آدم وهو بيلف في المكان : بغض النظر عن لسانك
الزفر ده بس شكك حد نظيف ، وaaaو مطوة دي
بجد ؟

قعد يلعب بيها لحد ما جسار اخدها من ايده ومسكه
من هدومه : ايوه مطوة يا حيلتها واللي هعلم على
خلقتك بيها بإذن الله

آدم أبتسم : شكك مسلم

جسار ادايق منه وكان فعلا هيعورة في وشه بس آدم
 قلع نظارته بهدوء : مش محتاج لده أنا كده كده
 متصاب

جسار بص على عينه المتصابة وسابه : أحم ،
 أحسن شكك واحد صايع وكان لازم تتربى

آدم بصله بحزن : أنت شايف كده ؟

جسار اتوتر : أنا مش شايف حاجة ويلا أمشي من
 هنا بقى قبل ما رجالتى يرجعوا ويبهدلوك

آدم ضحك : رجالتك ! شكك عيل والله ده أنت شكك
 ماكملتش ٢٠ سنه على بعض

جسار بصله بشر : أنت عايز ايه يالا أنت بجد ؟

آدم قرب منه بابتسامة : نبقى اخوات

جسار بزهبق : يارب صبرني ، انت متخلف يعني ؟
 يعني أنت سايب الدنيا كلها وماسك فيا أنا ؟ ماتروح
 تشوفلك أي واحد من ولاد الذوات اللي زيك ولا
 حتى قول لامك تجيبلك اخ ، ايه الخوته دي بس على
 الصبح

آدم بصله شوية بصمت : ماعنديش ام ، ومش عايز
 حد من الطبقة ال @\$# دي

جسار : وأنت ايش عرفك أني مش @\$# زيهم ؟

آدم بتفكير : تصدق ، أنت بيان عليك كده @\$# فعلا
 بس ماظنش أنك كده ، أو حتى ممكن تكون @\$#
 بس مش زيهم

جسار : لو خلصت أتفضل بقى من غير مطرود
 وخود الباب في ايدك

آدم : هديك كل اللي أنت عايزة

جسار وهو بيقلع التيشيرت بتاعه : مش عايز يلا
غور

آدم يببص على ظهره اللي كله علامات سكاكين :
اوووه ، سكاكين دي ؟ شكلك جبل

جسار : اللي هيتهد فوق دماغك بإذن الله

آدم : مش مشكله ، هي كده كده خربانه

جسار بص لريم : آدم في الوقت ده كان تنح أوي
حقيقي وعامل زي اللزقة وماكانش عايز يمشي ،
حاولت معاه كتير بس هو كان متبت في المكان ولا
كأنه ورت ابوه اللي سرقناه منه ، فضل يجي إسبوع

كامل عايش معانا وبياكل ويشرب من اكلنا بس تعب
وماقدرش يستحمل ، دخل المستشفى وكان عنده
إلتهاب في الجهاز الهضمي وتسمم وعمل غسيل
معدته وحوار كبير ، بس الحمد لله قام منها كويس
وأول ما شافني قالي [كنت عارف ان قلبك مش
هيطاو عك تسيبني لوحدي ، ده أنا برضه أخوك]
،كنت همشي واسيبه بس هو ضحك وقالي [أنت
السبب في اللي أنا فيه ده فلازم تعوضني]

بصراحة لفتني ضحكه ، آدم كان بيضحك على
الفاضي والمليان وخلص وكان كل مايتوجع أكثر
يضحك أكثر ، بصراحة مش هكذب واقول انه
ماكانش صعبان عليا ، مش عارف قلبي وجعني
وماهانش عليا اسيبه لوحده وهو باين عليه الوجع
والوحده ، ففضلت معاه في المستشفى يجي اسبوعين
لحد ماخف وقدر يخرج منها ومن هنا بدأت صداقتنا
وبعدها اخوات زي مانتى شايفه كده

أبتسم : حقيقي آدم ده مش هلاقي اخ زيه في الدنيا
دي ، ساعدني كتير أوي ، غيرني خالص شكلي

لبسي طريقة كلامي واكلي ، علمني الحاجات
الاساسية اللي بياخدوها في المدارس وكمان علمني
الدين وغير كثير فيا ، عرفني الصلاة والصوم
وغيره وغيره كثير ، كان عارف شغفي بالرياضة
والحديد فقدملي في نادي ألعاب قتالية وكمان ساعد
الشباب صحابي وده اللي خلانا كلنا نحبه ، كان
طيب جدا وبيعاملنا زي اخواته بجد وده اللي خلانا
لسه متمسكين بيه لحد النهارده

ريم : مين دول ؟

جسار : ادم هو اللي ساعدني أعمل شركة الحراسة
بتاعتي وكل الشباب اللي كانوا معايا اشتغلوا فيها
وكان هدفنا الاول حماية آدم ولحد النهاردة كل
الشباب دول شغالين تحت ايد آدم

ريم هزت دماغها بفهم وهو كمل : مرت سنين على
الوضع ده لحد ما في يوم آدم قالي إنه هينزل مصر
، بصراحة استغربت وسألته ليه وهو بصلي شوية
وقال بغباء كده [هزور أهلي] أنا حقيقي اتصدمت ،

مش عارف إزاي نسيت اصلا إنه ممكن يكون عنده
 أهل وبيت ودنيا غير الدنيا اللي إحنا عايشينها ،
 سألته ساعتها وأنا خلاص كده همشي !! بس هو
 ضحك واخذني تحت دراعه وقال لي أنى اخوه ومنين
 ما يروح أنا هبقى معاه

كمل بحزن : يوميا حكالي قصته كلها اللي قولتلك
 عليها وده خلاني اتمسك بيه اكثر ولما سافرت معاه
 وشوفت شوية الغجر اللي اسمهم اهله عاهدت نفسي
 أنى هفضل زي ضله وعمرى ما هسمح لحد ياذيه
 ابدأ لو التمن حياتي

بصلها : وبس يا ستى دي حكايتي مع آدم اخويا

ريم اخدته في حضنها جامد : انت شوفت كتير أوي
 يا حبيبي في حياتك

جسار دفن وشه في حضنها : لو كل ده كان عشان
 يبقى عندي اخ زي آدم فأنا راضي ولو نهاية كل ده

جايزة ماكنتش احلم بيها زيك فانا مش عايز حاجة
تاني من الدنيا دي

ريم طبطبت علي شعره وهمست جنب ودنه بخفوت
: مش عايز أطفال زي آدم أخوك

جسار بصلها بدهشة : ريم دي !

ريم باحراج : انا قولت إنك شوفت كتير أوي وحش
في حياتك ويعني ، يعني مش هيحصل حاجة لو
قولتلك جملة كده من نفسـ

ماكملتش كلامها وكان جسار سكتها بطريقته هو
وعاش معاها وقته الخاص اللي بينسى نفسه معاها
والعالم كله باللي حصل وبيحصل فيه

يتبع _____

بقلم/مريم محمد عبد القادر

لو البارت عجبكم ماتنسوش الفوت (النجمة) ورأيكم
في كومت لطيف

دمتم في حفظ الرحمن ورعايته ♡ ♡

اللهم صل وسلم وبارك على سيدنا محمد
بقلم/مريم محمد

بعد كذا يوم آدم راح لدولت القصر مع سولاف ،
طلعوا اوضتها وبعد ماسلموا عليها هي و هند آدم قعد
قصاد دولت و حط قدامها ورق كثير وشيك : اتفضلي

دولت : ايه ده ؟

آدم : أملاكك

دولت : آدم أنا

آدم قاطعها : لو سمحتي ، فلوسك أنتي حرة فيها بس
معلش ماتدخلنيش أنا في كل ده

دولت : بس

آدم : مابسش يا نانا ، أنا زمان ماكنتش فاهم أنتي ليه
عملي كده وكتبتي فلوسهم باسمي بس سوري أنا
مش موافق على ده

دولت : ده حقك ، هما ظلموك

آدم : حقي منين ؟ جبتيا منين لما حد يظلمني أروح
اظلمه أنا كمان ؟ ده في شرع مين ده ؟

شاور على الورق في ايديها : ده فيه حق مروان
وتمارا ولوجي ، أنا مش ظالم يا نانا ، فلوسك أنا

شغلتها كل السنين دي ورجعتهاك بأرباحها اعتبريها
كانت صفقة وخلصت وانتي حرة بقى فيها

دولت : انت شايف كده

آدم : أنا مش شايف غير كده يا دولت

دولت هزت دماغها بفهم وسألت بتردد : وفلوس
جماليات ؟

آدم بحزن : موجوده يا نانا ، أنا مش بضيع حاجتي ،
فلوسه موجوده عايزها ياخذها يشبع بيها أنا مش
عايز حاجة منه

دولت : وعهدك مع جمالات ؟

آدم سكت شويه : أكيد هتسامحني أنا كنت صغير
ساعتها وكلامي _____

دولت قاطعته : كنت مميز

آدم : معاكي حق كنت مميز بس ده مش معناه عشان
 احافظ على حلفان مش هتاسب عليه آكل فلوس
 الناس بالباطل ، أنا بس كنت بعاند وبلفت الإنتباه إنما
 دلوقتي أنا مش عايز حاجة منهم ، وعموما أنا معايا
 اللي يكفيني باقي عمري من غير ماحتاج لحد أو
 حاجة

بص لسولاف وفتح دراعه : تعالي جنبني هنا

سولاف راحت وقفت جنبه وهو مسك ايدها : عندنا
 خبر حلو ليكم

دولت وهد بصوله وهو أبتسم : سولي حامل

هند زغردت بصوت عالي وآدم : الله أكبر على
الصحة ودني يا حجه

هند راحت شددت سولاف وحضنتها جامد ودموعها
نزلت : ألف ألف ألف مبروك يا بنتي

سولاف دخلت في حضنها أوي وباست كتفها : الله
يبارك فيكي يا ماما ، أنا مبسوطة أوي بجد

هند باست خدها : ربنا يسعدك طول العمر يا حبيبة
قلبي ويعوضك أكثر وأكثر

آدم ببيص عليهم وهو مبتسم بحب ومبسوط بالحب
ده ، رغم ان مافيش روابط دم بينهم كلهم الا ان
الحب بينهم كبير أوي وجميل

سولاف راحت سلمت على دولت هي كمان ورجعت
وقفت جنب آدم وبصتله بحب وهو شدها قعدها على
رجليه وباس خدها وهمس : بحبك

سولاف حطت دماغها على صدره باحراج وهو
بص لهند ودولت اللي باصينله : مش ممكن والله
الفضول اللي انتوا فيه ده

هند لوت شفايفها : وأنت مش ممكن والله قلة الأدب
اللي أنت فيها دي

آدم ضم سولاف لحضنه أكثر : عجباني ، سيبينا بقى
في حالنا

هند هزت دماغها بقلة حيلة ودولت : تعرف ان إياس
عايز يخطب ؟

آدم : ايبيه داااا بجد ؟ مين ؟ بنت صفرا تانية ؟

دولت : لا ، كارما بتقول أخت مرات جسار

آدم بتذكر : أخت مرات جसार !! فيبيح

دولت ضحكت : تقريبا اسمها فرح

آدم : وقعت وماحدث سمي عليك يابن يعقوب خليها
تربية

دولت : أنت تعرفها ؟

آدم : يبيبي دي شغالة عندي في المطعم

دولت : وأنت ايه رأيك فيها ؟

آدم : بنت بميت راجل والله ، تخيلي أول مرة إياس
كلمها بطحته بطوبه فتحت دماغه

دولت شهقت : يا خبر أسود يا آدم

آدم : بس هو يستاهل والله ، كان كل ما يشوفها
يعاكسها

دولت : على رأيك خليه يتربى شوية

سولاف كل ده كانت ساندده على صدر آدم وساكته
مسكت التيشيرت بتاعه وبصوت ضعيف : آدم

آدم : عيونه ؟

سولاف حطت ايدها على بوءها : أنا _____

سابتة وطلعت جري على الحمام وقعدت تستفرغ
وهو قام وراها بسرعة وراح قعد جنبها : مالك يا
حبيبي ؟

سولاف : مش قادرة يا آدم أنا داخلة أوي

آدم سند دماغها على كتفه وهو بيطبب على خدها :
طهور يا حبيبي طهور

فضلت سانه على كتفه لوقت طويل لحد ما قدرت
تقوم تاني وهو غسلها وشها ، كانت هند ودولت
واقفين وراها

هند : أنتي كويسه يا بنتي ؟

سولاف : اه الحمد لله يا ماما

آدم : هنروح بقى عشان تريح شوية

دولت : ماشي يا بني ، ربنا يعينك يا سولي وتقوميلنا
بالسلامة

سولاف : آمين يا رب

سلموا عليهم وخرجوا من الاوضة و آدم بص
لسولاف : هتعرفي تنزلي السلم ولا اشيلك ؟

سولاف مالحقتش ترد كان هو شايها بين ايديه وهي
حطت دماغها على كتفه : حقا عليا يا قلب قلبي ،
تعباك معايا على طول

آدم : أنا ماليش غيرك اتعبله يا مزتي

سولاف لفت دراعتها حولين رقبتة و غمضت عينيها
وهو نزل على السلالم بهدوء عشانها وقابل عاصم
في وشه

الاتنين قعدوا يبصوا لبعض بكره وهو بص على
سولاف : افرحلك يومين من نفسك بكرة افرق بينكم
زي ماعملت مع أبوك وامك

سولاف شهقت واتعلقت جامد في حضن آدم وهو
 بص لعاصم بصمت شوية : أعلى ما في خيلك اركبه
 يا عاصم ، شوف بقى اذا كنت أنت عرفت تضحك
 على كمال وهو سكتلك فأنا لا مش بسكت ، أنا واحد
 صايح أصلا ومش متربي وبيتهيألي أنت مجربني
 كويس فاستعد بقى يااااا هه عمي

مشي وهو بيوصله نظرات نارية كلها تحذير وتهديد
 ليه ، أول ما خرج من القصر سولاف شدت هدومه
 جامد من ورا بقبضة ايديها وهي بتعيط جامد

آدم : مالك يا سولي ؟ أنتى تعبانه في حاجة وجعاكي
 ؟

سولاف : أنت ماسمعتهوش بيقول ايه ؟ ده عايز
 يبعدي عنك يا آدم ، عايز يأذيك

آدم ركب عربيته واخذها في حضنه : بس يا حبيبتى
كفاية عياط كده ، ماتخافيش ماحدث يقدر يعمل
حاجة

سولاف كلبشت جامد في حضنه وهي بتهز دماغها
برفض خايفه عليه وهو بيضطرب عليها يطمئنها

بعد كذا يوم

جسار كان واقف مع لؤي : لوجين ماتعرفش حاجة
من الكلام ده فاهم

لؤي : فاهم ماتقلش لوجين ماتعرفش أي حاجة من
اللي بتحصل في القصر أصلا ، بس هو انتوا قررتوا
خلاص هتعملوا ايه ؟

جسار كشر : هو أتصرف لوحده من دماغه أصلا
وأنا لسه عارف الكلام ده من شوية

لؤي : والعمل ؟

جسار بحزم : هنفذ اللي هو عايزة أكيد انشالله نموت
فيها برضه نعمل اللي يريحه

لؤي بصله شوية باستغراب : أنت بجد مستعد تموت
نفسك عشانه ؟ يعني مثلا زمان أنت كنت بطولك
انما دلوقتي انت واحد متجوز وقريب ربنا يرزقك
بعيال مش خايف عليهم ؟

جسار : واوعى تنسى يا لؤي إنه اللي وصلني لكل
ده وأنا من غيره الله أعلم كنت هبقى في السجن ولا
في قبري دلوقتي ، أنا افديه الساعة اللي اخدمه فيها
حتى لو التمن راحتى وحياتي وحذاري اسمعك تتكلم
في الموضوع ده تاني فاهم ؟ ويلا احنا ورانا شغل

سابه ومشى وهو راح وراه بصمت ينفذوا الخطط
اللي وراهم

إياس اتكلم مع مامته عن موضوع فرح وهي كانت
موافقه جدا لأنها اتعاملت معاها ، اي نعم كانت
شيفاها شقية حبتين بس حبتها أوي ، المشكلة كانت
مع يعقوب اللي كان رافض إبنه يتجوز من مصر
بس إياس فضل يتكلم معاه كتير وكارما كمان كلمته
كتير بالعقل وإن الولد خلاص كبر ومن حقه يستقر
في حياته زي ما هو عمل زمان وحقه يختار البنت
اللي قلبة دقلها ويعيش الحب زيه برضه ، وهو رغم
قلقة عليه بس ما قدرش يقف قدام سعادته وراحة باله
وقلبه، خصوصا وهو شايف الحب الحقيقي في عينية
وفي النهاية استسلم قصادهم هما الإثنين وقال لابنه
يعمل اللي يريحه

إياس ماكانش مصدق ان اخيرا باباه وافق وكلم عبد
الواحد على طول واتقدم لفرح وهي وافقت بعد ما
لففته وراها السبع لفات وقرأوا الفاتحة على الضيق
واياس شرح ظروفه لعبد ان في شوية مشاكل بس

في العيلة وهو مش هينفع يعمل أي احتفالات الفترة
الحالية احتراما لمشاعرهم واكتفوا بالفاتحة لحد
ماربنا يفرجها عليهم

عند آدم كان قاعد في صالون بيته وبيتكلم مع حد في
الفون من ايطاليا وحاطت اللاب بتاعه قدامه
وبيشوف عليه حاجات تبع الشغل

سولاف طلعت عنده وراحت قعدت جنبه بهدوء
وشوية وحطت دماغها على رجليه وفضلت نايمه
بصمت لحد ماخلص اللي بيعمله

آدم بص عليها : أنتى بتعملي ايه ؟

سولاف : ايه ؟

آدم : عماله تشمي فيا كده ليه ولا كأنك قطه ؟

سولاف بصتله وقالت بدلع : مش أنا قطة دومي
برضه ؟

آدم ابتسم : قطته بس ! أنتى أكثر من كده كمان

سولاف اتعدلت وقعدت على رجليه : كنت عايزة
أعمل حاجة من زمان بس كنت مكسوفه منك

آدم : ودلوقتي مش مكسوفه ؟

سولاف وشها أحمر بكسوف محبب : لا مكسوفه
برضة بس ، بس يعني

آدم ضحك : خلاص خلاص ، قوليلي عايزة تعملي
ايه ؟

سولاف بصت بتركيز على التيشيرت الأوفر سايز
اللى لابسه وهو حط ايده على صدره : ايه ده في ايه
؟

سولاف ضحكت ومسكت التيشيرت وهو مش فاهم
هي عايزة ايه لحد مالقاها دخلت جوه التيشيرت معاه
وهي بتضحك وهو ماقدرش يمسك ضحكته هو كمان
على الهبل ده

آدم : ده أنتى طلع عليكي حركات

سولاف وهي بتحرك راسها يمين وشمال: الموضوع
طلع مش رومانسي ولا حاجة بالعكس حاسه أنى
محشورة

آدم ضحك ولف ايديه حولين وسطها : لا والله أنا
شايفه رومانسي جدا

سولاف رفعت راسها وبصت لعينيها : مبسوط
بالحشرة اللى إحنا فيها دي ؟

آدم ضحك أكثر : اه مبسوط أوي الصراحة، وهو أنا
أطول اتحشر معاكي في تيشيرت واحد

سولاف ضحكت وهو سند ظهره على الكنبه وهي
عدلت قعدتها بحيث ظهرها يكون ساند على صدره
وهو ضمها لحضنه وهو ببسال

آدم : نفسك في ايه يا سولاف ؟

سولاف بتلقائية : عصير ليمون بالنعناع اللى
عملتهولي يوم صبحيتنا

آدم ضحك : يااااه أنتى لسه فاكراه ؟

سولاف حركت رأسها : اه ، كان أول حاجة ادوقها
من ايدك بعد جوازنا ازاي عايزني أنساه ؟

آدم قرب راسه من كتفها وهمس : من عيوني اعملك
أحلى كوباية عصير ليمون بالنعناع ، قوليلي نفسك
في ايه تاني ؟

سولاف : اممم ، نفسي في حاجات كتير أوي

آدم ركز معاها عشان يسمع امنياتها وهي أبتسمت :
نفسى اتمشى معاك على الكورنيش واحنا مشبكين

ايدينا في بعض كأننا بنقول للعالم كله إننا لبعض ،
ونفسي نروح ناكل سوى في مطعم كشري ، سمعت
إن الكشري الاسكندراني حلو أوي بس ماجر بتهوش
لسه

آدم : فعلا ، اللي وصلك المعلومة دي صادق ، كملني
نفسك في ايه كمان ؟

سولاف : نفسي بعد مانخلص أكل نروح نتمشى في
شوارع المنشية واحنا بنشرب عصير قصب ونروح
نشترى كتب من الأزبكية

آدم باستغراب : هي اسكندرية فيها الازبكية ؟

سولاف : ما عرفش هو مكان بيع كتب كده ؟

آدم ضحك : لا يا روي ، سور الأزبكية ده في
القاهرة ، هنا عندنا شارع النبي دانيال في المنشية
بيبيعوا هناك كتب

سولاف : بجد ؟ ما كنتش أعرف ، المهم ، هنروح
شارع دانيال ده ونجيب كتب ونشرب قهوة من هناك
وبعدها نطلع على البحر تاني ، نفسي أوي أجري
على الرملة معاك وتمسك أيدي وتلفني حولين نفسي
، ونلعب على الشط ونرش مايه على بعض ، وبعدها

نركب مركب ، نفسي أوي أركب مركب سمعت أنه
بيدوخ

آدم ضحك جامد : عايزة تركبي مركب عشان
تدوخي ؟

سولاف : لا ، عايزه أركب مركب عشان اجر به إنما
الدوخه دي سمعت إنك لما تاكل بسكوت بالملح
بتروح فعايزة أجرب

آدم : بترمي ودانك كتير أنتي ، ايه تاني ؟

سولاف بصتله : نفسي أعمل كل حاجة في الدنيا يا
آدم بس تكون معايا ، أنا ضيعت ٢٦ سنة بعيد عنك
ومش عايزة أضيع ولا لحظة تانية زيادة ، عايزة
أعمل ذكريات كتيره أوي أوي معاك في كل
مكان

آدم أبتسم وضمها أكثر لصدره : في دي معاكي حق
، ٣١ سنة من عمري راحوا وأنا بعيد عن حضنك ،
يعني نص عمري تقريبا ومافاضلش في شبابي حاجة
وعايز أعيشه كله معاكي

سولاف أبتسمت وهي بتلف بجسمها لآدم عشان
تحضنه وهو سأل : بس أحلامك كلها بسيطة أوي يا

سولاف ، يعني أنا قولت هتتمني تسافري بره مثلا ،
تشوفي الدنيا والمدن

سولاف : وهستفاد ايه بكل ده ، آدم المدن اللي بتتكلم
عليها دي كلها حجارة وجماد زي أي جماد ، أنا اللي
يفرق معايا هو أنت ، يعني أنا لو لفيت الدنيا كلها
لو حدي مش هبقى مبسوطه بقدر مانا دلوقتي وأنا
محشورة كده في حضنك

آدم ضحك : ما هو أنا برضه هبقى معاكي وهنتحشر
كده برضه

سولاف: طلا ما أنت معايا فمش هتفرق بقي إحنا فين
، في البيت في الشارع في كوكب تاني ، طول مانت
جنبي ومعايا فمش مهم أي حاجة تانية

آدم أبتسم برضا وضمها لحضنه ولسه هيتكلم لقي
فونه بيرن بصله وكشر

سولاف : تليفون مهم ؟

آدم : ماتخديش في بالك ده رقم غريب

حط الفون جنبه وقعد يلعب في شعرها وينعكسه :
قوليلي بقي نفسك في ايه تاني ؟

سولاف لسه هتقول نفسي لقت فون آدم بيرن ثاني
فضحكت : رد

آدم مسك الفون ورد بضيق على اللي بيقطع لحظاته
الجميلة مع حبيبته : السلام عليكم

سمع المتصل : ايوه أنا آدم هارون أتفضل

سولاف بصتله شوية وبعدها قربت منه باسته بين
حواجه عشان يفك التكشيرة وهو فعلا أبتسم وهي
حطت دماغها على كتفه

آدم بعد ما سمع المتصل : تمام ماشي هحاول اجي
في أقرب وقت ، سلام

سولاف : مين ده ؟

آدم : الشرطه

سولاف رفعت وشها بخضه : ليه خير ؟

آدم : ماتخافيش يا حبيبتى ، دي شوية مشاكل كده
بسبب فريال الزفت والمقدم اللي ماسك قضيتها كان
عايز يتكلم معايا شوية

سولاف هزت دماغها بفهم وهو قام وقف وطلعها من
التيشيرت بتاعه وهو بيضحك وراح غير هدومه

ووقف على الباب : هحاول ماتأخرش ، هتعوزي
حاجة اجيبها لك وأنا جاي ؟

سولاف هزت دماغها برفض وحطت ايدها على
صدره بقلق : عايزاك ترجعلي بالسلامة

آدم باس راسها : ما تخافيش يا قلبي خير ان شاء
الله

سولاف هزت دماغها بموافقة : مع السلامة يا حبيبي

آدم أبتسم وفتح الباب وقام قفله تاني وراح باسها
بعمق وبعد عنها بهدوء : مش هتأخر

سولاف حركت رأسها بفهم وهو مشي وسابها
بتدعيه ربنا يحفظه ويرجعلها بالسلامة

في مكان تاني

في واحد من الأماكن الصحراوية المهجورة ، وقفت
مجموعتين من عربيات النقل الثقيل المقفولة قصاد
بعض ونزل من العربيات رجالة كتير باين عليهم
الإجرام ووقفوا قصاد بعض كأنهم في ساحة حرب

دقايق ووصل مجموعة من العربيات الفخمة ونزل
منها رجاله ببدل غالية جدا

واحد منهم اتقدم رجالته ووقف قصاد زعيم
المجموعة الثانية وبص حويليه : جبت البضاعة ؟

زعيم² : بيتهياي إنا اتفقنا نكلم بعض باحترام

زعيم¹ ضحك باستهزاء: ايه عايزني اقولك حضرتك
ويا فندم ولا ايه؟ ما حنا كلنا سواسية في الكار واوعى
تنسى أنى الأقدم يعني سلطة أقوى ونفوذ أعلى وأنت
مجرد مبتدأ الحظ كان حليف ليه وعرف يوصل
لمركز عالي شوية في وقت قليل

قرب منه وخط ايده على كتفه بتحذير: فلحد ماتوصل
لمركز ينافسني احسنك تطاطي راسك وتسمع

الكلام

زعيم² بصله بشر وضيق وكان هالين عليه يمسكه
يخنقه بس ما يقدرش لأن أي حركة غدر منه ممكن
يدفع روحه تمنها

زعيم¹ أبتسم بانتصار لما شاف علامات الاستسلام
على ملامحه وكرر سؤاله بعجرفة أكبر : سألتك
جبت البضاعة ؟

زعيم² بضيق : ايوه في العربيات

شاور لرجالته اللي اتحركوا على طول وفتحوا
العربيات وطلعوا البضاعة وقبل ما رجالة زعيم¹
يتحركوا ويستلموا منهم الحاجة لقوا صوت حد بيتكلم
في ميكروفون بيهددهم

راجل : سلم نفسك المكان محاصر من الشرطة

وخلال ثواني كان المكان عبارة عن ساحة معركة ،
الشرطة حاوطت المجرمين وبدأوا يقبضوا عليهم
وكان في تبادل رصاص ومات عدد من المجرمين
والشرطة ولكن في النهاية الشرطة غلبتهم بقوتهم
وعددهم الكبير

بعد وقت آدم قاعد قصاد المقدم اللي أتصل بيه : خير
يا حضرت ؟

المقدم : خير يا آدم باشا ، أنا هدخل في الموضوع
على طول ، فريال واسمجلي اقول فريال بس بدون
اي القاب لان دي مجرمة

آدم : أتفضل براحتك

المقدم : إحنا دورنا وراها و اتأكدنا فعلا إنها كانت بتحط سم لكمال بيه في آكله، اي نعم كمايات صغيرة جدا بس برضة الحكم حكم ، ولقينا السم في اوضتها في القصر و عليه بصماتها، إحنا حاولنا نوصل لعمك عاصم بيه بس ما عرفناش ولما كلمنا دولت هانم قالت اللي أنت هتقول عليه هو اللي هيتنفذ فحضرتك عايز تعمل ايه دلوقتي ؟

آدم بص في الارض بصمت لمدة طويلة وبعدها بصله : خلي القانون ياخذ مجراه يا حضرة المقدم ، مافيش حد أكبر من القانون

المقدم هز دماغه بفهم وطلع المحضر : حضرتك أمضي هنا و هتعرض على النيابة و هما هيكملوا الطريق

آدم أخذ القلم ومضي وقام وقف : حاجة تاني ؟
المقدم وقف : لا حضرتك مافيش ماتشغلش بالك أنت بأي حاجة إحنا هنتابع الإجراءات و هنبلي حضرتك بالنتائج

آدم هز دماغه بموافقة ولسه هيمشي بس تراجع : أنا ممكن اشوفها ؟ عايز اسألها سؤال معلش

المقدم بصله بتردد وهو : خمس دقائق بس في سؤال
مهم عايز اعرف اجابته منها

المقدم : اللي تعوزه حضرتك

نادى على العسكري وامره يجيب فريال للمكتب ،
جات وقعدت قصاد آدم بنفس التكبر بتاعها

فريال : انا هخرج من هنا يابن جمالات فماتفرحش
كثير

آدم بصلها كثير بصمت : ليه ؟

فريال : هو ايه اللي ليه ؟

آدم : ليه عملتي كده ؟ مش موتي جمالات بقهرتها
ووصلتي للي انتى عايزاه كله ليه عملتي كده
وحاولتي تقتليه وهو كان السلم اللي وصلتي بيه
لهدفك ؟

فريال : عشان كده ، هو كان سلم وصلني لمكان
ومهمته خلصت فكان لازم يترمي ، أنا حاولت معاه
بالذوق جوز تمارا لآدم عشان أضمن كل فلوس
الهارون في جيبي بس فشل ، ولوجي وفشل كمان
يستفاد من وراها لا وكان عايز يجوز تمارا لمارون
كمان ، اتجنن ده ؟

آدم : برضه كل همك الفلوس وبس

فريال : ايوه الفلوس ، الفلوس هي أهم حاجة في الدنيا
 ، الفلوس دي هي اللي بتعمل بني آدم الناس بتحترمه
 ، الفلوس هي الدنيا كلها ومن غيرها الواحد مالهوش
 قيمة ، وأنا اوعدك يابن جمالات أني هخرج من هنا
 وهنفذ اللي في دماغي برضه وأنا اللي هكسب في
 الآخر

آدم قام وقف : ابقى قابليني

مشي وسط زعيقها : ايوه هقابلك بس ساعتها
 هوصلك للقبر زي ما عملت مع @\$#جمالات بنت
 ال@\$#

آدم اتعصب وراح شدها من هدومها بعنف : أوعى
 اسمع لسانك الزفر ده يتكلم عن جمالات كده تاني
 والا هقطعه ، جمالات دي ستك يا @\$# وهفضل
 ستك لحد آخر نفس قدر فيكي واوعي تقارني نفسك
 بيها ، دي جمالات المصري أوعي تنسي الاسم ده
 جمالات المصري ست الكل

هبدها على الكرسي ومشى وسط زعيقها : أنا هي
 ست الكل يا @\$# ويانا يانت يا آدم ال@\$#

المقدم : يا عسكري خد الشرشوحه ديه على الحبس

العسكري جرها وراه جر على الحبس وهي عمالة
تصوت وتزعق

سولاف بعد ما آدم مشي مسكت فونها ورننت على
هند تظمن عليها هي ودولت

هند : إحنا كويسين يا حبيبتى طمنيني عليكي أنتي
عامله ايه مع الحمل ؟

سولاف : بخير والله يا ماما هي بس الدوخه اللي
مسكاني وعلى طول معدتي مقلوبه

هند : معلش يا حبيبتى فترة وهتعدي إن شاء الله

سولاف : يارب ، المهم أنا سامعه صوت عربيات
حوليكى أنتي بره ؟

هند : اه دولت هانم كانت عايزة تروح تقعد مع كمال
بيه شوية فوصلتها وروحت بيتي أجيب شوية
حاجات كنت عايزاها ولما اخلص هرجلها تاني

سولاف : اممم ، هو كمال بيه لسه زي ما هو ؟

هند اتنهدت بقلة حيلة : لسه حالته زي ما هو ، مش
عارفه ادعيه ولا ادعي عليه

سولاف : لا يا ماما بلاش تدعي عليه ، ده أنا لحد
 دلوقتي مش عارفه أخلي آدم يصفى من ناحيته
 فمايقاش انتوا الاتنين

هند : صعب يصفى من ناحيته يا سولاف دلوقتي
 لأنه مصدوم فيه ، يلا ربنا يسامحه بقى ويتولاه
 برحمته

سولاف : يارب ، هسيبك بقى عشان ماعطلكيش
 هند : ماشي يا حبييتي يلا مع السلامه

فقلوا مع بعض و هند كانت وصلت بيتها وسولاف
 قامت تشوف هنعمل ايه لحد ما آدم يجي

عند القسم آدم كان ماشي بعصبية ، فونه رن ورد :
 ماشي أنا جاي

قفل وبص لجسار : أطلع على المستشفى

جسار : _____ الدولي ؟

آدم : اه

جسار ساق لحد هناك و آدم نزل بالعفاريت بتاعته
وراح عند ابوه وقابل الدكتور بتاعه بره اللي كان
واقف مع دولت

آدم : خير يا دكتور ؟

الدكتور : خير إن شاء الله ، المريض فاق اخيرا
وصحته مستقره حاليا بس هو في حاجة كان لازم
تعرفها

آدم : حاجة ايه ؟

الدكتور بتردد : هو ، هو يعني _____

آدم بنرفزة : ماتخلص أنت هتنقطني قول حصل ايه
وانجز

الدكتور بلع ريقه بتوتر : أنت عارف طبعا ان والد
حضرتك كبير واتعرض لصدمة كبيرة وكمان
السم_____

آدم قاطعه: أنت أكيد مش جايبني تقولي الكلمتين دول
فخش في الموضوع على طول عشان ماتعصبش
على اللي خليفوك أنت كمان

الدكتور : احم كل ده مع الجلطة عمل شلل نصفي
وللأسف مالهوش علاج

دولت شهقت وحطت ايدها على بوءها وكانت هتقع
لولا جسار سندها بسرعه و آدم كشر باستتكار : عمل
ايه ؟

الدكتور رجع خطوتين لورا بخوف من منظر ادم :
شلل نصفي

آدم : يعني ايه ؟ يعني هيفضل قاعد كده مكانه
ماييعملش حاجة ؟

الدكتور هز دماغه بتأكيد و آدم زعق : يعني ايه ان
شاء الله الكلام ده ؟ أنا مستحيل اسمح باللي أنت
بتقوله ده

راح فتح باب اوضة كمال ودخل وقف قدام باباه اللي
بصله بصمت ، وهو عينيه بقى لونهم أحمر من
العصبية و صدره عمال يعلى ويهبط بسرعه و بيزعق
: أنا مستحيل اسمحك تقعد كده في سلام، أنا ههد
الدنيا دي كلها عشان تقوم تاني ، أنت ماينفعش تقعد
كده أنا لسه مانتقمتش منك

دولت شهقت بصدمة و جريت بسرعه عليه شدته من
دراعاته جامد : آدم بس

آدم بيزعق وهو باصص لباباه بقهر و ووجع : أنت
هتعالج فاهم ، هتعالج و تتحمل عقاب كل اللي

عملته ، أنا مش هر حمكم ابداء على اللي بيحصل ده ،

أنا

ماكملش كلامه من القلم اللي نزل على وشه بعنف
من دولت اللي واقفه بتعيط قدامه : اخرس

آدم بصلها بصدمة : ن ، نان

دولت : حرام عليك كده

آدم ببيصلها جامد وهو مبرق عينيه اللي الدموع
متحجره فيها وبيجز جامد على اسنانه وعروقه
هتنفجر من كتر الدق

سابهم ومشى من غير مايضيف كلمه زياده وهي
قعدت على أقرب كرسي منها وحطت دماغها بين
ايديها بألم وتهالك من اللي بيحصل واللى وصلوله
وهي حاسه بضغطها بيعلا ، بدأت تدعى ربنا بتعب

بره آدم واقف هيموت من الغضب اللي جواه ، عايز
يصرخ ويكسر كل حاجة حوليه وللأسف جزار كان
هو ضحية الغضب ده كله وهو اللي استقبل كل
زعيقه وضربه ليه لحد ما تعب

جسار حط ايده على بوءه بيمسح الدم : ارتحت ؟
 آدم بصله بصمت وجسار قام ضربه في وشه ضربه
 واحده بس وقعه على الارض : حيوان
 آدم : أهو أنت

قام من على الارض وزقه من قدامه وراح ركب
 عربيته : روحني البيت لو سمحت
 جسار نفض هدومه وركب وساق بصمت لحد البيت
 وبصله

آدم : عايز ايه ؟

جسار : ولا حاجه ، وصلنا

آدم نزل من العربية وطلع على شقته ودخل مالمقاش
 سولاف مستنياه زي عاداتها ، دور عليها في الشقة
 كلها ومالمقاش وده رعبه عليها بس سمع صوت
 المياه جاي من الحمام اللي في أوضة النوم فاتنهد
 بعنف وقعد بتهالك على السرير وحط ايده على وشه
 : وقعتي قلبي يا سولاف حرام عليك

شوية وسولاف طلعت وهي لابسه البرنص ولفه
 شعرها بفوطه : آدم حبيبي

آدم بصلها وهي كشرت وراحت مسكت وشه : أنت
ايه اللي عامل في وشك كده ؟

آدم : جسار

سولاف كشرت أكثر : هو ضربك ؟ ليه ؟

آدم : عشان انا ضربته الأول

سولاف : انتوا لسه فيكم العادة دي ؟

آدم شدها من ايدها قربها منه وحضنها ، وهي جت
تبعده عنه : آدم

آدم : معلىش يا سولاف أنا محتاجك دلوقتي

سولاف حست ان في حاجة حصلت معاه في مشوراه
ده فاتنهدت وقربت منه خطوه وحضنت راسه بهدوء
: مالك يا قلبي ايه اللي حصل معاك بره ؟

آدم : هحكيلك حاضر

سولاف قعدت جنبه وهو نام في حضنها وبدا يحكيها
كل حاجة حصلت معاه من ساعة مانزل لحد ماروح
: مش عارف أنا مالي بجد ، بصراحه كنت عايز
اشمت فيه بس ماقدرتش وكنت عايزة يقوم عشان
انتقم منه بس برضه مش عايز ، سولاف أنا حاسس
أنى اتجننت خلاص

سولاف بتطبطب على ظهره : أنت ماتجنتش ولا
 حاجة ، أنت بس في صراع بين مشاعر الابن
 والانتماء ومشاعر الغضب والثورة جواك ، جزء
 منك عارف ان ده ابوه وطبيعي يزعل عليه ويبره
 والجزء تاني بيحب جمالات وحاسس بالغضب تجاه
 والدك من اللي عمله فيها

آدم دفن وشه في حضنها : أنا مش ابن ___

سولاف قاطعته بسرعة : أنت ابنه ولو انكرت ده
 لسنه قدام ، آدم ماتنساش ان والدك هو كمان كان
 ضحية للعبة قذرة اتلعبت عليه باحترافية

آدم بصلها بغضب وهي : ماتبصليش كده ، أنت
 كمان عارف ده

آدم : هو كمان غلطان

سولاف : أنا ماقولتتش إنه مش غلطان بس برضه
 مش مذنب للدرجة دي

آدم حط دماغه على صدرها تاني وبص بعيد بصمت
 وهو مش عايز يتقبل كلامها ده

فونه رن فقام رد عليه وسمع المتصل بسعادة : أنت
 متأكد ؟ يعني بجد اتقبض عليه ___ طيب ماشي أنا

هاجبيك ___ اه صح ده إحنا بالليل ___ ماشي خلاص
اقابلك الصبح

قفل الفون وسولاف بصتله : في ايه ؟

آدم حط الفون على الكومود وبصلها بسعادة : في
أنى مبسوط جدا دلوقتي وعايز أعمل أي حاجة
مجنونة

سولاف : ربنا يسعدك دايمًا بس فهمني برضه في
ايه ؟

آدم : فكك فكك ، قوليلي بقي أنتي حلوة أوي كده ليه
النهاردة ، أنا حاسس أنى أول مرة أشوفك ومش
عارف اتلم على نفسي خالص

سولاف : آدم كفاية كده أنت مش بتتعب ؟

آدم كشر : في ايه يا سولاف أنتي من ساعة ماجيت
وانتي رفضاني ممكن أفهم مالك ؟

سولاف مسكت ايده حطتها على بطنها : في ده يا
حبيبي أنت نسيت ، أنا لسه في أول الحمل

آدم بعدم استيعاب : يعني ايه مش فاهم ؟

سولاف : يعني الدكتوراة قالتلي بلاش خالص دلوقتي
لحد ما الحمل يثبت، كفاية كده النهاردة عشان الطفل

آدم : وأنا ؟

سولاف : وأنت تقدر تستحمل الكام يوم دول وفي مليون حاجة تانية نقدر نعملها

آدم بص قدامه بتفكير ، هو ماكانش يعرف عن الموضوع ده حاجة ، قلق على سولاف أو الطفل يحصلهم حاجة وقرر ياخذها للدكتورة يطمئن عليهم

سولاف قربت منه بتوتر : حبيبي أنت زعلت مني ؟
آدم بصلها وطبب على شعرها بحنية : لا يا قلبي
مازعلتش أنا ماكنتش أعرف حاجة عن الموضوع ده
معلش اعذريني

سولاف هزت دماغها وهو : هي الدكتورة قالتك
الكلام ده امتي ؟ أنا مش فاكتر
سولاف : لا أنت ماكنتش معايا ساعتها ، أنا روحت
مع ماما هند يوميها

آدم : اممم ، قوليلي طيب هي قالتك ايه ؟
سولاف : يعني ، قالتلي الرحم بتاعي ضعيف شوية
بصتله بتردد : أنت عارف بسبب اللي حصلي زمان
البرشام والاجهاض

آدم : امممم ، كملني

سولاف : بس فقالتلي أخلي بالي أكثر لحد ما الدنيا
تستقر واتابع معاها باستمرار واخذ الفيتامينات
بتاعتي

آدم هز دماغه بفهم : طيب طمنيني انتي كويسه في
اي وجع أو حاجة ؟

سولاف أبتسمت : لا أنا كويسه الحمد لله

آدم : الحمد لله يا حبيبي

سكت شويه وبعدها بصلها بمكر : بس ده برضه
مش هيمنعني عنك

قام مرة واحده وشالها بين ايديه وباس خدها : تعالي
نخرج

سولاف : دلوقتي ؟ دي الساعة ٢ بالليل !

آدم : وايه يعني ، يلا يلا

وفعلا لبسوا ونزلوا

سولاف : الله الجو حلو أوي بالليل

آدم : امممم ، تعالي نتمشي شوية على الرمل
تحت

عدوا الكورنيش ونزلوا على الرملة وفضلوا يتمشوا
 ويتكلموا ويضحكوا وأدم مسك ايدها ولففها حولين
 نفسها وفضل يلعب معاها في المياه ويرش عليها
 وهي تضحك وهي شيفاه بيحاول يحقلها أحلامها
 زي ما قالتله قبل كده ، وفضلوا يلعبوا ويمشوا لحد
 ماصلوا قدام مكان عالي عامل زي ميناء صغير من
 الصخور وكان في يخت مستنيهم هناك

سولاف بصت لأدم : ايه ده ؟

آدم : مش قولتلك عايز أعمل حاجة مجنونة ، خلينا
 نختفي يومين كده نعيش على اليخت ده في وسط
 البحر ، ايه رأيك ؟

سولاف ضحكت : ده جنان

آدم ضحك : اه مانا عارف وهو ده المطلوب

اخدها وركبوا وكان في على سطح اليخت ترابيزة
 كبيرة شوية وعليها عشاء رومانسي جميل وهادي

سولاف : أنت عملت كل ده امتي ؟

آدم : عيب عليكى والله تسألني سؤال زي ده ، المهم
 عجبك المكان ؟

سولاف مسكت الجاكيث بتاعه وبتدلع عليه : المكان
جميل أوي ، بس صاحب المكان أجمل

آدم : يارب أمسك اعصابي

سولاف ضحكت : وهو أنا وجهتك كلام أنا بقول
صاحب المكان

آدم باستغراب : لا مش فاهم ، مين صاحب المكان ؟

سولاف بثقه : أنا يا حبيبي أنا

آدم ضحك : أنتى مرة واحده كده ؟

سولاف : مش أنت وأنا واحد ، يعني أنت صاحب
المكان فأنا كمان صاحبة المكان

آدم ضحك بعلو صوته : لا حلوه دي ، طيب تعالي
بقى يا سمو الملكة نسهر شوية مع بعض

سولاف أبتسمت وبصتلته بحب : تعرف أنى بحبك يا
آدم ؟

آدم أبتسم : أعرف يا قلب آدم

خرج فونه وبعث مكانه لجسار عشان مايقلقش عليه
، وقفل الفون وقفل فون سولاف هو كمان وقعد
قصادها

مسك ايدها : خلينا لوحدنا كده شوية

سولاف أبتسمت : وماله يا حبيبي ، لو ده هيرحك

شوية خلينا لحد ماتقرر أنت نرجع

آدم أبتسم وبعدها بصلها : كان في حاجة عايز

اديهالك

سولاف وهي بتاكل من طبق الكانيلوني اللي قدامها :

امممم قول

آدم : طيب سيبي الاكل دلوقتي وركزي معايا

.

سولاف بتحرك ايدها وايدها الثانية على بوءها

المليان آكل: ءءممم، أنا جعانه أوي يا آدم وبصراحه

لما شوفت الأكل جوعت أكثر

آدم ضحك وطبطب على خدها بحب : كولي يا قلبي

بالهنا عليكي

سولاف أبتسمت وكملت أكل بجوع حقيقي آدم

مستغربه : أنتى آخر مره اكلتى امتى ؟

سولاف : العصر

آدم بذهول : لحد دلوقتي يا سولاف ! أنتى عارفه

الساعة كام ؟ ده عدى أكثر من ١٢ ساعه

سولاف : لما نزلت تروح القسم فضلت قاعده متوتره
وماقدرتش أكل حاجة وبعدها أنت جيت وقعدنا مع
بعض واديننا أهو

آدم : طيب يا حبيبي كولي

أخذ طبق الاستيك اللي قدامه وبدأ يقطعه حتت
صغيره عشان يبقى سهل الأكل وحطه قدامها

سولاف : أنت مش هتاكل؟

آدم هز راسه بنفي : كفاية عليا أشوفك شبعانه كولي
أنتي

سولاف هزت دماغها برفض واخذت الشوكه بتاعته
ومدت أيدها بحته من الاستيك : افتح بوءك يلا

آدم : ايه ده شيفاني طفل ولا ايه هتأكليني ؟

سولاف : اه أنت طفلي أنا مش كده يا بيبي ؟

آدم ضحك : هي وصلت لبيبي كمان ؟ إذا كان كده
فماشي

قرب منها بس رجع تاني لورا : بقولك أحسن

سولاف : ايه ؟

شاور على الشوكه بتاعتها : اكليني بدي

سولاف : شوكتي ! ليه ماننت ليك بتاعتك ؟

آدم بتذمر : لا أنا عايز آكل بشوكتك أنتي ماليش فيه

سولاف : مش هتقرف ؟

آدم كشر باستغراب وقام وقف وسند بدراعه على
الترابيزة وخطف منها بوسه سريعة على شفايفها :
هقرف إزاي وأنا ببوسك كده إحنا هنعيل ولا ايه ؟

سولاف ضحكت : تصدق فعلا

سابت شوكته بعيد واكلته بشوكتها وفضلوا كده لحد
ماخلصوا آكل وبعدها قعدوا في اليخت قدام بيراقبوا
البحر والنجوم

جسار قاعد ماسك فونه وبيبص على رسالة آدم وهو
لاوي شفايفه وريم قاعده قصاده بتعمله الخدوش
اللي في وشه

ريم : أموت وافهم ليه كل ده ، انتوا ماتقدروش
تقعدوا شوية من غير ضرب ؟

زقت ايده اللي ماسك بيها الفون وبصتله بغيط : ركز
معايا وأنا بتكلم

جسار بصلها : في ايه يا ريمو

ريم : في أنى عايزة أعرف مين عمل فيك كده وليه ؟

جسار : هو أنا قولتلك إنك حلوة أوي النهارده ؟

ريم كشرت جامد : جسار بطل تتوه في الموضوع
ورد عليا

جسار حط الفون جنبه ومسك وشها : ماتشغليش
مخك الجميل ده بمشاكلي

ريم : ولما ماشغليش نفسي بمشاكلك أشغلها بايه ؟

جسار : خلاص يا ريم بقى ده عادي في شغلي يا
بنتي أصلا

ريم كشرت : شغل أيه ده يا جسار هاه ؟ أوعى تكون
رجعت للي كنت بتعمله زمان ؟

جسار بضيق : ريم ، انتى ليه بتفتحي في الماضي
تاني ؟

ريم : أنا مش بفتح في حاجة بس أنت اللي تصرفاتك
غريبه ، يعني لما جوزي يرجعلي بالمنظر ده
ومخبي عليا اللي حصل متخيل تفكيري هيروح لفين
يعني ؟

جسار: ريم ماتنسيش أنا شغلي ايه ومعرض لحاجات
زي دي كثير

ريم وقفت بضيق : ماشي يا جسار أنا ماقولتش
حاجة عن شغلك أنا بقولك ايه اللي عمل فيك كده ؟
بس يا سيدي براحتك عايز تقول قول مش عايز
براحتك بقى حياتك وأنت حر فيها واعتبرني أنا
مجرد شئ شاريه بفلوسك زي زي أي كرسي ، عن
إذناك

سابتله الأوضة وراحت المطبخ ووقفت تعيط بصمت
ولقته وراها بيحضنها من ظهرها : مين قالك إنك
شئ ؟ أنتى بني ادمه يا ريم ، مراتي وحببتي وكل
دنييتي

لفها ليه وباس جفونها : حببتي كل الفكرة اني مش
عايز اوجع دماغك بالمشاكل دي ، عارفك قلبك
طيب أوي وهتتوجعي بالمشاكل أنا كده غلطان
؟؟

ريم : ايوه غلطان يا جسار ، أنا مش بقولك تقولي
مشاكل شغلك بس تفهني ايه اللي حصل معاك بس ،
عايزة اطمن عليك ، أنت دلوقتي ماعدتش وحيد أنا

مراتك والمفروض تفهم أني ليا حق فيك ، حياتك
المفروض تشاركها معايا

جسار : حاضر يا ريم اتخانقت مع حد وهو اللي
عمل فيا كده

ريم بنرفزة : يعني برضه اتخانقت يا جسار ؟
جسار بنرفزة هو كمان : لا إله إلا الله يا ريم ماهو
شغلي كده

مسك وشها بين ايديه : أنتى مالك بجد النهارده
متعصبه كده ليه هو أنا مدايقك في حاجة ؟

ريم هزت دماغها برفض وهو : طيب مالك فهميني
مين مدايقك كده ؟

ريم : مافيش

جسار غمض عينيه جامد بضيق : ريم أنا مابحبش
الأسلوب ده لو سمحتي خليكي واضحه معايا ، انا
وأنتى عارفين ان في حاجة مدايكاكي ففهميني براحه
كده في ايه ؟

ريم بصتله بتردد : مافيش بجد ، أنا بس تعبانه
شوية

جسار بحزم : ريم

ريم بصت بعيد : البريود يا جسار ارتحت سييني في
حالي بقى

جت تمشي بس هو مسك ايدها : ريم اقلي هنا انا
لسه ماخلصتش كلامي

ريم وقفت قدامه تاني وهو : دي مش أول مرة تتعبي
كده أنا عارفك وعارف مزاجك الوقت ده بس دي
أول مرة تتنرفزي عليا ، في ايه ؟

ريم : في أنى مش حامل يا جسار ، البريود يعني
مش حامل

جسار : وفين المشكلة يعني مش فاهم ؟

ريم بصتله : مش أنت نفسك في طفل ؟

جسار : ايوووووو يا ريم تو

شالها وقعدها على رخامة المطبخ : كده ؟ ماكنتش
أعرف إنك بتفكري بالطريقة دي

ريم بدموع : مش أنت قولتلي عايز طفل ؟

جسار : ايوه يا حبيبي ، أي حد بيحب مراته بيبقى
عايز أطفال منها بس بوقته يا بابا أنا مش مستعجل
على حاجة

ريم : يعني أنت مش زعلان ؟

جسار : لا مش زعلان

خبط جبينها بصبعه : أنا از عل لما تكوني زعلانه أو
مخنوقة بالشكل ده اه از عل لما نتخانق مع بعض اه
از عل لو حصلك حاجة وحشة لا قدر الله، إنما از عل
عشان مش حامل

بصلها كده بطرف عينه : ده اسمه كلام برضه ؟

ريم باحراج : ما أنا ماكنتش أعرف بقى

جسار : واديكي عرفتي أهو ، خلينا بقى مانفتحش
الموضوع ده تاني ومش عايز اللي حصل النهارده
يتكرر تاني ، خلينا عايشين بهدوء وراحه بال ماشي
؟

ريم هزت دماغها بموافقة وفتحت دراعتها قدامها :
ممكن تحضني ؟

جسار قرب وحضنها جامد ، هو عارف قد ايه بتبقى
نفسيتها وحشة أوي الفترة دي وبتبقى محتاجه حنيته
أكثر من أي وقت تاني

على اليخت آدم قاعد وسولاف في حضنه اتكلمت

بهدوء : كنت عايز تديني ايه قبل ماناكل ؟

آدم خرج من جيبه علبة مستطيله و عطاهاها

سولاف : ايه ده ؟

آدم : افتحيها

سولاف فتحتها وشهقت بفرع أول ماشافت اللي فيها

واتنفضت من مكانها و آدم قام وقف هو كمان بخضه

: في ايه ؟

سولاف عينيها بتلمع بالدموع وهي بتشاور على

العلبة : ده ، ده أنت وصلتله إزاي ؟

آدم : جيبته بنفسه

سولاف بصتله باستفهام وهو شدها عليه : لما كنا في

طنطا قابلت معاذ وجبناه يوميها

سولاف بصت على فونها القديم ورجعت بصت لآدم

بانفعال : وأنت بتديهولي ليه دلوقتي ؟ عايز توصل

لايه بالضبط هاه ؟ عايز تفكرني تاني بأيام زمان ولا

عا

آدم حط ايده على بوءها بذهول : ايه اللي أنتي

بتقوليه ده يا بنتي ؟ أنا مستحيل أعمل كده

سولاف بدموع : او مال ليه بتديهولي ؟

آدم مد ايده اخذ الفون وشغله وقبل ما ينطق سولاف
خطفت الفون من ايده : ده ، ده بيشتغل ، آدم ده
شغال ، إزاي أنا فاكراه إنه اتكسر ؟

آدم : كان مكسور فعلا وبايظ فوديته لو احد صلحه
أى نعم أخذ وقت طويل جدا على ماقدر يصلحه بس
اتصلح في الآخر ، ولما شوفته لقيت عليه ذكريات
كثير حلوه ليكي ، وقولت أكيد هتفرحي لو
رجعتهولك

سولاف بصتله بدموع : أنت عملت كل ده
عشـ

آدم قاطعها ببوسه طويله على جبينها ومسك وشها
بين ايديه واتكلم بهمس وهو حاطت جبينه على
جبينها: كل ده عشانك أنا وعدتك معايا مش هتشوفي
وجع تانى وحياتك هتكون كلها سعادته وبس وأنا أي
حاجة تسعدك هعملها بأي شكل

سولاف دخلت ايديها جوا الجاكيت بتاعه ومسكت في
التيشيرت بتاعه من ورا وحضنته جامد : آدم أنا
بحبك ، بجد بحبك ، وبحب كل حاجة بتعملها
عشاني

آدم أبتسم وقفل الجاكيت بتاعه على ظهرها وضمها
هو كمان : وأنا بحبك وبحب أشوف فرحتك دي باى
حاجة بعملها عشانك

سولاف رفعت راسها سندتها على صدره : أنت
زعلت منى لما اتترفت عليك ؟

آدم أبتسم بتفهم وحب : لا ماز علتش أنا حاسس بيكي
وعارف قد ايه أنتى مش بتحبي الذكريات دي فعادي
يا حبيبتى

سولاف اتمسحت في صدره زي القطط وهو
بيصلها باعجاب من حركتها اللطيفه اللي بيحبها
وهي خرجت من حضنه وفتحت فونها القديم ودخلت
على الصور وفتحت صوره مامتها وايدها بترتجف ،
اول ماشافتها دموعها لمعت : وحشتيني اوي اوي ،
وحشتيني ومش مصدقه أنى شيفاكي تانى قدام
عينيا

قربت الصوره منها وباستها بحب ولفت الفون لآدم :
دي ماما

آدم بص للصوره وشاف مامتها قد ايه ملامحها طيبه
أوي وصعب عليه اللي حصل فيها : جميله أوي
ماشاء الله ، شبهك

سولاف : أنا شبه بابا أكثر حتى شوف في صوره
لينا سوى

ورته صورة باباها وهي بتتكلم عنه بفخر وكملت :
تعالا احكيك قصص الصور دي

آدم طلع من جيبه حاجة وعطاهاها : ماشي احكي
بس وأحنا بناكل ده

سولاف بصت للكيس اللي حطه في ايدها ولقت
كياس بسكوت بالملح فضحكت : الله بسكوت بالملح
آدم : عشان تمشي الدوخه

سولاف ضحكت بصوت عالي وقعدت مكانها وادم
قعد جنبها وحاوطها بدراعه وهي بتفرجه على
الصور اللي عندها وبتحكيه قصة كل صوره
بالتفصيل كأنها عايزه تخليه جزء من كل ذكرياتها
القديمة ، وأكد مش هتنسى البسكوت بالملح

بعد كذا يوم ، مروان كان قاعد في اوضة فاضية
مافيهاش غير ترابيزة وأربع كراسي قصاد بعض
وتمارا قاعده جنبه ، شوية والباب اتفتح ودخل

عسكري ومعه عاصم اللي ايديه مربوطه بكلبشات
وراح قعد قصاد مروان والعسكري سابهم لوحدهم

ومشي

عاصم رفع ايديه : عاجبك اللي ابن عمك عمله فيا ده ؟

مروان : وأنت مين قالك إنه آدم اللي عمل كده ؟

عاصم : مافيش غيره هو ولد غلاوي ومجرم

عيل@#\$

مران فضل يبصله شوية بصمت واتهد : أنت
بتضحك على نفسك ولا على مين بجد ، أنا وأنت
عارفين كويس إنه محترم وأحسن واحد فينا سواء
في الدين أو الأخلاق

عاصم : والله !! وهو المحترم بيروح يحبس عمه كده
؟؟

مروان بص في الارض : هو كان بيرد بس على
اللي عملته

عاصم اتعصب جامد : انت كده هتفضل طول عمرك
غبي و آدم هيفضل طول عمره أحسن منك لحد ما
يكوش هو على كل حاجة

مروان زعق : هو فعلا أحسن مني ، على الأقل
 ماحاولش يهدني زي ما كنت بعمل وان كان هيكوش
 على كل حاجة فعشان هو يستاهل ده

قرب منه و اتكلم بصوت خافت : تعرف إنه رجع كل
 فلوسنا تاني وماصرفش منهم مليم ، فلوسنا اللي كنت
 عمال تقولي آكل حقنا وظلمنا، هو رجعهم تاني و ٣
 أضعاف كمان

عاصم عينيه لمعت بطمع ومروان أبتسم بتهكم :
 الظاهر كده ان كل واحد بان على حقيقته ، آدم دايم
 كان حولينا وبيحاول معانا نرجع عن اللي كنا فيه في
 حين انت وفريال كنتوا بتعملوا العكس، كل واحد كان
 ماسك في ابنه وشغال يعبي فيه غل وكره وغيره
 وظلم وقرف على دماغنا

زعق : كنت دايم تقارني بيه وتحتقرني وتقل من
 كل حاجة بعملها لحد ما عقدتني وكرهتني في
 عيشتي

سكت شويه بيتنفس : أنا آسف بس أنا مش همشي
 على نفس طريقك ده

عاصم بص على تمارا : ايه ! هتروح تتجوزها
 وتعيش حياتك وتنسى أبوك ؟

مروان : اه هتجوزها واه هعيش حياتي بس مش
هنساک ، أنا هعمل اللي أقدر عليه عشان أساعدك
بس ماتتوقعش كتير ، أنت ممسوك وأنت بتستلم
شحنة الهيب.روين وكل رجالتك اعترفوا عليك ف
القضية لبساک لبساک للأسف

العسكري قاطعهم بدخوله : وقتكم خلص

مروان قام وقف وشد تمارا وقفها : أنا قولت اللي
عندي ، عن إذنك

مشي هو وتمارا وروحوا القصر بصمت قطعته
تمارا : مروان

مروان بصلها : أنتي كمان يا تمارا شكلك تعبانه
أوي، وشك كله منفخ من العياط ، فخلينا مانتكلمش
عنهم أكثر ، انا عارف إنك موجوعه أوي من كل
اللي حصل فجأة ده وعلى مامتك اللي في السجن بس
مش في ايدينا حاجة نعملها

تمارا بصت في الارض وسكتت وهو نزل من
العربية ودخل القصر وقابل هند في طريقه

وقف وبصلها شوية : كنت عايز اقولك حاجة

هند : قول يا بيه

مروان: بصي بلاش بيه دي تاني، أنا مش عايز أبقى
بيه ممكن تنادينني زي آدم ؟

هند : ماشي يا بني اللي تحبه

مروان : حلوه أوي كلمة ابني من حضرتك ، ياما
كان نفسي أسمعها من زمان

هند صعب عليها أوي وهو : المهم ، كنت عايز
اعتذرلك عن طريقتي معاكي زمان ، آسف ، أنا أي
نعم ماتغيرتش ميه في المية بس او عدك هحاول على
قد ماقدر ابقى إنسان كويس

هند أبتسمت وطبطبت علي كتفه : ان شاء الله تبقى
أحسن من اللي بتتمناه كمان

مروان باحراج : أنا ممكن اطلب منك حاجة ؟

هند : أتفضل يا بني

مروان : ممكن حضن ؟ أنتي في سن ماما تقريبا بس
هي عمرها ماحضنتني ابدأ ومن ساعة مانفصلت عن
بابا وأنا مش بشوفها فيعني___

هند قربت منه بهدوء وحضنته وهو كلبش جامد أوي
فيها كأنه بيشتكي كل وجعه ليها كأنها مامته وهي

حست بيه وبصوت شهقاته اللي بيحاول يكتمها
 بالعافية ودموعها نزلت على حاله هو كمان وفضلت
 تططب علي ظهره بحنية : كله هيعدي يا حبيبي
 ماتوجعش قلبك كده

مروان ماقدرش يمسك أعصابه أكثر من كده وقعد
 يعيط على كتفها وهو بيضم نفسه ليها : انا تعبان ،
 قلبي واجعني أوي

هند : ربنا يخفف عنك يا بني ويبعد عنك وجع القلب
 ، صدقني كل حاجة هتتحسن بإذن الله وبكرا هيكون
 أحسن

مروان فضل في حضن هند شوية لحد ما بطل عياط
 ومسح وشه وبعد عنها : أنا آسف
 هند بابتسامة : ولا يهملك يا حبيبي أنا متعوده
 مروان باستغراب : متعودة !!

هند : آدم ابني كان دايمًا يجي يعيط في حضني كده
 لما الدنيا تضيق بيه ، وداليدا كمان ياما موتت نفسها
 من العياط برضه على كتفي
 مروان : آدم كان بيعيط ؟
 هند بزعل : اكثر مما تتخيل

مروان في اللحظة دي كره نفسه جدا لأنه كان
السبب في يوم يوجعه بالشكل ده

هند طبطبت علي كتفه : اللي فات مات خلاص يا
مروان واحنا ولاد النهارده ، لو عايز فعلا تعتذرله
عن اللي فات خليك جنبه من يوم ورايح ، خليك اخ
ليه زي ماكان بيتمنى

بصت لتماما اللي واقفه بعيد بتبص عليهم ودموعها
بتنزل في صمت وفتحلتها دراعاتها : وأنتي كمان
تعالى يا بنتى

تماما زي ما تكون ماصدقت وراحت رمت نفسها
في حزن هند وقعدت تعيط لحد ماخرجت كل اللي
في قلبها و هند بتطبطب عليها : بس يا حبيبتى كفاية
عياط كده

تماما : أنا آسفه أوي يا دادة أنا كنت بعاملك وحش
زمان وكمان اذيت داليدا بنتك ، اسفه أوي
هند : ولا يهملك ، زي ما قولت لمروان هقولك إحنا
ولاد النهارده

ضمتهم هما الاتنين : ابدأوا تاني من أول وجديد انتوا
لسه صغيرين والفرص قدامكم كتيره أوي استغلوها

قاطعهم صوت دولت : والله واخذتي كل العيال
 حوليكي يا هند ، أومال سيبتيلي أنا ايه ؟
 هند بصتلها : أنتي الكل في الكل يا أمي ، انتي خير
 وبركة البيت ده

دولت أبتسمت : ربنا يكرمك يا بنتي

مروان : حضرتك رايحه في حته يا نانا ؟

دولت بتعب وحزن : رايحه لكمال

مروان هز دماغه بفهم : اوصلك ؟

دولت : شكلك تعبان خليك أنت

مروان : لالأ خليني اجي معاكي

بص لهند : خليك انتي هنا بلاش تتعبي نفسك

وعشان تمارا برضه ماتبقاش لوحدها

هند لوت شفايفها : تمارا ! قول كده بقى عشان

عصفورتك حبيبة القلب

مروان اخرج ودولت ضحكت : هي هند كده يا

مروان بكرة تتعود عليها

مروان أبتسم وهي : بس هي صح ، أنت و تمارا

ماعدتوش تقعدوا ولا تروحوا في مكان تاني لوحدكم

مروان كشر : ليه ؟

دولت : هو ايه اللي ليه يا ولد ؟ أنت بتحبها وهي
بتحبك وتقعديا لوحدكم والشيطان شاطر ياقلب جدتك
، لا أنا ما عنديش الكلام ده في بيتي، مش كفاية نازل
فيها أحضان ولا كأنها مراتك

مروان ضحك : ايه ده يا نانا انتي خيالك واسع أوي
دولت بغيط : بتتمالس عليا ياولا ؟ طيب قولي بأمانه
لو اتحطيت في وضع زي ده هتعمل ايه ؟

مروان بص لتماما وبص في الأرض وسكت
باحراج لان كلام دولت صح فعلا وهي : أهو قامت
الحجه عليك ، من النهارده لحد ماتكتب عليها مش
عايزاك تلمسها نهائي

راحت طبطبت علي كتفه : عارفه ان تربيتكم كانت
غلط وانتوا الاتنين متربين على ان كل ده عادي بس
لازم تعرفوا ان ده غلط ، وأنت لو بتحبها بجد حافظ
عليها من نفسك قبل الناس عشان ربنا يحفظها لك
ويرزقك بيها في الحلال

مروان هز دماغه بفهم وهي : ربنا يكملك بعقلك يا
حبيبي

بصت لتماما : وانتى كمان نفس الكلام ، لو بتحبيه
 احفظي نفسك عشانه ، لبسك الضيق والقصير ده
 بلاش منه قدامه لحد ماتتجوزوا ابقي اعلمي اللي
 أنتى عايزاه ساعتها ، ماشي يا حبيبتى

تماما : حاضر يا نانا

دولت أبتسمت : ربنا يحضرك الخير يابنتى يلا
 روجي ارتاحي شكلك مرهقه

تماما هزت دماغها بموافقة وطلعت على اوضتها
 وهند قربت من دولت : متأكدة إنك مش محتاجاني
 معاكي ؟

دولت : ماتخافيش يا حبيبتى أنا معايا مروان ريحي
 أنتى النهارده

هند هزت دماغها بموافقة ووصلتها لحد باب العربية
 وساعدتها تركب : تروحي وترجعي بالسلامة يا
 أمي

دولت أبتسمتلها والسواق اتحرك بالعربية ومروان
 بص لدولت : هو آدم هيكون هناك ؟

دولت : والله ماعرف يابني ، آدم بقاله يجي أربع أيام
 مختفي ماعرفش فين وكل ما اسأل جسار يقولي

ماتلقيش هو كويس و هيكون بخير ان شاء الله بس
 سيبه يرتاح شوية
 مروان : ان شاء الله خير

وصلوا عند المستشفى ونزلوا
 دولت : مش دي عربية آدم يا مروان ؟
 مروان بص عليها : تصدقي فعلا ، تفتكري جه ؟
 دولت : تقريبا
 مروان قرب من واحد من حرس آدم : هو آدم جوا ؟
 الراجل ماردش عليه بس شاف دولت اللي قربت
 منهم واتكلم بعربي مكسر : ازيك يا هانم ؟
 دولت : إزيك يا بني طمني هو آدم هنا ؟
 الراجل : ايوه يا هانم هو فوق
 دولت هزت دماغها بفهم واخذت مروان ودخلت
 المستشفى
 مروان : ايه الراجل الرخم ده ؟ ماردش عليا

دولت : هتلاقيهم كلهم كده ، مش بيطلعوا كلمه عن
 آدم غير للناس اللي هو بنفسه قايلهم يتكلموا معاهم
 عادي

مروان هز دماغه بفهم : وهو الواد ده شكله كده
 اجنبي ايه اللي مشغله هنا بودي جارد ؟

دولت : آدم نص رجالاته ايطاليين صحاب جسار
 بصت بعيد وشافت آدم واقف مع جسار وجنبه
 سولاف : حبيبي

آدم بصلها وأبتسم وراح حضنها : وحشتيني

دولت : أنت أكثر ، كان فينك كل ده ؟

آدم : كنت بفصل شوية بعيد عن الدنيا معلى قلفتك

دولت : ماتشغلش بالك يا حبيبي المهم أنت ترتاح

حطت ايدها على خده اللي ضربته قبل كده : أوعى

تكون زعلان مني يا آدم

آدم باس جبينها : مش زعلان ولا حاجة يا غاليه

ماتقلقيش

بص حوليه : غريبه ، جاية من غير هند يعني ؟

دولت : اه مروان معايا

آدم بص لمروان بصمت ومروان كمان بببصله
بصمت

دولت وهي بتراقب نظراتهم لبعض : في ايه يا ولاد
؟

آدم : مافيش ماتشغليش بالك بحاجة

مروان : أنا عارف إنك اللي بلغت عن ابويا بس مش
هعاتبك ماتقلقش

آدم : على أساس أنى كنت قلقان منك يعني، أنا
مابخافش من حد يالا

دولت : آدم في ايه ؟

آدم : مافيش حاجة

سابهم وراح وقف جنب جبار

سولاف راحت سلمت على دولت وباست ايدها :
اخبارك ايه يا نانا ؟

دولت : الحمد لله بخير يا حبيبتى ، قوليلي أنتى
عامله ايه واخبار البيبي ؟

سولاف حطت ايدها على بطنها بحب : الحمد لله كلنا
كويسين ، كنت لسه بكشف دلوقتى واطمنا الحمد لله
انه بخير

دولت : ربنا يتملك على خير يا قلبي

سولاف : يا رب

دولت : قوليلي بقى هو جوزك هو اللي بلغ عن عمه ؟

سولاف بصت لمروان اللي واقف يبصلها : بلغ بايه
معلش مش فاهمه

دولت : أنتى هتضحكي عليا يا سولاف ولا ايه ؟

سولاف بجديه : مش بضحك عليكى والله بس أنا
حقيقي مش فاهمه ، هو آدم عمل ايه لعمه ؟ هو
وعدني إنه مش هيعمل حاجة

دولت حست إنها عكت الدنيا فطبطبت علي كتفها :
ماتشغليش بالك خلاص الظاهر أنا فهمت غلط

بصت لمروان : مش كده يا مروان ؟

مروان كان هيقول إن آدم بلغ عن عمه وسجنه بس
تراجع ، هو وعد نفسه إنه هيبقى أخ لآدم ولو اتكلم
دلوقتي هيوقع بينه وبين مراته ، أخذ نفس طويل : اه
كده ، مافيش حاجة أصلا انتى اللي مصره تقلقى
نفسك على الفاضي ، المهم بما إنهم كلهم هنا فخليكي
معاهم وأنا هروح بقى

دولت بصتله بتردد وهو يببص على آدم اللي ببقر
 منهم : شكله مش طايقني فخليني امشي أحسن
 ادم : ماحدث قال أنى مش طايقك أنت ماعملتش
 حاجة أصلا

بص لدولت : دولت معلش ثانية الدكتور عايزك
 دولت راحت معاه وبعد شوية رجعت تاني
 مروان : خير يا نانا حالة عمي ايه ؟

دولت بدأت تحكيه اللي الدكتور قاله وسولاف
 راحت وقفت جنب آدم : أنت عملت ايه في عمك ؟
 آدم استغرب وبصلها : عملت ايه في ايه ؟

سولاف بصتله : سمعت إنك بلغت عنه بلغت ايه
 وعملت ايه يا آدم ؟ هو مش أنت وعدتني إنك مش
 هتعمل حاجة خلاص وهنعيش سوى في هدوء ؟

آدم أتهد بعنف : خلينا نتكلم بعدين

سولاف مسكت دراعه قبل ما يمشي : لا مش بعدين
 يا آدم ، معنى كلامك إنك اخلفت وعدك معايا
 وعملت حاجة فعلا صح ؟

آدم مسك ايدها وشدها وراه لمكان فاضي وبصلها :
 أنتى عايزه ايه بالظبط يا سولاف ؟

سولاف : عايزه أفهم أنت عملت ايه بالظبط من
ورايا ؟

آدم اتنهد بملل : اخدت حقي بطريقتي

سولاف : يعني برضه عملت اللي في دماغك يا آدم
مش كده ؟

آدم كشر بضيق : وفيها ايه يعني أنا ماعملتش حاجة
غير أنى اخدت حقي، لا جزء كمان مش كله، اخدت
جزء صغير من حقي مايشفعلهمش كمان

سولاف : أنا قولتلك مش هسامحك لو عملت كده

آدم: قولتيلي بلاش تدخل عليهم بصدرك مفتوح وانك
ماعملتيش كده وكل انتقامك كان قانوني من غير
مخاطره وده اللي أنا عملته ، واحد بيتاجر في
المخدرات ورا ستاره شركة تصدير ، بيدمر شباب
وبيهد بلده بايدده، ده غير ذنبي اللي فى رقبتة وعمري
ابدا ما هسامحه فيه ليوم الدين ، ماعملتش حاجة غير
أنى بلغت الشرطه عنه، راقبناه لحد ما وقع هو بنفسه
، مسكوه وهو بيستلم البضاعه بنفسه ، أنا كل شغلي
قانوني ومن غير مخاطره ، عملت نفس اللي أنتى
عملتية ، ايه هتقوليلي ده كمان مش من حقي وأنى
متهور ومش مسمحاني ؟

جت تتكلم بس هو قاطعها بدفاذ صبر : أنا ماعملتش
 حاجة غلط و ماعملتش اللي وعدتك أنى مش هعمله ،
 أنتى شاور تيلي على الطريق وأنا مشيت فيه
 فماتلومينيش ، وبعدين كل ده ولا طفى نار قلبي ولا
 هدى وجعه حتى ، أنا قلبي مدبوح ومافيش حاجة في
 الدنيا دي هتقدر تعالجه، انتى عايزه بقى تزعلي مني
 براحتك يا سولاف ، أنا طول عمري متعود على
 اللوم العتاب

جه يمشي بس هي مسكت دراعه بسرعه شدته عليها
 بعنف لدرجة إنه كان هيقع و اتكلمت بضيق هي كمان
 : أنا مش بلومك فبلاش تطلعني حد وحش كده

آدم اتعدل في وقفته وهي مسكت ايديه : آدم أنا سبق
 وقولتلك أنى موجوده عشانك ، حاسه بيك ومقدره
 وجعك وده مش هيتغير ، أنا فعلا كنت معترضه
 على حته إنك تعاديهم بتهور وتأذي نفسك بس
 ماعترضتتش إنك تخلى القانون هو اللي ياخذ مجراه
 ، أنا ماكنتش اعرف أصلا إن عمك بيتاجر في
 الممنوعات وطلاما هو اتمسك من الشرطه فخلاص
 ماحدث يقدر يقول حاجة ، أنا بس كنت خايفه عليك

لتكون عملت حاجة تأذيك أنت في الآخر يا حبيبي ،
خوفي عليك أنت

آدم بيصلها واتكلم بصوت ضعيف : قولتي إنك مش
مسمحاني

سولاف مسكت وشه بين ايديها : مسمحاك يا روي
ماتز علش كده ، مسمحاك صدقني

آدم : شكلك بيقول إنك ز علانه

سولاف : ز علانه لأنك خبيت عني وروحت عملت
كل ده من ورايا ، أنا مراتك يا آدم يعني جزء منك
وكان المفروض تشاركني اللي بتعمله ، تشاركني
أفكارك ، فهمتني ؟

آدم حط ايديه على ايديها اللي حطاهم على وشه :
ماكنتش عايز از عجبك بالهم ده، أنا ماصدقت خلصت
من فريال و عاصم و قرفهم و قولت بقى شوية راحه
وشوية هدوء و ما حبتش اوجعك معايا أكثر ، أنا عايز
انسى يا سولاف يمكن أرتاح شوية ، يمكن لما
اشوفهم تعبانين زي ماتعبوا أمي قلبي يحس براحه
شوية

سولاف قربت منه وباست على قلبه ونزلت راسه
على كتفها : ماتقلقش ، الأيام كفيله تنسيك ، أنت

خلاص وصلتهم للمكان اللى يستحقوه ، ارتاح بقى
وانسى ، ريح قلبك التعبان ده شويه

آدم لف دراعه حولين وسطها قربها منه أكثر ودفن
وشه في رقبتها أكثر واكثر وهي بتمشي ايدها براحه
على ظهره

قاطعتهم الممرضة بتتكلم باحراج : آدم بيه
سولاف اتخضت من الممرضة اللى ظهرت فجأة
وجت تبعد عن آدم بس هو شدد من قبضته عليها
ومنعها تتحرك واتكلم من غير مايرفع راسه : افندم
؟

الممرضة بإحراج : متأسفه بس الدكتور عايز
حضرتك

آدم على نفس وضعيته : حاضر ، اتفضلي أنتى وأنا
هبقى اروحله

الممرضة مشت بصمت من غير ماتزود كلمه واحده
وآدم فضل واقف زي ما هو لوقت طويل

سولاف بقلق : حبيبي مالك ، أنت كويس ؟

آدم رفع راسه وبصلها : امممم كويس ، تعالى
نروحلهم يلا

رجعوا مع بعض عند اوضة كمال و آدم وقف مع
الدكتور يتكلموا شوية

جسار واقف على جنب وبيتكلم في الفون مع حبييته

جسار : يا ريم بقى والله ما فارقه

ريم : إزاي يعني يا جسار ، أنت عايز تقنعتي إن

البشاميل زي البيتزا ؟ إزاي يعني ؟

جسار : والله أنا بالنسبالي واحد ، حاجة بتتاكل

ريم : قصدك حلل بتتاكل

جسار ضحك : شايفك ياللي غيرانه مني اكمني باكل

كثير ومش بتخن وأنتى لو زودتي معلقة زياده في

الغدا تزيدي كيلو ، عارفه كله من الرياضة ، ماهو

أنتى لو تطاوعيني بس وتلعبى رياضة معايا مش

هتبقى كده

ريم بغيط : أنت بتتتمر عليا يا جسار ، ولا مايكونش

قصدك أنى تخينه ؟

جسار بذهول : أنا قولت كده ؟

ريم : ايوه قولت ، وايه رايك بقى أنى مش عامله
غدا النهاردة لا بشاميل ولا بيتزا ، خلاص هنصوم
عشان نخس ، يلا سلام

جسار : بت يا ريم انتي يا بت

بس ريم كانت قفلت الفون وهو قعد يخبط كف على
كف : إنا لله وإنا إليه راجعون

راح ناحية دولت اللي سألته : في مشكلة ولا ايه ؟

جسار : لا يا نانا مافيش حاجة دي ريم بس بتسأل
عايز اتغدى ايه عشان تعمله

.

دولت أبتسمت بحب إنها اخيرا شافت جسار ليه بيته
وأهله اللي بيهتموا بأصغر تفاصيله وجسار لقي فونه
بيرن برسالة شافها لقاها من ريم كتباله

«هعملك بشاميل عارفه إنك بتحبها أكثر من البيتزا ،
ماتتأخرش عليا هستناك»

أبتسم وبعثتها : بحبك ، هحاول ماتأخرش

قفل الفون وحطه في جيبه والإبتسامة مش مفارقه
وشه ودولت بتراقبه وتدعيه ربنا يسعده ويعوضه
عن أي حزن مر بيه

آدم دخل عند كمال وراح قعد قصاده بصمت شوية :
أنا جيتلك زي ماطلبت ، خير ؟

كمال بصله كثير بحزن : آدم أنا آسـ

آدم قاطعه بسرعه : أوعى تكمل ، أوعى تفكر
تعتذرلي في يوم لأنني مش هقبل إعتذار منك ابدا ،
الاعتذار مش هيصحي اللي ماتوا ولا هيرجع اللي
راح مني

طلع شيك من جيبه وحطه قدامه مع ورق تاني : ده
حقك في ورث جمالات ، فلوس واملاك ، اتفضلهم
بس يارب تكون مبسوط بيهم

قام وقف ولسه هيمشي هو وقفه: أنا مش عايز فلوس
ولا أملاك

آدم : وهو كان حد قالك إني عايز حاجة ؟

فرقع بصوابعه : ولا صحيح نسيت أني واحد جشع
وبحب الفلوس زي عينيا واكل مال النبي كمان ولا
بخاف مش كده ؟

كمال : أنا عمري ماقولت عنك كده حتى لو عاصم
قال فانا ماقولتش

آدم : والله مش هتفرق مين قال ومين لا المهم ان
الكلام اتقال في الآخر

كمال : آدم ، بالله عليك تديني فرصة واحده ادافع
عن نفسي

آدم بصله وأبتسم بسخرية : هه ، تدافع ! هتدافع عن
ايه بالظبط ؟ بهدلتك لامي زمان ولا عن خوضك في
عرضها اللي هو يبقى عرضك أنت كمان ولا بهدلتك
فيا من وأنا صغير لحد كام يوم عدوا

قلع نظارته : ولا دي ! هااا هتدافع عن ايه ؟

كمال : أنا آسف حقك عليا

آدم بجمود : وأنا قولتلك مش عايز اسف منك وحقى
هو عليك فعلا ، حقى وحق أمي ، الاتنين

جه يمشي بس هو وقفه تاني : أنا والله حبتها

بجد

آدم بصله بنرفزة : ح ايه ؟ حبتها ! ده اللي هو إزاي
ده ؟ حبتها و عملت فيها كل ده أو مال لو كنت
بتكرها كنت عملت ايه ؟

كمال : ايوه حبتها وعشان حبتها جرحي منها كان
كبير ، حسيت أني هموت من وجعي

آدم : فقولت توجعها زي ماتوجعت ، بس ده مايقاش
اسمه حب، أنا كان ممكن اصدقك لو ما حبتش بس أنا
حببت و عارف يعني ايه حب ويعني ايه تخاف على
حبيبك من الهوا الطاير مش اروح اوجعه بنفسي ،
وهي ماكانتش عملتك اي حاجة اصلا ، اللي وجعك
هما عاصم وفريال وهي ماكانش ليها ذنب في كل ده
، وأنت لو كان عندك ذرة ثقة واحده فيها مكنتش
عملت كل ده ، على الأقل كنت هتواجهها ، هتتكلم
معاها وتحاول تفهم ، كنت بعت حد يتأكد من اللي
سمعته ، تشوف بعينك مش تصدر ودنك لغيرك من
غير تفكير

طلع كذا ورقة من جيبه حطهم قدامه : دول تحاليل
DNA وقبل ما تفكر أني زورتهم فاحب أقولك أنا
مش بالوساخه دي وبصراحة كنت اتمنى يطلع مش
متطابق بس للأسف زي مانت شايف ٩٩,٩% تطابق
تام ، يعني انت ابويا ، كان ممكن تعمل ده ، مرة
واتنين وعشرة عند كذا معمل وتتأكد مش تاخذ تحليل
اخوك هو اللي وداك بنفسه للدكتور صاحبة وتقول
أهو الدليل ، أنت لو كنت بتحبتها وتثق فيها زي

مابتقول كنت على الأقل حظيت افتراض ان في غلط
 حصل أو لخبطه من أي نوع وكنت كررت التحليل
 ثاني ، كنت هديت الدنيا كلها عشان تتأكد بس أنت
 اكتفيت بالظاهر وبس

سكت شويه : مش فاهم أنا بصراحة يعني أنت إزاي
 ماسألتش نفسك لو هي بتخونك فعلا ففين الراجل
 اللي خانتك معاه ؟ قابلته امتى وفين وهي طول
 الوقت قاعده في البيت مع هند ودولت ؟ ولا تكونش
 عملت كده بالبلوتوث ؟

بصله : شوفت ان كان في مليون حاجة وحاجة تتأكد
 بيها فماتجيش دلوقتي وتقولي آسف أنا اتخدعت ، لا
 أنت اللي كنت عايز تتخدع بمزاجك واختيارك
 لبس نظاراته : بيتهياي كده مافيش حاجة تانية
 تقولها

عطاله ظهره وفضل واقف بصمت مستني منه أي
 كلمه بس هو ساكت ، ضغط على ايده جامد بضيق
 وقرر يمشي

كمال : أنا يمكن زي مانت قولت وعملت كل ده فعلا
 وظلمتكم كتير بس أنا برضه اتظلمت وسط كل ده ،
 على الأقل جمالات ماتت واطرحت من الظلم ده أما

أنا اللي عشت فيه ، وكل ما بصلك اشوفها فيك وأنت
 نسخة كربون منها اتكويت بنار بعدها عني واحساس
 الذنب ملازمي من يومها وفاتها واصابتك في وقت
 واحد ، أنا بجد اتوجعت كثير يا آدم ، كنت كثير اقعد
 لو حدي في مكتبي وامسك صورتها واتكلم معاها
 وبسأل ليه كل ده حصلنا ؟

بص على ظهره : كنت كثير افتح النت واشوف
 اخبارك وصورك ، كنت حقيقي فخور بيك وبنجاحك
 كل يوم ، ساعات كانت فكرة أني نفسي أشوفك أو
 احضنك تسيطر عليا بس كنت بعاند وبكابر ، عارف
 أني قولتلك كذا مرة أني مايشرفنيش يبقى عندي ابن
 زيك بس كله كان من ورا قلبي ، كنت فاكر اني كده
 هطفي النار اللي جوايا بس اللي كان بيحصل هو
 العكس ، وجعي كان بيزيد أكثر

مسح دموعه اللي كانت بتنزل زي الشلال : حقك
 عليا يا بني ، عارف أني ظلمتك كثير والله وليك حق
 ماتسامحنيش بس أنا نفسي تكون أحسن مني
 وماتقسيس قلبك عليا زي ما عملت معاك ، خليني
 أعيش الكام يوم اللي فاضليني طبيعي ، الله أعلم بعد
 ما موت ربنا هيعمل فيا ايه على ظلمي ده ؟

آدم بصله وهو وشه غرقان بالدموع : أنت مش هتموت دلوقتي، ماينف عش تموت خالص دلوقتي، أنت لازم تعيش كتير أوي وتفضل تتعذب كده كتير، لازم تعيش فاهم

كمال بيصله وهو بيحبر نفسه يقوله كلام يوجع : أنا مش هزعل منك يا آدم على قسوتك عليا بس بلاش تجبر نفسك كده ، بلاش توجع قلبك بالشكل ده أنت مش كده ، كفاية عليك عذاب لحد هنا

آدم مسح وشه : بطل تعمل دور الاب الطيب اللي خايف على ابنه أنا ماتعودتش منك على كده ، أنت طول الوقت بتوجع فيا ياما بكلامك او نظراتك أو حتى صمتك

حط ايده على قلبه اللي بيدق بعنف لدرجة وجعته : أنت عارف وانا في ايطاليا كام مرة فضلت ماسك تليفوني وابص فيه على امل إنك ترن عليا ولو مرة واحده بس ؟ عارف كام ليلة صعبة عدت عليا وأنا عايش لوحدي ونفسي لو كنت جنبي زي اي اب وأمى تاخدني في حضنها زي أي أم ؟ عارف عن قد ايه كنت بحلم بكوابيس بسببك واصحى أصرخ واقعد اعيط لوحدي طول الليل وأنا لسه عيل ماكملتش

العشرين سنه ؟ انت عارف أنت حرمتني من حاجات
قد ايه ؟

أنا كنت ساعات أحس أني هتجنن من حياتي واقعد
أعيش في الوهم واكلم الفراغ قدامي كأن في بني
أدمين حوليا واتخيل نفسي عايش وسط عيلتي في
سعادة ، عارف بسببك روحك لكام دكتور نفسي
وحاولت اتعالج كام مرة ولسه لحد النهارده مش
عارف أخف منك ؟

خبط جامد على قلبه وهو بيزعق بقهره : فماتجيش
دلوقتي تطلب مني انسى كل ده واعاملك عادي ، لا
أنا آسف مش هقدر

سابه وخرج بسرعه قبل ما ينهار أكثر من كده ، قفل
الباب وسند عليه وهو حاسس ان الدنيا بتلف بيه
ومش قادر يقف

سولاف وجسار أول اتنين اتحركوا بسرعه وراحوله
سولاف : آدم مالك ؟

آدم بصلها وبص لكل الموجودين بتوهان وغمض
عينيه وساب نفسه للجاذبية اللي مابقاش قادر يقاومها
أكثر من كده

سولاف صرخت باسمه وجسار مسكه بسرعة قبل
مايقع على الارض وقعد ينادي على اي دكتور يلحقة
بسرعة، وخلال دقائق كان في طقم طبي كامل واقف
عند آدم بعد ما نقلوه لاوضه فاضية

الدكتور : ماتلقوش يا جماعة هو كويس ، ضغطه
عالي شوية بس من الانفعال والزرعل ، هو هيصحي
دلوقتي ماتلقوش بس ياريت تراعوا نفسيته شوية
أكثر من كده

الطقم الطبي مشي وسولاف راحت قعدت جنب آدم
على السرير وحطت ايدها على خده بلطف :

حبيبي

دولت وقفت جنبها وطببت علي كتفها وهي
حضنتها وقعدت تعيط : أنا مش قادرة اصدق اللي
بيحصل ده يا نانا

دولت مسحت دموعها هي كمان : أنا محقوالكم يا
بنتي والله حقكم عليا أنا

بعد وقت مش قليل سولاف فضلت فيه في حضن
دولت تعيط جسار بص لدولت : هانم لو سمحتي
حضرتك ممكن تاخدي الجماعة وتروحوا وأنا
هفضل معاه هنا

سولاف طلعت من حضن دولت وبصت لجسار وهي
مكشرة بشر وقالت بانفعال وهجوم : يعني ايه ؟ بص
بقي يا جسار باشا أنا مقدره أوي إنك اخوه وخايف
عليه بس ماتنساش أنى ابقى مراته وليا حق فيه أنا
كمان فلو سمحت ماتقولش كلام زي اسيبه وامشي ده
لأنه مش هيحصل ، أنا مش هتحرك سنتي من هنا
من غيره

سولاف لقت اللي بيشدها من ايدها من وراها فبصت
كان آدم اللي فاق : في ايه يا حبيبتى لكل ده ؟
سولاف دموعها نزلت ومسكت وشه : أنت صحيت !
قولي حاسس بايه في حاجة وجعاك ؟

آدم قام بوجع وضمها بهدوء : ماتخافيش أنا كويس
بصلهم كلهم بيبصوله بخوف وقلق : في ايه يا جماعة
أنا كويس

جسار قرب منه : متأكد ؟ خليني طيب أناديلك دكتور
يطمنا

سولاف بصتله : ايوه نادية

آدم: بالاس انتوا الاتنين في ايه ؟ أنا كويس يا جماعة
والله كويس ، احلفلكم على المصحف ولا اعمل ايه ؟

بص لسولاف وهمس : انا كويس ماتخافيش
 سولاف اتعلقت في حضنه جامد وهمست : قلقتني
 عليك أوي يا آدم
 آدم : حقك عليا يا قلب آدم
 بص لدولت ومسك ايدها : عجزتي يا دولت أوي
 دولت : كله بسببكم ، كل خضه والتانية بتوقع قلبي ،
 ربنا يسامحك
 آدم أبتسم : حقك عليا يا ستى آسف
 دولت باست راسه : حبيبي قولي أنت كويس ؟
 آدم : الحمد لله والله كويس

بص لمروان اللي واقف بعيد بصمت : مش هتيجي
 تظمن عليا أنت كمان ولا ايه؟ ده أنت حتى مادخلتش
 عليا بعلبتين عصير أم تلاته جنيه
 مروان : على اساس إنك كنت هتشر به يعني ؟
 آدم ضحك : يا عم أهو أي منظر و خلاص
 مروان ضحك وهو بيقترب منه شويه : قلقتنا عليك
 والله ايه عايز تشوف غلاوتك عندنا ؟

آدم : بابا حبيبي أنا عارف أنى غالي أوي من غير
ماعم كل ده

مروان ضحك جامد : يا رب نص ثقتك دي
آدم : اءااو انسى ، هو أنا أي حد يالا ولا ايه ،وسع
كده ، أما انتوا شوية عيال بصحيح
جه يقوم بس كلهم قالوا في صوت واحد : بتعمل ايه
؟

آدم حط ايده على قلبه : خضتوني والله في ايه ؟
سولاف : ماتخليك شوية أرتاح

آدم همس جنب ودنها : أنا راحتى واماني في
حضنك أنتى ، خلينا نروح أحسن ، انا مخنوق هنا
سولاف قامت ومسكت ايده : ماشي تعالا نروح
دولت : ضحك عليكى بكلمتين يا هبله ؟

آدم قام : اه ضحكت عليها ، أنا همشي عايزة تخليكي
براحتك

دولت طبطبت علي كتفه : ماشي يا حبيبي وابقى
طمني عليك لما تروح
آدم : ماشي يا دولي

بص لمروان : خلي بالك منها يا مروان بالله عليك

مروان : ماتقلش عليها دي حبييتي دي

آدم بصله باستغراب : وده من امتي ؟

مروان : من فترة وعلى فكرة أنا ليا فيها زيك وداده
هند كمان

آدم : نعم يا بابا بتقول ايه ؟ لا معلش هند دي خط
أحمر

دولت ضحكت : يالهوي عليك يا آدم مش ممكن
كده

آدم بجديه : أنا بتكلم جد على فكره ، هند دي أمي أنا
خليه يروح هو لامه اما هند لا

مروان: قول اللي أنت عايزة براحتك عموما أنا اللي
عايش معاهم في بيت واحد

آدم بصله شوية بصمت ومسك أيد سولاف : يلا بينا
يا سولاف أنا مش قادر اقف أكثر

سولاف بصتله بلهفة وشدت على ايده جامد كأنها
عايزة تحطه جوه قلبها عشان تتأكد أن مافيش حاجة
تانية هتأذيه ابدأ

آدم مشي مع سولاف ، وجسار بص لمروان : اسمع
كويس يالا انت اللي هقوله وأنا مش هقول كده عشان
مدايق منك لأنني لو اتعاملت معاك بمشاعري أنا
همسكك افرمك في ايدي ، اللي حصل ده ياريت
ماتكرر هوش تاني حتى لو كنت بتهزر ، انت مش
عارف قيمة هند عند آدم ومعنى كلامك ده إنك عايز
تاخدها منه وده اللي مش هيحصل ابدا
دولت اتدخلت بسرعه : جسار يا حبيبي هو أكيد مش
قصده كده

جسار : ماليش دعوة بقصده يا نانا أنا ليا باللي وصل
لآدم ، وخلينا نتكلم بصراحة آدم قلبه أبيض وكان
دايما بيدافع عنه وعداله كل اللي عمله زمان
وبيتعامل معاه على ان مافيش حاجة حصلت واكيد
هيعدي اللي حصل ده دلوقتي بس أنا لا ، أنا مش
بحب الولد ده أو بمعنى أصح بكرهه وبكره كل واحد
اذى آدم في يوم ومش هتردد لحظة ازيحه من قدام
آدم لو حسيت إنه هياذيه تاني فياريت تفهميه النقطة
دي

أخذ بعضه وطلع بسرعة على بره عشان يلحق آدم
ودولت بصت لمروان اللي بصلها واتكلم بحزن : أنا

ماكنش قصدي كل ده بس الظاهر إنهم مستحيل
يتقبلوني

دولت : حبيبي ماتقولش كده ، جيسار قالك أهو آدم
نسى اللي حصل خلاص بس هو مضغوط جامد
دلوقتي وأنت شوفت بعينك حصله ايه من كتر التعب
فاديله وقته، أما جيسار هو ده طبعه مترابي كده بيشك
في ضله ومش سهل ابدا تعرف تتعامل معاه ، أنا
وهند اخدنا سنين لحد ما عرف ياخذ علينا فواحدة
واحدة وكله هيتحل بإذن الله

مروان هز دماغه بفهم ودولت : تعالا بقى نشوف
كمال ونروح

على الناحية الثانية

جيسار طلع من المستشفى بسرعة وركب عربية آدم
: سوري اتأخرت

آدم كان نايم على صدر سولاف وقام أول ما جيسار
ركب : أنت كنت بتعمل ايه كل ده ؟

جيسار حط ايده في شعره : أنا؟؟ اناااا

آدم : هتكذب ؟

جسار بصله : لا ، كنت بهزأ ابن عمك اللطخ ده
 آدم بتعب : يا جسار حرام عليك والله تعبتني ،
 ماتسيب الولد في حالة هو فيه اللي مكفيه هو كمان
 وفوق دماغه جبال هموم

جسار : أنت غبي أوي على فكرة

بص قدامه : عموما أنا ماعملتش حاجة بس حطيت
 النقط على الحروف عشان التعامل يبقى واضح
 قدامه

شغل العربية وربط حزام الأمان : وأنت حر بقى
 بدأ يسوق و آدم اتتهد بعنف : ماشي يا جسار
 آدم نام و حط دماغه على رجلين سولاف و غمض
 عينيه وراح في النوم فعلا وهي بتطبطب على شعره
 بهدوء طول الطريق

عدت الأيام والاسابيع واتحكم على فريال و عاصم
 بالمؤبد و فريال ماقدرتش تستحمل قاعده السجن
 فانتحرت ، خسرت دنيتها و اخرتها كمان ، و تمارا

انهارت لما عرفت الخبر ده ودخلت المستشفى لكذا
اسبوع بس وجود مروان و آدم وسولاف حوليها
خفف عنها شويه وكمان دولت و هند كانوا بياخدوا
بالهم منها أكثر

أما لوجين فهي اتصدمت لما عرفت كل اللي حصل
، هي أي نعم ماكانتش مرتبطة بفريال زي تمارا بس
هي في الآخر مامتها ، بس وجود لؤي ومامته جنبها
خفف عنها كثير

كمال طلع من المستشفى ورجع القصر ، قانونيا هو
ماملش اي جريمة فعشان كده ماتحكّمش عليه بس
عقابه كان بعد آدم عنه ورفضه إنه يسامحه ، طول
الوقت قاعد في اوضته وحيد وشارد

بسبب كل الشوشرة دي سمعة العيلة اتهزت جامد
وخسرت كثير ، الشركة مروان هو اللي ماسكها
لوحده و آدم شايل ايده منها خالص ، الضغط صعب
جدا عليه بس هو بيحاول وتمارا بدأت تفوق وتنزل
معاه بتحاول تساعده وتدعمه

مطاعم آدم خسرت كثير برضه لدرجة إنه اضطر
يقفل كذا فرع بس ماكانش فارق معاه طلا ما هو في
حزن حبيته و عايش بهدوء وسلام وبيستعد لطفاته
اللي قربت خلاص تيجي تنور حياتهم

إياس خطب فرح بعد مده من الاحداث دي وبسبب
حياته وشغله قاعد في ايطاليا بس بيكلمها كثير جدا
في الفون

لوجين رجعت تعيش في القصر لفترة مع لؤي عشان
تبقى مع تمارا ويتقوا ببعض في الفترة الصعبة دي

الصبح بدري أوي سولاف كانت نايمه بتعب وبتتقلب
بصعوبة بسبب بطنها الكبيرة لحد ما قعدت بوجع
جامد في بطنها وظهرها ودموعها بدأت تنزل
غصب عنها من الوجع
نادت على آدم بصوت ضعيف : آدم

آدم كان قاعد بره وماسمعهاش فاخذت نفس طويل
ونادت عليه تاني : آدم ، أنت فين ؟

ادم جه على صوتها بخضة : ايه يا حبيبي مالك ؟
سولاف مسكت في هدومه : انا شكلي بولد ، ااه ،
آدم أنا شكلي بولد بجد

آدم : طيب أعمل ايه أعمل ايه ؟ اتنفسي براحه هاه
قام بتوتر ولخبطه مش عارف يعمل ايه ولا ايه ،
ساعدها تلبس وجاب شنطتها : هتعرفي تمشي ولا
ايه ؟

سولاف بوجع : مش قادره مش قادره يا آدم
آدم ساعدها تقوم براحه ونزل بيها لتحت وواحد من
رجالته اخذ الشنطه منه حطها في العربية وساق
بسرعة على المستشفى وادم ماسك ايد سولاف جامد
وبيرن على دكتورتها يبلغها

بعد وقت آدم كان واقف مع الدكتورة : ولاده فعلا
آدم : إزاي أنتي قولتي لسه كمان اسبوع أو أكثر ؟
الدكتورة : أنا قولت كده فعلا هو ده كان وقت
تقريبي بس هي لازم تولد دلوقتي

آدم هز دماغه بفهم : ماشي يا دكتورة بس أنتي
متأكدة إنها هتكون كويسه ؟

الدكتورة بابتسامة : ماتقلقش ان شاء الله خير

عدى الوقت و آدم قاعد بره قدام غرفة العمليات بتوتر
وقلق وبيدعي ربنا ، بعد فترة سمع صرخة الطفلة
فنزل سجد شكر لله وأبتسم ، وبعد فتره كمان خرجت
الدكتوره ومعها الممرضة اللي شايله الطفله
وسلمتها لآدم اللي ايديه بترتجف جامد

بصلها وشاف ملامحها الجميلة وأبتسم بحب واذن
في ودنها وباسها واخذها في حضنه ، شوية كمان
والممرضات خرجوا بالترولي اللي عليها سولاف
وودوها لاوضتها

بعد وقت سولاف فتحت عينيها وهي لسه نص واعية

من التعب : آدم

آدم قرب منها بسرعة ومسك ايدها : حبيبي أنا هنا

أهو

سولاف بصتله : بنتنا فين ؟

آدم أبتسم وراح جابها ونيمها جنبها : شوفي يا حبيبيتي
، بنت قمر ما شاء الله زي ابوها

سولاف كشرت وبصتله : هي مش بتبقى بنت قمر
زي امها ؟

آدم : أنتي شايفه نفسك قمر ؟

سولاف بغیظ : آدم

آدم ضحك جامد وباس خدها بحب : أنتي شمس يا
حبيبيتي شمس بتتور حياتي ودنييتي

سولاف أبتسمت بحب ورضا وفتحت دراعتها وهو
حضانها وهمس جنب ودنها : عارفه ان بنات العيلة
كلهم في الأوضة وبيتفرجوا علينا دلوقتي ؟

.

سولاف شهقت بتفاجئ وضربته على كتافه وخبث
وشها بين ايديها باحراج وادم واقف بيضحك جامد
عليها

هند : قولتلها ايه يا جزمه ؟

آدم : أنا !! وهو أنا بقول حاجة ؟ ده أنا حد طيب
خالص

كلهم ضحكوا و هند راحت باست سولاف ومسكت
ايدها : اخيرا ربنا عوضك وتمم عليكي جبرة ، زوج
وأهل وبيت ونونو صغير

سولاف دموعها نزلت وحضنتها بضعف : الحمد لله
يا ماما الحمد لله ، أنا بجد عايزة اشكرك جدا على
كل حاجة ، لولاكي ما عرفش كنت عملت ايه ؟ ربنا
يديك نعمة في حياتي

آدم كشر بتذمر : ايه ده طيب وأنا ؟

سولاف بصتله بحب : أنت معجزتي

آدم أبتسم وبص لكل الموجودين: أنا بقول الجو حرر
كده شويه اطلعوا شموا هوا بره يلا

كلهم ضحكوا ودولت : انت لسه فيك العادة دي ؟

آدم : أي نعم

كلهم راحوا سلموا على سولاف وباركولها وجسار
استأذن ودخل بارك لسولاف وراح بارك لآدم
وحضنه وهمسله بحاجة وبصله وأبتسم وهو أبتسم
وحضنه جامد : ألف مبروك يا حبيبي

بص لكل : يا جماعة ، جسار حب يخلي الفرحة
اتنين ويفرحنا بحمل المدام

كلهم بصوا لريم اللي أبتسمت وباركولها هي كمان
 ودعولها ربنا يتملها على خير
 كل واحد رجع على بيته ومشاغله وسابوا آدم مع
 سولاف لوحدهم

آدم قفل الباب وراهم وراح قعد جنب سولاف في
 سريرها والطفلة نائمة بينهم بهدوء

سولاف بصت لآدم : بحبك

آدم : أكيد مش أكثر مني

حط جبينه على جبينها : قوليلي يا سولاف مبسوطه
 معايا ؟ هل في يوم ندمتي إنك اتجوزتيني ؟

سولاف هزت دماغها برفض : ابدأ ، عمري ماندمت
 للحظه أني اتجوزتك يا آدم ، أنا بحمد ربنا كل يوم
 وكل ثانية إنه رزقني بيك

بصت على بنتهم : ودي ثمرة حبنا لبعض ربنا
 عوضني بيها

آدم : هتسميها ايه ؟

سولاف بصتله : أنت سميها

آدم : اممممم

أبتسم : دلال ، دلال آدم ، دي هتبقى دلوعتي

سولاف كشرت بطفولة : وأنا يا آدم ؟

آدم أبتسم وباس خدها بلطف: أنتى معجزتي، حبيبتى
وشريكة حياتي، بنتي الأولى ودلوعة قلبي ، أنتى كل
حاجة في حياتي يا سولاف

سولاف بصتله بحب : وأنت كل ما ليا يا آدم ،
عوضتني عن كل اللي خسرتة السنين اللي عدت ،
كنت ليا امان الأب وحنية الام وحب الزوج واخيرا
أبو طفلي ، أنا لو قعدت اوصفلك مشاعري ناحيتك
سنة مش هيكفي ، بس ممكن أخص كل ده في جملة
، أنت حياتي كلها يا آدم ، بحبك يا أعظم راجل في
الدنيا

قربت منه بارهاق وباست جبينه بتقدير ودخلت في
حضنه بحب هو شاركها فيه وبصوا في عيون
بعض

دلال صحيت وبدأت تعيط وسولاف اخذتها في
حضنها وضمتهما بهدوء ورهبة أول طفل وبصت
لآدم : أعمل ايه ؟

آدم رفع كتافه ماعرفش وبص شوية لدلال

سولاف : حساها جعانه

آدم بص على وشها دلال : فكرتيني صحيح الدكتور
كانت قايلالي إنها هتحتاج ترضع لما تصحى ، بس
أنتى عرفتي منين ؟

سولاف : ماعرفش أنا حاسه كده ، أجرب ؟

آدم : جربي

.

سولاف بدأت ترضعها وهي فعلا سكتت وفضلت
ترضع بهدوء وسولاف بصت لآدم وأبتسمت وهو
ضمها ليه بحب والاتنين فضلوا يبصوا على دلال
اللي كان شكلها لطيف جدا

مرت الأيام وآدم وسولاف عايشين حياتهم الجميلة
مع دلال اللي ملت ايامهم بهجة أكثر ودوشه ، وآدم
لسه ماصفاش من ناحية باباه ومش عارف هيتقبل
كل ده إزاي

.

مروان و تمارا اتجوزوا ومكملين طريقهم مع بعض
 باحترام وحب ومع بعض بدأوا يوقفوا الشركة تاني
 على رجليها وبدأ الناس ينسوا واسم العيلة يرجع
 لهيبته تاني

حتى آدم شغله بدأ يتحسن تاني وسلسلته رجعت
 لمكانتها زي الأول

ومروان اكتشف أخيرا ان في حاجات مختلفه بينه
 وبين آدم ، زي شغل الشركة اللي هو بيسلك فيه بكل
 ذكاء في حين آدم بيحتاس فيه فسايبله الشركه هو
 يديرها بمعرفته

وكم ان آدم ومروان بدأوا ياخدوا على بعض اكثر
 وعلاقتهم اتحسننت تاني وبقوا زي الاخوات

إياس وفرح اتجوزوا هما كمان اخيرا وفرح سافرت
 معاه ايطاليا وبينزلوا كل فترة والتانية يزوروا اهلهم
 ، واياس مبسوط جدا بدلع فرح عليه اللي أول مرة
 يشوفه منها والحب اللي كان نفسه يعيشه هي بتعيشه
 في أضعاف اضعافه

ريم ولدت طفلها اخيرا بعد تعب وسمته ابياد وجسار
طاير بيه طير ومش مصدق إنه اخيرا بقي عنده بيته
الصغير المسؤول منه

حياته كانت ماشية بهدوء وحب ومش مدايقه غير
وجود مروان وتمارا حولين آدم بس بيحاول بتقبلهم
عشان خاطره

أما لوجين فعاشه حياتها البريئة مع لؤي بسعادة
وفرق معاها وجود سوسن مامت لؤي اللي بتعاملها
أحسن من مامتها وبتخلي بالها منها زي بنتها وكمان
هي وجنة بقوا أصحاب أوي ومجننين لؤي معاهم
بشقاوتهم

« [بعد مرور سنة في قصر الهارون] »

أجواء لطيفة بتغلف جنينة القصر الضخمه ، الأنوار
في كل مكان وترابيزات وكراسي متزينه بالقماش

الوردي الرقيق والبلالين الهيليوم في كل مكان ، في
عدد بسيط من الناس والضحكات السعيده بتملى
المكان ، عدى سنة على ولادة دلال آدم هارون

آدم رحب بكل الموجودين واتكلم معاهم شوية وبعدها
راح وقف ورا الكرسي المتحرك بتاع باباه اللي قاعد
لوحده قدام البسين بعيد عن الناس

آدم : ايه مش عايز تشوف بنتي ؟ دي كملت السنة
وأنت ماشفتهاش ولا مرة

كمال جسمه كله قشعر وبصله وعينيه بتلمع بالدموع
، دي كانت أول مرة آدم يكلمه من ساعة اللي حصل
في المستشفى ، ماكانش مصدق إنه اللي جاي يكلمه
ولا كمان عايزة يشوف بنته اللي ماسمحلهاش ولا
مرة يشوفها كأنه بيحرمه منها زي ما هو عمل معاه
زمان وحرمه من امته

آدم كان شايل دلال على دراعه نزل بركبته براحه
على الارض وحطها على رجليه : دلال آدم
سكت شوية بتردد وكمل بصوت مبجوح وهو
بيبصله : كمال هارون

كمال دموعه نزلت وشد آدم عليه براحه وحضنه :
 حقك عليا يابني، سامحني يا غالي حقك عليا
 آدم مسح دموعه بسرعه وطببطب على ظهر كمال
 بهدوء وبعد عنه : سلم على حفيدتك
 كمال بص على دلال اللي كانت جميلة جدا وشالها
 براحة وافتكر أول مرة شال آدم فيها ودموعه على
 خده مش قادر يوقفها

آدم كان قاعد بيبيص عليه ، هو فعلا ندم على اللي
 عمله زمان بس لسه قلب آدم مش قادر ينسي كل
 حاجة ، غمض عينيه وهو بيتكلم جوا نفسه :
 ماتقلقش كله هيتصلح كفاية قسوة لحد كده يا
 آدم

فتح عينيه واخذ نفس طويل وبص لكمال شوية وهو
 بيلاعب دلال اللي باين عليها حبته وأبتسم ، وقام
 وقف ورا الكرسي وبدأ يزقه

كمال بصله : انت رايح فين ؟

آدم : الحفلة اللي هناك دي أنا مش عاملها عشان
 تقعد لوحداك كده ، أنت _____

بلع ريقه بصعوبه: أنت جد دلال ولازم تكون موجود
معاها في حفلة زي دي

كمال أبتسم وضم دلال بهدوء وأدم راح وقف
الكرسي عند الترابيزة اللي عليها دولت وهي بصت
لكمال اللي شايل دلال وبصت لأدم اللي بصلها شوية
وأبتسم كأنه بيقولها كفاية وجع لحد كده وخلينا نعيش
الباقي من عمرنا في هدوء

آدم بعت لدولت بوسه في الهوا وهي أبتسمتله
وبصت لكمال وبدأت تتكلم معاه وتلاعب دلال هي
كمان

آدم انسحب بهدوء وراح وقف جنب سولاف اللي
عينيها مانزلتش من عليه طول الوقت : انا حقيقي
فخورة بيك يا آدم

آدم بصلها : وده يكفيني يا سولي
سكت شويه : انا محضرك حاجة حلوة أوي
سولاف : هو في حاجة حلوة أكثر من اني اصحى
كل يوم الصبح الاقايك جنبي ؟
آدم بلع ريقه : اه في ، أنتى أحلى من كل ده

قرب من وشها أوي وهي أبتسمت وحطت ايديها
على صدره : حبيبي الناس بيصوا علينا هتعمل ايه
؟

آدم بص بطرف عينه على المعازيم اللي مركزين
معاهم أوي وأبتسم وباس جبينها: ولا حاجة ، أنا مش
هعمل الااي حاجة خالص

سولاف ضحكت : والله ؟

آدم كمل كلامه : دلوقتي ، أنتي فهمتي ايه ؟ هو
دلوقتي بس

سولاف أبتسمت وهو بص على حد : أهو وصل

.

سولاف بصت مكان مايبص كان معاذ ومعاه اسرته
راحوا سلموا عليهم وبعد شوية كلام آدم بص
لسولاف : قولتلك مجهلك حاجة ؟

سولاف : اه

آدم : فاكراه المستشفى اللي اتكلمنا عليها قبل كده ؟

سولاف أبتسمت أوي : أوعى تقول إنك__

آدم هز دماغه بتأكيد وابتسامه : خلصت شغل فيها
ومعاذ ساعدني بما إنه دكتور ويفهم في أمور الطب

دي ، المستشفى باسمك ومديرها معاذ ، مستشفى
الحنان ، ودي هديتي ليكي يا أجمل مامي في
الدنيا

سولاف عينيها اتملت بالدموع وهي بتبصله وهمست
بصوت خافت : حنان ؟

آدم أبتسم ومسك وشها بين ايديها : ماتعيطيش
سولاف بحب : أنا مش عارفه بجد هحك أكثر من
كده ايه ، أنت دائما بتعمل الحاجات اللي بتفرح قلبي
ودايما بتهاديني بحاجات حلوة أوي عمري ما تخيلت
في يوم حد يهاديني بيها ، في حين أنا مش بعمل
كده

آدم : وأنا مش عايز منك اي هدايا ، أنتى هي هديتي
واكبر هدية في حياتي ، وجودك جنبي بس بيفرح
قلبي ، نومي في حضنك كل يوم ده بيرحني ويخليني
مش عايز حاجة تانية من الدنيا دي ، فأنا مش عايز
منك حاجة غير إنك تفضلني جنبي وتنوري حياتي
بوجودك معايا وبس يا سولاف

بصوا في عيون بعض بحب وقالوا في نفس الوقت :
معجزتي

شيلتني على راسك وفي عينك ، وارتحت معاك كتر
خيرك

ولا يملى عنيا ما بين الناس ، ولا يدخل قلبي راجل
غيرك

الواحدة هتطلب إيه غير بيت فيه راجل عارف
يفهمها !

وأنا كل ما احتجت أتكلم تسمعي بالساعة والأتنين
وإن أنت لو لفيت الدنيا كنت ألقى في طبك تاني
منين؟

سيد الرجالة ونن العين

وإن كنت زمان أنا مش حباك ، فأنت حنين وأنا
حبيتك

وإن كنت زمان أنا مش عايزاك ، دلوقتي سعيده وأنا
في بيتك

مش سهل الواحد يلقى ونيس ربنا حبني خلاني لقيتك

بعنيك شفت الأيام تتعاش

في واحدة الراجل يحييها وفي راجل ثاني يبيعها
بلاش

الونس "فارس قطرية"

تمت بحمد الله

يوم ٢٠٢٣/١٢/٢١ م

٨ جمادي الآخرة ١٤٤٥ هـ

وبكده تكون رحلتنا انتهت مع رواية معجزتي ،
يارب تكون عجبتم وماكانش فيها أي شئ يضايق

أراكم في رواية جديدة بإذن الله
مع تحياتي / مريم محمد عبد القادر
#ميمووو

روايات مريم محمد عبد القادر